

Jág₁ Dse₃ quió'₅ Diú₄ a₂ca₂tó'₂ San Mateo ne₄ Si₂

Dsa₂ can'₅₄ quián₅ Jesucristo i₂jme₁chan₂ ma₂líg'₂
(Lucas 3:23-38)

1 ¹ A₂la₂ bá₄ caun₂ lista ja₁le₁ton₅ dsa₂ can'₅₄ quián₅ Jesucristo
i₂jme₁lín₄ tsi₁jon₂ quián₅ David^a quian'₅₄ Abraham.

² Abraham ca₂lin₃ jmei₂ Isaac,

Isaac guë'₂ ca₂lin₃ jmei₂ Jacob;

Jacob guë'₂ ca₂lin₃ jmei₂ Judá quian'₅₄ riin'₅₄.

³ Judá guë'₂ né₃ ca₂lin₃ jmei₂ Fares quian'₅₄ Zara

të₂le₃ quian'₅₄ Tamar.

Fares guë'₂ ca₂lin₃ jmei₂ Esrom;

Esrom guë'₂ ca₂lin₃ jmei₂ Aram.

⁴ Aram guë'₂ ca₂lin₃ jmei₂ Aminadab;

Aminadab guë'₂ ca₂lin₃ jmei₂ Na'asón;

Na'asón guë'₂ ca₂lin₃ jmei₂ Salmón;

⁵ Salmón guë'₂ ca₂lin₃ jmei₂ Bo'oz

të₂le₃ quian'₅₄ Rahab.

Bo'oz guë'₂ ca₂lin₃ jmei₂ Obed

të₂le₃ quian'₅₄ Ruth.

Obed guë'₂ ca₂lin₃ jmei₂ Isaí;

⁶ Isaí guë'₂ ca₂lin₃ jmei₂ Rag₅₄ David.

Rag₅₄ David guë'₂ né₃ ca₂lin₃ jmei₂ Salomón,

(të₂le₃ quian'₅₄ i₂jme₁lín₄ dsa₂ mí₂

quián₅ Urías le₂jñiá₅).

⁷ Salomón guë'₂ ca₂lin₃ jmei₂ Roboam;

Roboam guë'₂ ca₂lin₃ jmei₂ Abías;

Abías guë'₂ ca₂lin₃ jmei₂ Asa;

⁸ Asa guë'₂ ca₂lin₃ jmei₂ Josafat;

Josafat guë'₂ ca₂lin₃ jmei₂ Joram;

Joram guë'₂ ca₂lin₃ jmei₂ Usías;

⁹ Usías guë'₂ ca₂lin₃ jmei₂ Jotam;

Jotam guë'₂ ca₂lin₃ jmei₂ Acáz;

Acáz guë'₂ ca₂lin₃ jmei₂ Ezequías;

¹⁰ Ezequías guë'₂ ca₂lin₃ jmei₂ Manasés;

Manasés guë'₂ ca₂lin₃ jmei₂ Amón;

Amón guë'₂ ca₂lin₃ jmei₂ Josías;

¹¹ Josías guë'₂ ca₂lin₃ jmei₂ Jeconías quian'₅₄ riin'₅₄,

(lia'₂ con'₂ jmig₄ jme₁ca₂i₃lén₂ dsa₂ israelitas

^a1 Rag₅₄ David i₂ca₂rë₃chán₃ con'₂ co₂mei₅ ñi₂ né₃ a₂ca₂rë₃chán₃ Jesús.

- a₂ca₂tág₃ dsa₂ jui₅ 'uë₃ Babilonia).
- ¹² Cang₂ jme₁ma₂tág₃ dsa₂ 'uë₃ Babilonia jaun₂,
ca₂lin₃ Jeconías jmei₂ Salatiel;
i₂ca₂lin₃ jmei₂ Zorobabel;
- ¹³ Zorobabel né₃ ca₂lin₃ jmei₂ Abiud;
Abiud guë'₂ ca₂lin₃ jmei₂ Eliaquim;
Eliaquim guë'₂ ca₂lin₃ jmei₂ Azor;
- ¹⁴ Azor né₃ ca₂lin₃ jmei₂ Sadoc;
Sadoc guë'₂ ca₂lin₃ jmei₂ Aquim;
Aquim guë'₂ ca₂lin₃ jmei₂ Eliud;
- ¹⁵ Eliud guë'₂ ca₂lin₃ jmei₂ Eleazar,
i₂ca₂lin₃ jmei₂ Matán;
Matán guë'₂ ca₂lin₃ jmei₂ Jacob;
- ¹⁶ Jacob né₃ ca₂lin₃ jmei₂ José, dsi₂i₂gu₂ María;
María guë'₂ né₃ ca₂lin₃ chog₅₄ Jesús
i₂té'₂ dsa₂ Cristo.
- ¹⁷ Jaun₂ né₃, con'₂ guia₃-quén₂ tsi₁jon₂ dsa₂ ca₂ñí₂ ca₂le₃ jme₁chan₂
Abraham ca₂të₂ jmi₄g₄ jme₁ca₂rë₃chán₃ David, ján₃ bá₄ le₂jaun₂ guia₃-
quén₂ tsi₁jon₂ dsa₂ ca₂ñí₂ ca₂le₃ jme₁chan₂ David, ca₂të₂ jmi₄g₄
jme₁ca₂tág₃ dsa₂ dsa₂ israelitas jui₅ 'uë₃ Babilonia; cang₂ jaun₂ gué₄ né₃,
con'₂ guia₃-quén₂ tsi₁jon₂ dsa₂ ca₂ñí₂ ca₂le₃ ca₂tág₃ dsa₂, ca₂të₂ jmi₄g₄
jme₁ca₂rë₃chán₃ dsa₂ I₂rë₂'ín₁ quián₅ Diú₄.^b

'A₂ lia'₂ ca₂lë₃ a₂ca₂rë₃chán₃ Jesús

(Lucas 2:1-7)

- ¹⁸ Le₂la₂ bá₄ ca₂lë₃ a₂ca₂rë₃chán₃ Jesús: chog₅₄ jme₁chen₂ María
jme₁ma₂li'₅₄ jág₁ a₂jéin'₂ gu₂ quian'₅₄ José; la₁ né'₃ gué₄ a₂tiaín'₃, María
né₃ ca₂can₃ guein₂ të₂le₃ quian'₅₄ jui₅bí₂ quió'₅ Jme₂dsí₂ Jñi₅ó₅. ¹⁹ José
dsa₂ ñe'₂ quiáin₅ né₃ jme₁lín₄ jan₂ dsa₂ dsen₃, jaun₂ tsá₃ jme₁'nio₃
chein'₃ o₂guí'₃ María jua'₅₄ le₃ñi₅ dsa₂ juín₅; jñia'₅₄ lia'₂ a₂jaun₂ bá₄
jme₁dsi₂jio₅ dsí₅ a₂jme₁téi₂ bá₄ con'₂ tsá₃ 'ein₂ ñi₅. ²⁰ Le₂jaun₂ bá₄
jme₁ma₂ca₂'náu'₃ dsí₅ jmo₃, jme₁ca₂qui₃ a₂ca₂jme₃jnia₅ jan₂ ángel quián₅
Te₁gui'₅₄ ne₅₄ ca₂juá'₂:
—Sé₄, tsi₁jon₂ David, tsá₃ lë₁jmo₂ gang'₃ jua'₅₄ cán'₁ o₂guí'₃ a₂guéng'₄
María a₂lén₂ dsi₂i₂gog'₂, ia₁ guein₂ i₂le₃chan₂ quiáin₅ já₅ ja₁con₂
Jme₂dsí₂ Jñi₅ó₅. ²¹ Jaun₂ le₃chan₂ jan₂ guein₂ dsa₂ ñe'₂ quiáin₅, jaun₂
quian'₅₄ 'ne₂ JESÚS.^c Le₃chein₂ le₂në₅ ia₁ a₂lióin₂ dsa₂ juig₂ quiáin₅
'uig₅₄ dsáu₁.

^b16,17 Co₂rë₂ bá₄ jein₅ jág₁ “Cristo” quian'₅₄ “I₂rë₂'ín₁ quián₅ Diú₄.” Quian'₅₄ jág₁ jmei₅
hebreo guë'₂ tág₃ juá'₂ dsa₂ Meshíaj: “Mesías” quian'₅₄ jág₁ ñi'₅₄.

^c21 Lia'₂ chen₂ Jesús (hebreo: Yeshua) jein₅ jág₁: Lió₂ bá₄ Te₁gui'₅₄.

²² Ca₂lë₃ ca₂le₃jé₃ a₂në₅ ia₁jaun₂ le₃ti₃ jui₁lia'₂ ca₂juá'₂ Te₁gui'₅₄ të₂le₃ quian'₅₄ dsa₂ i₂jme₁'ë₂ jág₁ quiáin₅, jme₁ca₂juá'₂:

²³ Cán₂ jan₂ dsa₂ mi₄ guein₂,

jaun₂ le₃chan₂ jan₂ guein₂ dsa₂ ñe'₂ quiáin₅,

jaun₂ le₃chein₂ Emanuel,^d

co₂'nió'₄ a₂juá'₂: Quiong'₅₄ Diú₄ jniog₄.

²⁴ Jaun₂ jme₁ca₂ñé₃ Sé₄ a₂jme₁rë₂güín₃ jaun₂, le₂jaun₂ bá₄ ca₂jmo₃ lia'₂ con'₂ lé₅ ca₂juá'₂ ángel quián₅ Te₁gui'₅₄, jaun₂ ca₂guein₃ bá₄ María a₂lén₂ 'éi₂ dsi₂i₂gu₂. ²⁵ La₁ia₁ tsá₃ ca₂tiáin'₂ dsi₂jui₅ jme₁né₄, jua'₅₄ a₂ca₂rë₃cuin₂₃ riin'₅₄, ca₂lia'₂ jme₁ca₂rë₃chán₃ guein₂ i₂le₂'uig₅₄ 'éi₂ quián₅ bá₄ María; jaun₂ ca₂quiain₃ guein₂ Jesús.

Ca₂o₃lén₂ dsa₂ can'₅₄ i₂dsi₂ jág₁

2 ¹ Ca₂rë₃chán₃ Jesús jë₄ juig₂ Belén, ja₁tén₄ 'uë₃ Judea, jmi₄g₄ lia'₂ con'₂ jme₁lín₄ Herodes rag₅₄ 'uë₃ jaun₂. Jaun₂ ca₂o₃lén₂ co₂nió'₃ dsa₂ i₂chan₂ uing₂ të₂le₃ ja₁'ia₂^e 'iog₂, jaun₂ ca₂dsi₃lén₂ juig₂ Jerusalén.

² Jaun₂ ca₂ñag₃:

—¿Na₅ Rag₅₄ quián₅ dsa₂ judíos i₂ca₂rë₃chán₃? Ia₁ 'uë₃ të₂le₃ ja₁'ña₂ 'iog₂, ma₂në₂jín₄ jnia'₅₄ nei₅ quiáin₅, jaun₂ ja₂náu₅ jnia'₅₄ a₂jme₁juin'₂.

³ Jme₁ca₂rë₃ñi₅ Rag₅₄ Herodes jág₁ në₅, 'ñio₅ lín₃ tsá₃ ma₃tei₄ ca₂'ág₂ dsí₅, ján₃ bá₄ le₂jaun₂ ca₂le₃jín₃ dsa₂ juig₂ Jerusalén. ⁴ Jaun₂ në₃ ca₂té'₃ rag₅₄ ca₂le₃jín₃ juig₅₄ jme₂dsa₂ quian'₅₄ ca₂le₃jín₃ të₅juá'₅ quián₅ dsa₂, jaun₂ ca₂ñag₃ a₂já'₄ dsón'₂ lé₅ jág₁ le₃chan₂ dsa₂ I₂rë₂'ín₁ quián₅ Diú₄.

⁵ Jaun₂ ca₂juá'₂ dsa₂ 'éi₂:

—Juig₂ Belén, ja₁tén₄ 'uë₃ Judea. Ia₁ le₂la₂ ca₂tó'₂ ne₄ si₂ dsa₂ i₂jme₁'ë₂ jág₁ o₄quió'₄ Diú₄:

⁶ Jaun₂ 'ne₂, Belén, juig₂ tén₅ 'uë₃ Judá,

on₃jua'₅₄ 'ne₂ líng'₅ juig₂ i₂me'₂ gué₄

të₂le₃ ne₄ jui₁lia'₂ dsa₂ i₂qui₂dsi₅ 'éi'₃ 'uë₃ në₅;

ia₁ ja₁con'₂ 'ne₂ bá₄ o₃'ín₅ jan₂

i₂gon₂, cán₂ ne₄ jui₅,

jmo₃ 'í₁ dsa₂ juig₂ Israel quiáng₃.^f

⁷ Jaun₂ Herodes në₃ ca₂té'₃ dsa₂ can'₅₄ 'éi₂ con'₂ jë₄ të₃co'₅₄, jaun₂ ca₂ñag₃ líg'₂ 'e₂ jmi₄g₄ të₃dsón'₂ ca₂rë₃jniá₂ nei₅ jaun₂. ⁸ Jme₁ma₂në₂ñag₃ dsa₂ 'éi₂ jaun₂ gué₄ ca₂chei₃ jui₅ juig₂ Belén, jaun₂ ca₂tsí'₃ dsa₂:

—O₂nó'₅ 'nia'₂ ja₁jaun₂, o₂quion₂ de'₂ 'nia'₂ 'í₁ rë₂ të₂le₃ quió'₅ chi'₂ bë'₅₄ i₂'ín₅ 'nia'₂ në₅; jaun₂ jë₁ma₂ca₂dsáin'₂ 'nia'₂, i₂con'₄ 'nia'₂ jág₁ ia₁jaun₂ nei₅₄ jniá₂ ján₃ i₂jme₁juin'₂.

^d23 Isaías 7:14.

^e1,7 Co₂'nió'₄ le₃jua'₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio'₂ ja₁ton₅ Salmo 8:3; Romanos 1:25.

^f6 Miqueas 5:2.

⁹ Jme₁ma₂nē₂néi₂ dsa₂ 'éi₂ jág₁ quió'₅ rag₅₄, jaun₂ ca₂i₃lén₂. Jaun₂ né₃, nei₅ a₂ma₂ca₂jág₃a tē₂le₃ 'uē₃ ja₁'ia₂a 'iog₂, ca₂ŋó₃ ne₄ jui₅ quió'₅, ca₂lia'₂ ca₂'ág₂ tei₄ ne₄ ja₁jme₁'en₅₄ guein₂. ¹⁰ Jme₁ca₂jág₃ jaun₂,⁸ ca₂jmo₃ 'io'₂ 'ŋio₅ lín₃; ¹¹ jaun₂ jme₁ca₂i₃toin'₅₄ dsi₂néi₂, ca₂jín₂ guein₂ bē'₅₄ quiaín'₅₄ chog₅₄ i₂chen₂ María. Jaun₂ né₃, ca₂chi₃jné₃ ca₂jme₃juiin'₂ guein₂. Jaun₂ dsi₂jui₅ le₂jaun₂ qui₂ca₂niá₃ tsi₁gu₅ quió'₅, ca₂cuē₃ cu₄nióg₄, chen₂, no'₅₄ mirra né₃. ¹² Cang₂ gué₄ jaun₂ ca₂qui₃ dsa₂ 'éi₂ a₂ca₂jmo₃ Diú₄ jág₁ a₂tsá₃ ma₃dsi₃lein₃ jui₅ ja₁con₂ Rag₅₄ Herodes, jaun₂ jui₅ siá'₂ bá₄ ca₂i₃lein₃ jui₅ go₅₄.

Ca₂cuíng₃ Sé₄ quiaín'₅₄ María jui₅ 'uē₃ Egipto

¹³ Cang₂ gué₄ jaun₂, jme₁ma₂i₂len₃ dsa₂ can'₅₄ 'éi₂, ca₂qui₃ Sé₄ a₂ca₂jme₃jnia₅ jan₂ ángel quián₅ Te₁gui'₅₄ ja₁coin₂, a₂ca₂juá'₂:
—Nau₂, jñia₅ i₂bē'₅₄ quiáng'₂, chog₅₄ né₃, cuíng₅ 'nia'₂ jui₅ 'uē₃ Egipto. Ja₁jaun₂ o₂'ú₅ ca₂lia'₂ ca₂juá'₃ jniá₂. Ia₁ 'nau'₂ Herodes 'nai'₂ guein₂ a₂jñag'₃.

¹⁴ A₂ca₂nau₂ jaun₂ Sé₄, ca₂tág₃ guein₂ quiaín'₅₄ chog₅₄ a₂'uē₂ jaun₂, ca₂i₃lén₂ jui₅ Egipto. ¹⁵ Ja₁jaun₂ ca₂tóin'₂ ca₂lia'₂ ca₂jon₃ Herodes. Ca₂lě₃ le₂nē₅ ia₁jaun₂ le₃ti₃ jág₁ a₂ca₂juá'₂ Te₁gui'₅₄ tē₂le₃ quiaín'₅₄ dsa₂ i₂jme₁'é₂ jág₁ o₄quió'₄, jme₁ca₂juá'₂: “Tē₂ Egipto bá₄ ca₂tě₃ jniá₂ jón₃ quiáng₃.”^h

Jmo₅ Herodes 'éi'₃ a₂jme₃dsiain₂₃ guein₂

¹⁶ Jme₁ca₂rě₃lí'₄ Herodes ca₂jme₃gau₅ dsa₂ can'₅₄ 'éi₂ quió'₅, ca₂rě₃'néi₃ 'ŋio₅ lín₃. Jaun₂ ca₂chein₃ dsa₂ a₂jme₃dsiain₂₃ ca₂le₃jín₃ guein₂ i₂con'₂ ma₂tion'₅₄ tin₃ ŋi₂, guein₂ i₂pí'₁ gué₄ né₃ i₂chan₂ ma₂quián₅ Belén, lia'₂ con'₂ tí₅ ma₂ne₁ŋó₄ jmig₄ a₂ca₂juá'₂ dsa₂ can'₅₄ 'éi₂. ¹⁷ Jaun₂ le₂nē₅ ca₂rě₃ti₃ jág₁ a₂ca₂tó'₂ ne₄ si₂ Jeremías i₂jme₁'é₂ jág₁ o₄quió'₄ Diú₄:

¹⁸ Ca₂né'₂ tē₁tsi'₅₄ co₂mi'₅₄ jē₄ juig₂ Ramá,

a₂'o₅ dsa₂ a₂qui'₂ dsí₅ gué₄ lín₃;

Raquel bá₄ 'éi₂ ca₂'o₃ⁱ

o₄quió'₄ chi'₂-guein₂ quiaín₅,

jaun₂ tsá₃ ca₂gue₃ jua'₅₄ 'ein₂ gué₃ jmo₃ lián'₂ dsí₅,

ia₁ ma₂ca₂dsan₃ bá₄ guein₂.^j

¹⁹ La₁ cang₂ gué₄ jaun₂, jme₁ma₂ca₂jon₃ Herodes, ca₂qui₃ Sé₄ a₂ca₂jme₃jnia₅ táng₃ jan₂ ángel quián₅ Te₁gui'₅₄ ja₁coin₂ 'ein₅₄ Egipto,

²⁰ Ca₂juá'₂ ángel:

⁸7,9,10 Co₂'nió'₄ le₃jua'₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio'₂ ja₁ton₅ Salmo 8:3; Romanos 1:25.

^h15 Oseas 11:1.

ⁱ18 Raquel: 'io₅₄ quián₅ Jacob, Génesis 29.

^j18 Jeremías 31:15.

—Nau₂, jnia₅ táng₃ i₂bè'₅₄ quiáng'₂, chog₅₄ né₃, jaun₂ o₂nó'₅ táng₃
'nia'₂ jui₅ 'uë₃ Israel, ia₁ ma₂ca₂dsan₃ bá₄ i₂jme₁'nio₃ jme₁jñi'₃ guein₂.

²¹ A₂ca₂nau₂ jaun₂ táng₃ Sé₄, ca₂tág₃ chi'₂ quiáin₅, quian'₅₄ chog₅₄, jui₅
'uë₃ Israel. ²² La₁ jme₁ca₂rë₃ñi₅ Sé₄ a₂ma₂lín₅ ta₁ Arquelao 'uë₃ Judea, ta₁
a₂jme₁lín₄ Herodes jmei₂, jaun₂ ca₂rë₃gó'₅ dsó₃ ja₁jaun₂. Ia₁ ca₂'é₂ táng₃
Diú₄ jág₁ jë₄ qui₂₃, jaun₂ jui₅ 'uë₃ Galilea bá₄ ca₂ñó₃. ²³ Jme₁ca₂dsióg₃
ja₁jaun₂, ca₂ñó₃ ca₂i₁gua₂ jui₂ja₁chei₂ Nazaret. Le₂në₅ bá₄ ca₂rë₃ti₃ jág₁
quió'₅ dsa₂ i₂ca₂'é₂ jág₁ quián₅ Diú₄ ma₂líg'₂: “A₂quiong₃ dsa₂ nazareno.”

'É₂ Juan₅₄ jág₁ caun₂ 'uë₃ quein₂ ja₁co₂'ñiog₅

(Marcos 1:1-8; Lucas 3:1-18; Juan 1:19-28)

3 ¹ Jmig₄ jaun₂ guan₃ Juan₅₄ i₂chon₅ dsa₂ jmig₂, caun₂ 'uë₃ quein₂
co₂'ñiog₅ ja₁tén₄ 'uë₃ Judea, a₂'é₂ jág₁, ² a₂juá'₂:

—Jein'₅₄ 'nia'₂ 'au'₂, ia₁ ma₂ja₂quián₃ jmig₄ jë₁gon₃ Diú₄.

³ Juan₅₄ la₂ bá₄ 'éi₂ i₂ca₂'in₃ Isaías i₂jme₁juá'₂ o₄quió'₄ Diú₄ jme₁ca₂tó'₂
ne₄ si₂ a₂juá'₂ le₂la₂:

Né'₂ a₂táun₂ dsa₂ tiá₂ jág₁

caun₂ 'uë₃ quein₂ ja₁co₂'ñiog₅, a₂juá'₂:

“Jmo₄ 'nia'₂ co₂jñia₅₄ jui₅ quió'₅ Te₁gui'₅₄;

nia₄ 'nia'₂ caun₂ jui₅ co₂dsau₅.^k

⁴ Ni₁tsin'₅₄ Juan₅₄ 'éi₂ jme₁lé₄ 'mi'₂ a₂rë₂ta₄ quian'₅₄ jñi₄ já'₂ camello;
a₂jme₁jén'₅ tú'₅ guë'₂ quian'₅₄ lo₄ já'₂; má₃ a₂jme₁guë'₅ guë'₂, jmá'₃ i₁ni'₂
tia₄ quian'₅₄ jmi₁tá'₄ cha₂ ja₁nau₂. ⁵ Jme₁ja₂lén₂ dsa₂ chan₂ Jerusalén,
quian'₅₄ dsa₂ i₂tián'₅ 'uë₃ Judea quian'₅₄ dsa₂ i₂tián'₅ cau₅ Cuá₃ Jordán
né₃, jme₁qui₂ja₂néi₃ jág₁ a₂cuë₅ 'éi₂. ⁶ Jme₁ma₂ca₂lë₃ jmo₂₃ qui₂ñí₃ quió'₅
ne₄ Diú₄ ca₂le₃jé₃ dso₄ a₂qui₂rë₂cáin'₄, jaun₂ guë'₄ ca₂cho₃ Juan₅₄ jmig₂^l
Cuá₃ Jordán.

⁷ La₁ jme₁ca₂jág₃ Juan₅₄ juin₅ lin₃ dsa₂ fariseos ja₂lén₂ quian'₅₄ dsa₂
saduceos né₃, a₂mi₂₃ cho₃ Juan₅₄ jmig₂,^m jaun₂ ca₂juá'₂ Juan₅₄:

—i'Nia'₂ tsi₁jon₂ dsi₂mi'₂! ¿Ein₂ bá₄ në₂chí'₃ 'nia'₂ a₂cuing'₂ long'₅₄
a₂'i₄ 'nei₂ dsí₅ Diú₄ a₂ja₂quián₃? ⁸ Jmo₄ 'nia'₂ jaun₂ jui₁le₂jniá₂ a₂léi₄
të₃dsón'₂ a₂ma₂ca₂jein'₅₄ 'nia'₂ 'au'₂. ⁹ Tsá₃ o₁len'₂ 'nia'₂ jua'₅₄ lé₂
le₃jua'₅₄ 'nia'₂: “Lág₅ jnia'₅₄ tsi₁jon₂ Abraham”; ia₁ jniá₂ juá'₅, ca₂të₂
ni₁cang₁ tio'₅₄ la₂, lé₂ le₃jmo₃ Diú₄ jmói'₂ tsi₁jon₂ Abraham. ¹⁰ Ia₁ ma₂lë₅
co₂jñia₅₄ ñi₁dsi₁ a₂qui₂uín'₂ 'ma₂. Ca₂le₃jé₃ 'ma₂ a₂tsá₃ dse₃ míg₂ 'ag₅,
uín'₂ bá₄, dsi₂to'₅₄ si₂. ¹¹ Jniá₂ né₃, dsau₅ bá₄ në₂tiáng₃ 'nia'₂ jmig₂
co₂'nió'₄ a₂jáng₅ léi₄ a₂jein'₅₄ 'nia'₂ 'au'₂; la₁ i₂já₅ chi₁co'₅₄ quió₃ né₃, 'éi₂
bá₄ i₂'uan'₂ guë'₄ lia'₂ con'₂ guë'₄ jniá₂, ca₂lia'₂ jñia'₅₄ lau₂ ton₅ tag₅₄ bá₄
tsá₃ ca₂tíng₂ i₁quian₃. 'Éi₂ guë'₄ né₃, tióg₂ Jme₂dsí₂ Jñi₅, dsi₂si₂ né₃.

^k3 Isaías 40:3.

^l6 lit. “ca₂tióg₃ Juan₅₄ jmig₂.”

^m7 lit. “tióg₂ Juan₅₄ jmig₂.”

¹² Nē₂jag₄ bá₄ a₂ma₂chi₁chan'₂ ŋí₁ a₂quió'₅ mīg₂ trigo, dsia₃ jma₃quén₅ quian'₅₄ jme₁qui₅. Jmá'₃ mīg₂ bá₄ cág'₃, 'ma₃ dsi₂néi₂, la₁ qui₂dsí'₂ bá₄ jme₁qui₅ dsi₂si₂ ja₁tsá₃ ma₃o₁líg'₂ jmig₄ éi₃.ⁿ

Ca₂ḡó₂ Jesús jmig₂

(Marcos 1:9-11; Lucas 3:21-22)

¹³ Jaun₂ né₃, Jesús, o₂'ín₃ 'uē₃ Galilea, ca₂dsióg₃ tē₂ Cuá₃ Jordán ia₁jaun₂ cho₃ Juan₅₄ jmig₂.^o ¹⁴ Tsá₃ jme₁gue₅ Juan₅₄ le₂'uig₅₄, jaun₂ ca₂juá'₂ tsí'₅ Jesús:

—Jniá₂ bá₄ i₂'nió'₅ quió₃ tsón'₄ 'ne₂ jmig₂.^p ¿'A₂ bá₄ lia'₂ 'ne₂ ŋe'₃ ja₁con₂ jniá₂?

¹⁵ La₁ ca₂juá'₂ Jesús:

—Jui₁le₅₄ bá₄ le₂nē₅ tē₂nē₃, ia₁ dsi₂ten₅₄ de'₂ jmó₁ jniog₄ le₂nē₅ ia₁jaun₂ jme₁ti₁ ca₂le₃jē₃ a₂dse₃.

Jaun₂ bá₄ ca₂gue₃ Juan₅₄.

¹⁶ Jme₁ma₂lē₅ cho₅ Juan₅₄ jmig₂,^q jaun₂ ca₂o₃'ín₃ Jesús dsi₂jmig₂. Jaun₂ dsi₂jui₅ le₂jaun₂ ca₂niá₃ dsi₄ mi₂güí₃ ca₂lē₃, jaun₂ ca₂jín₂ Jesús Jme₂dsí₂ quián₅ Diú₄ ca₂sión₃ ne₄ quió'₅, i₂lín₅ lia'₂ lín₅ jan₂ i₁ju₂.¹⁷ Jaun₂ ca₂né'₂ jág₁ guei'₅₄ a₂ca₂juá'₂:

—I₂la₂ bá₄ jón₃ quiáng₃ i₂ŋí₄ lē₃ 'nióg₃ gué₄ lín₃. 'E₂ bá₄ 'ŋio₂ dsi₃ quian'₅₄.

Ca₂caun₃ i₂sē₃dsen₃ táu₂ quió'₅ Jesús

(Marcos 1:12-13; Lucas 4:1-13)

4 ¹ Dsi₂jui₅ jaun₂ ca₂tē₃ Jme₂dsí₂ quián₅ Diú₄ ca₂té'₃ Jesús caun₂ 'uē₃ quein₂ co₂'ŋiog₅ ia₁jaun₂ ja₁jaun₂ cáun₂ táu₂ i₂sē₃dsen₃.

² Tē₂láu₃ jmig₄ tē₂láu₃ nei₅, ca₂jme₃'ín₅₄ Jesús; cang₂ gué₄ jaun₂ ca₂lē₃ i₁cón'₅ 'ŋio₅ lín₃. ³ Jaun₂ ca₂jme₃quián₃ i₂sē₃dsen₃ ja₁coin₂, a₂cáun₂ táu₂, jaun₂ ca₂juá'₂ tsí'₅ Jesús:

—Chi₂jua'₂ dsón'₂ líng'₅ Ja₁ŋi'₅₄ Diú₄, jmo₄ jui₁le₅₄ i₁ŋí'₄ ni₁cang₁ tio'₅₄ nē₅.

⁴ La₁ ca₂ḡag₃ Jesús:

—Chi₁ton₅ ne₄ Si₂: “On₃jua'₅₄ jmá'₃ quian'₅₄ i₁ŋí'₄ le₃tan₅₄ dsa₂ mi₂güí₃ le₃chain₂, ján₃ bá₄ 'nió'₅ jme₃tan₅₄ dsa₂ quian'₅₄ ca₂le₃jē₃ jág₁ a₂'uē'₂ mi₂'o₄ Diú₄.”^r

ⁿ12 'Nio'₂ ja₁ton₅ Mateo 13:30.

^o13 lit. “ia₁jaun₂ tióg₂ Juan₅₄ jmig₂.”

^p14 lit. “tián'₄ 'ne₂ jmig₂.”

^q16 lit. “tióg₂ Juan₅₄ jmig₂.”

^r4 Deuteronomio 8:3.

⁵ N₃ jaun₂, ca₂jio₃ táng₃ i₂sě₃dsen₃ tē₂ jui₂ Jerusalén ciudad jni₅, jaun₂ ca₂jio₃ tē₂ guei'₅₄ guá'₅ templo ja₁nei₅ 'ŋio₅ lín₃. ⁶ Jaun₂ ca₂juá'₂ ca₂tsí'₃ Jesús:

—Chi₂jua'₂ 'ne₂ líng'₅ Ja₁ni'₅₄ Diú₄, tian'₅₄ ja₁ně₅; ia₁ juá'₂ ne₄ Si₂:

Chen₃ Diú₄ ángeles quiáin₅

ia₁jaun₂ jmo₃ 'í₁;

chó'₂ quian'₅₄ gu₂

ia₁jaun₂ tsá₃ jéng'₂ uig₅ nióg'₃ quian'₅₄ cang₄.^s

⁷ Jaun₂ ca₂ŋag₃ Jesús:

—Ján₃ bá₄ juá'₂ ne₄ Si₂: “Tsá₃ tang'₅₄ Te₁gui'₅₄ Diú₄ quiáng'₂.”^t

⁸ Con'₂ gué₄ siá'₂ táng₃ ca₂jio₃ i₂sě₃dsen₃ jui₅ caun₂ má'₂ ja₁nei₅ 'ŋio₅ lín₃. Jaun₂ ca₂'ě₃ le₃jé₃ jui₂ a₂cha₂ mi₂güig₃ quian'₅₄ ca₂le₃jé₃ a₂jlá'₁ cha₂. ⁹ Jaun₂ ca₂tsí'₃ Jesús:

—Dsia₅₄ jniá₂ gog'₂ 'ne₂ ca₂le₃jé₃ a₂ně₅, ně₁jua'₂ ca₂chi₁jne'₄ ne₃ a₂jme₁juag'₂.

¹⁰ Jaun₂ ně₃ ca₂ŋag₃ Jesús:

—Guan'₂ Satanás, ia₁ ne₄ Si₂ juá'₂: “Jme₁juin'₂ Te₁gui'₅₄ Diú₄ quiáng'₂, jñia'₅₄ lia'₂ ne₄ 'éi₂ bá₄ jme₁ti₁.”^u

¹¹ Jaun₂ ně₃ ca₂ŋá'₃ i₂sě₃dsen₃, jaun₂ ca₂o₃lén₂ ángeles ca₂jme₃ti₃ ta₁ ne₄ Jesús.

Ca₂jme₃lióg₃ Jesús ta₁ quió'₅, 'uě₃ Galilea

(Marcos 1:14-15; Lucas 4:14-15)

¹² Jme₁ca₂rě₃ni₅ Jesús a₂'en₅₄ Juan₅₄ né'₃ 'má₃, jaun₂ ŋó₃ jui₅ 'uě₃ Galilea. ¹³ Tsá₃ ca₂jñia₃ jě₄ jui₂ Nazaret, ŋó₃ bá₄ ca₂i₁'i₅ tē₂ Capernaum, caun₂ jui₂ a₂nio₅ chei'₅₄ jmi₁ŋí'₄ 'uě₃ ja₁tén₄ Zabulón quian'₅₄ Neftalí.

¹⁴ Jaun₂ le₂ně₅ ca₂rě₃ti₃ jág₁ a₂ca₂tó'₂ ne₄ si₂ Isaías i₂jme₁'ě₂ jág₁ o₄quió'₄ Diú₄:

¹⁵ 'Uě₃ ja₁tén₄ Zabulón quian'₅₄ Neftalí

a₂nio₅ le₃quióng₄ Cuá₃ Jordán, chei'₅₄ jmi₁ŋí'₄,

'uě₃ Galilea le₃quió'₅ dsi₂nau₂:

¹⁶ dsa₂ i₂jme₁tián'₄ jě₄ qui₁né'₃

ma₂ca₂jág₃ caun₂ si₂ juě'₂;

dsa₂ i₂jme₁tián'₄ 'uě₃ ja₁'ei₅ 'én'₁ 'mú₃,

ne₄ quió'₅ ma₂ca₂'ág₂ si₂.^v

¹⁷ Tě₂le₃ ne₄ jui₅ jaun₂ ca₂jme₃lióg₃ Jesús ca₂'ě₂ jág₁, ca₂juá'₂:

—Jein'₅₄ 'nia'₂ 'au'₂, ia₁ ma₂ja₂quián₃ guá₂ 'éi'₃ quió'₅ Diú₄.

^s6 Salmo 91:11-12.

^t7 Deuteronomio 6:16.

^u10 Deuteronomio 6:13.

^v15-16 Isaías 9:1-2.

Ca₂té'₃ Jesús quén₂ dsa₂ i₂tsán'₂ ju₄*(Marcos 1:16-20; Lucas 5:1-11)*

¹⁸ Co₂ráun₂ ŋó₃ Jesús i₁ŋi₂ chei'₅₄ jmi₁ŋi'₄ Galilea. Ja₁jaun₂, ca₂jín₂ Si₂mu₅₄ i₂té'₂ dsa₂ Pe₄, quiaín'₅₄ dsó₂ riín'₅₄ i₂chen₂ Dré₄. Dsa₂ i₂tsán'₂ ju₄ bá₄ 'éi₂, jaun₂ hora jaun₂ dé₄ né₃ jme₁tioín'₅₄ táun₂ 'má₅ dsi₂jmi₂g₂.

¹⁹ Jaun₂ ca₂juá'₂ Jesús:

—'Éin₃ jniá₂, jaun₂ cuë₅₄ ta₁ a₂chi₁liang'₂ dsa₂ mi₂güí₃g₃, jui₁lia'₂ chi₂liáng'₁ ju₄ né₅.

²⁰ Dsi₂jui₅ le₂jaun₂ bá₄ ca₂dsia₃ cau₅ 'má₅ quió'₅, jaun₂ i₃lén₂ quiong'₅₄.

²¹ Me'₂ gué₄ ne₄ jui₅ ja₁i₃lén₂ jaun₂, ca₂jín₂ con'₂ gué₄ on₃ dsó₂: Jacobo quian'₅₄ Juan₅₄ riín'₅₄, ja₁ŋi'₅₄ Zebedeo. Jme₁tioín'₅₄ 'ŋió'₃ tsi₁mu₅ qui₂'méi₅ 'má₅ quió'₅, quiaín'₅₄ jmei₂. Jaun₂ ca₂té₃ Jesús, ²² jaun₂ dsi₂jui₅ le₂jaun₂ bá₄ ca₂tí₂ tsi₁mu₅ quió'₅ ca₂téin₂ jmei₂, jaun₂ ca₂i₃lén₂ ca₂jme₃quiaín'₅₄ Jesús.

Ca₂jme₃tin₅ Jesús juín₅ lín₃ dsa₂*(Lucas 6:17-19)*

²³ I₂ŋi₅₄ Jesús le₂tan₅₄ 'uë₃ Galilea, qui₂jme₂tiín₂₃ dsa₂ dsi₂néi₂ guá'₅ sinagogas lia'₂ caun₂ ja₁qui₂ŋí₅. Qui₂'é₂ jág₁ dse₃ jui₁lia'₂ ja₁gon₂ Diú₄, ján₃ bá₄ qui₂jme₂'lióin₂ dsa₂ ca₂le₃jé₃ ne₅₄ dso₄ 'e₂ niog₅ lín₅ dsa₂.

²⁴ Le₂tan₅₄ 'uë₃ Siria ca₂i₃ág₃ jág₁ 'a₂ lia'₂ lé₅ jmo₅ Jesús ŋi₂₃, jaun₂ ca₂o₃ŋia₃ dsa₂ ca₂le₃jín₃ dsa₂ i₂le₁quian₅ ca₂le₃jé₃ ne₅₄ jmi₁uig₅, quian'₅₄ jui₁'ein₂ gué₃ i₂qui₂' uig₅ quió'₅. Ca₂i₁quiaín₅₄ ca₂le₃jín₃ dsa₂ i₂tion'₅₄ jme₂dsí₂ je₂na'₅₄, dsa₂ i₂lín₅ dso₄ 'ei₂, quian'₅₄ dsa₂ 'lian'₂ né₃. Ja₁jaun₂ ca₂jme₃'lión₂ Jesús ca₂le₃jín₃ dsa₂ 'éi₂.

²⁵ Juín₅ lín₃ dsa₂ i₂chan₂ Galilea, dsa₂ i₂chan₂ ta₁guia₃ juig₂ ja₁té'₂ dsa₂ Decápolis, quian'₅₄ dsa₂ i₂chan₂ Jerusalén, dsa₂ i₂tián'₅ 'uë₃ Judea quian'₅₄ dsa₂ i₂tián'₅ le₂'ŋo'₅₄ Cuá₃ Jordán né₃, ca₂jme₃quiong'₅₄ ca₂jme₃quiaín'₅₄ Jesús.

Jág₁ a₂ca₂cuë₃ Jesús má'₂*(Lucas 6:20-23)*

5 ¹ Jín₂ Jesús dsa₂ juín₅ 'éi₂, jaun₂ ca₂uíg₂ caun₂ dsi₂con'₂ ja₁nei₅ gué₄, jaun₂ ca₂guá₂. Jaun₂ ca₂ŋi'₂ dsa₂ i₂quiaín'₅₄ le₃lág'₃ quió'₅.
² Jaun₂ ca₂jme₃lióg₃ ca₂jme₃tiín₂₃ dsa₂, ca₂juá'₂ le₂la₂:

¿'Ein₂ dsa₂ 'éi₂ i₂jmo₅ 'io'₂?

³ —'E₂ gué₄ dsen₃ jui₁lia'₂ dsa₂ i₂rē₂lí₄ qui₂chi₁quiaín₁₂ jmi₂g₄ o₄quió'₄ jme₂dsí₂ quió'₅, ia₁ i₂le₂'éi₂ bá₄ ca₂tín₂ ja₁gon₂ Diú₄.

⁴ 'E₂ gué₄ dsen₃ jui₁lia'₂ dsa₂ i₂ta'₂ 'lia'₂ dsí₅, ia₁ cuë₃ bá₄ Diú₄ lián'₂ dsí₅.

⁵ 'E₂ gué₄ dsen₃ jui₁lia'₂ dsa₂ i₂jmo₅ me'₂, ia₁ gua'₅₄ 'uë₃ bá₄ tiin₅₄, cuë₃ Diú₄.

⁶ 'E₂ gué₄ dsen₃ jui₁lia'₂ dsa₂ i₂ñí₄ lë₃ 'ín₅ dsí₅ jmo₃ a₂'ñio₂ dsí₅ Diú₄, ia₁ lé₂ dsí₅ nē₂jag₄ bá₄ a₂i₁cón'₅, a₂rē₂quein₂ dsí₅ né₃; ia₁ 'ág'₄ bá₄ dsí₅, jmo₃ Diú₄.

⁷ 'E₂ gué₄ dsen₃ jui₁lia'₂ dsa₂ i₂ñéi₂ dsí₅ dsa₂ sián'₂, ia₁ dsia₃ bá₄ Diú₄ ñéi₂ dsí₅ guioin₅₄.

⁸ 'E₂ gué₄ dsen₃ jui₁lia'₂ dsa₂ i₂qui₂le₁jé₃ dsí₅, ia₁ jín₂ bá₄ Diú₄.

⁹ 'E₂ gué₄ dsen₃ jui₁lia'₂ dsa₂ i₂quín'₅ bí₂ 'no'₂ jui₅ 'a₂ lia'₂ 'ag₃ tei₄, ia₁ quiong₃ Diú₄ chi'₂-guein₂ quián₅.

¹⁰ 'E₂ gué₄ dsen₃ jui₁lia'₂ dsa₂ i₂qui₂co₂'ein₅ dsa₂ 'uig₅₄ ia₁ a₂jmo₂₃ a₂'ñio₂ dsí₅ Diú₄, ia₁ ja₁gon₂ Diú₄ bá₄ ca₂tiin₂.

¹¹ 'E₂ gué₄ dsen₃ 'nia'₂, jē₁ma₂tē₂ rē₁qui₃ñáu'₂ dsa₂ jág₁, qui₂co₂jmo₂g'₂, a₂juá'₂ ca₂le₃jé₃ ne₅₄ jág₁ a₂tsá₃ tí₅ ja₁con'₂ 'nia'₂ o₄quió₃ jniá₂; ¹² jmo₄ 'nia'₂ 'io'₂, jui₁le₁'ág₄ bá₄ dse₃ 'au'₂, ia₁ guéi'₁ 'nia'₂ 'liang'₅₄ jó₄ guei'₅₄ i₂juíg₃. Ia₁ le₂nē₅ bá₄ ján₃ qui₂ca₂co₃'ein₃ dsa₂ quió'₅ dsa₂ i₂jme₁'é₂ jág₁ quián₅ Diú₄, i₂ma₂ca₂rē₃chán₃ le₂jniá₅ con'₂ gué₄ 'nia'₂.

Jág₁ a₂jáng'₅ léi₄ jui₁lia'₂ tsi₁ñi₁ quian'₅₄ si₂ a₂tág₅ jin₄ dsa₂ mi₂güí₃
(Marcos 9:50: Lucas 14:34-35)

¹³ 'Tén'₅ 'nia'₂ ta₁ ne₄ gua'₅₄ 'uë₃ jui₁lia'₂ jmo₅ tsi₁ñi₁ jē₄ má₃. La₁ nē₁jua'₂ ma₂ca₂'en₃ ñi'₅₄ tsi₁ñi₁, ¿'a₂ bá₄ lia'₂ lé₂ le₃lei₂ táng₃? Tsá₃ ma₃'e₂ ta₁ jmo₃, a₂jñia'₅₄ lia'₂ a₂dsi₃ga'₅₄ bá₄ jaun₂, qui₃tsó'₃ dsa₂.

¹⁴ 'Ján₃ bá₄ rē₂jniá'₁ 'nia'₂ co₂'nió'₄ a₂lín₃'g'₅ si₂ quió'₅ dsa₂ mi₂güí₃. Jui₁lia'₂ caun₂ juig₂ a₂nio₅ dsi₂con'₂ tsá₃ lé₂ le₃dsi₃'ma₄, ¹⁵ ján₃ bá₄ tsá₃ guí'₅ dsa₂ si₂ caun₂ ni₁tsí₅ a₂chi'₃ né₃ tsi₁gu₅; guei'₅₄ bá₄ chi'₂ dsa₂ ia₁jaun₂ tág'₅ si₂ ja₁con₂ ca₂le₃jín₃ i₂tion'₅₄ dsi₂néi₂. ¹⁶ Le₂nē₅ bá₄ 'nia'₂ né₃, jmo₄ tág₅ si₂ quiáng'₂ jin₄ dsa₂ mi₂güí₃, ia₁jaun₂ tē₅₄ ne₄ dsa₂ a₂dse₃ a₂jmo'₂ 'nia'₂, jaun₂ jme₃juiin'₂ Nēi'₅ 'nia'₂ i₂guá₅ guei'₅₄ i₂juíg₃.

Jme₂tag₅ Jesús jui₁lia'₂ 'Éi'₃

¹⁷ 'Tsá₃ o₁len'₂ 'nia'₂ jua'₅₄ a₂guio₃ jniá₂ a₂jñiá'₄ Si₂ 'Éi'₃ quió'₅ Moisés, on₃ gué'₂ jág₁ a₂jme₁jme₂tag₅ dsa₂ i₂jme₁'é₂ jág₁ quián₅ Diú₄. On₃jua'₅₄ ta₁ jaun₂ guio₃ jniá₂ a₂jñiá'₄, tē₂le₃ a₂jme₁'ñia₅ bá₄ jniá₂ guio₃. ¹⁸ Ia₁ a₂dsi₂jó'₃ juá'₅ jniá₂, tē₁lia'₂ niog₅ mi₂güí₃, tē₁lia'₂ jniá₂ dsi₄ guei'₅₄ nē₅, 'i₁caun₂ punto, on₃ gué'₂ 'i₁caun₂ letra pí'₁ quió'₅ Si₂ 'Éi'₃ tsá₃ dsi₃'én₂ ca₂lia'₂ ca₂rē₃ti₃ ca₂le₃jé₃ a₂niog₅ lé₂. ¹⁹ 'Uig₅₄ jaun₂, jui₁lia'₂ i₂jmo₅ cau₅ caun₂ 'Éi'₃ Juá'₅ ne₄ Si₂ 'Éi'₃, o₁jñia'₅₄ lín₂ caun₂ 'éi'₃ tsá₃ lín₄ quen₅, nē₁jua'₂ le₂jaun₂ jme₁tiin₂₃ dsa₂ riin'₅₄, le₂jaun₂ bá₄ lén₂ dsa₂ 'éi₂ jan₂ dsa₂ i₂tsá₃ lín₄ quen₅ ja₁gon₂ Diú₄. La₁ jui₁lia'₂ dsa₂ i₂nag₅ gau₂, jme₂ti₃, le₂jaun₂ jme₂tiin₂₃ i₂sián'₂ né₃, le₂jaun₂ bá₄ lén₂ dsa₂ 'éi₂ juiin'₂ ja₁gon₂ Diú₄. ²⁰ Ia₁ a₂dsi₂jó'₃ juá'₅ jniá₂ juíg₂ 'nia'₂, nē₁jua'₂ tsá₃ ca₂jmo'₅₄ 'nia'₂

a₂dse₃ gué₄ con'₂ gué₄ tē₅juá'₅ quian'₅₄ dsa₂ fariseos, lia'₂ o₁líg'₂ jmig₄ tsá₃ lé₂ dsi₁no'₃ 'nia'₂ ja₁gon₂ Diú₄.

Jme₂tag₅ Jesús jui₁lia'₂ a₂rē₂'ne₂ dsa₂

(Lucas 12:57-59)

²¹ 'Ma₂ñi'₅₄ bá₄ 'nia'₂ 'a₂ lia'₂ lé₅ ma₂nág₂ dsa₂ can'₅₄ quián'₂ 'nia'₂:
 “Tsá₃ jñíg'₄ dsa₂,^w ia₁ nē₁jua'₂ 'ein₂ ca₂jñi'₃ rin'₅₄, tion₅₄ tē₃dsi₅₄ bá₄ 'éi'₃
 ja₁coin₂.” ²² La₁ jniá₂ juá'₅ juíg₂ 'nia'₂, chi₂jua'₂ 'ein₂ ca₂rē₃'né₃ quian'₅₄
 rin'₅₄,^x ján₃ bá₄ le₂jaun₂ jióg'₂ 'í₁ ja₁coin₂, tē₃dsi₅₄ 'éi'₃. Ján₃ bá₄ le₂jaun₂
 jui₁lia'₂ i₂tē₂'on'₂ rin'₅₄, ne₄ dsi₂tan₅₄ quián₅ guá'₅ bá₄ dsi₁lén₂, la₁
 jui₁lia'₂ i₂quian₅ tonto^y rin'₅₄, go'₂ 'liáin'₃ quióin'₄ dsi₂si₂ ja₁'lig'₅₄.
²³ 'Uig₅₄ jaun₂ né₃, nē₁jua'₂ dsi₂can'₅₄ 'e₂ dsi₂can'₅₄ ne₄chei₂, a₂jen'₅₄
 ne₄ Diú₄, nē₁ca₂dsáu'₃ 'au'₂ tsá₃ 'ei₅ caun₂ jág₁ quian'₅₄ ríng'₂, ²⁴ ja₁jaun₂
 de'₂ dsia₄ a₂jaun₂ cau₅ ne₄chei₂, jaun₂ gué₄ guan'₂ jme₁dsian₅ mi'₅₄ o₂'éi₂
 caun₂ jág₁ quian'₅₄ ríng'₂. Jaun₂ gué₄ ñe'₅₄ táng₃ i₂dsia₄ a₂cué'₅₄ Diú₄.
²⁵ 'Chi₂jua'₂ 'ein₂ 'nio₃ 'nag₃ ne₄ dsi₂tan₅₄, ñi'₅₄ ta₁ 'nio'₂ jui₅ 'éi₂ caun₂
 jág₁ quian'₅₄ né₃ a₂jmo₃ le₂jaun₂, ia₁jaun₂ tsá₃ jáng'₂ ne₄ dsi₂tan₅₄
 i₂qui₂dsi₅ 'éi'₃; ia₁ dsi₂tan₅₄ né₃, con'₂ tsá₃ ñó₅ nē₁ca₂jáng'₂ o₄gú₃ chi'₂
 'i'₅₄; i₂'éi₂ gué₄ né₃ 'liog'₃ né₃ 'má₃. ²⁶ A₂dsi₂jó'₃ juá'₅ jniá₂, tsá₃ a₁jaun₂
 o₃'ing'₂ ja₁jaun₂ ca₂lia'₂ ca₂qui'₅₄ ca₂le₃jé₃ 'a₂ con'₂ mi₅ dsa₂ quiáng'₂.

Jme₂tag₅ Jesús a₂tsá₃ nió'₃ dsa₂ jág₁ quian'₅₄ dsa₂ on₃jua'₅₄ dsi₂i₂gu₂

²⁷ 'Ma₂ñi'₅₄ bá₄ 'nia'₂ ján₃ 'a₂ lia'₂ lé₅ ma₂juá'₂ dsa₂ le₂jñiá₅: “Tsá₃
 nióg'₄ jág₁ quian'₅₄ dsa₂ on₃jua'₅₄ dsi₂i₂gog'₂.”^z ²⁸ La₁ jniá₂ gué'₂ juá'₅
 juíg₂ 'nia'₂, chi₂jua'₂ 'ein₂ dsi₂jio₅ dsí₅ 'lig'₅₄ qui₂jín₂ jan₂ dsa₂ mí₂,
 co₂'nió'₄ ma₂nē₂'nióg₂ dso₄ quiong'₅₄ jui₅ tē₂dsí₅.
²⁹ 'Nē₁jua'₂ mi₂ne'₅₄ jmo₅ a₂tang'₂ dso₄, co₂dsia₅ dsi₄, tiong₂ uíng₂; ia₁
 dse₃ gué₄ a₂dsi₃lén₂ ca₂jne₄ quiáng'₂, con'₂ gué₄ jme₁o₁'ú'₃ ta₁jang'₂
 ja₁'lig'₅₄. ³⁰ Ján₃ bá₄ le₂nē₅ nē₁jua'₂ mi₂gog'₂ jmo₅ a₂tang'₂ dso₄, co₂dsia₅
 ti₄, tiong₂ uíng₂; ia₁ dse₃ gué₄ a₂dsi₃lén₂ ca₂jne₄ ni₁ñi'₁ con'₂ gué₄
 jme₁o₁'ú'₃ ta₁jang'₂ ja₁'lig'₅₄.

Jme₂tag₅ Jesús jui₁lia'₂ dso₄ a₂tén₂ dsa₂ dsi₂i₂gu₂

(Mateo 19:9; Marcos 10:11-12; Lucas 16:18)

³¹ Ján₃ bá₄ ma₂juá'₂ dsa₂ le₂jñiá₅: “Chi₂jua'₂ 'ein₂ ca₂tén₂ dsa₂ mí₂
 quián₅, ca₂tín₂ cho₃ caun₂ si₂ a₂jáng'₅ léi₄ a₂ma₂ca₂tén₂ dsón'₂ riin'₅₄.”^a
³² La₁ jniá₂ juá'₅ juíg₂ 'nia'₂, chi₂jua'₂ 'ein₂ ca₂tén₂ dsa₂ mí₂ quián₅,

^w21 Éxodo 20:13.

^x22 A₂lin'₅₄ chog₅₄ si₂ juá'₂ ján₃: “on₃jua'₅₄ cha₂ 'uig₅₄.”

^y22 griego: raza; caun₂ jág₁ tē₂'o'₅₄ arameo co₂'nió'₄ a₂juá'₂: “Tsá₃ 'e₂ tio'₅₄ mi₂dsei'₂.”

^z27 Éxodo 20:14.

^a31 Deuteronomio 24:1.

on₃jua'₅₄ cha₂ 'uig₅₄, jua'₅₄ a₂ma₂nió'₅ jág₁ quian'₅₄ i₂sián'₂, jmo₂₃ a₂'no₃
'io₅₄ quiáin₅ dso₄. Ján₃ bá₄ le₂jaun₂ jui₁lia'₂ dsa₂ ηe'₂ i₂cán₂ 'io₅₄
i₂ma₂téi₂ dsa₂, ján₃ bá₄ le₂jaun₂ 'no₂₃ dso₄.

Jme₂tag₅ Jesús jui₁lia'₂ jág₁ a₂'in₅ dsa₂ Diú₄

³³ 'Ma₂nei'₂ bá₄ 'nia'₂ ján₃, 'a₂ lia'₂ lé₅ ca₂nág₂ dsa₂ can'₅₄ ma₂líg'₂:
“Tsá₃ jmó'₂ jua'₅₄ a₂tsá₃ jme₁ti'₄ jág₁ quiáng'₂ a₂ma₂cuë'₅₄ a₂'íng'₅
Te₁gui'₅₄.” ³⁴ La₁ jniá₂ juá'₅ juíg₂ 'nia'₂ tsá₃ 'e₂ 'uig₅₄ cha₂ jua'₅₄ a₂'íng'₄
Diú₄; tsá₃ 'é'₁ guei'₅₄ i₂juíg₃, ia₁ ne₄ta₁ quió'₅ Diú₄ bá₄ jaun₂; ³⁵ on₃ guë'₂
'é'₁ gua'₅₄ 'uë₃, ia₁ co₂'nió'₄ ja₁tióng₂ tag₄ bá₄ Diú₄; on₃ guë'₂ 'nió'₅ 'é'₁
'nia'₂ Jerusalén, ia₁ juig₂ quió'₅ Rag₅₄ Juin'₂ bá₄ jaun₂. ³⁶ Tsá₃ lë₁'ë₂ 'nia'₂
mi₂dsei'₂ guiong'₅₄ né₃, ia₁ 'i₁ca₂mi'₂ ni₁jñi₂ dsei'₂ 'nia'₂ tsá₃ lé₂ le₃jmó'₂
tiog₂, on₃ guë'₄ a₂lia'₂ né₃. ³⁷ Jua'₅₄ bá₄ 'nia'₂ quian'₅₄ ca₂jon₄ jág₁, “ján₅”,
o₃ “jan₂'ón₄” 'e₂, ia₁ nē₁jua'₂ 'ein₂ ca₂juá'₂ ηag₅₄ guë'₄ con'₂ lé₅ nē₅, já₅
ja₁con₂ i₂sē₃dsen₃ bá₄ jaun₂.

Jme₂tag₅ Jesús jág₁ jui₁lia'₂ a₂con₂ dsa₂ 'ma'₅₄ ja₁con₂ riin'₅₄

(Lucas 6:29-30)

³⁸ 'Ma₂nei'₂ bá₄ 'nia'₂ a₂ma₂juá'₂ dsa₂ le₂jñiá₅: “Nē₁jua'₂ 'ein₂ ca₂'én₂
ca₂míg₂ mi₂ne₄ rin'₅₄, le₂jaun₂ bá₄ lé₂ 'éi'₃ dsi₃'én₂ ca₂míg₂ mi₂ne₄
jui₁lia'₂ i₂ca₂jmo₃ ján₃; o₃ nē₁jua'₂ 'ein₂ ca₂tia'₃ ca₂míg₂ mi₂jan₄ rin'₅₄
né₃, le₂jaun₂ bá₄ lé₂ táng₃ 'éi'₃, tiá'₃ ca₂míg₂ quió'₅.”^b ³⁹ La₁ jniá₂ guë'₂
juá'₅ juíg₂ 'nia'₂, tsá₃ lë₁nau₂ 'nia'₂ queng'₂ quian'₅₄ dsa₂ 'lin'₅₄. Nē₁jua'₂
'ein₂ ca₂quein₃ rē₂jog'₂, jein'₅₄ tē₂le₃ ca₂ton₂, jui₁quein₂₃ ta₁tin₃ ton₂.
⁴⁰ Chi₂jua'₂ 'ein₂ 'nag₅ quiáng'₂, a₂'nio₃ jñiá'₂ ni₁tsín'₂, le₂jio₅ tsi₁'mi'₂
dsiog₂ qui'₅₄ cuë'₅₄ jui₁quion₂. ⁴¹ Nē₁jua'₂ 'ein₂ ca₂chi₃quióng₂ jmig₄
a₂caun'₅₄ lio₅₄ caun₂ kilómetro, o₂con₄ tin₃ kilómetros. ⁴² Jui₁'ein₂ guë'₃
mi₅ 'e₂ mi₅ quiáng'₂ a₂dsi₂, cuë'₅₄; 'a₃ lë₁jein'₅₄ le₃mi₂ca'₅₄ quió'₅.

Jme₁'nió₄ bá₄ 'nia'₂ jui₁lia'₂ dsa₂ i₂'iog₅₄ quián'₂ 'nia'₂

(Lucas 6:27-28, 32-36)

⁴³ Ján₃ bá₄ ma₂nei'₂ 'nia'₂ a₂ma₂juá'₂ dsa₂ le₂jñiá₅: “Jme₁'nió₄ a₂mei₅₄
quiáng'₂, jme₁'ñia₅₄ jui₁lia'₂ dsa₂ i₂'iog₅₄.” ⁴⁴ La₁ jniá₂ guë'₂ juá'₅ juíg₂
'nia'₂: Jme₁'nió₄ bá₄ 'nia'₂ jui₁lia'₂ dsa₂ i₂'iog₅₄, mi₄ ne₄ Diú₄ o₄quió'₄
jui₁lia'₂ dsa₂ i₂co₂'ein₅.^c ⁴⁵ Jaun₂ le₂nē₅ bá₄ a₂rē₂jñiá'₁ 'nia'₂ a₂líg'₅ chi'₂-
guein₂ quián₅ Néi'₅ i₂guá₅ guei'₅₄ i₂juíg₃; ia₁ 'éi'₂ bá₄ cuë'₅ 'iog₂ cuë'₅ lia'₂
dsa₂ 'lin'₅₄ lia'₂ dsa₂ dsen₃; ján₃ bá₄ chein₁₂ jmí₅ cuë'₅ lia'₂ dsa₂ i₂cuin₅
Diú₄ lia'₂ dsa₂ i₂tsá₃ Diú₄ cuin₅ né₃. ⁴⁶ Ia₁ nē₁jua'₂ 'nió'₃ 'nia'₂ jmá'₃ lia'₂
dsa₂ i₂'nio₃ 'nia'₂, ¿'e₂ 'lian'₅₄ 'nia'₂ guéi'₁ le₂jaun₂? Le₂jio₅ dsa₂ i₂cán₂

^b38 Éxodo 21:24; Levítico 24:20; Deuteronomio 19:21.

^c44 A₂lin₅₄ chog₅₄ si₂ juá'₂: “Jua'₅₄ a₂dse₃ ja₁con₂ jui₁lia'₂ dsa₂ i₂juá'₂ uig₅, jmo₄ a₂dse₃ ja₁con₂
jui₁lia'₂ dsa₂ i₂'iog₅₄.”

'lia'₅₄ quián₅ dsi₂tan₅₄ tin₂ le₂jaun₂.⁴⁷ Chi₂jua'₂ cuín'₅ 'nia'₂ Diú₄ jmá'₃
lia'₂ dsa₂ ríng'₂, 'e₂ a₂ṇag₅₄ gué₄ a₂dse₃ jmo'₂ 'nia'₂ ně₁jua'₂ le₂jaun₂? Ia₁
le₂ně₅ bá₄ jmo₅ dsa₂ i₂tsá₃ Diú₄ cuín₅ ján₃.⁴⁸ Jui₁dsi₂can'₅₄ bá₄ 'nia'₂
a₂dsi₁nóg'₅ léng'₂ dsa₂ dsen₃ jui₁lia'₂ dsen₃ Nėi'₅ 'nia'₂ i₂guá₅ guei'₅₄
i₂juíg₃.

Jme₂tag₅ Jesús jág₁ jui₁lia'₂ a₂jmo₅ dsa₂ dse₃

6 ¹ 'Jmo₄ 'nia'₂ 'í₁ tsá₃ lě₁jmo₂ 'nia'₂ a₂lín₅ dsa₂ dsen₃ jñia'₅₄ lia'₂
jmá'₃ jě₄ jág₃ dsa₂. Nė₁jua'₂ le₂ně₅ jmo'₂ 'nia'₂, Nėi'₅ 'nia'₂ i₂guá₅
guei'₅₄ i₂juíg₃ tsá₃ 'e₂ 'lian'₅₄ 'nia'₂ cuě₃ 'i₁caun₂.
² 'Uig₅₄ jaun₂, jě₁ma₂tě₂ rě₁jme₁'on'₁ 'nia'₂ 'ein₂ jme₁'ong'₁ jui₁lia'₂
i₂'nió'₅ quió'₅, tsá₃ jmó'₂ jua'₅₄ uíng₂ ma₂dsi₂'ag₅ jág₁ jui₁lia'₂ jmo₅ dsa₂
i₂lě₁jmo₅ o₁ne₁ dsi₂nėi₂ guá'₅ sinagogas jui₁lia'₂ jě₄ calles nế₃. Jmo₂₃
le₂jaun₂ a₂chein'₂ dse₃ guioin₅₄ ia₁jaun₂ 'ag₃ dsa₂ dse₃; la₁ia₁ a₂tě₃dsón'₂
juá'₅ jniá₂ i₂ma₂gue₃ 'lian'₅₄ bá₄ i₂le₂'éi₂.³ La₁ 'ne₂ nế₃, jě₁ma₂tě₂
rě₁jme₁'ong'₁ jui₁lia'₂ 'ein₂ jme₁'ong'₁, jmo₄ ca₂lia'₂ jñia'₅₄ a₂mei₅₄ dsen₃
quiáng'₂ tsá₃ ñi₅.⁴ Ja₂lin₃ gué₄ dse₃ jmó'₂ jě₄ tē₃co'₅₄. Jaun₂ Nėi'₅ i₂jág₅
a₂dse₃ jmo'₂ jě₄ tē₃co'₅₄ jaun₂, cuě₃ 'liang'₅₄.^d

Jme₂tag₅ Jesús 'a₂ lia'₂ chi₃lén'₂ dsa₂ Diú₄

(Lucas 11:2-4)

⁵ 'Jě₁ma₂tě₂ rě₁chi₁len'₄ 'nia'₂ Diú₄, tsá₃ lě₁jmo₂ 'nia'₂ jui₁lia'₂ jmo₅
dsa₂ i₂lě₁jmo₅-dsáu₅ o₁ne₁, a₂tě₅ dsí₅ chi₂lén'₂ Diú₄ tē₃ tióin₂ dsi₂nėi₂
guá'₅ sinagogas jě₄ calles nế₃, ia₁jaun₂ jág₃ dsa₂. A₂dsi₂jó'₃ juá'₅ jniá₂,
i₂ma₂gue₃ 'lian'₅₄ bá₄ i₂le₂'éi₂.⁶ La₁ jě₁ma₂tě₂ rě₁mí'₁ 'ne₂ ne₄ Diú₄, jne₅₄
dsi₂nėi₂ quiáng'₂. Ja₁jaun₂ chi₁len'₄ 'ne₂ Diú₄ Nėi'₅ i₂tsá₃ jniá₂. Jaun₂ nế₃
Nėi'₅ i₂ñi₅ 'e₂ a₂jmo'₂ jě₄ tē₃co'₅₄, cuě₃ 'liang'₅₄.

⁷ 'Jě₁ma₂tě₂ rě₁juig'₅₄ Diú₄, tsá₃ jmó'₂ 'nia'₂ jua'₅₄ a₂lě₁tě₁ 'í₁ jág₁ a₂tsá₃
ta₁ tí₄, jui₁lia'₂ jmo₅ dsi₂nau₂ i₂tsá₃ 'én₂, ia₁ lín₂ nag₃ Diú₄ tē₂le₃ ia₁
a₂'lióng₂ jág₁ juá'₂.⁸ Tsá₃ lě₁o₁len'₅₄ 'nia'₂ jui₁lia'₂ lín₅ dsa₂ le₂'éi₂. Ia₁
i₂ma₂ñi₅ bá₄ Nėi'₅ 'nia'₂ 'e₂ a₂'nió'₅ quián'₂ 'nia'₂ nế₃ gué₄ a₂mí'₁.⁹ Jaun₂
nế₃, le₂la₂ bá₄ juig'₅₄ 'nia'₂ Diú₄:

Tia₅₄ quián₂ jniog₄, 'ne₂ i₂nėi'₂ guei'₅₄ i₂juíg₃,

jui₁jme₂go₃ bá₄ dsa₂ a₂rě₂jñió₄ a₂cheng'₂.

¹⁰ Jui₁le₅₄ bá₄ 'éi'₃ quiáng'₂,

jui₁le₅₄ bá₄ a₂'ñio₂ 'au'₂ 'ne₂ ne₄ gua'₅₄ 'uě₃,

jui₁lia'₂ lế₅ guei'₅₄ i₂juíg₃.

¹¹ Cuě₄ a₂'nió'₅ que₅₄ jnia'₅₄ jmi₄ nế₃.

¹² 'Én₃ dso₄ quián₂ jnia'₅₄,

jui₁lia'₂ 'én₅ jnia'₅₄ dsáu₁ rin'₅₄.

^d4 Juá'₂ a₂lin₅₄ chog₅₄ si₂ le₂la₂ ján₃: "tē₃ jin₄ juin₅ dsa₂."

- ¹³ 'A₃ cuë₂ jmi₄ jíá₃ jui₅ bí₂ a₂ cáun₂ táu₂,
të₂ le₃ lio₄ bá₄ o₄ gú₃ i₂ sē₃ dsen₃.^e
- ¹⁴ 'Ia₁ nē₁ jua₂ 'én₅ 'nia₂ dsáu₁ ríng₂ jē₁ ma₂ 'náu₂ dso₄ ja₁ cong₂, ján₃
bá₄ le₂ jaun₂ Néi₅ 'nia₂ i₂ guá₅ guei₅₄ i₂ juí₃ 'éin₂ dsáu₂ 'nia₂ guiong₅₄.
¹⁵ La₁ nē₁ jua₂ tsá₃ 'éng₅ dsáu₁ ríng₂, ján₃ bá₄ le₂ jaun₂ tsá₃ 'én₂ Néi₅
dsáu₂ 'nia₂.

Jme₂ tag₅ Jesús jág₁ jui₁ lia₂ a₂ jme₂ 'in₅₄ dsa₂

- ¹⁶ 'Jē₁ ma₂ té₂ rē₁ jme₁ 'in₄ 'nia₂, tsá₃ jme₁ tsín₄ 'nia₂ o₄-ne₅₄ jua₅₄
a₂ jmó₂ lē₁ ág₄ 'lia₂ 'au₂ jui₁ lia₂ jmo₅ dsa₂ i₂ lē₁ jmo₅-dsáu₅ o₁ ne₁. Jmo₅
dsa₂ le₂ 'éi₂ le₂ jaun₂ ia₁ jaun₂ jág₃ dsa₂ a₂ dsón₂ bá₄ jme₂ 'iin₅₄. A₂ dsi₂ jó₃
juá₅ jniá₂, i₂ ma₂ gue₃ 'lian₅₄ bá₄ 'éi₂.¹⁷ La₁ 'ne₂ né₃, jē₁ ma₂ té₂
rē₁ jme₁ 'ing₄, sio₅ rē₂ dse₁ '2, rang₂ ne₅₄ né₃,¹⁸ ia₁ jaun₂ tsá₃ 'éin₂ le₃ lí₄
a₂ jme₂ 'ing₄. Jñia₅₄ lia₂ Néi₅ i₂ tsá₃ jniá₂ bá₄ ñi₅. Jaun₂ Néi₅ i₂ jág₅
ca₂ le₃ jé₃ a₂ jmo₂ jē₄ tē₃ co₅₄ jaun₂, 'éi₂ bá₄ cuë₃ 'liang₅₄.

Jui₁ lia₂ a₂ quen₅ lin₃ a₂ rē₂ 'ma₄ guei₅₄ i₂ juí₃

(Lucas 12:33-34)

- ¹⁹ 'Tsá₃ lē₁ dsia₂ 'nia₂ lo₂ le₁ má₂ a₂ jmo₂ 'nia₂ a₂ quen₅ lin₃ quiáng₂
ne₄ gua₅₄ 'uë₃ la₂, ia₁ ja₁ lá₃ ja₁ lē₁ qui₂ rē₂ jui₁ tón₅ i₁ cá₁ qui₂ 'éin₂, ján₃ bá₄
ja₁ lá₃ ja₁ qui₂ dsi₂ 'én₂ qui₂ rē₃ 'áu₁ cosas né₃; ja₁ lá₃ bá₄ chan₂ dsa₂
qui₂ juí₂₃ 'e₂ qui₂ juí₂₃ a₂ tóin₅ 'ang₂₃.²⁰ Guei₅₄ i₂ juí₃ bá₄ 'nió₅ dsiá₁
'nia₂ lo₂ quiáng₂, ja₁ tsá₃ 'e₂ lé₂ jua₅₄ a₂ qui₃ 'én₂ cá₁, on₃ guë₂ 'e₂
rē₂ 'áu₁, on₃ guë₄ lé₂ dsi₃ ton₅₄ 'ang₂.²¹ Ia₁ jui₁ lia₂ jē₁ tio₅₄ a₂ quen₅
quiáng₂, ja₁ jaun₂ bá₄ 'i₄ a₂ 'i₅ 'au₂.

Jui₁ lia₂ jme₁ ne₁ dsa₂

(Lucas 11:34-36)

- ²² 'Lē₅ jme₁ ne₁ dsa₂ jui₁ lia₂ lē₅ caun₂ si₂ ni₁ tsí₅ quió₅ ni₁ ñi₁ dsa₂; 'ui₅₄
jaun₂ né₃, nē₁ jua₂ dse₃ jme₁ ne₁, ján₃ bá₄ le₂ jaun₂ co₂ 'nió₄ tág₅ bá₄ si₂
ta₁ jang₂; ²³ la₁ nē₁ jua₂ tsá₃ dse₃ jme₁ ne₁, ta₁ jang₂ bá₄ lē₅ qui₁ né₃.
Nē₁ jua₂ si₂ quiáng₂ né₃, chí₅ chí₁ liá₃, 'e₂ guë₄ 'ñio₅ juë₂ lē₅ qui₁ né₃
nē₁ jua₂ le₂ jaun₂!

Jui₁ lia₂ a₂ 'nio₃ dsa₂ Diú₄, a₂ 'ín₅ guë₂ dsí₅ cu₄ né₃

(Lucas 16:13)

- ²⁴ 'I₁ jan₂ tsá₃ 'éin₂ lé₂ jme₃ ti₃ ta₁ ne₄ on₃ juí₅₄; ia₁ jme₃ 'ñiai₅₄ jan₂,
i₂ jan₂ guë₂ jme₃ 'nioi₃. O₃ náu₃ tiá₂ quian₅₄ jan₂, i₂ jan₂ guë₂ tsá₃
le₃ jein₅₄. Tsá₃ 'éin₂ lé₂ jme₃ ti₃ ne₄ Diú₄, le₂ jiog₅ ne₄ a₂ 'ín₅ dsí₅ cu₄ né₃.

^e13 A₂ lin₅₄ chog₅₄ si₂ juá₂: "lio₄ bá₄ jnia₅₄ ne₄ a₂ 'lig₅₄;" a₂ siá₂ juá₂ bá₄ ján₃: "ia₁ 'ne₂ bá₄
ca₂ tíg₂ gong₂, qui₁ dsi₂ 'éi₃, a₂ jme₃ juag₂ dsa₂ né₃, co₂ tan₅₄."

Jmo₅ Diú₄ 'í₁ chi'₂-guein₂ quiáin₅

(Lucas 12:22-31)

²⁵ 'Jaun₂ ně₃ juíg₂ jniá₂ 'nia'₂: Tsá₃ lë₁can₂ 'nia'₂ o₂i₁ dsi₅ jua'₅₄ a₂ñí₄ 'i₅ 'au'₂ 'e₂ quë'₅₄ o₃ 'e₂ 'ag'₅₄ tē₁lia'₂ chang'₂, on₃ guë'₂ o₄quió'₄ nī₁ñi'₁ 'nia'₂, 'e₂ 'mī'₂ a₂qui'₅₄. 'Tsa₁ quen₅ gué₄ jme₂dsí₂ a₂chan₂ dsa₂ lia'₂ con'₂ gué₄ má₃? ²⁶ Jin₄ de'₂ 'nia'₂ jui₁lia'₂ i₁tan₅ i₂i₂nio₄ guei'₅₄: tsá₃ 'e₂ jne₂₃, on₃ guë'₂ 'e₂ cág'₅, jua'₅₄ a₂dsia₂₃ lo'₂; la₁ Néi'₅ 'nia'₂ i₂guá₅ guei'₅₄ i₂juíg₃ qui₂jme₂tau₅₄. Jaun₂ ně₃, 'Tsa₁ quen'₅ gué₄ 'nia'₂ lia'₂ con'₂ gué₄ já'₂ 'éi₂? ²⁷ 'Ein₂ 'nia'₂, tē₂le₃ ia₁ a₂ñí₄ 'i₅ 'au'₂, lé₂ le₃jmo'₂ 'nia'₂ a₂lé₂ le₃chang'₂ caun₂ hora ñag₅₄ gué₄?^f

²⁸ 'E₂ 'uig₅₄ a₂ñí₄ lë₃ 'i₅ 'au'₂ 'nia'₂ jui₁lia'₂ o₄quió'₄ 'mī'₂ a₂qui'₅₄? Jag₄ de'₂ 'nia'₂ jui₁lia'₂ 'a₂ lia'₂ dsi₂cón₃ lí₁ a₂cha₂ ja₁nau₂; on₃jua'₅₄ i₂jmo₅ ta₁ 'ua'₂, on₃ guë'₂ 'me₂₃; ²⁹ la₁ juíg₂ jniá₂ 'nia'₂, ca₂lia'₂ jñia'₅₄ Rag₅₄ Salomón lia'₂ con'₂ jme₁quí'₅ tsin'₅₄ a₂jlá'₁ gué₄, tsá₃ ca₂rë₃jláin'₁ jui₁lia'₂ jlá'₁ lí₁. ³⁰ Jaun₂ ně₃, chi₂jua'₂ Diú₄ le₂ně₅ jmo₂₃ jlá'₁ nau₂ a₂cha₂ jmig₄ ně₃, la₁ 'ióg₃ guë'₂ dsi₃'én₂ dsi₂si₂, 'i₂ gué₄ bá₄ 'nia'₂ dsa₂ tsá₃ lín₄ 'én₂ jmo₃ 'í₁ qui₃chein'₃ 'nia'₂ dse₃! ³¹ Jaun₂ le₂ně₅, tsá₃ lë₁can₂ 'nia'₂ o₂i₁ dsi₅, jua'₅₄ a₂qui₁ñag'₅₄ 'nia'₂: “'E₂ que₅₄ jniog₄?” o₃ “'E₂ 'ne'₅₄ jniog₄?” o₃ “'E₂ 'mī'₂ qui₅₄ jniog₄?” ³² Ia₁ dsa₂ mī₂güí₃ bá₄ i₂nio₄ qui₂'en₅ 'ín₅ dsí₅ ca₂le₃jé₃ a₂ně₅. I₂ñi₅ bá₄ Néi'₅ 'nia'₂ i₂guá₅ guei'₅₄, a₂'nió'₅ quián'₂ 'nia'₂ le₃jé₃ a₂ně₅. ³³ La₁ jmo₄ de'₂ jñiá₅ 'nia'₂ 'ín₅ 'au'₂ a₂jiá₃ 'éi'₃ quió'₅ Diú₄ ja₁cong'₂, quian'₅₄ a₂jmo'₂ 'nia'₂ ca₂le₃jé₃ a₂dse₃ a₂tē₅ dsí₅ 'éi₂, jaun₂ gué₄ guéi'₁ 'nia'₂ le₃jé₃ a₂ně₅ a₂ñag₅₄ gué₄. ³⁴ Tsá₃ lë₁can₂ 'nia'₂ o₂i₁ dsi₅ jaun₂, o₄quió'₄ jmig₄ 'ióg₃, ia₁ jma₃quén₅ o₂i₁ dsi₅ cha₂ bá₄ lia'₂ co₂jmig₄ lia'₂ co₂jmig₄.

Tsá₃ lë₁caun₂ 'nia'₂ 'í₁ quió'₅ i₂sián'₂

(Lucas 6:37-38, 41-42)

7 ¹ Tsá₃ lë₁caun₂ 'nia'₂ 'í₁ quió'₅ ríng'₂, ia₁jaun₂ tsá₃ con₂ Diú₄ 'í₁ ja₁con'₂ 'nia'₂ guiong'₅₄. ² Ia₁ le₂ně₅ bá₄ con₂ Diú₄ 'í₁ ja₁con'₂ 'nia'₂ guiong'₅₄ jui₁lia'₂ cáun'₂ 'nia'₂ 'í₁ ja₁con₂ ríng'₂. Quian'₅₄ 'éi'₃ a₂dsia'₂ 'nia'₂, 'éi'₃ jaun₂ bá₄ dsio₃ Diú₄ quián'₂ 'nia'₂ guiong'₅₄.

³ 'E₂ lia'₂ jniag'₃ 'ne₂ jag'₅₄ jme₁qui₅ pí'₁ a₂'i₄ jme₁ne₁ ríng'₂, ton'₂ tsá₃ leng'₅₄ guë'₂ a₂'i₄ ca₂'nau₅₄ nī₁chá₅ pa₁ jme₁ne₁ 'ñiag'₂? ⁴ 'O₃ 'a₂ lia'₂ lé₂ le₃juig'₅₄ ríng'₂: “Cuë₄ jmig₄ dsi₄ jniá₂ jme₁qui₅ pí'₁ a₂'i₄ jme₁ne₁,” ton'₂ ně₅ bá₄ chi₁ 'i₁ ca₂'nau₅₄ nī₁'ma₂ chá₅ jme₁ne₁ 'ñiag'₂? ⁵ 'Ne₂ dsa₂ i₂lë₁jmo₅ o₁ne₁! Dsi₄ de'₂ jñiá₅ nī₁'ma₂ chá₅ mī₂ne₁'₅₄ 'ñiag'₂, jaun₂ gué₄ lé₂ le₃jag'₅₄ rë₂, jaun₂ gué₄ lé₂ dsí'₁ qui₅ pí'₁ jme₁ne₁ ríng'₂.

⁶ Tsá₃ cuë'₂ 'nia'₂ jui₁lia'₂ dsi₂jñi'₅₄ a₂lë₅ a₂jñiós₅ quió'₅ jme₂dsí₂, ia₁ con'₂ tsá₃ ñó₅ ně₁jua'₂ ja₂dsín₂ a₂jmo₃ le₁juig₁ quiáng'₂. Ján₃ bá₄ tsá₃

^f27 A₂lin₅₄ chog₅₄ si₂ juá'₂: “a₂lé₂ le₃i₃con'₅₄ 'nia'₂ caun₂ lë₂.”

dsia₂ 'nia'₂ jui₁lia'₂ míg₂ jlá'₁ a₂quen₅ quiáng'₂ ne₄ i₁ñí₅, con'₂ tsá₃ ñó₅
në₁jua'₂ qui₂ca₂tsó'₃, jme₃'ióg₃.

Jui₁lia'₂ dsa₂ i₂mi₅, i₂'no'₂, i₂té₂ né₃

(Lucas 11:9-13; 6:31)

⁷ 'Mi₄ 'nia'₂ ne₄ Diú₄, jaun₂ guéi'₁ 'nia'₂; 'nio'₂ 'nia'₂, jaun₂ bá₄
dsiang'₂; té₃ 'nia'₂ o₄'né₄, jaun₂ bá₄ niá₂. ⁸ Ia₁ jui₁lia'₂ i₂mi₅, gue₃ bá₄;
jui₁lia'₂ i₂'no'₂, dsio'₂ bá₄ ján₃; ján₃ bá₄ le₂jaun₂, quió'₅ jui₁lia'₂ i₂té₂
o₄'né₄, niá₂ bá₄.

⁹ '¿O₃ chan₂ jui₁lia'₂ 'ein₂ 'nia'₂, jme₁mi₅ chi'₂ quiáng'₂ i₁ñí'₄, cuë'₂
'nia'₂ ca₂mí₂g₂ ni₁cang₁? ¹⁰ '¿O₃ chan'₂ 'nia'₂ jë₁ma₂ca₂mi₃ chi'₂ quiáng'₂
quió'₅ ju₄, cuín'₄ 'nia'₂ dsi₂mi'₂? ¹¹ Jaun₂ né₃, chi₂jua'₂ 'nia'₂ dsa₂
i₂rë₂cán'₄ dso₄ ting'₂ cuë'₂ cosa dse₃ chi'₂-guein₂ quiáng'₂, i'ë₂ gué₄ bá₄
Néi'₅ 'nia'₂ i₂guá₅ guei'₅₄ cuë₃ a₂dse₃ cuë'₃ jui₁lia'₂ i₂mi₅ ja₁coin₂!

¹² 'Uig₅₄ jaun₂ né₃, jmo₄ bá₄ 'nia'₂ quian'₅₄ dsa₂ mi₂güí₃ ríng'₂ jui₁lia'₂
'e₂ a₂'niog'₂ 'nia'₂ jmo₃ 'éi₂ quian'₅₄ 'nia'₂; ia₁ a₂në₅ bá₄ ta₁ quí'₅ ca₂le₃jé₃
Si₂ 'Éi'₃, quian'₅₄ gué₄ Si₂ a₂qui₂ca₂jmo₃ dsa₂ i₂jme₁'é₂ jág₁ quián₅ Diú₄.

O₄jui₅ dsag₂

(Lucas 13:24)

¹³ 'Tión'₂ 'nia'₂ të₂le₃ o₄jui₅ dsag₂. Ia₁ a₂'í₂ juë'₂ bá₄ ja₁dsi₂ton'₅₄ dsa₂
jui₅ a₂jio₅ ja₁dsi₃'éin₂. Ja₂lín₃ gué₄ juin₅ dsa₂ i₂dsi₂ton'₅₄ jui₅ jaun₂; ¹⁴ ia₁
caun₂ o₄jui₅ dsag₂ rë₂quí'₅ bá₄ ja₁i₂nio₄ dsa₂ a₂dsi₁lein₅ ja₁le₃chan₂
jme₂dsí₂, jaun₂ tsá₃ lín₄ juin₅ i₂dso'₂ jui₅ jaun₂.

Të₂le₃ quian'₅₄ mí₂g₂ a₂'ag₅ bá₄ ni₁'ma₂, jáng'₅ léi₄

(Lucas 6:43-44)

¹⁵ 'Jmo₄ 'nia'₂ 'í₁ jaun₂ tsá₃ jme₃gau₅ dsa₂ i₂i₂nio₄ 'é₂ jág₁ a₂jui₁gain₂,
i₂ja₂lén₂ ja₁con'₂ 'nia'₂ qui₂rë₂lín₅₄ a₂lín₅ já'₂ cha'₂, la₁ të₂le₃ né₃ të₂dsí₅
lín₅ jui₁lia'₂ lín₅ dsi₂jí'₅₄ náu₂ tsau₂ dsí₅. ¹⁶ La₁ të₂le₃ 'a₂ lia'₂ jmo₅-dsáu₅
bá₄ le₃cuiin'₂ 'nia'₂; ia₁ tsá₃ guei'₅₄ chi₁uíng₃ taun₅ quin₅ dsa₂ jui₁lia'₂
mí₂g₂ uvas. On₃ guë'₂ lé₂ le₃quin₃ dsa₂ mí₂g₂ higos guei'₅₄ 'ma₂ taun₅
jmi'₅₄. ¹⁷ Jaun₂ né₃, ca₂le₃jé₃ 'ma₂ dse₃, mí₂g₂ dse₃ bá₄ 'ag₅; ján₃ bá₄
le₂jaun₂ jui₁lia'₂ ni₁'ma₂ 'lig'₅₄, mí₂g₂ 'lig'₅₄ bá₄ 'ag₅. ¹⁸ Jui₁lia'₂ ni₁'ma₂
dse₃, tsá₃ lé₂ le₃'ag₃ mí₂g₂ 'lig'₅₄; ján₃ guë'₂ le₂jaun₂ tsá₃ lé₂ le₃'ag₃ mí₂g₂
dse₃ jui₁lia'₂ ni₁'ma₂ 'lig'₅₄. ¹⁹ Ca₂le₃jé₃ ni₁'ma₂ a₂tsá₃ 'ag₅ mí₂g₂ dse₃,
jnja'₅₄ lia'₂ a₂uín'₂ bá₄, dsi'₂ dsi₂si₂. ²⁰ Jaun₂ le₂në₅ bá₄ le₃cuiin'₂ 'nia'₂:
të₂le₃ 'a₂ lia'₂ lë₅ jmo₂₃.

Tsá₃ ca₂le₃jín₃ tín'₄ ja₁gon₂ Diú₄

(Lucas 13:25-27)

²¹ 'Tsá₃ ca₂le₃jín₃ i₂té₂ jniá₂: "Te₁gui'₅₄, Te₁gui'₅₄," dsi₁lein₅ guei'₅₄
i₂juí₃ ja₁gon₂ Diú₄; jnja'₅₄ lia'₂ jmá'₃ i₂jmo₅ a₂'nio₂ dsí₅ Ne'₃ i₂guá₅

guei'₅₄ bá'₄ dsi'₁len'₅.²² Juin'₅ dsa'₂ lé'₂ jmig'₄ jaun'₂ i₂juá'₂ tság'₃ jniá'₂:
 “Te₁gui'₅₄, Te₁gui'₅₄, ma₂qui₂ca₂'é'₄ jnia'₅₄ jág'₁ o₄quián'₂ 'ne₂. Quian'₅₄
 bí'₂ 'éi'₃ quiáng'₂ né'₃, ma₂qui₂ma₂'uin'₅₄ jnia'₅₄ je₂na'₅₄, ma₂qui₂ma₂jmo'₁
 jnia'₅₄ 'lióng'₂ léi'₄ jué'₂ né'₃.”²³ La₁ jaun'₂ gué'₄ né'₃ juig'₅₄ jniá'₂: “O₁líg'₂
 tsá'₃ 'nia'₂ ca₂rë'₃cuíng'₅. Cau₅ jñia'₃ 'nia'₂ i₂jmo'₂ a₂'lig'₅₄.”

Ta₁tin₃ ne₅₄ 'uig'₅₄

(Marcos 1:22; Lucas 6:47-49)

²⁴ 'Jaun'₂ né'₃, ca₂le₃jín'₃ jui₁lia'₂ dsa'₂ i₂nag'₅ jág'₁ quió'₃, jmo₂₃ a₂juíg'₂
 jniá'₂, lín'₅ jui₁lia'₂ lín'₅ jan'₂ dsa'₂ i₂ñi'₂ dsí'₅ i₂ca₂jmo'g'₃ 'ne₄ ne₄ 'lau₂.
²⁵ Ca₂já'₃ jmí'₅, qui₂ca₂jué'₂ jmig'₂ cuá'₃, ca₂'ág'₂ dsí'₂ tiá'₂ lín'₃ ca₂jnú'₃ 'né'₅
 jaun'₂; la₁ tsá'₃ ca₂qui'₃, ia₁ jme₁chí'₄ bá'₄ 'uig'₅₄ ne₄ 'lau₂.²⁶ La₁ ca₂le₃jín'₃
 jui₁lia'₂ dsa'₂ i₂nag'₅ jág'₁ quió'₃, tsá'₃ jmo₂₃ gué'₂ a₂juíg'₂ jniá'₂, lín'₅ jui₁lia'₂
 lín'₅ jan'₂ dsa'₂ co₄ i₂tsá'₃ 'en₅₄ dsí'₅, ca₂chi'₃ 'né'₅ quió'₅ ne₄ ti₁tsag₁.
²⁷ Jme₁ca₂já'₃ jmí'₅, ca₂jué'₂ jmig'₂ cuá'₃, ca₂'ág'₂ dsí'₂ tiá'₂ ca₂jnú'₃ dso'₂
 tsi₁'né'₅ jaun'₂; jaun'₂ ca₂qui'₃ ca₂gon'₃ gau₂ lín'₃.
²⁸ Jme₁ca₂lë'₃ juá'₂ Jesús jág'₁ le₂në'₅, 'ñio₅ lín'₃ qui₂dsi₂gó'₃ dsí'₅ dsa'₂ 'a₂
 lia'₂ lé'₅ jág'₁ a₂jme₂tag₂₃,²⁹ ia₁ jme₂tag₂₃ jui₁lia'₂ jan'₂ i₂quian'₅ 'éi'₃ dsón'₂,
 on₃juá'₅₄ rë'₂ lia'₂ tē₅juá'₅ quiáin'₅.

Ca₂jme₃'lión₂ Jesús jan₂ dsa₂ i₂lín₅ 'mé'₅ 'iog₅

(Marcos 1:40; Lucas 5:12-16)

8 ¹ Jme₁ca₂sión₃ Jesús má'₂, juin'₅ lín'₃ dsa'₂ jme₂quiong'₅₄. ² Jaun'₂
 ca₂jme₃quián₃ jan₂ dsa'₂ dso'₅₄ i₂lín₅ 'mé'₅ 'iog₅, ca₂chi₃jné'₃ ne₄
 Jesús, jaun'₂ ca₂juá'₂:
 —Chi₂juá'₂ 'niog'₂ 'ne₂, Te₁gui'₅₄, lé'₂ bá'₄ jme₁'lio'₅₄ jniá'₂.
³ Jaun'₂ Jesús né'₃ ca₂néi'₃ gu₂, ca₂jña'₃ quió'₅ dsa'₂ 'éi'₂, jaun'₂ ca₂juá'₂:
 —'Nio₃ bá'₄ jniá'₂. Jme₁'lióng₅₄ 'ne₂.
 Dsi₂jui₅ jme₁ca₂juá'₂ le₂në'₅, ca₂'lón₂ dsa'₂ 'éi'₂ 'mé'₅ 'iog₅ a₂jme₁lín₄.
⁴ Jaun'₂ ca₂juá'₂ Jesús:
 —Në'₃ jaun'₂, tsá'₃ lë'₁'ein₂ juig'₂ 'i₁jan₂; jñia'₅₄ lia'₂ guan'₂ o₂jme₁jnia₅
 ne₄ jme₂dsa₂, jaun'₂ o₂jen'₅₄ a₂'nió'₅ jme₁ti'₄ con'₂ lë'₅ 'Éi'₃ quió'₅ Moisés,
 ia₁jaun'₂ le₃ñi₅ dsa'₂ a₂ma₂le₁jíng'₃.⁸

'A₂ lia'₂ jme₁'én₂ jan₂ juig'₅₄ 'lióg₂ romano

(Lucas 7:1-10)

⁵ Jme₁ca₂'í₃ Jesús jë'₄ juig'₂ Capernaum, ca₂jme₃quián₃ jan₂ juig'₅₄ 'lióg₂
 romano coin₂, jaun'₂ ca₂mi₃ a₂jme₃'o₅₄ 'éi'₂, ca₂juá'₂:
⁶ —Te₁gui'₅₄, jan₂ dsó'₂ i₂jme₂ti₃ ta₁ ne₃, ron₅ dso'₅₄ ñág₅ uig₅ ja₁quió'₃;
 a₂'ua'₂ quió'₅, tsá'₃ lé'₂ jé'₂ gu₂-tag₅₄.
⁷ Jaun'₂ ca₂juá'₂ Jesús:

⁸4 'Í₂ Levítico 14.

—Nei₅₄ bá₄ jniá₂ i₁jme₁'lioín₁₂.

⁸ Jaun₂ ca₂ṇag₃ juig₅₄ 'lióg₂:

—Te₁gui₅₄, tsá₃ ca₂tín₂ jniá₂ jua₅₄ o₁'ú₃ 'ne₂ dsi₂néi₂ quió₃; jñia₅₄ lia₂ a₂jme₁jmó₂ 'éi₃ bá₄, jaun₂ 'lión₂ dsa₂ 'éi₂ quiáng₃. ⁹ Ia₁ le₂ně₅ bá₄ jniá₂ 'ñió₃, chéng₅ a₂jme₂ti₅₄ 'éi₃ quió₅ juig₃, ján₃ bá₄ le₂ně₅ te₁neg₅₄ 'lióg₂ i₂nio₅ gu₃, 'e₂ caun₂ 'nio₃ jniá₂ lé₂. Nē₁jua₂ ca₂juíg₂ jniá₂: “Gua₂ jó₄”, ja₁jaun₂ dsó₃ bá₄; nē₁jua₂ ca₂juíg₂ jniá₂ i₂sián₂ guē₂ táng₃: “Ñia₅”, jiá₃ bá₄. Nē₁jua₂ ca₂juíg₂ jniá₂ dsa₂ sián₂ quiáng₃: “O₂jmo₄ a₂la₂ a₂ó₃”, a₂jaun₂ dsi₃jmó₂ bá₄.

¹⁰ Jme₁ca₂nág₂ Jesús a₂juá₂ dsa₂ 'éi₂, ca₂i₃gó₃ dsí₅, jaun₂ ca₂tsí₃ dsa₂ i₂jme₁quian₅₄:

—A₂dsi₂jó₃ juá₅ jniá₂ juíg₂ 'nia₂, ca₂lia₂ 'i₁jan₂ dsa₂ juig₂ Israel, tsá₃ i₂ma₂jñ₄ jniá₂ i₂'én₂ gué₄ lín₃ lia₂ 'én₂ dsa₂ la₂. ¹¹ Jniá₂ juíg₂ 'nia₂, juin₅ dsa₂ i₂qui₂ja₃lén₂ ca₂le₂con₂ gua₅₄ 'uē₃, a₂tiain₃ co₂lě₅ gué₃ quian₅₄ Abraham, quian₅₄ Isaac, Jacob né₃ ja₁gon₂ Diú₄ guei₅₄ i₂juíg₃; ¹² la₁ dsa₂ i₂jme₁ca₂tín₂ tón₃ ja₁gon₂ Diú₄, dsi₃toin₅₄ jē₄ qui₁né₃ uíng₂, qui₂dsi₃'áu₃, quíg₃ jan₅₄.

¹³ Jaun₂ ca₂juá₂ Jesús ca₂tsí₃ juig₅₄ 'lióg₂:

—Guan₂ dsi₂néi₂ quiáng₂. Lé₂ bá₄ con₂ lě₅ 'éng₂.

Dsón₂ rē₂ hora jaun₂ ca₂'lón₂ dsó₂ mozo quián₅ dsa₂ 'éi₂.

Ca₂jme₃'lión₂ Jesús ma₂chog₅₄ Pe₄

(Marcos 1:29-31; Lucas 4:38-39)

¹⁴ Co₂ráun₂ ṇó₃ Jesús ja₁quió₄ Pe₄. Ja₁jaun₂ jme₁rē₂quian₅ ma₂chog₅₄ Pe₄ a₂dso₅₄ 'i₄ dséi₂. ¹⁵ Jaun₂ ca₂jñ₃ Jesús gu₂ dsa₂ dso₅₄, jaun₂ dsi₂jui₅ le₂jaun₂ bá₄ ca₂o₃'ág₃ dséi₂. Jaun₂ ca₂nau₂ ma₂chog₅₄ Pe₄ ca₂jme₃lióg₃ ca₂jme₃ti₃ ta₁ ne₄ mesa, a₂ag₃.

Ca₂jme₃'lión₂ Jesús juin₅ lín₃ dsa₂ dso₅₄

(Marcos 1:32-34; Lucas 4:40-41)

¹⁶ Le₃ca₂nei₂ jaun₂, juin₅ lín₃ dsa₂ i₂jio₅ jme₂dsí₂ je₂na₅₄, ca₂o₃jñia₃ dsa₂ ne₄ Jesús; jaun₂ quian₅₄ ca₂jon₄ jág₁ bá₄ ca₂'uín₂ jme₂dsí₂ 'lín₅₄. Jaun₂ ca₂jme₃'lióín₂ ján₃ ca₂le₃jín₃ dsa₂ dso₅₄. ¹⁷ Le₂ně₅ bá₄ ca₂rē₃ti₃ jág₁ quió₅ Isaías i₂jme₁'é₂ jág₁ o₄quió₄ Diú₄ jme₁ca₂juá₂:

'Éi₂ bá₄ ca₂jñiá₂ a₂jme₁'uau₅₄ jniog₄,

'éi₂ bá₄ ca₂can₃ guei₂ jmi₁uig₅ quián₂ jniog₄.^h

^h17 Isaías 53:4.

Dsa₂ i₂jme₁'nio₃ jme₃quian'₅₄ Jesús*(Lucas 9:57-62)*

¹⁸ Jme₁ca₂jág₃ Jesús juin₅ lin₃ dsa₂ le₁lio₃, jaun₂ ca₂jmo₃ 'éi'₃ a₂ñí₃ dsa₂ quiáin₅ të₂le₃ 'ño'₅₄ jmi₁ñí'₄. ¹⁹ Jaun₂ ca₂jme₃quián₃ jan₂ të₅juá'₅ coin₂, jaun₂ ca₂juá'₂:

—Të₅, nei₅₄ jniá₂ quian'₅₄ 'ne₂ ca₂le₂con₂ ja₁gog'₅₄.

²⁰ Jaun₂ ca₂ñag₃ Jesús:

—I₂cha₂ të₂'lau₂ quió'₅ bá₄ jui₁lia'₂ i₁güi₅, ján₃ bá₄ le₂jaun₂ jui₁lia'₂ i₁tan₅ i₂'in₅ guei'₅₄, i₂tio'₅₄ tsag₄ bá₄ 'éi'₂. La₁ Jaun₅ dsa₂ mi₂güig₃ né₃, tsá₃ ja₁cha₂ jua'₅₄ ja₁quióg₃ ca₂tiá₂.

²¹ Jan₂ guë'₂ i₂sián'₂ i₂jme₁ma₂ñó₅ quiong'₅₄ ca₂juá'₂:

—Te₁gui'₅₄, ¿tsa₁ cué'₁ jmig₄ a₂nég'₄ i₁'ong₃ de'₂ jniá₅ ñe'₃?

²² La₁ ca₂ñag₃ Jesús:

—Éin₃ 'ne₂ jniá₂, jui₁dsi₂'ón₃ bá₄ 'lag₄, 'lag₄ riin'₅₄.

Ca₂jmo₃ Jesús ca₂'ág₂ tei₄ jmi₁ñí'₄, ca₂jñia'₃ dsí₂ né₃*(Marcos 4:35-41; Lucas 8:22-25)*

²³ Jaun₂ né₃, ca₂'í₃ Jesús 'ñió'₃ tsi₁mu₅, quian'₅₄ dsa₂ i₂ma₂quiain'₅₄.

²⁴ Jme₁ma₂tioin'₅₄ ne₄ jmig₂, ca₂'ág₂ dsí₂ tiá₂ lin₃ con'₂ tsá₃ jáin₅. Ca₂lia'₂ ma₂dsi₂jein₃ jmig₂ 'ñió'₃ tsi₁mu₅. La₁ jme₁rë₂güín₃ bá₄ Jesús ñó₅. ²⁵ Jaun₂ ca₂i₁ñei₅₄ bá₄ dsa₂ quiáin₅, jaun₂ ca₂juá'₂:

—iTe₁gui'₅₄, lio₄! iIa₁ dsi₃'éin₂ jnia'₅₄ iⁱja₁lá₃!

²⁶ Jaun₂ ca₂ñag₃ Jesús:

—¿E₂ lë₃ ñí₄ lë₃ gan'₃ 'nia'₂ dsa₂ i₂tsá₃ lin₄ 'én₂?

Jaun₂ ca₂nau₂ ca₂jéin₂ dsí₂, jmi₁ñí'₄ né₃, jaun₂ co₂ñei'₅₄ ca₂të₁tsi'₅₄ táng₃ tei₄. ²⁷ Jaun₂ ca₂i₃gó'₃ dsí₅ dsa₂, qui₂ca₂ñí'₃ riin'₅₄:

—¿I₂'ein₂ bá₄ dsa₂ në₅, le₂jio₅ dsí₂ le₂jio₅ jmi₁ñí'₄ nag₅ gau₂ jág₁ quió'₅?

Dsa₂ i₂chan₂ Gadara i₂jme₁tion'₅₄ je₂na'₅₄ të₂dsí₅*(Marcos 5:1-20; Lucas 8:26-39)*

²⁸ Jme₂ca₂dsióg₃ Jesús le₃ca₂ton₂ jmi₁ñí'₄, të₂le₃ 'uë₃ Gadara,^j jaun₂ ca₂'uin₂ on₃ dsa₂ jë₄ le₁'on₅ 'lag₄, jaun₂ ca₂jme₃quiáin₃ con₂ Jesús. Le₃on₃ dsa₂ 'éi'₂ jme₁jio₅ je₂na'₅₄, jaun₂ 'ño₅ lin₃ jme₁tsau₂ dsí₅, 'i₁jan₂ dsa₂ tsá₃ 'ein₂ lé₂ le₃ñí₃ jui₅ jaun₂. ²⁹ Jaun₂ ca₂tóin'₂ co₂mi'₅₄ ca₂juá'₂ tiá₂:

—¿E₂ 'uig₅₄ tián'₅ 'ne₂ jë₄ quian'₅₄ jnia'₅₄, Jesús Ja₁ñi'₅₄ Diú₄? ¿A₂ñe'₃ 'ne₂ ja₁lá₃ a₂jmo₅ jnia'₅₄ të₃jñiá₅?

³⁰ Me'₂ cau₅ jaun₂, jme₁tion'₅₄ juin₅ i₁ñí₅ gué'₅; ³¹ jaun₂ qui₂ca₂mi₃ je₂na'₅₄ ne₄ Jesús, ca₂juá'₂:

ⁱ25 o₃, “jniog₄.”

^j28 A₂lin₅₄ chog₅₄ si₂ juá'₂: “Gerasa”; a₂siá'₂ guë'₂ né₃, juá'₂: “Gergesa.”

—Chi₂jua'₂ 'uag'₅₄ jnia'₅₄ ja₁lá₃, chei₅ jnia'₅₄ dsi₁tió'₄ quió'₅ i₁ñí₅ 'o₃.

³² Jaun₂ ca₂juá'₂ Jesús:

—O₂nó'₅ 'nia'₂.

Jaun₂ ca₂'uin₂ jme₂dsí'₂ 'lin'₅₄ tē₂dsí₅ dsa₂ 'éi₂, jaun₂ ca₂i₃toin'₅₄ tē₂dsí₅ i₁ñí₅. Dsi₂jui₅ le₂jaun₂ bá₄ ca₂i₁nio₁ co₂chi'₅₄ i₁ñí₅ cuing₂₃ jui₅ siá₅, jaun₂ ca₂i₁sein'₃ tē₂ jmi₁ñí'₄. Ja₁jaun₂ ca₂dsain₃ ca₂'in'₃ jmi₂g₂.

³³ Dsa₂ i₂jme₁jmo₅ 'í₁ i₁ñí₅ nē₃ ca₂cuing₃. Jme₁dsi₃lein₃ jē₄ juig₂ ca₂dsia₃ a₂ca₂lē₃ jaun₂, quian'₅₄ a₂ca₂lē₃ quian'₅₄ dsa₂ i₂jme₁tion'₅₄ je₂na'₅₄ nē₃. ³⁴ Ca₂le₃jín₃ dsa₂ chan₂ juig₂ jaun₂ nē₃ ca₂'uiin₂ i₃lén₂ ja₁'en₅₄ Jesús. Jaun₂ jme₁ca₂jín₂ Jesús nē₃, ca₂chi₃quióng₂ jmi₂g₄ a₂o₃'iin₅ le₂con₂ jaun₂.

Ca₂jme₃'lión₂ Jesús jan₂ dsa₂ 'lian'₂

(Marcos 2:1-12; Lucas 5:17-26)

9 ¹ Jaun₂ ca₂'í₃ Jesús 'ñi₁ó'₃ tsi₁mu₅, ca₂ñí₃ le₃'ño'₅₄ jmi₁ñí'₄, jaun₂ ca₂dsiáin'₃ juig₂ ja₁jme₁guá₄. ² Jaun₂ ca₂o₃jnia₃ dsa₂ jan₂ dsa₂ 'lian'₂, dsín₂ ne₄ tsi₁jein₁. Jme₁ca₂jág₃ Jesús a₂'én₂ dsa₂ 'éi₂ 'ñio₅ lín₃, ca₂tsí'₃ dsa₂ dso'₅₄:

—Jmo₄ lían'₂ 'au'₂, jón₃; ma₂rē₂'én₄ bá₄ dsáu'₂.

³ Jaun₂ ca₂i₃jio₅ dsí₅ i₂lín₅₄ tē₅juá'₅: “A₂'in₅ 'lig'₅₄ Diú₄ bá₄ i₂nē₅ a₂juá'₂ le₂nē₅.”

⁴ La₁ i₂ñi₅ rē₂ bá₄ Jesús a₂dsi₂jio₅ dsí₅ dsa₂ 'éi₂, jaun₂ ca₂juá'₂:

—¿E₂ lē₃ dsi₂jio₅ 'au'₂ 'nia'₂ 'lig'₅₄ le₂nē₅? ⁵ ¿Na₂ a₂'ua₁ gué₄ ta₁ jua'₅₄ a₂jme₁juig₅₄ jniá₂ dsa₂ la₂: “Ma₂rē₂'én₄ bá₄ dsáu'₂”, o₃ a₂jme₁juig₅₄ 'e₂ jniá₂: “Nau₂, ñi₄?” ⁶ Dse₃ jaun₂. La₂ jmo₅₄ jniá₂ jaun₂ le₃ñi'₅₄ 'nia'₂ a₂'io₅ 'éi'₃ Jaun₅ dsa₂ mi₂güí₃ ne₄ gua'₅₄ 'uē₃ a₂qui₃'éin₂ dsáu₁ dsa₂.

Jaun₂ gué₄ ca₂juá'₂ ca₂tsí'₃ dsa₂ 'lian'₂:

—Nau₂, quion₂ tsi₁jein₁ quiáng'₂, guan'₂ ja₁quiáng'₂.

⁷ Jaun₂ ca₂nau₂ bá₄ dsa₂ 'éi₂, ca₂ñái'₃ ja₁quió'₄. ⁸ Jme₁ca₂jág₃ dsa₂ a₂ca₂lē₃ jaun₂, ca₂i₃gó'₃ dsí₅, jaun₂ ca₂jme₃juiin'₂ Diú₄ ne₄ 'uig₅₄ ia₁ a₂ma₂cuē₃ bí₂ jaun₂ ma₂cuē₃ jan₂ dsa₂ mi₂güí₃.

Ca₂té'₃ Jesús Mateo

(Marcos 2:13-17; Lucas 5:27-32)

⁹ Ca₂o₃'ín₃ bá₄ Jesús ja₁jme₁'ein₅₄ jaun₂. Ja₁ño₄ jaun₂, ca₂jín₂ jan₂ dsa₂ i₂chen₂ Mateo, guá₅ caun₂ dsi₂néi₂ cán₂ 'lia'₅₄ o₄quió'₄ dsi₂tan₅₄. Jaun₂ ca₂juá'₂ Jesús ca₂tsí'₃ 'éi₂:

—'Éin₃ jniá₂.

Jaun₂ ca₂nau₂ bá₄ Tē₅₄, ca₂jme₃quiong'₅₄.

¹⁰ Ca₂lē₃ jme₁ma₂'en₅₄ Jesús gué₅ dsi₂néi₂ quió'₅ Tē₅₄, ca₂dsi₃lén₂ juin₅ gué₄ dsa₂ i₂cán₂ cu₄ riin'₅₄, dsa₂ “i₂le₁cán'₄ dso₄” sián'₂ gué₄ nē₃, ca₂i₃toin'₅₄ i₁guē₂ quiaín'₅₄ Jesús, quiaín'₅₄ dsa₂ i₂ma₂quiaín'₅₄ nē₃.

¹¹ Dsa₂ fariseos nē₃, jme₁ca₂jág₃ a₂nē₅, jaun₂ ca₂ñí'₃ dsa₂ quián₅ Jesús:

—ǎ'A₂ lia'₂ gué'₅ tē₅ quián'₂ 'nia'₂ co₂lě₅ quian'₅₄ dsa₂ i₂cán₂ 'lia'₅₄
quián₅ dsi₂tan₅₄, dsa₂ i₂le₁cán'₄ dso₄ nē₃?

¹² Ca₂nág₂ Jesús jág₁ jaun₂, jaun₂ ca₂juá'₂:

—On₃jua'₅₄ dsa₂ i₂qui₂le₁'ág₄ dse₃ dsí₅ i₂'nió'₅ tē₅mí₅ quió'₅; tē₂le₃
ja₁con₂ dsa₂ i₂le₁dso'₅₄ bá₄ 'nió'₅ quió'₅. ¹³ O₂nó'₅ 'nia'₂ o₂jme₁tin₅ 'e₂
jein₅ jág₁ la₂ tio'₅₄ ne₄ Si₂: “A₂'nio₃ jniá₂ dsiá'₁ 'nia'₂ nēi₂ 'au'₂ dsa₂
mi₂güig₃ ríng'₂, on₃jua'₅₄ rē'₂ a₂jnia'₅₄ qui₁jen'₄ 'nia'₂ 'e₂ qui₁jen'₄ ne₃.”^k
Ia₁ tsá₃ ta₁ jaun₂ guio₃ jniá₂ jua'₅₄ a₂tē₄ dsa₂ dsen₃; a₂tē₄ dsa₂ i₂le₁cán'₄
dso₄ bá₄ jniá₂ guio₃.

Ca₂ní'₃ dsa₂ Jesús jui₁lia'₂ jág₁ a₂jme₂'in₅₄ dsa₂

(Marcos 2:18-22; Lucas 5:33-39)

¹⁴ Jaun₂ ca₂dsi₃lén₂ dsa₂ i₂jme₁i₂nio₄ quian'₅₄ Juan₅₄ i₂chon₅ dsa₂ jmi₂
ca₂jme₃quiáin₃ ne₄ Jesús, jaun₂ ca₂nag₃:

—ǎ'A₂ lia'₂ jme₂'in₅₄ bá₄ dsa₂ fariseos, le₂jaun₂ gué'₂ jnia'₅₄ nē₃, la₁
dsa₂ i₂quian'₅₄ 'ne₂ gué'₂ tsá₃ jme₂'in₅₄?

¹⁵ Jaun₂ ca₂nag₃ Jesús:

—ǎLé₂ le₃tón'₃ 'lia'₂ dsí₅ jui₁lia'₂ dsa₂ i₂té₁ ja₁nio₅ jmi₂ ja₁jen'₂ gu₂
dsa₂, chi₂jua'₂ jaun₂ bá₄ guá₅ gué'₂ dsa₂ nē'₂ i₂jen'₂ gu₂? Já₅ jmi₂ jē₁ tsá₃
ma₃dsa₂ i₂jen'₂ gu₂ 'éi₂ chan₂ lé₂; jaun₂ gué'₄ tóin'₃ jme₃'in₅₄.

¹⁶ 'Ma₁ tsá₃ 'ein₂ tin₂ tíong₅ tsi₁'mí'₂ gui'₅₄ quian'₅₄ 'nau₅₄ tsi₁'mí'₂ 'mí₂.
Ia₁ dsán'₅ tsi₁'mí'₂ 'mí₂, jaun₂ jué'₂ gué'₄ ja₁gag₂ lé₂. ¹⁷ Ján₃ bá₄ le₂jaun₂
tsá₃ tia'₂ dsa₂ vino 'mí₂ 'ñi₃ ni₁lau₂ gui'₅₄, ia₁ ne'₂. Nē₅ bá₄ téin₃ vino,
ton'₂ dsi₃'én₂ ni₁lau₂ nē₃ nē₁jua'₂ ca₂jmo₃ dsa₂ le₂jaun₂. Jaun₂ lē₃, 'ñi₃
lau₂ 'mí₂ bá₄ 'nió'₅ tia'₃ dsa₂ vino 'mí₂, ia₁jaun₂ le₃tin₃ bá₄ lé₂ 'í₁.

Ja₁mí₄ Jairo, quian'₅₄ 'io₅₄ i₂ca₂ní'₃ tsin'₅₄ Jesús

(Marcos 5:21-43; Lucas 8:40-56)

¹⁸ Tē₃ 'en₅₄ Jesús dsia₂₃ jág₁, jme₁ca₂dsi₃og₃ jan₂ i₂nio₅ gu₂ guá'₅
sinagoga. Ca₂chi₃jné₃ ne₄ Jesús, jaun₂ ca₂juá'₂:

—Lia'₂ ca₂jon₃^l jan₂ chi'₂ dsa₂ mí₂ quiáng₃. La₁ nē₁jua'₂ gog'₅₄ 'ne₂
quian'₅₄ jniá₂ o₁quiog'₂ gog'₂ ne₄ quió'₅, le₃chain₂ bá₄ táng₃.

¹⁹ Jaun₂ ca₂nau₂ Jesús, jaun₂ ca₂ñó₃ quian'₅₄ dsa₂ 'éi₂, lia'₂
jma₃quian'₅₄ dsa₂ i₂ma₂ja₂lén₂ quiong'₅₄. ²⁰ Tē₃jē₄ jaun₂, ñó₃ jan₂ dsa₂
mí₂ i₂dso'₅₄ ma₂guia₃-tín₂ ñi₂ a₂tiin₂. Ca₂jme₃quiáin₃ tē₂le₃ chi₁co'₅₄
quió'₅ Jesús, jaun₂ ca₂ní'₂ chei'₅₄ tsin'₅₄ 'éi₂. ²¹ Ia₁ lín₂: “Tsá₃ nag₅₄
nē₁jua'₂ jnia'₅₄ níng'₄ ca₂juig₄ tsin'₅₄, jnia₃ quió₃.” ²² Jaun₂ ca₂jén'₃ Jesús,
ca₂jín₂ 'io₅₄, jaun₂ ca₂juá'₂:

—Jmo₄ lián'₂ 'au'₂, jón₃. Ma₂'lóng'₂ bá₄, ia₁ 'éng'₂.

Dsi₂jui₅ le₂jaun₂ bá₄ ca₂jnia₃ co₂ñei'₅₄ quió'₅.

^k13 Oseas 6:6.

^l18 o₃, “ma₂i₁jón₂”, lé₂ le₃jein₃ jág₁.

²³ Jme₁ca₂dsióg₃ Jesús ja₁quíó'₄ dsa₂ juig₅₄ sinagoga 'éi₂, jaun₂ ca₂jág₃ ma₂tion'₅₄ dsa₂ i₂jmo₅ son₅₄, ma₂tion'₅₄ dsa₂ juin₅ go₂'i₃ ně₃, qui'₂-o₂₃.

²⁴ Jaun₂ ca₂juá'₂:

—'Uín'₂ 'nia'₂ ja₁lá₃; tsá₃ rē₂jon₅₄ i₂bě'₅₄ ně₅. Jñia'₅₄ lia'₂ a₂rē₂güfín₃ bá₄.

La₁ jñia'₅₄ ca₂ñág₂ bá₄ dsa₂. ²⁵ Jme₁ma₂'uín'₂ dsa₂, jaun₂ ca₂'í₃ Jesús dsi₂néi₂, ca₂jña'₃ mi₂gu₂ i₂bě'₅₄, jaun₂ ca₂nau₂ bá₄ 'éi₂. ²⁶ Ca₂le₂con₂ juig₂ tio'₅₄ 'uē₃ jaun₂, ca₂i₃'ág₃ jág₁ a₂ca₂lē₃ jaun₂.

Ca₂jme₃'lión₂ Jesús on₃ dsa₂ ten₄

²⁷ Jme₁o₂'ín₃ Jesús ja₁jaun₂, ca₂'ein₃ on₃ dsa₂ ten₄, ja₂léin₂ tě₂ tiá₂:

—iDsia₄ ñéi₂ 'au'₂ jnia'₅₄, 'ne₂ tsi₁jon₂ David!

²⁸ Jme₁ca₂'í₃ Jesús dsi₂néi₂, ca₂jme₃quián₃ dsa₂ ten₄ 'éi₂ cau₅ quió'₅.
Jaun₂ ca₂ñag₃ Jesús:

—'Én'₂ 'nia'₂ a₂lé₂ le₃jme₁'lio₅₄ jniá'₂?

Jaun₂ ca₂ñag₃:

—'Éin₂ bá₄ jnia'₅₄, Te₁gui'₅₄.

²⁹ Jaun₂ ca₂ñí'₃ Jesús gu₂ jme₁ne₁₂ jaun₂ ca₂juá'₂:

—Jui₁le₅₄ bá₄ con'₂ lé₅ 'én'₂ 'nia'₂.

³⁰ Jaun₂ ca₂lág₃ bá₄ mi₂ne₄ dsa₂ 'éi₂. Jaun₂ ca₂jmo₃ Jesús 'éi'₃ ca₂juá'₂:

—Tě₃ñi'₅₄ 'nia'₂ jnag₅₄ tsá₃ 'ein₂ jui₁le₂ñi₅ a₂ně₅.

³¹ La₁ 'éi₂ ně₃, jme₁ca₂'uín₂ jaun₂, ca₂dsia₃ ca₂le₂con₂ ja₁tén₄ 'uē₃ jaun₂ 'e₂ a₂ca₂jmo₃ Jesús.

Ca₂jme₃'lión₂ Jesús jan₂ dsa₂ con₄

³² Jme₁ma₂'uín₂ dsa₂ i₂jme₁ten₄ 'éi₂, ca₂o₃lén₂ i₂sián'₂ táng₃ jñiai₂₃ jan₂ dsa₂ con₄ i₂'en₅₄ jme₂dsí₂ je₂na'₅₄. ³³ Dsi₂jui₅ jme₁ca₂dsen₅ Jesús je₂na'₅₄, jaun₂ ca₂jme₃lióg₃ dsa₂ con₄ 'éi₂ ca₂dsia₃ jág₁. Dsa₂ juin₅ i₂jme₁tion'₅₄ ca₂tě₂ ne₅₄, ca₂i₃gó'₃ dsí₅, jaun₂ ca₂dsia₃:

—Ca₂le₂con₂ 'uē₃ Israel la₂, tsá₃ 'ein₂ ma₂ca₂jág₃ a₂le₂ně₅.

³⁴ La₁ dsa₂ fariseos guē'₂ ně₃, ca₂juá'₂:

—Tě₂le₃ quian'₅₄ jui₅bí₂ quió'₅ 'ñiog₅ juig₅₄ je₂na'₅₄ bá₄, jmo₅ i₂ně₅ 'uín'₂ je₂na'₅₄.

Dsia₅ Jesús ñéi₂ dsí₅ dsa₂

³⁵ Ca₂ñi₃ Jesús ca₂le₂con₂ juig₂ ca'₅₄, ca₂le₂con₂ juig₂ pí'₁ ně₃, jme₂tiin₂₃ dsa₂ dsi₂néi₂ guá'₅ sinagogas. Jme₁'é₂ jág₁ dse₃ jui₁lia'₂ ja₁gon₂ Diú₄. Jme₁jme₂'lióin₂ dsa₂ ca₂le₃jě₃ ne₅₄ dso₄, quian'₅₄ ca₂le₃jě₃ jmi₁uig₅ a₂jme₁le₁quian₅ dsa₂. ³⁶ Jme₁ca₂jñin₂ dsa₂, ca₂tá'₂ ñéi₂ dsí₅, ia₁ jme₁chain₂ o₂i₁ dsi₅ ca₂lia'₂ ma₂ja₂'ú'₃ dsí₅ chain₂, ně₂jag₄ bá₄ já'₂ cha'₂ i₂tsá₃ chan₂ jmo₃ 'í₁. ³⁷ Jaun₂ ně₃ ca₂tsí'₃ dsa₂ i₂jme₁quian'₅₄:

—Dson'₂ bá₄ dsau₅ 'lióng₂ a₂ca₂rau₂, la₁ tsá₃ juin₅ dsa₂ i₂jmo₅ ta₁ ja₁nau₂.³⁸ Jaun₂ lë₃, mi₄ 'nia'₂ ne₄ juig₅₄ ja₁nau₂ a₂chein₃ guë₄ juin₅ dsa₂ i₂jmo₃ ta₁ ja₁nau₂ quió'₅.

Ca₂quión'₂ Jesús guia₃-tín₂ dsa₂ jë₄ quió'₅ dsa₂ quiáin₅
(Marcos 3:13-19; Lucas 6:12-16)

10 ¹Jaun₂ ca₂té'₃ Jesús chi'₂ dsi₂guia₃-tín₂ quiáin₅, jaun₂ ca₂cuë₃ bí₂ 'éi'₃ a₂'uín'₂ jme₂dsí₂ 'lín'₅₄, a₂qui₂jme₃'lióin₂ ca₂le₃jë₃ ne₅₄ dso₄ a₂niog₅ lín₅ dsa₂, ca₂le₃jë₃ jmi₁uig₅ né₃.

²Le₂la₂ bá₄ chen₂ ta₁guia₃-tín₂ dsa₂ i₂ca₂quión'₂ Jesús 'éi₂ quiáin₅: Si₂mu₅₄, i₁té'₂ dsa₂ Pe₄; quiaín'₅₄ Dré₄ riin'₅₄; Jacobo^m quian'₅₄ Juan₅₄ riin'₅₄, ja₁ñí'₄ Zebedeo; ³Fe₂li₄ quian'₅₄ Bartolomé; To₁má₄ né₃ quian'₅₄ Të₅₄ i₂jme₁cán₂ 'lia'₅₄ a₂ca₂tín₂ dsi₂tan₅₄; Jacobo i₂lín₅ ja₁ñí'₄ Alfeo; Tadeo né₃; ⁴Si₂mu₅₄ né₃ i₂té'₂ dsa₂ cananista;ⁿ Judas Iscariote né₃, i₂ca₂jín'₂ Jesús.

Ca₂chen₃ Jesús dsa₂ guia₃-tín₂ quiáin₅ a₂ca₂i'₁é₄ jág₁ dse₃
(Marcos 6:7-13; Lucas 9:1-6)

⁵Dsa₂ guia₃-tín₂ në₅ bá₄ ca₂chen₃ Jesús jme₁ma₂në₂cuë₃ jág₁ la₂: —Tsá₃ o₁nó'₅ 'nia'₂ jui₅ 'uë₃ go₄ dsi₂nau₂, on₃ guë'₂ o₂ton'₅₄ 'nia'₂ 'i₁caun₂ juig₂ a₂tén₅ 'uë₃ Samaria. ⁶Ja₁jaun₂ bá₄ o₂nó'₅ 'nia'₂ ja₁tion'₅₄ dsa₂ i₂lín₅ co₂'nió'₄ já'₂ cha'₂ i₂ma₂i₂cón'₅ i₂chan₂ juig₂ Israel. ⁷O₂nó'₅ 'nia'₂ qui₂o₂'ë₃ jág₁ dse₃ la₂ chei'₅₄ 'nia'₂ dsa₂, ma₂ja₂quián₃ 'éi'₃ quió'₅ Diú₄. ⁸O₂jmo₄ 'nia'₂ le₁jín₃ dsa₂ i₂lín₅ 'mé'₅ 'iog₅; ca₂le₃jín₃ guë'₂ i₂lín₅ dso₄ siá'₂ né₃, o₂jme₁'lioin₅₄; o₂jme₁jen'₅₄ 'nia'₂ 'lag₄; o₂'uin'₅₄ 'nia'₂ je₂na'₅₄ quió'₅ dsa₂ né₃. Jaun₂ le₂në₅ jui₁lia'₂ në₂gue'₅₄ 'nia'₂ bí₂ la₂ on₃jua'₅₄ a₂cha₂ 'lia'₅₄, le₂në₅ o₂jmo₄ 'nia'₂ ján₃, o₂cuë'₅₄ dsa₂ bí₂ tsá₃ 'lia'₅₄ cán'₁. ⁹Tsá₃ 'e₂ cán'₁ 'nia'₂, jui₁lia'₂ a₂'nió'₅ le₂'i₄ jui₅, on₃ guë'₂ cu₄nióg₄, on₃ guë'₂ cu₄tio₂, on₃ guë'₂ ñí₁ guéin₂ të₂lau₂ quiáng'₂, ¹⁰on₃ guë'₂ të₂'mí'₂ jua'₅₄ a₂to'₅₄ lio₅₄ cán'₁. Jmá'₃ co₂dsán'₃ tsín'₂ bá₄ 'nia'₂ cán'₁, tsá₃ cán'₁ 'nia'₂ lau₂ ton₂ tag'₅₄ a₂ñag₅₄ guë'₄ con'₂ a₂ma₂le₁ton₅ tag'₅₄, on₃ guë'₂ 'ma₂'i₅₄; ia₁ jui₁lia'₂ dsa₂ i₂jmo₅ ta₁, ca₂tín₂ bá₄ gue₃ má₃ quió'₅.

¹¹Jë₁ma₂ca₂dsi₃nó'₅ 'nia'₂ lia'₂ caun₂ juig₂ ca'₅₄ o₃ juig₂ pí'₁ 'e₂, ja₁jaun₂ jñia₄ 'nia'₂ ja₁quió'₄ dsa₂ i₂léi₄ dsen₃ 'ua₁ dsí₅, quió'₅ 'éi₂ tión'₂ 'nia'₂ ca₂lia'₂ ca₂té₂ jmig₄ i₁'uín'₃ táng₃. ¹²Jë₁ma₂té₂ rë₁tóng'₁ dsi₂néi₂ quió'₅, cuiin₅₄ 'nia'₂ Diú₄ jua'₅₄ 'nia'₂: “Jui₁'ei₅ bá₄ tei₄ dsi₂néi₂ la₂.”

¹³Në₁jua'₂ dsa₂ dsi₂néi₂ jaun₂ léi₄ gue₂₃ bá₄ lia'₂ i₁rë₂ jág₁, jág₁ quián'₂ 'nia'₂ a₂cuín'₅ Diú₄, jui₁të₂'ñiá₄ bá₄ 'ei₅ tei₄ ja₁con₂ dsa₂ 'éi₂ dsi₂néi₂

^m2 Jacobo: ján₃ bá₄ chein₂ Santiago.

ⁿ4 cananista: partido quió'₅ dsa₂ i₂'nio₃ táun₂ 'uë₃ 'éi'₃ quió'₅ Roma. Jma₃quén₅ ca₂quioin₃ le₃on₃ Si₂mu₅₄ 'éi₂, ia₁ ñí₄ lë₃ mei'₂ tsá₃ ca₂ne₅₄ a₂chein₂.

jaun₂. La₁ nē₁jua'₂ léi₄ tsá₃ dse₃ le₁'ág₄ dsí₅ dsa₂ gue₂₃ jág₁ quián'₂ 'nia'₂,
 jui₁tē₂'ñiá₄ bá₄ jág₁ 'ei₅ tei₄ jaun₂ ja₁con'₂ 'nia'₂ guiong'₅₄.¹⁴ Nē₁jua'₂
 cha₂ ja₁lin₅₄ tsá₃ 'nio₃ dsa₂ guein₃ 'nia'₂, on₃ guē'₂ 'nio₃ nag₃ jág₁ quián'₂
 'nia'₂ nē₃, co₂ñei'₅₄ 'uín'₂ 'nia'₂ dsi₂néi₂ jaun₂, o₃ juig₂ jaun₂, séi'₃ 'nia'₂
 'liog₂ tag'₅₄.¹⁵ Ia₁ a₂dsi₂jó'₃ juá'₅ jniá₂, jē₁ma₂tē₂ rē₁qui₃dsi₅ Diú₄ 'éi'₃,
 'ñio₅ guē₄ uig₅ gue₃ dsa₂ juig₂ jaun₂ con'₂ guē₄ dsa₂ i₂jme₁chan₂ Sodoma
 quian'₅₄ Gomorra.^o

Qui₂co₃'ein₃ dsa₂

(Marcos 13:9-13; Lucas 21:12-17)

¹⁶ 'Tsín₂ jniá₂ 'nia'₂ jaun₂, a₂lín'₅ nē₂jag₄ bá₄ já'₂ cha'₂ jin₄ co₂'nió'₄
 já'₂ tsau₂ dsí₅. Jmo₄ 'nia'₂ jaun₂ a₂lín'₅ dsa₂ i₂'io₅ mai₅₄ jui₁lia'₂ dsi₂mí'₂,
 ton'₂ 'ua₁ 'au'₂ 'nia'₂ jui₁lia'₂ lín₅ i₁ju₂.¹⁷ Rē₂ján'₁ 'nia'₂ jaun₂ ia₁
 qui₃jáng'₂ dsa₂ ne₄ dsi₂tan₅₄, qui₃bóg₂ dsa₂ nē₃ dsi₂néi₂ guá'₅ sinagogas.
¹⁸ Lia'₂ ne₄ dsi₄má'₂ lia'₂ ne₄ rag₅₄ nē₃, dsi₁jñia₃ dsa₂ 'nia'₂ 'uig₅₄ quió₃
 jniá₂; jaun₂ le₂nē₅ bá₄ lé₂ le₃o₁jang'₄ 'nia'₂ jág₁ dsau₅ ne₄ 'éi'₂, quian'₅₄
 ja₁con₂ dsi₂nau₂ sián'₂ nē₃.¹⁹ La₁ jē₁ma₂tē₂ rē₁qui₃jáng'₂ dsa₂ ne₄ta₁, tsá₃
 lē₁jmo₂ 'nia'₂ 'i₅ 'au'₂ 'e₂ jua'₅₄ o₃ 'a₂ lia'₂ ñag'₅₄; ia₁ jē₁ma₂tē₂ rē₁jua'₅₄
 'nia'₂ jág₁, Diú₄ bá₄ cuē₃ jág₁ a₂ñi'₅₄ 'nia'₂ 'a₂ lia'₂ ñag'₅₄ juig'₅₄ dsa₂.
²⁰ Ia₁ on₃jua'₅₄ guion'₅₄ 'nia'₂ jua'₅₄ jág₁; 'ñiog₅ bá₄ Jme₂dsí₂ quián₅ Nēi'₅
 'nia'₂ juá'₂ jui₅ tē₂'au'₂.

²¹ 'Ia₁ lé₂ táng₃, jui₁lia'₂ rin'₅₄ dsa₂ qui₃jín'₂ riin'₅₄ jaun₂ jñag'₃ dsa₂,
 jui₁lia'₂ jmei₂ guē'₂ dsa₂ qui₃jín'₂ chi'₂ quián₅; chi'₂ guē'₂ nē₃ qui₃náu₃
 'nei₂ jmái'₃ chog₅₄-jmei₂, qui₃jáng'₂ a₂jme₃dsiog₅ dsa₂.²² Ca₂le₃jín₃
 jui₁lia'₂ dsa₂ mi₂güí'₃ jme₃'ñiai₅₄ 'nia'₂ 'uig₅₄ quió₃ jniá₂; la₁ia₁ jui₁lia'₂
 i₂tión₂ tiá₂ ca₂tē₂ jē₁ca₂tó'₂, i₂'éi'₂ bá₄ i₂lión₂.²³ Jē₁ma₂qui₂co₃'ein₃ dsa₂
 jui₁lia'₂ caun₂ juig₂, cuíng₅ 'nia'₂ jui₅ juig₂ siá'₂ táng₃; a₂dsi₂jó'₃ juá'₅
 jniá₂, tē₃ tsá₃ ma₂lē₅ quen'₄ 'nia'₂ i₁niog₄ ca₂le₃jé₃ juig₂ ja₁tén₄ 'uē₃
 Israel, a₂guan'₂ táng₃ Jaun₅ dsa₂ mi₂güí'₃.

²⁴ 'Jui₁lia'₂ jan₂ i₂jme₂tin₅, tsá₃ juiin'₂ con'₂ guē₄ tē₅ quián₅; ján₃ bá₄
 le₂jaun₂ jui₁lia'₂ jan₂ dsa₂ i₂jme₂ti₃, tsá₃ juiin'₂ con'₂ guē₄ juig₅₄.²⁵ Tió'₅
 jui₁lia'₂ i₂jme₂tin₅ léin₂ jui₁lia'₂ lín₅ tē₅ quián₅; jui₁lia'₂ dsa₂ i₂jme₂ti₃
 guē'₂ nē₃, dsi₁léin₂ jui₁lia'₂ lín₅ juig₅₄. Chi₂jua'₂ 'ñiog₅ dsa₂ juin'₂ caun₂
 dsi₂néi₂ ma₂quion₅ dsa₂ Be'elzebú, i'ē₂ guē₄ bá₄ 'in₃ dsa₂, jui₁lia'₂
 i₂tion'₅₄ dsi₂néi₂ quió'₅!

'Ein₂ 'nió'₅ jme₃gan₃ dsa₂

(Lucas 12:2-7)

²⁶ 'Uig₅₄ jaun₂, tsá₃ lē₁jmo₂ 'nia'₂ gang'₃ dsa₂ mi₂güí'₃. Ia₁ 'i₁caun₂
 jui₁lia'₂ a₂rē₂jlē₅ tsá₃ cha₂ jua'₅₄ a₂tsá₃ le₃jniá₂, ján₃ bá₄ le₂jaun₂ jui₁lia'₂
 a₂rē₂'ma₄ tsá₃ cha₂ jua'₅₄ a₂tsá₃ le₃ñi₅ dsa₂.²⁷ Jui₁lia'₂ a₂juí'₂ jniá₂ 'nia'₂

^o15 Sodoma quian'₅₄ Gomorra: 'Í₂ Génesis 18-19.

la₂ jē₄ tē₃co'₅₄, jua'₅₄ 'nia'₂ tē₃jīn₄ dsa₂ juin₅; ján₃ bá₄ le₂jaun₂ jui₁lia'₂
a₂juí_{g2} jniá'₂ 'nia'₂ con'₂ tei₄, jua'₅₄ 'nia'₂ co₂mi'₅₄ jui₁lia'₂ ja₁nei₅.²⁸ Tsá₃
lě₁jmo₂ 'nia'₂ gang'₃ quian'₅₄ i₂jñi'₃ ni₁ñí₅, la₁ tē₂'au'₂ 'nia'₂ tsá₃ 'e₂ lé₂
le₃jmo₃; i₂'éi₂ bá₄ ca₂tín'₂ 'nia'₂ jme₁gang'₃ jui₁lia'₂ i₂lé₂ le₃jñi'₃ ni₁ñí₅
quian'₅₄ guē'₂ tē₂'au'₂ 'nia'₂ a₂jeng'₃ ja₁'lig'₅₄.

²⁹ 'Tsa₁ 'ni₅ dsa₂ on₃ i₁tan₅ pí'₁ quian'₅₄ caun₂ ñí₁ guéin₂? La₁ 'i₁jan₂
i₁tan₅ tsá₃ tián'₃ 'uē₃ jua'₅₄ tsá₃ ñi₅ Néi'₅ 'nia'₂.³⁰ Ia₁ le₂jio_{g5} ni₁jñi₂ dsei'₂
'nia'₂ le₁'í₁ je₂liá'₂ mi'₂ tí₅ ján₃.³¹ Tsá₃ lě₁jmo₂ 'nia'₂ gang'₃, ia₁ 'ñio₅ lín₃
gué'₄ quen'₄ 'nia'₂ lia'₂ con'₂ gué'₄ juin₅ lín₃ i₁tan₅.

Jui₁lia'₂ i₂jme₂jnia₅ a₂cuin₂₃ Jesucristo jin₄ dsa₂ mi₂güí_{g3}

(Lucas 12:8-9)

³² 'Jui₁lia'₂ i₂jme₂jnia₅ tē₂le₃ quió₃ jniá'₂ jin₄ dsa₂ mi₂güí_{g3}, ján₃ bá₄
le₂jaun₂ jniá'₂ nē₃ jme₁jniag₅ tē₂le₃ quió'₅ 'éi₂ ne₄ Ne'₃ i₂guá₅ guei'₅₄
i₂juí_{g3}; ³³ la₁ jui₁lia'₂ i₂jme₂jnia₅ a₂tsá₃ cuig₂₃ jniá'₂ jin₄ dsa₂ mi₂güí_{g3},
ján₃ bá₄ le₂jaun₂ jme₁jnia₅ jniá'₂ a₂tsá₃ cuín₅ ne₄ Ne'₃ i₂guá₅ guei'₅₄
i₂juí_{g3}.

Jesús bá₄ i₂'uin₄ a₂lé₂ le₁dson'₅₄ dsa₂

(Lucas 12:51-53; 14:26-27)

³⁴ 'Tsá₃ o₁len'₂ 'nia'₂ jua'₅₄ a₂guio₃ jniá'₂ a₂i₃'ei₃ tei₄ mi₂güí_{g3}; ia₁ tsá₃
ta₁ jaun₂ guio₃ jniá'₂ a₂i₃'ei₃ tei₄. Mi'₅₄ 'nei₂ bá₄ a₂quian₄ jniá'₂.³⁵ A₂jaun₂
bá₄ guio₃ jniá'₂ a₂i₃dsia₃ mi'₅₄ dsi₂néi₂:

Chi'₂ jme₃'ñiai₅₄ jmei₂,

chi'₂ ja₁míg₄ dsa₂ nē₃

jme₃'ñiai₅₄ chog₅₄;

i₂lín₅ mi₂lo₅₄ nē₃

tóin'₃ mi'₅₄ quian'₅₄ ma₂chog₅₄.

³⁶ Dsa₂ i₂lín₅ jmei₂ dsi₂néi₂

qui₂jme₃'iog₅₄ chi'₂ quiáin₅.^p

³⁷ 'Jui₁lia'₂ i₂'nio₃ gué'₄ 'ñio₅ lín₃ chog₅₄-jmei₂ lia'₂ con'₂ gué'₄ jniá'₂, tsá₃
ca₂tín₂ lén₂ dsa₂ quiáng₃; le₂nē₅ bá₄ ján₃, jui₁lia'₂ i₂'nio₃ 'ñio₅ lín₃ gué'₄
ja₁ñi'₅₄ o₃ ja₁míg₄ 'e₂, lia'₂ con'₂ gué'₄ jniá'₂, tsá₃ ca₂tín₂ lén₂ dsa₂
quiáng₃; ³⁸ jui₁lia'₂ i₂tsá₃ ca₂'ág₂ caun₂ dsí₅ ca₂join₃ chi₂jua'₂ ca₂join₃,^q
a₂jiá₃ chi₁co'₅₄ quió₃, tsá₃ ca₂tín₂ lén₂ dsa₂ quiáng₃. ³⁹ Jui₁lia'₂ i₂ñí₄ lě₃
'nio₃ lí'₂ le₃chain₂ dse₃, dsi₃'én₂ quió'₅; ján₃ bá₄ le₂nē₅, jui₁lia'₂
i₂ca₂guen₃ 'mú₃ o₄quió₃ jniá'₂, lí'₂ bá₄.

^p36 Miqueas 7:6.

^q38 lit. "i₂tsá₃ cán₂ cróg₄ quió'₅."

Co₂'nió'₄ 'lian'₅₄ dsa₂

(Marcos 9:41)

⁴⁰ 'Jui₁lia'₂ i₂guen₅ 'nia'₂, guei₂₃ jniá₂; jui₁lia'₂ i₂guei₅ jniá₂ guein₂₃ i₂ca₂chei₃ jniá₂ né₃. ⁴¹ I₂guen₅ jui₁lia'₂ jan₂ dsa₂ i₂'é₂ jág₁ o₄quió'₄ Diú₄ ia₁ a₂lín₅ i₂chen₄ quián₅ Diú₄, co₂jaun₂ bá₄ 'lia'₅₄ gue₃ ján₃ jui₁lia'₂ 'lian'₅₄ jan₂ i₂'é₂ jág₁ quián₅ Diú₄. Le₂nē₅ bá₄ ján₃, jui₁lia'₂ i₂guen₅ jan₂ dsa₂ dsen₃ ia₁ lín₅ dsa₂ dsen₃, gue₃ 'liain'₅₄ ján₃ con'₂ 'lia'₅₄ a₂ca₂tín₂ jan₂ dsa₂ dsen₃. ⁴² Jui₁'ein₂ gué₃ dsa₂ i₂cuē₅ caun₂ vaso jmi₂g₂ güí₂g'₂, cué'₅ jan₂ dsa₂ me'₂ le₂nē₅ quiáng₃ 'uig₅₄ ia₁ a₂'ein₂₃ jniá₂, a₂dsi₂jó'₃ juá'₅, tion₅₄ bá₄ gue₃ 'liain'₅₄.

Dsa₂ i₂chen₄ quián₅ Juan₅₄ i₂chon₅ dsa₂ jmi₂g₂

(Lucas 7:18-35)

11 ¹ Jme₁ca₂dsan₃ cuē₅ Jesús jág₁ nē₅ cué'₅ chi'₂ dsi₂guia₃-tín₂ quián₅, ca₂o₃'ín₃ táng₃ ja₁jaun₂, ca₂'í₃ jui₅ ca₂i₁'é₄ jág₁, i₂jme₁tiin₂₃ dsa₂ jui₂g₂ tio'₅₄ con'₂ ma₂quián₅ jaun₂.

² Juan₅₄ né₃, tē₃ 'ein₅₄ né₃ 'má₃, ca₂rē₃ni₅ 'a₂ lia'₂ lé₅ jmo₅ I₂rē₂'ín₁ quián₅ Diú₄. Jaun₂ ca₂chein₃ i₂lín₅₄ dsa₂ i₂jme₁quiain'₅₄ ³ a₂ca₂i₁ngag₁₂: —¿'Ne₂ lín₅ dsa₂ i₂lé₅ jág₁ jiá₃, o₃ njia₄ jnia'₅₄ i₂sián'₂ 'e₂?

⁴ Jaun₂ ca₂ngag₃ Jesús:

—O₂nó'₅ 'nia'₂ o₂chei'₅₄ Juan₅₄ 'e₂ a₂tē₅ ne'₅₄ 'nia'₂ la₂, 'e₂ a₂nag'₂ 'nia'₂ né₃. ⁵ O₂dsia₄ 'nia'₂ 'a₂ lia'₂ lé₅ qui₂jág₅ dsa₂ ten₄; dsa₂ i₂jme₁guan'₅₄ guē'₂ né₃, ma₂i₂nioi₅₄ rē'₂ táng₃; dsa₂ i₂jme₁lín₄ 'mé'₅ 'iog₅ ma₂le₁jín₃ táng₃ dso₄ a₂jme₁lín₄; dsa₂ i₂jme₁guin₄ guē'₂ né₃ ma₂nag₂₃; dsa₂ i₂ma₂dsan₃, jein'₅₄ táng₃; ja₁con₂ dsa₂ te₂né₂ né₃ dsi₂'ag₅ jág₁ dse₃ la₂ a₂lión₂ dsa₂. ⁶ 'E₂ gué₄ dsen₃ dsa₂ i₂tsá₃ 'ag₅ caun₂-tín₃ dsí₅ ja₁con₂ jniá₂.

⁷ Jme₁ma₂i₂len₃ dsa₂ 'éi₂, jaun₂ ca₂jme₃lióg₃ Jesús ca₂tsí'₃ dsa₂ a₂'iin₂₃ Juan₅₄:

—¿'E₂ jme₁lín'₂ 'nia'₂ jme₁tē₃ ne'₅₄ lia'₂ con'₂ jme₁i₁nóg'₄ 'uē₃ quein₂ co₂'ngiog₅ jaun₂? ¿O₃ bá₄ jme₁lín'₂ 'nia'₂ a₂jme₁jing'₄ jan₂ dsa₂ i₂lín₅ jui₁lia'₂ lé₅ ca₂'nau₂ ni₁'ma₂ ta₅ a₂lē₁qui₂bí₂ dsí₂ jui₅ la₂ jui₅ nē₅?

⁸ Chi₂jua'₂ tsá₃ le₂jaun₂ né₃, ¿'e₂ guē'₂ ca₂i₁jag'₄ 'nia'₂? ¿O₃ bá₄ a₂jme₁lín'₂ 'nia'₂ a₂jme₁jing'₄ jan₂ dsa₂ i₂qui'₂ tsin'₅₄ jlá'₁? La₁ on₃jua'₅₄ le₂jaun₂. Ia₁ jui₁lia'₂ dsa₂ i₂quí'₅ tsin'₅₄ jlá'₁, i₂tón'₅ dsi₂néi₂ quió'₅ rag₅₄ bá₄ i₂le₂'éi₂. ⁹ ¿'E₂ guē'₂ ca₂i₁jag'₄ 'nia'₂ jaun₂ né₃? ¿O₃ bá₄ jan₂ dsa₂ i₂'é₂ jág₁ quián₅ Diú₄ 'e₂? Dsón'₂ bá₄ jaun₂ juá'₅ jniá₂. I₂lín₅ tson₂ gué₄ jan₂ dsa₂ i₂'é₂ jág₁ quián₅ Diú₄ bá₄ 'éi₂. ¹⁰ Juan₅₄ 'éi₂ bá₄ i₂'in₅ Si₂ quió'₅ Diú₄ ja₁juá'₂:

- Tsing₅₄ jan₂ dsa₂ quiáng₃ ne₄ jui₅ quiáng'₂, jón₃,
a₂dsi₃can₅ jág₁, jmo₃ co₂jñia₅₄ jui₅.^r
- ¹¹ A₂dsi₂jó'₃ juíg₂ jniá'₂ 'nia'₂, 'i₁jan₂ dsa₂ i₂ma₂can₅ dsa₂ mí₂ i₂chan₂ mi₂güig₃, tsá₃ 'ein₂ ma₂lin₅ i₂juin'₂ gué₄ i₂'é₂ jág₁ o₄quió'₄ Diú₄, lia'₂ con'₂ gué₄ Juan₅₄ i₂chon₅ dsa₂ jmig₂. La₁ia₁, i₂lín₅ i₂me'₂ gué₄ja₁gon₂ Diú₄, i₂'éi₂ bá₄ lín₅ i₂juin'₂ gué₄lia'₂ con'₂ gué₄ Juan₅₄ 'éi₂.¹² Ca₂le₃ ca₂guan₃ Juan₅₄ i₂chon₅ dsa₂ jmig₂, ca₂tě₂ jmig₄ ně₃, con'₂ 'i₄ jui₅ bá₄ ma₂já₅ tiá₂ja₁gon₂ Diú₄. Jaun₂ dsa₂ con'₂ i₂tiá₂ dsí₅ bá₄ chan'₂ tiá₂ jui₅ jaun₂.^s ¹³ Ca₂le₃jín₃ dsa₂ i₂jme'₁'é₂ jág₁ quián₅ Diú₄, quian'₅₄ 'Éi'₃ quió'₅ Moisés ně₃, a₂jñia'₅₄ con'₂ ca₂'é₂ jág₁ja₁gon₂ Diú₄ bá₄ jaun₂, ca₂lia'₂ ca₂tě₂ jmig₄ jme₁ca₂guan₃ Juan₅₄.¹⁴ Ján₃ bá₄ chi₂jua'₂ 'niog'₂ 'nia'₂ guéi'₁ jág₁ la₂, Juan₅₄ 'éi₂ bá₄ i₂ca₂jme₃ti₃ jág₁ a₂lé₅ a₂jme₁jiá₃ Elías.¹⁵ Jui₁lia'₂ i₂le₁dsi₅₄ rě₂gua₄, jui₁nei₅₄.
- ¹⁶ 'i'E₂ quian'₅₄ lé₂ le₃quíng₄ a₂lín₅ dsa₂ i₂chan₂ jmig₄ ně₃? Lín₅ jui₁lia'₂ lín₅ i₂bě'₅₄ i₂tion'₅₄ co₅ jě₄ 'ma'₅₄, tioen'₅₄ co₂mi'₅₄ qui₂guió'₅ tsí'₅ riin'₅₄.
- ¹⁷ Ně₂jéi₄ jnia'₅₄ te₁fi₁ o₄quián'₂ 'nia'₂,
la₁ tsá₃ ně₂dsián'₃ guě'₂ 'nia'₂;
ján₃ guě'₂ ně₂jmo₁ jnia'₅₄ son₅₄ quió'₅ 'lag₄
a₂ta'₂ 'lia'₂ dsí₅ dsa₂,
la₁ tsá₃ ca₂tá'₂ guě'₂ qui'₂ 'au'₂ 'nia'₂.
- ¹⁸ Ia₁ ca₂guan₃ Juan₅₄, i₂tsá₃ 'e₂ 'lióng₂ jme₁guě'₅ on₃ guě'₂ 'e₂ jme₁'ín'₂ ně₃, jaun₂ ca₂'ag₃ dsa₂ a₂'ein₅₄ je₂na'₅₄.¹⁹ Ca₂guan₃ guě'₂ táng₃ Jaun₅ dsa₂ mi₂güig₃ i₂guě'₅ i₂'ín'₂, 'ag₅ táng₃ dsa₂ a₂lín₅ jlé₂ 'í₅ quian'₅₄ má₄ jmig₃, a₂lín₅ a₂mei₅₄ quián₅ dsa₂ cha₂ dsáu₁, quian'₅₄ dsa₂ i₂cán₂ 'lia'₅₄ quián₅ dsi₂tan₅₄ ně₃. La₁ tion₅₄ bá₄ le₃lí'₄ dsa₂ a₂dsau₅ jág₁ a₂ñí'₂ dsí₅ Diú₄, 'uig₅₄ ia₁ ñí'₂ bá₄ dsí₅ dsa₂ i₂gue₅ jág₁ ně₅.

Juig₂ jě₁tsá₃ ne'₅₄ dsa₂

(Lucas 10:13-15)

- ²⁰ Jaun₂ ně₃, ca₂jme₃lióg₃ Jesús qui₂ca₂jéin₂ dsa₂ ja₁'lióng₂ gué₄ léi₄ juě'₂ ma₂qui₂ma₂jmo₃, ia₁ tsá₃ ma₂jéin'₃ dsa₂ dsí₅. Jaun₂ ca₂juá'₂:
- ²¹ —i'E₂ gué₄ juíg'₂ 'nia'₂ dsa₂ juig₂ Corazín! i'E₂ gué₄ juíg'₂ 'nia'₂ i₂chan₂ Betsaida! Ia₁ jua'₅₄ mei'₂ guě₃ jniá₂ ma₂jmo₃ léi₄ juě'₂ ně₅ jě₄ juig₂ Tiro quian'₅₄ juig₂ Sidón jui₁lia'₂ a₂ma₂jmo₃ jniá₂ jě₄ quián'₂ 'nia'₂, líg'₂ bá₄ tsá₃ ma₂ca₂jéin'₃ dsa₂ 'éi₂ dsí₅, jme₁cuě₃ léi₄ a₂qui'₂ dsí₅ jme₁i₃nioi₅₄ le₁qui'₂ 'mi'₂ taun₅ qui₂le₁séin₅ ti₁juá₃ ně₃.²² La₁ juig₂ jniá₂ 'nia'₂, jmig₄ i₁qui₃dsi₅ Diú₄ 'éi'₃, ja₂lín₃ gué₄ tson₂ uig₅ a₂guéi'₁ 'nia'₂ con'₂ gué₄ dsa₂ i₂jme₁chan₂ Tiro quian'₅₄ Sidón.²³ 'Nia'₂ guě'₂ dsa₂

^r10 Malaquías 3:1.

^s12 o₃, “ca₂tě₃ jmig₄ ně₃, ma₂já'₅ ja₁gon₂ Diú₄ ně₂jag₄ bá₄ a₂lé₂ 'nei₂. Jaun₂ dsa₂ i₂con'₂ qui₂jmo₂₃ 'nei₂ ně₃, 'nio₃ join₅₄ jui₁lia'₂ dsa₂ i₂i₂nio₄ jui₅ jaun₂.”

i₂chan₂ juig₂ Capernaum, ðlín'₂ 'nia'₂ a₂uig'₅₄ guei'₅₄ lín'₃? On₃jua'₅₄
 le₂jaun₂. Të₂ ja₁jí'₂ lín₃ ja₁tion'₅₄ 'lag₄^t bá₄ sén'₂ 'nia'₂. Ia₁ jua'₂ mei'₂ gué'₃
 jniá'₂ ca₂jmo₃ léi'₄ juë'₂ jë₄ juig₂ Sodoma jui₁lia'₂ a₂ma₂ca₂jmo₃ jniá'₂ jë₄
 quián'₂ 'nia'₂, a₂nio₅ bá₄ juig₂ jaun₂ ca₂të₂ jmig₄ né₃.²⁴ Jaun₂ juá'₅ jniá'₂,
 jmig₄ jë₁ma₂të₂ rë₁qui₃dsi₅ Diú₄ 'éi'₃, 'ñio₅ gué'₄ uig₅ guéi'₁ 'nia'₂ con'₂
 gué'₄ dsa₂ i₂jme₁chan₂ juig₂ Sodoma.

Ja₁jñia₅ dsa₂ i₂ma₂'ú'₃
 (Lucas 10:21-22)

²⁵ Jmig₄ jaun₂ ca₂juá'₂ Jesús:

—Jme₁juín'₁ jniá'₂ 'ne₂, Tia₅₄, i₂lín'₅ juig₅₄ gua'₅₄ 'uë₃ quian'₅₄ guei'₅₄
 i₂juíg₃, ia₁ ca₂'ma'₅₄ a₂në₅ ja₁con₂ dsa₂ i₂tín₂ si₂, i₂ñí'₂ dsi₅,
 a₂ma₂ca₂jme₁jniag'₂ ja₁con₂ dsa₂ i₂lín₅ lia'₂ lín₅ guein₂, i₂tsá₃ 'e₂ cuí'₅.

²⁶ Dsón'₂ bá₄ jaun₂, Tia₅₄, ia₁ le₂në₅ ca₂rë₃ 'ñió₃ 'au'₂.

²⁷ Jaun₂ ca₂tsí'₃ dsa₂:

—O₄gu₃ jniá'₂ ma₂ca₂dsia₃ Ne'₃ ca₂le₃jé₃. 'I₁jan₂ tsá₃ 'ein₂ cuín₅ Ja₁ñi'₅₄
 Diú₄ 'a₂ lia'₂ të₃dsón'₂ lín₅, jñia'₅₄ lia'₂ 'ñiog₅ bá₄ Jmei₂; ján₃ bá₄ 'i₁jan₂
 tsá₃ 'ein₂ cuín₅ Jmei₂ 'a₂ lia'₂ të₃dsón'₂ lín₅, jñia'₅₄ lia'₂ 'ñiog₅ bá₄
 Ja₁ñi'₅₄ táng₃, ján₃ bá₄ jme₃jñiai₂₃ ja₁con₂ i₂'nio₃ le₃ñi₅.²⁸ I₂nó'₅ 'nia'₂
 ja₁con₂ jniá'₂, ca₂le₃jín'₃ 'nia'₂ i₂qui₂ma₂'ú'₃ dsi₅, i₂qui₂le₁quian₅ guei₂,
 jaun₂ cuë₅₄ jniá'₂ ja₁jan'₄ 'nia'₂.²⁹ Gue₄ 'nia'₂ ta₁ quió₃ a₂cué₅ jniá'₂ 'nia'₂,
 jme₁tín₅ 'nia'₂ jmó'₂ ján₃, 'a₂ lia'₂ lín₅ jniá'₂, ia₁ juín'₂ dsi₃ lín₅, meg'₂ bá₄
 lé₅ dsi₃; jaun₂ le₂në₅ bá₄ dsi₁nó'₅ 'nia'₂ dsiang'₂ ja₁jñia₃ të₂'au'₂.³⁰ Ia₁ ta₁
 a₂cué₅ jniá'₂ 'nia'₂, on₃jua'₅₄ a₂'ua'₂ ta₁; ján₃ bá₄ le₂jaun₂ on₃jua'₅₄ a₂guei₂
 cán'₁ 'nia'₂ a₂cué₅ jniá'₂ 'nia'₂.

Jesús bá₄ i₂quian₅ 'éi'₃ ne₄ quió'₅ jmig₄ sa₅₄
 (Marcos 2:23-28; Lucas 6:1-5)

12 ¹ Jmig₄ jaun₂ ca₂ñi₃ Jesús ja₁lé₄ ja₁nau₂ quió'₅ dsa₂ caun₂
 jmig₄ sa₅₄. Dsa₂ i₂quian'₅₄ né₃ ca₂tá'₂ i₁cón'₅, jaun₂
 qui₂ca₂gág₃ mí'₂ trigo, jaun₂ ca₂gué'₃.² Jme₁ca₂jág₂ dsa₂ fairseos, jaun₂
 ca₂o₃léin₂ ca₂tsí'₃ Jesús:

—Jag₄ 'a₂ lia'₂ tion'₅₄ dsa₂ quiáng'₂ jmo₂₃ ta₁ a₂tsá₃ 'i₄ 'éi'₃ jmo₃ dsa₂
 jmig₄ sa₅₄.

³ Jaun₂ ca₂ñag₃ Jesús:

—¿Tsa₁ ma₂ca₂'í'₂ 'nia'₂ ne₄ Si₂ 'a₂ lia'₂ lé₅ ca₂jmo₃ David co₂ráun₂
 jme₁ca₂lë₃ i₁cón'₅ quian'₅₄ riin'₅₄?⁴ Ca₂'í₃ dsi₂néi₂ quió'₅ Diú₄, ca₂gué'₃
 i₁ñí'₄ jñió₅, a₂tsá₃ jme₁'i₄ 'éi'₃ gué'₃, a₂'i₄ 'éi'₃ gué'₃ jmá'₃ jme₂dsa₂.⁵ ¿O₃
 tsa₁ ma₂ca₂'í'₂ 'nia'₂ ne₄ Si₂ 'Éi'₃ quió'₅ Moisés, jui₁lia'₂ jme₂dsa₂ tsá₃
 jme₂gó'₃ jmig₄ sa₅₄? La₁ tsá₃ 'ein₂ bón'₂ guë'₂ dso₄ 'éi₂ né₃.⁶ Juíg₂ jniá'₂
 'nia'₂, ja₁lá₃ chén'₅ jan₂ i₂juín'₂ gué'₄ con'₂ gué'₄ guá'₅ templo.⁷ Jua'₅₄

^t23 griego: hades, co₂'nió'₄ a₂juá'₂, ja₁quió'₄ 'lag₄.

mei'₂ gué'₃ ma₂ñí'₂ 'nia'₂ 'e₂ jein₅ jág₁ la₂: “A₂'nio₃ jniá₂ a₂dsiá'₁ 'nia'₂
 ñéi'₂ 'au'₂, on₃jua'₅₄ rē'₂ a₂ñia'₅₄ qui₁jen'₅₄ 'nia'₂ 'e₂ qui₁jen'₅₄ ne₃”,^u tsá₃
 jua'₅₄ jme₁ bong'₅₄ dso₄ dsa₂ i₂tsá₃ 'e₂ dso₄ rin₂. ⁸ Ia₁ le₂nē₅ jaun₂, jniá₂,
 Jaun₅ dsa₂ mi₂güí'₃, jmo₂₃ 'éi'₃ jui₁lia'₂ jmig₄ sa₅₄.

Jan₂ dsa₂ jle₅ caun₂ gu₂
 (Marcos 3:1-6; Lucas 6:6-11)

⁹ Ca₂o₃'ín₃ bá₄ Jesús ja₁jaun₂, jaun₂ ca₂'í₃ táng₃ dsi₂néi₂ guá'₅
 sinagoga. ¹⁰ Ja₁jaun₂ jme₁'en₅₄ jan₂ dsa₂ i₂jle₅ caun₂ mi₂gu₂. Dsa₂ fariseos
 né₃ jme₁'nio₃ 'no'₂ jui₅ bóin'₂ dso₄ Jesús, jaun₂ ca₂ñag₃:

—¿I₄ 'éi'₃ jme₃'lión₂ dsa₂ jan₂ dsa₂ dso'₅₄ jme₁jmig₄ sa₅₄?

¹¹ Jaun₂ ca₂ñag₃ Jesús:

—¿Ein₂ 'nia'₂, i₂'ño₅ jan₂ já'₂ cha'₂, nē₁jua'₂ ca₂bain₃ siá₅ jui₁lia'₂
 caun₂ jmig₄ sa₅₄, tsa₁ dsó₅ dsi₃dsein₂₃ já'₂ quiáin₅? ¹² i'Ē₂ gué'₄ bá₄ quen₅
 jan₂ dsa₂ con'₂ gué'₄ jan₂ já'₂ cha'₂! Jaun₂ lē₃, 'i₄ bá₄ 'éi'₃ jmo₃ dsa₂ a₂dse₃
 jui₁lia'₂ jmig₄ sa₅₄.

¹³ Jaun₂ gué'₄ ca₂tsí'₃ dsa₂ dso'₅₄ 'éi₂:

—Nei'₅₄ gog'₂.

Jaun₂ ca₂néi'₃ 'éi₂ gu₂, ca₂ñia₃ quió'₅, jaun₂ ca₂lē₃ co₂rē₂ quian'₅₄
 a₂caun₂. ¹⁴ Ca₂'uín₂ bá₄ dsa₂ fariseos 'éi₂ né₃, jaun₂ ca₂jmo₃ jág₁ a₂ñii'₃
 Jesús.

Jui₁lia'₂ dsa₂ i₂ca₂quió'₂ Diú₄ a₂jme₃ti₃ ta₁ ne₅₄,
jág₁ a₂ca₂'ē₂ dsa₂ i₂ca₂juá'₂ o₄quió'₄ Diú₄

¹⁵ Jme₁ca₂rē₃ñi₅ Jesús jág₁ jaun₂, ca₂o₃'ín₃ bá₄. Jaun₂ juin₅ lin₃ dsa₂
 i₃lén₂ chi₁co'₅₄ quió'₅ 'ein₂₃. Jme₁jme₂'lión₂ Jesús ca₂le₃jín₃ dsa₂
 i₂le₁dso'₅₄, ¹⁶ jaun₂ ca₂juá'₂ a₂tsá₃ 'e₂ dsia₃ dsa₂ jua'₅₄ a₂'ag₃ 'ein₂ lín₅.
¹⁷ Le₂nē₅ bá₄ ca₂lē₃ ia₁jaun₂ le₃ti₃ jág₁ a₂ca₂'ē₂ Isaías, dsa₂ i₂jme₁'ē₂ jág₁
 quián₅ Diú₄, jme₁ca₂juá'₂ le₂la₂:

¹⁸ I₂la₂ bá₄ dsa₂ i₂jme₃ti₃ ta₁ ne₃,
 i₂ma₂ca₂quiong'₅₄, i₂'nióg₃ gué'₄ lín₃,
 jaun₂ 'io'₂ jéin₅ jniá₂ quiain'₅₄.

Tón'₁ jniá₂ Jme₂dsí₂ quiáng₃ tē₂dsí₅,
 jaun₂ jme₃jniái₂₃ ca₂le₃jé₃ juig₂
 jin₄ dsi₂nau₂ 'ē₃ jui₅ dsau₅ tē₃dsón'₂.

¹⁹ Tsá₃ quein₅ náu₃, on₃ guē'₂ guió'₃,
 on₃ guē'₂ né'₂ jág₁ quió'₅ jē₄ calle,

²⁰ Lia'₂ 'i₁ca₂tag₄ ni₁'ma₂ ta₅ tsá₃ jio₃,
 on₃ guē'₂ ei₃ ni₁mecha a₂ca₂juig₄ 'ia₂ gué'₄ jme₁ñi₁.
 Jmo₃ le₂nē₅ ca₂lia'₂ ca₂tió'₃
 a₂lí'₂ a₂dsi₂ten₅₄ dsón'₂.

^u7 Oseas 6:6.

²¹ Jaun₂ caun₂ ja₁con₂ 'éi₂ bá₄
 'ag₃ dsa₂ caun₂ dsí₅
 ca₂le₃jín₃ dsa₂ i₂chan₂ ca₂le₃jé₃ juig₂.^v

Juá'₂ dsa₂ a₂'io₅ Jesús jui₅bí₂ quió'₅ Be'elzebú

(Marcos 3:19-30; Lucas 11:14-23; 12:10)

²² Jaun₂ ca₂o₃jñia₃ dsa₂ ja₁coin₂ jan₂ dsa₂ ten₄ i₂con₄ né₃ i₂jme₁'en₅₄
 jan₂ jme₂dsí₂ je₂na'₅₄. Jesús né₃ ca₂jme₃'lió₂, ca₂jág₃ táng₃ dse₃, ca₂dsia₃
 dse₃ jág₁ né₃. ²³ Ca₂i₃gó'₃ dsí₅ ca₂le₃jín₃ dsa₂, jaun₂ ca₂juá'₂:

—¿On₁jua'₅₄ i₂nē₅ lín₅ tsi₁jon₂ David?

²⁴ La₁ jme₁ca₂nág₂ dsa₂ fariseos jág₁ jaun₂, ca₂dsia₃ jág₁ quian'₅₄
 riin'₅₄:

—A₂'uin'₂ i₂nē₅ je₂na'₅₄ quió'₅ dsa₂ tē₂le₃ quian'₅₄ jui₅bí₂ quió'₅
 Be'elzebú, juig₅₄ je₂na'₅₄ bá₄.

²⁵ La₁ i₂ñi₅ rē₂ bá₄ Jesús 'e₂ dsi₂jio₅ dsí₅ dsa₂ 'éi₂, jaun₂ ca₂juá'₂:

—Jui₁lia'₂ dsi₂tan₅₄ tion'₅₄ le₁dsoin'₅₄, nió'₅ mi'₅₄, tsá₃ ué₂ tió'₅ jua'₅₄
 tsá₃ dsi₃'én₂ 'éi'₃ quió'₅. Le₂nē₅ bá₄ ján₃ jui₁lia'₂ dsa₂ caun₂ dsi₂néi₂,
 nē₁jua'₂ lé₅ le₁dsoin'₅₄, niog₅ mi'₅₄, ján₃ bá₄ tsá₃ ué₂ tió'₅. ²⁶ Ján₃ bá₄
 le₂nē₅, nē₁jua'₂ ca₂jmo₃ Satanás mi'₅₄ dsein₂₃ jan₂ i₂quiáin₅ 'ñiog₅,
 co₂'nió'₄ 'ñiog₅ bá₄ jmo₂₃ le₁dsoin'₅₄. ¿'A₂ lia'₂ lé₂ le₃'io₃ gué₄ bí₂ 'éi'₃
 quió'₅, chi₂jua'₂ le₂jaun₂? ²⁷ Chi₂jua'₂ jniá₂ 'uig'₅₄ je₂na'₅₄ quian'₅₄ bí₂
 quió'₅ Be'elzebú jui₁lia'₂ juá'₂ 'nia'₂, ¿ein₂ bá₄ gué'₂ cuē₅ bí₂ cué'₅ dsa₂
 quián'₂ 'nia'₂ a₂'uíin'₂ je₂na'₅₄ jaun₂ né₃? 'Uig₅₄ jaun₂, guion₅₄ bá₄ dsa₂
 quiáng'₂ jme₃li₅₄ a₂lín'₅ 'nia'₂ guiong'₅₄. ²⁸ La₁ jniá₂ né₃ nē₂'uig'₅₄
 je₂na'₅₄ tē₂le₃ quian'₅₄ bí₂ quió'₅ Jme₂dsí₂ quián₅ Diú₄. Jaun₂ né₃ le₂nē₅
 bá₄ cuē₅ jniá₂ léi₄ a₂ma₂gua₅ 'éi'₃ quió'₅ Diú₄ ja₁con'₂ 'nia'₂.

²⁹ 'Jaun₂ né₃, ¿'a₂ lia'₂ lé₂ le₃'í₂ jan₂ dsa₂ dsi₂néi₂ quió'₅ jui₁lia'₂ jan₂
 dsa₂ i₂'uan'₂, a₂jñiá'₃ a₂te₁'i₁ quió'₅, chi₂jua'₂ le₂'uig₅₄ tsá₃ ma₂nē₂'nei'₂
 de'₂ dsa₂? Jñia'₅₄ lia'₂ le₂jaun₂ bá₄ lé₂ le₃jñiá'₃ a₂cha₂ quió'₅.

³⁰ 'I₂tsá₃ tión₂ le₃quió₃ jniá₂, dsa₂ i₂'iog₅₄ jniá₂ bá₄ 'éi₂; le₂jaun₂ gué'₂
 i₂tsá₃ quian'₅₄ jniá₂ cág'₅, jñia'₅₄ jmo₂₃ tsi₁rē₂ja₅₄ bá₄. ³¹ Juíg₂ jniá₂ 'nia'₂
 jaun₂ né₃, a₂lé₂ le₃'én₂ bá₄ ca₂le₃jé₃ dsáu₁ dsa₂, ca₂le₃jé₃ 'e₂ a₂'lig'₅₄ juá'₂
 né₃. La₁ nē₁jua'₂ ca₂'iin₃ 'lig'₅₄ Jme₂dsí₂ quián₅ Diú₄, a₂nē₅ gué₄ tsá₃
 ma₃o₂'én₂ dso₄ cha₂. ³² La₁ nē₁jua'₂ chan₂ i₂ca₂'in₃ 'lig'₅₄ Jaun₅ dsa₂
 mi₂güí₃, lé₂ bá₄ le₂'én₂ dsáu₁; la₁ jui₁lia'₂ i₂'in₅ 'lig'₅₄ Jme₂dsí₂ Jñi₅,
 tsá₃ ma₃o₂'én₂ dso₄ cha₂ quió'₅, mi₂güí₃ la₂, on₃ gué'₂ mi₂güí₃ caun₂
 né₃.

^v 18-21 Isaías 42:1-4.

Të₂le₃ 'a₂ lia'₂ lé₅ míg₂ a₂'ag₅ bá₄ nī₁'ma₂, jáng'₅ léi₄

(Lucas 6:43-45)

³³ 'Chi₂jua'₂ jmo'₂ 'nia'₂ a₂le₃dse₃ nī₁'ma₂, míg₂ dse₃ bá₄ 'ag₃; la₁ chi₂jua'₂ jmo'₂ 'nia'₂ a₂le₃'lig'₅₄ nī₁'ma₂, míg₂ 'lig'₅₄ bá₄ 'ag₃ jáng₃. 'Uig₅₄ jaun₂, të₂le₃ quian'₅₄ míg₂ a₂'ag₅ bá₄ nī₁'ma₂, jáng'₅ léi₄ chi₂jua'₂ dse₃ o₃ a₂'lig'₅₄ 'e₂. ³⁴ i'Nia'₂ tsi₁jon₂ dsi₂mi'₂! ¿'A₂ bá₄ lia'₂ lé₂ le₃dsiá'₁ 'nia'₂ jág₁ dse₃, ton'₂ 'lín'₅₄ bá₄ guë'₂ 'nia'₂ guiong'₅₄? Ia₁ lia'₂ con'₂ lé₅ a₂'lióng₂ ñag₅₄ cha₂ të₂dsí₅ dsa₂, a₂jaun₂ bá₄ 'uë₂ mi₂'o₅₄. ³⁵ Jui₁lia'₂ dsa₂ dsen₃, jág₁ dse₃ bá₄ dsia₂₃, ia₁ jmá'₃ lia'₂ a₂dse₃ bá₄ rë₂'ma₄ të₂dsí₅; le₂në₅ bá₄ jui₁lia'₂ dsa₂ 'lín'₅₄, jág₁ 'lig'₅₄ bá₄ dsia₂₃, ia₁ jmá'₃ lia'₂ a₂'lig'₅₄ bá₄ rë₂'ma₄ të₂dsí₅. ³⁶ Jaun₂ juá'₅ jniá₂, jáng'₃ bá₄ dsa₂ mi₂güí₃ cuenta quió'₅ jë₁ma₂të₂ jmig₄ i₁con₂ Diú₄ 'í₁, qui₃dsi₂₃ 'éi'₃ ne₄ ca₂le₃jé₃ jág₁ a₂tsá₃ ta₁ tí₄. ³⁷ Ia₁ të₂le₃ 'a₂ lia'₂ lé₅ jág₁ quián'₂ bá₄ 'nia'₂, jióg'₂ 'í₁, ring'₂ o₃ tsá₃ ring'₂.

Mi₅ dsa₂ fariseos a₂jmo₃ Jesús caun₂ léi₄ juë'₂

(Marcos 8:12; Lucas 11:29-32)

³⁸ Jaun₂ në₃ i₂lin₅₄ dsa₂ fariseos quian'₅₄ të₅juá'₅ ca₂tsí'₃ Jesús:

—Të₅, 'niog₂ jnia'₅₄ jag₅₄ caun₂ léi₄ juë'₂ a₂jmó'₂ 'ne₂.

³⁹ Jaun₂ ca₂ñag₃ Jesús:

—Tsi₁jon₂ dsa₂ 'lín'₅₄ i₂tsá₃ nag₃ la₂ mi₂₃ a₂jmo₅₄ jniá₂ caun₂ léi₄ juë'₂. La₁ tsá₃ ma₃'e₂ léi₄ lé₂ le₃cuë₅₄ jniá₂ ja₁con'₂ 'nia'₂, jnia'₅₄ lia'₂ con'₂ léi₄ jui₁lia'₂ a₂ca₂i₃ñí₂ Jonás i₂jme₁'é₂ jág₁ o₄quió'₄ Diú₄ bá₄. ⁴⁰ Ia₁ jui₁lia'₂ ca₂'í₃ Jonás 'ni₅ jmig₄, 'ni₅ nei₅ të₂dsí₅ já₂ jmig₂ pan₅₄ 'éi₂, le₂jaun₂ bá₄ 'í₂ Jaun₅ dsa₂ mi₂güí₃ né₃ 'uë₃ 'ni₅ jmig₄, 'ni₅ nei₅. ⁴¹ Jmig₄ jë₁ma₂të₂ rë₁con₂ Diú₄ 'í₁, dsa₂ i₂jme₁chan₂ juig₂ ciudad Nínive, dsa₂ 'éi₂ bá₄ náu₃ qui₃dsi₂₃ 'éi'₃ jáng₃ ja₁con'₂ 'nia'₂ dsa₂ chang'₂ jmig₄ në₃. Ia₁ dsa₂ 'éi₂ ca₂jéin'₃ dsí₅ lia'₂ con'₂ jme₁ca₂'é₂ Jonás jág₁ quió'₅ Diú₄. La₁ në₃ në₃ la₂ chén'₅ jan₂ i₂juin'₂ gué₄ lia'₂ con'₂ gué₄ Jonás 'éi₂. ⁴² 'Io₅₄ rag₅₄ i₂jme₁gon₂ 'uë₃ të₂le₃ sur, jáng₃ bá₄ náu₃ 'éi₂ jmig₄ i₁qui₃dsi₅ Diú₄ 'éi'₃, jáng₃ guë'₂ 'liog'₃ 'éi₂ 'liain'₃ 'nia'₂ i₂chang'₂ jmig₄ në₃. Ia₁ 'éi₂ në₃ ca₂já₃ uíng₂ lín₃ ca₂'í₃ jui₅ a₂ca₂o₃néi₃ jág₁ quió'₅ Salomón 'a₂ lia'₂ jme₁ñí'₂ dsí₅ 'éi₂ a₂ñí₄ lë₃ jme₁tiin₂; ^w la₁ në₃ në₃, la₂ chén'₅ jan₂ i₂juin'₂ gué₄ con'₂ gué₄ Salomón 'éi₂.

Jme₂dsí₂ 'lín'₅₄ i₂jón'₂ táng₃

(Lucas 11:24-26)

⁴³ 'Jë₁ma₂o₂'ín₃ jan₂ jme₂dsí₂ 'lín'₅₄ quió'₅ jan₂ dsa₂, jaun₂ dsi₂ñí₃ le₂tan₅₄ ja₁quein₂ 'no'₂ ja₁jnia₃. Në₁jua'₂ tsá₃ ca₂dsó'₂ ja₁jnia₃ në₃, jaun₂ 'no'₂ táng₃ dsí₅: ⁴⁴ “Nég'₄ táng₃ dsi₂néi₂ quió'₃ ja₁ca₂o₃'íng₃.”

^w42 'Í₂ 1 Reyes 10; 2 Crónicas 9:1-12.

Jë₁ma₂ca₂dsiáin'₃ jaun₂, dsain'₂ táng₃ dsa₂ 'éi₂ lín₅ co₂'nió'₄ bá₄ caun₂
dsi₂néi₂ a₂rë₂jë₄, rë₂'ia'₅₄, rë₂ chí'₅.⁴⁵ Jaun₂ në₃ o₂'iin₅₄ táng₃ dsó₅
chi₂liain'₂ con'₂ gué₄ guion₃ jme₂dsí₂ 'lín'₅₄ riin'₅₄ i₂lë₁'nio₅ gué₄ con'₂
gué₄ 'nio₅. Dsi₂lein₅ dsi₂tiaín'₂ të₂dsí₅ dsa₂ 'éi₂. Jaun₂ dsa₂ 'éi₂ në₃,
dsió₄ lén₂ le₃'lín'₅₄ gué₄ lín₃ gué₄ con'₂ gué₄ jme₁lín₄ le₂'uig₅₄.^x Le₂në₅
bá₄ dsi₃ñí₂ tsi₁jon₂ 'lín'₅₄ i₂chan₂ rë₂në₃.

Chi'₂ rin'₅₄ Jesús quian'₅₄ chog₅₄
(Marcos 3:31-35; Lucas 8:19-21)

⁴⁶ Të₃ 'en₅₄ Jesús dsia₂₃ jág₁ tsí'₅ dsa₂, jme₁ca₂dsi₃lén₂ chi'₂ riin'₅₄
quian'₅₄ chog₅₄ në₃. Ca₁'né₄ bá₄ ca₂tiáín'₂ a₂'nio₃ dsia₃ jág₁ quian'₅₄
Jesús. ⁴⁷ Jaun₂ ca₂i₁con₂ jan₂ jág₁, ca₂juá'₂:

—Chog'₂ quian'₅₄ chi'₂ ríng'₂ tiáín'₅ ca₁'né₄, a₂'nio₃ dsia₃ jág₁ quian'₅₄
'ne₂.^y

⁴⁸ Jaun₂ ca₂ñag₃ Jesús:

—¿Ein₂ 'éi₂ cha₃ jniá₂, 'ein₂ 'éi₂ rín'₃ jniá₂ në₃?

⁴⁹ Jaun₂ në₃ ca₂'iin₃ chi'₂ dsi₂guia₃-tín₂ quiáín₅, jaun₂ ca₂juá'₂:

—I₂la₂ bá₄ lín₅ co₂'nió'₄ cha₃ jniá₂, quian'₅₄ ríng'₃ në₃.⁵⁰ Ia₁ jui₁'ein₂
gué₃ i₂jmo₅ a₂'nio₂ dsí₅ Ne'₃ jniá₂ i₂guá₅ guei'₅₄ i₂juíg₃, i₂'éi₂ bá₄ lín₅
jui₁lia'₂ dsó₂ ríng'₃, 'io₅₄ ríng'₃, cha₃ në₃.

Jág₁ a₂jáng'₅ léi₄ jui₁lia'₂ dsa₂ i₂séi₂ míg₂ jon₂
(Marcos 4:1-9; Lucas 8:4-8)

13 ¹ Jmig₄ jaun₂ ca₂o₃'ín₃ Jesús dsi₂néi₂ ja₁jme₁'ein₅₄, ca₂ñó₃
ca₂i₁gua₂ chei'₅₄ jmi₁'ñí'₄. ² Ia₁ ca₂ñi'₂ táng₃ juín₅ lín₃ dsa₂
le₃lág'₃ quió'₅ ja₁guá₄, jaun₂ ca₂'í₃ 'ñió'₃ tsi₁mu₅, jaun₂ ca₂guá₂. Jaun₂
dsa₂ gué'₂ në₃ ca₂tóin'₂ ca₂le₃jín₃ chei'₅₄ jmig₂. ³ Jaun₂ në₃ ca₂jme₃tiín₂₃
dsa₂ 'lióng₂ lín₃ jág₁ të₂le₃ quian'₅₄ jág₁ a₂jáng'₅ léi₄.

Ca₂juá'₂:

—Jan₂ dsa₂ ca₂ñe₄ ja₁nau₂ ca₂i₁séi₄ míg₂ jon₂; ⁴ jme₁ma₂'ein₅₄ séi₂ në₃,
a₂lín₅₄ míg₂ jon₂ ca₂i₃ga'₅₄ le₂'i₄ jui₅, jaun₂ në₃ i₁tan₅ bá₄ ca₂o₃lén₂
ca₂cág'₃. ⁵ A₂lín₅₄ gué'₂ míg₂ jon₂ ca₂i₃to'₅₄ jë₄ ni₁cang₁, ja₁tsá₃ lín₄ gua'₅₄
lé₅. A₂jaun₂ në₃ tsá₃ ué₂ ca₂rë₃'ag₄ ca₂'ia₂, ia₁ tsá₃ ji'₂ gua'₅₄ ja₁i₃to'₅₄.
⁶ La₁ jme₁ca₂të₂ 'iog₂, ca₂rë₃juíng₅, ca₂cáu₂ bá₄ a₂jaun₂, ia₁ tsá₃ jmú₄
'lióng₂ jme₁ma₂cha₂. ⁷ A₂lín₅₄ gué'₂ i₃ga'₅₄ ja₁lé₄ ni₁taun₅. Jme₁ca₂i₃cón₃
ni₁taun₅ në₃, ca₂jlë₃ bá₄ jon₂ jaun₂ táng₃. ⁸ La₁ a₂lín₅₄ gué'₂ në₃ ca₂tín₂
ja₁'o'₅₄ 'uë₃; a₂jaun₂ ca₂rau₂ dse₃; a₂lín₅₄ míg₂ jon₂ ca₂'ág₂ jma₃cáun₃
'ñiá₂-láu₂ míg₂ lia'₂ ca₂míg₂ jon₂ a₂i₃jnia₄; a₂lín₅₄ gué'₂ jma₃'nag'₂
ne₂guióg₂ míg₂, a₂lín₅₄ gué'₂ jma₃guióg₂-guiá₂ míg₂. ⁹ Chi₂jua'₂ 'ein₂
'nia'₂ i₂dsi₅₄ rë₂gua₄, nei₂ 'nia'₂.

^x45 'Nio'₂ ja₁ton₅ 2 Pedro 2:20.

^y47 A₂lín₅₄ chog₅₄ si₂ tsá₃ chi₁ton₅ 47.

Ta₁ qui'₅ jág₁ a₂jáng'₅ léi₄
(Marcos 4:10-12; Lucas 8:9-10)

- ¹⁰ Jaun₂ ca₂jme₃quián₃ chi'₂ dsi₂guia₃-tín₂ con₂ Jesús, jaun₂ ca₂ηag₃:
—'E₂ lë₃ jme₂tíng'₁ dsa₂ jmá'₃ lia'₂ quian'₅₄ jág₁ a₂jáng'₅ léi₄?
- ¹¹ Jaun₂ në₃ ca₂ηag₃ Jesús:
—Diú₄ bá₄ jmo₅ a₂rë₃ηí'₂ 'au'₂ 'nia'₂ jág₁ rë₂'ma₄ jui₁lia'₂ 'a₂ lia'₂ lë₅
ja₁goin₂ guei'₅₄ i₂juíg₃. La₁ ja₁con₂ dsa₂ në₅ në₃, tsá₃ le₂jaun₂. ¹² Ia₁
jui₁lia'₂ dsa₂ i₂ηí'₂ dse₃, Diú₄ bá₄ jmo₃ le₃ηí'₂ gué₄ 'lióng₂, jaun₂ dsi₁lén₂
lén₂ dsa₂ i₂niog₅ dsi₄. La₁ jui₁lia'₂ i₂tsá₃ 'nio₃ le₃ηí'₂ në₃, Diú₄ bá₄ jmo₃
co₂dsia₅ tsá₃ le₃ηí'₂ co₂ηei'₅₄. ¹³ 'Uig₅₄ jaun₂ bá₄ a₂jme₂tín₂ jniá₂ dsa₂
të₂le₃ quian'₅₄ jág₁ a₂jáng'₅ léi₄:
Ia₁jaun₂ i₂jág₃,
la₁ tsá₃ le₃lí'₄ 'e₂ a₂në₂jág₃;
i₂në₂néi₂ guë'₂ në₃,
la₁ tsá₃ ca₂rë₃lí'₄ 'e₂ a₂në₂néi₂,
on₃ gué₄ ca₂ηí'₂.
¹⁴ Jaun₂ le₂në₅ rë₂ti₃ të₂le₃ quió'₅ dsa₂ në₅ jui₁lia'₂ ca₂juá'₂ Isaías i₂ca₂'é₂
jág₁ quián₅ Diú₄:
Dsón'₂ bá₄ nág'₁ 'nia'₂,
la₁ tsá₃ le₃ηíg'₂ 'e₂ a₂nág'₁;
Caun₂ qui₁jag'₅₄ 'nia'₂ në₃,
la₁ tsá₃ le₃len'₅₄ 'nia'₂.
¹⁵ Ia₁ a₂ma₂'ua'₂ dsi₄ bá₄ dsa₂ la₂,
ja₂lag₃ bá₄ nag₂₃,
në₂jag₄ bá₄ i₂ma₂rë₂jni₅ rë₂gua₄;
ján₃ bá₄ le₂në₅, në₂jag₄ bá₄ a₂tsá₃ jniá₂ mi₂ne₅₄,
ia₁jaun₂ tsá₃ jág₃ quian'₅₄ mi₂ne₅₄,
on₃ guë'₂ nag₃ quian'₅₄ rë₂gua₅₄,
on₃ gué₄ le₃ηí'₂ dsí₅,
ia₁jaun₂ tsá₃ jéin'₃ dsí₅ ja₁con₂ jniá₂
ia₁jaun₂ jme₁'lioin₁₂ jniá₂.^z
¹⁶ 'La₁ 'e₂ gué₄ dsen'₃ 'nia'₂ ia₁ jniá₂ mi₂ne'₅₄, nag'₂ bá₄ 'nia'₂ në₃
quian'₅₄ rë₂guá'₂. ¹⁷ A₂dsi₂jó'₃ juíg₂ jniá₂ 'nia'₂, juin₅ dsa₂ i₂jme₁'é₂ jág₁
quián₅ Diú₄ ma₂líg'₂, juin₅ dsa₂ dsen₃, jme₁'nio₃ të₃ ne₅₄ a₂jág'₂ 'nia'₂
rë₂në₃, la₁ tsá₃ ca₂jág₃; jme₁'nio₃ nag₃ në₃ jui₁lia'₂ a₂nag'₂ 'nia'₂ rë₂në₃,
la₁ tsá₃ ca₂nág₂.

^z15 Isaías 6:9-10.

Juá'₂ Jesús tsí'₅ dsa₂ lia'₂ tí₅ jág₁ 'e₂ jág₁ dsau₅
 jáng'₅ jui₁lia'₂ jág₁ quió'₅ dsa₂ i₂séi₂ mi₂jon₂
 (Marcos 4:13-20; Lucas 8:11-15)

¹⁸ Nei₂ 'nia'₂ jaun₂, 'e₂ jág₁ dsau₅ jáng'₅ jui₁lia'₂ jág₁ quió'₅ dsa₂ i₂séi₂ míg₂ jon₂. ¹⁹ Jui₁lia'₂ dsa₂ i₂nag₅ jág₁ dse₃ a₂já₅ guei'₅₄ i₂juíg₃ ja₁gon₂ Diú₄, nē₁jua'₂ tsá₃ nǎi'₂, lín₅ jui₁lia'₂ míg₂ jon₂ a₂ca₂séi'₂ dsi₂jui₅. I₂sē₃dsen₃ bá₄ ja₂ ja₁coin₂, jaun₂ jniá'₂ táng₃ jág₁ dse₃ a₂jme₁ma₂jnia₄ tē₂dsí₅. ²⁰ Míg₂ jon₂ a₂ca₂séi'₂ guē'₂ jē₄ nǎi₁cang₁, lé₅ jui₁lia'₂ lín₅ dsa₂ i₂gue₅ 'nio₂ dsí₅ jág₁ dse₃ a₂nag₂₃, ²¹ la₁ia₁ tsá₃ cha₂ guē'₂ jē₁dsi₃'má₂ jmú₄ né₃ 'uē₃, tsá₃ uē₂ tió'₅; jaun₂ jē₁ma₂já₅ o₂i₁ dsi₅ a₂dsi₂nǎi₂ 'e₂ dsi₂nǎi₂, o₃ qui₂co₂'ein₅ dsa₂ o₄quió'₄ jág₁ quió'₅ Diú₄, guein₂₃ tí₂ bá₄ táng₃ jág₁. ²² Jui₁lia'₂ míg₂ jon₂ a₂i₃ga'₅₄ jē₄ nǎi₁taun₅ guē'₂ táng₃, jáng'₅ jág₁ dsau₅ jui₁lia'₂ dsa₂ i₂nag₅ jág₁ dse₃, la₁ia₁ 'nio₅ lín₃ guē'₄ 'i₅ dsí₅ o₂me'₅₄ dsi₅ a₂cha₂ mi₂güí₃ la₂, a₂'ín₅ dsí₅ a₂le₃cha₂ cu₄ a₂le₃chain₂ dse₃ nē₃, a₂nē₅ bá₄ a₂jme₂gau₅ táng₃ quió'₅. Ca₂le₃jé₃ a₂nē₅ jlé₂ bá₄ táng₃ jág₁ dse₃ a₂jme₁ma₂nág₂, jaun₂ tsá₃ ma₂'e₂ a₂dse₃ ráu₃ ja₁con₂ dsa₂ 'éi₂. ²³ La₁ jui₁lia'₂ míg₂ jon₂ a₂ca₂séi'₂ ja₁dse₃ gua'₅₄, jáng'₅ táng₃ jág₁ dsau₅ tē₂le₃ ja₁con₂ dsa₂ i₂nag₅ jág₁, ton'₂ nǎi'₂ nē₃; jaun₂ jmá'₃ lia'₂ ca₂ne₅₄ a₂dse₃ bá₄ rau₂ ja₁coin₂. I₂lín₅₄ guē'₂ dsa₂ 'éi₂ tē₂le₃ quian'₅₄ a₂dse₃ rē₂jniá₂ a₂jmo₂₃, lín₅ jui₁lia'₂ lé₅ lia'₂ ca₂cho'₅₄ míg₂ a₂ca₂i₃jnia₄, rau₂ caun₂ 'niá₂-láu₂ míg₂ lia'₂ ca₂míg₂; i₂lín₅₄ guē'₂ jma₃'nag'₂ co₂ne₂guió₂; i₂lín₅₄ guē'₂ jma₃guió₂-guiá₂ míg₂.

Jág₁ a₂jáng'₅ léi₄ jui₁lia'₂ nǎi₁nau₂ 'lig'₅₄ a₂ca₂'ia₂ jē₄ trigo

²⁴ Ca₂juá'₂ Jesús táng₃ ca₂tsí'₃ dsa₂ caun₂ jág₁ a₂jáng'₅ léi₄ siá'₂:
 —A₂lé₅ guei'₅₄ i₂juíg₃ ja₁gon₂ Diú₄ lia'₂ lín₅ jan₂ dsa₂ i₂ca₂séi₂ ca₂ne₅₄ míg₂ jon₂ dse₃ 'uē₃ quió'₅; ²⁵ la₁ caun₂ 'uē₂ jme₁ma₂le₁güín₃ dsa₂ le₃jín₃, ca₂guan₃ jan₂ dsa₂ 'lín'₅₄ i₂'iog₅₄ ca₂jmo₃ uig₅ dsí₅ ca₂guia'₃ jon₂ nǎi₁nau₂ 'lig'₅₄ jē₄ trigo, jaun₂ ca₂nái'₃ táng₃. ²⁶ Jme₁ca₂i₃cón₃ trigo, jme₁ma₂tio'₅₄ mí'₂ nē₃, jē₄ jaun₂ ca₂'ia₂ nǎi₁nau₂ 'lig'₅₄ ján₃. ²⁷ Jaun₂ nē₃, dsa₂ i₂jme₂ti₃ ta₁ ne₄ juig₅₄ ja₁nau₂, ca₂i₁con₂ jág₁ ne₄ juig₅₄, ca₂juá'₂: “Gui'₅₄, ÷on₁jua'₅₄ jmá'₃ ca₂ne₅₄ míg₂ jon₃ dse₃ ca₂jni'₂ ja₁nau₂ quiáng'₂ jme₁ca₂jni'₂? ÷A₂ guē'₂ lia'₂ ca₂lē₃ a₂ca₂'ia₂ nǎi₁nau₂ 'lig'₅₄ jaun₂ nē₃?”
²⁸ Jaun₂ ca₂ngag₃ dsa₂ juig₅₄: “An₁ jan₂ dsa₂ 'lín'₅₄ i₂'iog₅₄ bá₄ ca₂jmo₃ a₂nē₅.” Jaun₂ ca₂ngag₃ dsa₂ i₂jme₂ti₃ ta₁ ne₅₄: “÷Tsa₁ 'niog'₂ jua'₅₄ co₂dsia₅ dsi₁guéi₁ jnia'₅₄ nǎi₁nau₂ 'lig'₅₄ jaun₂?” ²⁹ Jaun₂ ca₂ngag₃ táng₃ 'éi₂, ca₂juá'₂: “Jan₂'ón₄. Tió'₅ bá₄. Ia₁ con'₂ tsá₃ nǎi₁jua'₂ le₂jio₅ tag₄ trigo dse₃ bá₄ ca₂cang₅. ³⁰ Ja₂lín₃ guē'₄ dse₃ jui₁le₁dsi₅₄ me'₂ jaun₂, jui₁dsi₂cón₃ bá₄ co₂lē₅, ca₂lia'₂ ca₂tē₂ jmig₄ i₁ráu₃; jaun₂ guē'₄ tsing₅₄ dsa₂ a₂dsi₃cang₅₄ de'₂ le₂'uig₅₄ nǎi₁nau₂ 'lig'₅₄, jaun₂ cág'₃ jmá'₃ co₂dsong'₅₄ ia₁jaun₂ 'nei₃, dsi'₂, jaun₂ guē'₄ cág'₃ trigo tó'₃ caun₂ ja₁tó'₃ dsi₂néi₂ quió₃.”

Jág₁ a₂jáng'₅ léi₄ jui₁lia'₂ mǐg₂ jon₂ quió'₅ ni₁'ma₂ mostaza

(Marcos 4:30-32; Lucas 13:18-19)

³¹ Ca₂dsia₃ Jesús ján₃ caun₂ jág₁ a₂jáng'₅ léi₄ le₂la₂:

—Ja₁gon₂ Diú₄ guei'₅₄ i₂juíg₃, lé₅ jui₁lia'₂ lé₅ mǐg₂ jon₂ quió'₅ ni₁'ma₂ mostaza^a a₂ca₂jné₂ jan₂ dsa₂ ja₁nau₂ quió'₅. ³² Dsón'₂ mǐg₂ jon₂ jaun₂ lé₅ mǐg₂ a₂pí'₁ tei₄ gué₄ 'ñio₅ lin₃ lia'₂ con'₂ gué₄ mǐg₂ jon₂ siá'₂; la₁ia₁ jè₁ma₂ca₂i₃cón₃ né₃, lé₂ caun₂ ni₁'ma₂ pa₁ gué₄ lia'₂ con'₂ gué₄ rin'₅₄ a₂cha₂ ja₁nau₂ quió'₅, ca₂tè₂ i₁tan₅ lé₂ le₃tiain'₃ gu'₂ nei'₅₄.

Jág₁ jáng'₅ léi₄ jui₁lia'₂ 'a₂ lia'₂ rón'₂ i₁ñí'₄

(Lucas 13:20-21)

³³ Ca₂dsia₃ Jesús jág₁ a₂jáng'₅ léi₄ le₂la₂ táng₃:

—Lé₅ guei'₅₄ i₂juíg₃ ja₁gon₂ Diú₄, jui₁lia'₂ lé₅ levadura a₂co₂güín'₂ jan₂ 'io₅₄ quian'₅₄ 'ni₅ tio'₅₄ ñí₁ ca'₅₄^b ti₁jui₁ harina, ia₁jaun₂ ron'₂ dse₃ ca₂le₃jé₃ ti₁can₁.

Ta₁ a₂quí'₅ jág₁ a₂jáng'₅ léi₄ a₂ca₂jme₃tag₅ Jesús

(Marcos 4:33-34)

³⁴ Ca₂le₃jé₃ jág₁ la₂ ca₂juá'₂ Jesús ca₂tsí'₃ dsa₂ të₂le₃ quian'₅₄ jág₁ a₂jáng'₅ léi₄; 'i₁co₂ráun₂ tsá₃ jme₁jme₂tag₂₃ jua'₅₄ tsá₃ të₂le₃ quian'₅₄ jág₁ a₂jáng'₅ léi₄. ³⁵ Le₂në₅ ca₂jmo₃ ia₁jaun₂ le₃ti₃ jág₁ a₂jme₁ma₂rë₂'é₂ quió'₅ dsa₂ i₂jme₁'é₂ jág₁ quián₅ Diú₄ ma₂líg'₂ jme₁ca₂juá'₂:

'Uë'₅₄ jniá₂ jág₁ 'o₃

të₂le₃ quian'₅₄ jág₁ a₂jáng'₅ léi₄;

dsia₅₄ jniá₂ jág₁ a₂tsá₃ ma₂ca₂rë₃jniá₂

ca₂le₃ ca₂jmo₃ Diú₄ mi₂güí₃.^c

Dsia₅ Jesús lia'₂ tí₅ jág₁ 'e₂ jág₁ dsau₅ jáng'₅

jui₁lia'₂ ni₁nau₂ 'lig'₅₄ a₂ca₂'ia₂ jë₄ trigo

³⁶ Jaun₂ né₃, ca₂o₃'ín₃ Jesús jin₄ dsa₂ juín₅ ja₁jme₁'ein₅₄ jaun₂ ca₂'í₃ táng₃ caun₂ dsi₂néi₂. Jaun₂ ca₂o₃lén₂ táng₃ chi'₂ dsi₂guia₃-tín₂ ja₁coin₂, ca₂juá'₂:

—Dsia₄ lia'₂ tí₅ jág₁ 'e₂ jág₁ dsau₅ jáng'₅ jui₁lia'₂ jág₁ quió'₅ ni₁nau₂ 'lig'₅₄ a₂ca₂'ia₂ jë₄ trigo.

³⁷ Jaun₂ ca₂ñag₃ Jesús:

—Dsa₂ i₂ñi₅ séi₂ mǐg₂ jon₂ dse₃, Jaun₅ dsa₂ mi₂güí₃ bá₄ 'éi₂; ³⁸ ja₁nau₂ guë'₂ lé₅ co₂'nió'₄ mi₂güí₃ la₂. Jon₂ dse₃ guë'₂ né₃, co₂'nió'₄ lín₅ chi'₂-guein₂ i₂tion'₅₄ 'éi₃ quió'₅ Diú₄. Ni₁nau₂ 'lig'₅₄ guë'₂ né₃, co₂'nió'₄ dsa₂

^a31 mostaza: On₃jua'₅₄ mi₁ján'₅ a₂cuí'₅ dsa₂ go₄ jniog₄; caun₂ ni₁'ma₂ dsón'₂ jaun₂ a₂té'₂ të₅ sí₃ Brassica nigra.

^b33 griego: “'ni₅ tio'₅₄ ñí₁ sata”, a₂tio'₅₄ con'₂ 22 litros le₂caun₂ ñí₁.

^c35 Salmo 78:2.

i₂tion'₅₄ jui'₅ 'éi'₃ quió'₅ i₂sē₃dsen₃.³⁹ Dsa₂ 'lin'₅₄ i₂'iog₅₄ i₂ca₂jné₂ jon₂ ni₁nau₂ 'lig'₅₄, i₂sē₃dsen₃ bá₄ 'éi'₂. I₁ráu₃ guè'₂ né₃, lé₅ jmig₄ jē₁ca₂tó'₂; i₂ja₃lén₂ ja₃cag'₅₄ gué'₄ né₃, ángeles quián₅ bá₄ Diú₄.⁴⁰ Jaun₂, jui₁lia'₂ cág'₅ dsa₂ ni₁nau₂ 'lig'₅₄, a₂tó'₅ dsi₂si₂, le₂nē₅ bá₄ lé₂ ján₃ jmig₄ jē₁ca₂tó'₂ mi₂güí₃ la₂.⁴¹ Chen₃ Jaun₅ dsa₂ mi₂güí₃ ángeles quián₅ ia₁jaun₂ 'uín'₂ jē₄ quió'₅ dsa₂ quián₅ ca₂le₃jín₃ i₂jmo₅ qui₂sén'₂ rin'₅₄ a₂'no₂₃ dso₄, ca₂le₃jín₃ gué'₄ i₂ca₂rē₃chán₃ i₂tsá₃ ca₂tí₂ jui₅ 'lig'₅₄.⁴² Jaun₂ to'₂ ja₁néi'₅ tsi'₄ si₂, ja₁tóin'₃ qui'₂-o₂₃, qui₃quí₃'₃ jan₅₄ né₃.⁴³ Jaun₂, dsa₂ dsen₃ quián₅ Diú₄ gué'₂ dsi₃lein₅ dsi₃tiain'₂ ja₁jniai₅₄ tá₅ jui₁lia'₂ jniá₂ 'iog₂ ja₁jmo₅ Diú₄ Jmei₂ 'éi'₃. Chi₂jua'₂ 'ein₂ 'nia'₂ i₂dsi₅₄ rē₂gua₄, rē₂ nei₂ 'nia'₂.

Jág₁ a₂jáng'₅ léi₄ jui₁lia'₂ caun₂ a₂quen₅ gué'₄ 'nio₅ lín₃ a₂rē₂'ma₄

⁴⁴ 'Guei'₅₄ i₂juíg₃ ja₁gon₂ Diú₄ ján₃ bá₄ lé₅ jui₁lia'₂ caun₂ a₂quen₅ 'nio₅ lín₃ a₂rē₂'ma₄ rē₂o₅ né₃ 'uē₃. La₁ jui₁lia'₂ jan₂ dsa₂ i₂dso'₂ né₃, ja₁jaun₂ bá₄ 'ma₂₃ táng₃; ia₁ a₂ñí₄ lē₃ 'io'₂ jén'₅, jaun₂ dsáin'₅ dsi₂'nág₂ ca₂le₃jé₃ 'e₂ a₂cha₂ quió'₅, jaun₂ lá₅ 'uē₃ jaun₂.

Jág₁ a₂jáng'₅ léi₄ jui₁lia'₂ míg₂ perla a₂quen₅ lín₃

⁴⁵ 'Ján₃ bá₄ lé₅ guei'₅₄ i₂juíg₃ ja₁gon₂ Diú₄ jui₁lia'₂ lín₅ jan₂ dsa₂ i₂ñí₅ 'no'₂ perlas jlá'₁ ia₁jaun₂ jmo₃ 'ma'₅₄.⁴⁶ Jē₁ma₂ca₂dsó'₂ ca₂míg₂ a₂quen₅ lín₃, dsáin'₅ dsi₂'nág₂ ca₂le₃jé₃ 'e₂ a₂cha₂ quió'₅, jaun₂ lá₅ míg₂ jlá'₁ jaun₂.

Jág₁ a₂jáng'₅ léi₄ jui₁lia'₂ tsi'₁ 'má₅

⁴⁷ 'Ján₃ bá₄ le₂jaun₂ lé₅ guei'₅₄ i₂juíg₃ ja₁gon₂ Diú₄ jui₁lia'₂ lé₅ caun₂ tsi'₁ 'má₅ a₂táun₂ dsa₂ ne₄ jmi₁ñí'₄ jaun₂ 'uín'₂ ca₂le₃jín₃ ne₅₄ já'₂.
⁴⁸ Jē₁ma₂ca₂rin₅ tsi'₁ 'má₅, dsa₂ né₃ 'ín₅ tē₂le₃ chei'₅₄ jmi₁ñí'₄; jaun₂ quióin'₂ jmá'₃ lia'₂ ju₄ dsen₃ caun₂ ja₁to'₂, jaun₂ guíain'₂ bá₄ jui₁lia'₂ já'₂ i₂tsá₃ dsen₃.⁴⁹ Ján₃ bá₄ le₂jaun₂ lé₂ jmig₄ jē₁ca₂tó'₂ mi₂güí₃ la₂: 'uín₃ ángeles ja₃jmo₂ jma₃quén₅ dsa₂ 'lin'₅₄ jē₄ quió'₅ dsa₂ dsen₃.⁵⁰ jaun₂ toin'₂ i₂'lín'₅₄ ja₁néi'₅ tsi'₄ si₂ ja₁dsi₃toin'₅₄ qui'₂-o₂₃ qui₃quí₃'₃ jan₅₄ né₃."

Jui₁lia'₂ cu₄nióg₄ 'mí₂ quian'₅₄ cu₄nióg₄ gui'₅₄

⁵¹ Jaun₂ ca₂ñí'₃ Jesús chi'₂ dsi₂guia₃-tín₂ quián₅:
—¿Níg'₂ 'nia'₂ ca₂le₃jé₃ jág₁ a₂juá'₅ jniá₂ nē₅?
Jaun₂ ca₂ñag₃:
—Nág'₂ bá₄ jnia'₅₄.
⁵² Jaun₂ ca₂juá'₂ Jesús né₃:
—Jui₁lia'₂ jan₂ tē₅juá'₅ i₂ma₂ca₂jme₃tin₅ 'a₂ lia'₂ lé₅ guei'₅₄ i₂juíg₃ ja₁gon₂ Diú₄, lín₅ jui₁lia'₂ lín₅ jan₂ juíg₅₄ tsi'₁ 'né₅ i₂'uē'₅ a₂quen₅ a₂te₁'i₁ le₁'ma₁ dsi₂néi₂ quió'₅, lia'₂ cosas 'mí₂ lia'₂ cosas gui'₅₄ né₃.

'En₅₄ Jesús jë₄ juig₂ Nazaret

(Marcos 6:1-6; Lucas 4:16-30)

⁵³ Jme₁ca₂dsan₃ jme₂tin₅ Jesús dsa₂ jág₁ a₂jáng₅ léi₄ në₅, ca₂o₃'ín₃ bá₄ ja₁jaun₂, ñái₃ juig₂ go₅₄. ⁵⁴ Jme₁ca₂dsiáin₃ jaun₂ në₃, ca₂jme₃lióg₃ ca₂jme₃tiin₂₃ dsa₂ jág₁ dse₃ quió₅ Diú₄ dsi₂néi₂ guá₅ sinagoga quió₅ dsa₂ ja₁jaun₂, jaun₂ dsa₂ në₃, ca₂i₃gó₃ dsí₅ jág₁ a₂ca₂nág₂, jaun₂ ca₂dsia₃:

—¿A₂já₄ ca₂i₁jme₁tin₅ i₂në₅ jág₁ a₂ñí₄ lë₃ tiin₂₃ në₅? ¿'A₂ bá₄ lia₂ 'io₂₃ bí₂ a₂tiin₂ jmo₃ o₂dsain₂ në₃? ⁵⁵ ¿On₁jua₅₄ i₂në₅ ja₁ñi₅₄ tē₅'má₃? ¿On₁jua₅₄ chog₅₄ i₂chen₂ María? ¿On₁jua₅₄ i₂në₅ i₂lín₅ rin₅₄ Santiago^d quian₅₄ Sé₄, Si₂mu₅₄, Judas në₃? ⁵⁶ ¿On₁jua₅₄ jë₄ quián₂ jniog₄ la₂ tián₅ 'io₅₄ riin₅₄ në₃? ¿'A₂ bá₄ já₄ já₅ a₂ñí₄ lë₃ cuí₅ i₂në₅ ca₂le₃jé₃ jág₁ a₂tiin₂ në₅?

⁵⁷ Jaun₂ tsá₃ dse₃ ca₂tín₂ dsa₂ jág₁ jaun₂ quió₅, tsá₃ jui₅ ca₂tón₃ dsa₂. La₁ ca₂juá₂ Jesús:

—Ca₂le₂con₂ bá₄ juig₂ siá₂ jme₂gan₃ dsa₂ jui₁lia₂ jan₂ dsa₂ i₂'é₂ jág₁ quián₅ Diú₄; jñia₅₄ lia₂ dsa₂ go₅₄ bá₄, tsá₃ jei₅₄, quian₅₄ dsa₂ dsi₂néi₂ quió₅ 'ñiog₅ në₃.

⁵⁸ Jaun₂ tsá₃ ma₃léi₄ juë₂ lín₅₄ ca₂jmo₃ ja₁jaun₂, ia₁ tsá₃ guë₂ 'én₂ dsa₂.

Ca₂jon₃ Juan₅₄ i₂chon₅ dsa₂ jmig₂

(Marcos 6:14-29; Lucas 9:7-9)

14 ¹ Jmig₄ jaun₂ Herodes, i₂jme₁lín₄ dsi₄má₂ 'uë₃ Galilea, ca₂rë₃ñi₅ jág₁ a₂ñi₅ Jesús le₂con₂ jaun₂. ² Jaun₂ dsia₂₃ tsí₅ dsa₂ i₂jme₂ti₃ ta₁ ne₅₄:

—Juan₅₄ i₂chon₅ dsa₂ jmig₂ bá₄ në₅ ñi₅; ma₂ca₂jein₅₄ táng₃. 'Uig₅₄ jaun₂ 'io₂₃ jui₅bí₂ a₂jmo₂₃ léi₄ juë₂.

³ Ia₁ le₂jñiá₅ ma₂ca₂jña₃ dsa₂ Juan₅₄ 'éi₃ quió₅ Herodes, ca₂'nei₂, ca₂to₂ dsa₂ né₃ 'má₃ në₃. Ca₂jmo₃ le₂në₅ 'uig₅₄ quió₄ 'io₅₄ Herodías i₂jme₁lé₄ dsa₂ mí₂ quián₅ Fe₂li₄ riin₅₄. ⁴ Ia₁ 'lióng₂ ráun₂ ma₂qui₂ma₂juá₂ Juan₅₄ ma₂qui₂ma₂tsí₃ Herodes: “Tsá₃ 'i₄ 'éi₃ cáng₄ 'io₅₄ në₅.”

⁵ 'Uig₅₄ jág₁ jaun₂, jme₁'nio₃ Herodes jñii₃ Juan₅₄, la₁ tsá₃ tiá₂ dsí₅, ia₁ jme₁gain₃ dsa₂; ia₁ ca₂le₃jín₃ bá₄ dsa₂ jme₁'éin₂ a₂lín₅ Juan₅₄ jan₂ dsa₂ i₂'é₂ jág₁ quián₅ Diú₄. ⁶ La₁ caun₂ jmig₄ në₃, jme₁ca₂dsí₃ Herodes ñi₂, ca₂o₃'ín₃ ja₁míg₄ 'io₅₄ Herodías, ca₂dsáin₂ jín₄ dsa₂ i₂té₁ jmig₄. A₂në₅ në₃ ca₂té₂ dsí₅ 'ñio₅ lín₃ Herodes, ⁷ ca₂lia₂ ca₂cuë₃ jág₁ quió₅, ca₂le₃jé₃ 'iin₂₃ Diú₄ a₂cuë₃ 'e₂ caun₂ a₂mi₃ 'io₅₄ bë₅₄ 'éi₂. ⁸ Jaun₂ në₃, jme₁ma₂në₂tio₂ chog₅₄ jág₁, ñó₃, ca₂juá₂:

—Cuë₄ mi₂dsi₄ Juan₅₄ i₂chon₅ dsa₂ jmig₂, tē₂në₃, 'i₄ 'ñió₃ uing₅.^e

^d55 Santiago: ján₃ bá₄ chein₂ Jacobo.

^e8 lit. “rë₂dsí₂ ne₄ caun₂ ni₁ñí₁ charola.”

⁹ Jaun₂ ca₂tá'₂ 'lia'₂ dsí₅ rag₅₄ jme₁ca₂nág₂ le₂në₅, la₁ tsá₃ ma₃'e₂ ñi₅ jmo₃, ia₁ ma₂në₂cuë₃ jág₁ quió'₅ a₂'iin₂₃ Diú₄, tē₃nag₅ dsa₂ i₂tion'₅₄ dsi₂néi₂ ja₁niog₅ jmi₄. ¹⁰ Jaun₂ lē₃, ca₂jmo₃ 'éi'₃ a₂ca₂i₁qui'₂ dsa₂ mi₂dsi₄ Juan₅₄ dsi₂néi₂ tsi₁'né₅ 'má₃. ¹¹ Dsi₂jui₅ jaun₂ bá₄ ca₂o₃can₅ dsa₂ mi₂dsi₄ Juan₅₄ rē₂'i₄ 'ñi₃ó' uing₅,^f jaun₂ ca₂cué'₃ 'io₅₄ bē'₅₄ 'éi₂, jaun₂ 'éi₂ nē₃ ca₂i₁con₂ ne₄ chog₅₄.

¹² Jme₁co₂lág₂ jaun₂ nē₃, ca₂o₃lén₂ dsa₂ i₂jme₁quian'₅₄ Juan₅₄, jaun₂ ca₂tág₃ 'lag₄ 'éi₂ ca₂i₁'ó₄. Jaun₂ gué₄ ca₂i₁lein₅₄ ca₂i₁chi'₄ Jesús.

Ca₂jme₃tan₅₄ Jesús 'ñiá₂ mei₅ dsa₂

(Marcos 6:30-44; Lucas 9:10-17; Juan 6:1-14)

¹³ Jme₁ca₂rē₃ñi₅ Jesús jág₁ nē₅, ca₂o₃'ín₃ ja₁jme₁'ein₅₄, ca₂'í₃ 'ñi₃ó'₃ caun₂ tsi₁mu₅, a₂jme₁i₂'i₅ caun₂ ja₁co₂'niog₅. La₁ juin₅ dsa₂ juig₂ te₁'i₁ con'₂ ma₂quián₅ jaun₂ ca₂rē₃ñi₅, jaun₂ ca₂'uiin₂, ca₂i₁lein₅₄ ca₂i₁'ein₂₃ Jesús jui₅ tag₅₄. ¹⁴ Jme₁ca₂dsi₃óg₃ Jesús le₂'ño'₅₄ jmi₄, ca₂jág₃ juin₅ lin₃ dsa₂ ma₂tión₂ le₁jniog₅. Jaun₂ ca₂dsia₃ ñéi₂ dsí₅ dsa₂ 'éi₂, ca₂jme₃'lióin₂ dsa₂ i₂jme₁qui₂le₁dso'₅₄ quián₅ dsa₂. ¹⁵ Tē₃le₃ ca₂'láu₂ jaun₂, ca₂o₃lén₂ chi'₂ dsi₂guia₃-tín₂ ca₂juá'₂ ca₂tsí'₃ Jesús:

—Ca₂'láu₂ bá₄ la₂, ton'₂ caun₂ ja₁co₂'niog₅ bá₄ la₂ ja₁tsá₃ 'ein₂ tián'₅. 'Ei'₂ jág₁ dsa₂ ia₁jaun₂ dsi₃lén₂ le₂con₂ juig₂ ma₂quián₅ nē₅, qui₂dsi₃lia₅ ca₂la₂ a₂gué'₃.

¹⁶ Jaun₂ ca₂ñag₃ Jesús:

—Tsá₃ tion₅₄; cuë'₅₄ 'nia'₂ dsa₂ guiong'₅₄ a₂gué'₃.

¹⁷ Jaun₂ ca₂ñag₃ chi'₂ dsi₂guia₃-tín₂:

—Tsá₃ 'e₂ a₂siá'₂ cha₂ ja₁lá₃, jñia'₅₄ lia'₂ 'ñiá₂ i₁ñí'₄ bá₄, quian'₅₄ on₃ i₁ju₁.

¹⁸ Jaun₂ ca₂juá'₂ táng₃ Jesús:

—O₂quian₂ 'nia'₂ ja₁lá₃.

¹⁹ Jaun₂ nē₃, ca₂tsí'₃ dsa₂ a₂tiain'₃ ne₄ 'uë₃. Jaun₂ ca₂jña'₃ ta₁'ñiá₂ i₁ñí'₄ quian'₅₄ le₃on₃ i₁ju₁, jaun₂ ca₂chóg'₃ ne₅₄ guei'₅₄ i₂juíg₃, ca₂cué'₃ ti₁'mag'₄ Diú₄. Jaun₂ ca₂dsioin₃ le₂caun₂ le₂caun₂ i₁ñí'₄, ca₂cué'₃ chi'₂ dsi₂guia₃-tín₂. Jaun₂ 'éi₂ gué₄ nē₃ ca₂dsi₃ó'₃ jin₄ dsa₂. ²⁰ Ca₂le₃jín₃ bá₄ dsa₂ ca₂gué'₃ ca₂lia'₂ ca₂'ág'₃ dsí₅. Jme₁ca₂lē₃ gué'₅, jaun₂ ca₂cág'₃ bá₄ gué₄ guia₃-tín₂ tsi₁mi'₂ 'nau₅₄ a₂ca₂chóng₃. ²¹ Dsa₂ i₂ca₂gué'₃ 'éi₂ jme₁tén₄ 'ñiá₂ mei₅ jmá'₃ lia'₂ dsa₂ ñe'₂, i₂sián'₂ bá₄ dsa₂ mí₂, chi'₂ nē₃.

Ca₂ñi₃ Jesús ne₄ jmi₁ñí'₄

(Marcos 6:45-52; Juan 6:16-21)

²² Dsi₂jui₅ jme₁ca₂lē₃ jaun₂, ca₂jmo₃ Jesús 'éi'₃ a₂tón'₃ chi'₂ dsi₂guia₃-tín₂ 'ñi₃ó'₃ tsi₁mu₅, a₂ñí₃ de'₂ 'éi₂ jmi₄ le₁jñiá₄ lia'₂ con'₂ gué₄ 'niog₅ a₂dsi₃lein₃, tē₁lia'₂ 'í₂ 'niog₅ 'ág'₅ jág₁ dsa₂. ²³ Jme₁ca₂lē₃ 'ág'₅ jág₁ dsa₂,

^f11 lit. “rē₂dsí₂ ne₄ caun₂ ni₁ñí₁ charola.”

ca₂ηó₃ jui₅ má'₂ i₁chi₂i₁lein'₄ Diú₄. Ca₂tó'₂ nei₂ jme₁ca₂tó'₂, jaun₂ bá₄
'ein₅₄ 'ηiog₅. ²⁴ Tsi₁mu₅ a₂tion'₅₄ chi'₂ dsi₂guia₃-tín₂ ně₃, jme₁ma₂dsióg'₃
dsi₂jo₂ jmi₁ηí'₄. Jmig₂ ně₃, qui₂iná'₅ tiá₂ lin₃ dso'₂ tsi₁mu₅, ia₁ 'ei₅ tiá₂
dsí₂ 'liog'₂ le₃ca'₃. ²⁵ Le₁ně₃ tē₂le₃ ca₂jnia₃ jaun₂, ca₂jme₃quián₃ Jesús
ja₁ηáu'₄ tsi₁mu₅ tioin'₅₄. ²⁶ Jaun₂ ně₃ jme₁ca₂jág₂ chi'₂ dsi₂guia₃-tín₂
jóin'₅ ηi₂₃ ne₄ jmi₁ηí'₄, ca₂juin'₂ ca₂tóin'₂ co₂mi'₅₄ ca₂guió'₃ ca₂juá'₂:

—iJme₂dsí₂ 'lin'₅₄⁸ bá₄ ó₃!

²⁷ La₁ dsi₂jui₅ bá₄ ca₂juá'₂ Jesús ně₃:

—iDsia₄ 'nia'₂ tiá₂ 'au'₂! iJniá₂ bá₄ la₂; tsá₃ lē₁juín'₂ 'nia'₂!

²⁸ Jaun₂ Pe₄ ně₃ ca₂ηag₃:

—Te₁gui'₅₄, chi₂jua'₂ 'ne₂ ně₅, jmo₄ 'éi'₃ a₂nei₅₄ ηi₅₄ ne₄ jmig₂ a₂dsióg₄
tē₂ ja₁chéng'₄ ně₅.

²⁹ —Nia₅ jaun₂ —ca₂juá'₂.

Jaun₂ ca₂sión₃ Pe₄ 'ηió'₃ tsi₁mu₅, ca₂ηi₃ ne₄ jmig₂ jme₁ηó₄ ja₁chén'₄
Jesús. ³⁰ La₁ jme₁ca₂tón'₃ jui₅ ca₂jág₃ 'a₂ lia'₂ 'ei₅ tiá₂ dsí₂, ca₂ja₃gó'₃ dsí₅,
jaun₂ gué₄ ca₂rē₃lióg₃ ca₂i₃'óin'₅ jmig₂. Ca₂guió'₃ tiá₂, ca₂juá'₂:

—iLio₄ jniá₂, Te₁gui'₅₄!

³¹ Dsi₂jui₅ jaun₂ ca₂néi'₃ Jesús gu₂, ca₂tín₂ quió'₅ Pe₄, jaun₂ juá'₂:

—i'E₂ gué₄ ca₂juig₄ 'én'₂ 'ne₂! ¿'E₂ lē₃ ně₂'éi'₂ caun₂-tín₃ 'au'₂?

³² Jme₁ca₂i₃toin'₅₄ 'ηió'₃ tsi₁mu₅, ca₂'ág₂ táng₃ tei₄ dsí₂. ³³ Jaun₂
i₂jme₁tion'₅₄ 'ηió'₃ tsi₁mu₅ ca₂jmo₃ i₁'áin₃ ne₄ Jesús, ca₂jme₃juag'₂. Jaun₂
ca₂juá'₂:

—Dsón'₂ bá₄ líng'₅ Ja₁ηi'₅₄ Diú₄.

Ca₂jme₃'lión₂ Jesús dsa₂ dso'₅₄ 'uē₃ Genesaret

(Marcos 6:53-56)

³⁴ A₂ca₂'ain₂ jmig₂ jaun₂, ca₂dsi₃lein₃ 'uē₃ Genesaret. ³⁵ Dsa₂ chan₂
ja₁jaun₂ ně₃, jme₁ca₂rē₃cuiin₂₃ Jesús, jaun₂ ca₂i₁nioi₁₂ ca₂i₁can₅ jág₁
ca₂le₃jē₃ juig₂ te₁'i₁ le₃lág'₃ jaun₂, jaun₂ ca₂o₃jñia₃ dsa₂ ca₂le₃jín₃ dsa₂
i₂jme₁le₁dso'₅₄ ja₁'en₅₄ Jesús. ³⁶ Jaun₂ ca₂mi₃ tsá₃ a₂nag₅₄ o₁jñia'₅₄ 'ág₃
tag₄ tsin'₅₄ bá₄ cuē₃ jmig₄ ní'₃ dsa₂ i₂le₁dso'₅₄; jaun₂ ně₃, ca₂le₃jín₃ dsa₂
dso'₅₄ i₂qui₂ca₂ní'₃ tsin'₅₄ Jesús, ca₂'lóin₂ co₂ηei'₅₄ dso₄ a₂jme₁lín₄.

Jme₂tag₅ Jesús jui₁lia'₂ 'e₂ jaun₂ a₂jmo₅ a₂rē₂'ηio₅ dsa₂

(Marcos 7:1-23)

15 ¹ Jaun₂ ně₃ ca₂o₃lén₂ i₂lin₅₄ dsa₂ fariseos quian'₅₄ tē₅juá'₅
i₂ja₂lén₂ Jerusalén, ca₂jme₃quiáin₃ ja₁con₂ Jesús, jaun₂
ca₂ηag₃:

² —¿'E₂ lē₃ tsá₃ jme₂ti₃ dsa₂ i₂quiang'₅₄ tag₄ 'éi'₃ a₂chí'₅ quió'₅ dsa₂
can'₅₄? Tsá₃ rang₂₃ gu₂ né'₃ gué₄ a₂gué'₃.

³ Jaun₂ ca₂ηag₃ Jesús:

⁸26 griego: fantasma.

—'Nia'₂ guë'₂ në'₃, ÷'E₂ lë'₃ qui₂tsó'₂ 'nia'₂ 'éi'₃ quió'₅ Diú₄ a₂jme₂tí'₁
 'nia'₂ jmá'₃ lia'₂ tag₄ quián'₂ 'nia'₂ guiong'₅₄? ⁴ Ia₁ ca₂juá'₂ Diú₄:
 “Jme₁gan₃ 'nia'₂ chog'₂-ñéi'₅.”^h Ján₃ bá₄ ca₂juá'₂: “I₂të'₂on'₂ jmei₂, o₃
 i₂të'₃on'₂ chog₅₄, ca₂tín₂ jóin₂.”ⁱ ⁵ La₁ 'nia'₂ në'₃ jme₂tín'₁ dsa₂, në₁'ein₂
 cha₂ quió'₅ a₂lé₂ le₃jme₃'oin₅₄ chog₅₄-jmei₂, la₁ lag₃ në₁ca₂tsí'₃ dsa₂
 chog₅₄-jmei₂: “A₂ma₂rë₂jen'₅₄ ne₄ Diú₄ bá₄ a₂jaun₂”, ⁶ jaun₂ në'₃, jme₂tín'₂
 'nia'₂ dsa₂ 'éi'₃ a₂tsá₃ ma₃tíon₅₄ 'nió'₅ jme₃'on₅₄ dsa₂ chog₅₄-jmei₂.
 O₄quió'₄ tag₄ quián'₂ 'nia'₂ guiong'₅₄ bá₄ ma₂ja₂nó'₅ 'nia'₂ jmo'₂ tsá₃
 ma₃'e₂ quen₅ 'éi'₃ quió'₅ Diú₄. ⁷ i'Nia'₂ dsa₂ i₂lë₁jmo₅-dsáu₅ o₁ne₁ a₂jmo'₂
 'nia'₂ a₂jme₂juíng'₁ Diú₄ quian'₅₄ tag₄ quiáng'₂ ja₂nóg'₅! Dsón'₂ bá₄ dsau₅
 a₂ca₂juá'₂ Isaías i₂jme₁'ë₂ jág₁ quián₅ Diú₄, jme₁ca₂tióng₃ ne₄ si₂, 'iin₂₃
 'nia'₂, jme₁ca₂juá'₂:

⁸ Dsa₂ juig₂ la₂ jme₂juag'₂ jniá₂
 jmá'₃ lia'₂ quian'₅₄ mi₂'o₅₄ bá₄,
 la₁ia₁ uíng₂ bá₄ 'i₄ dsí₅
 ja₁con₂ jniá₂.

⁹ La₁ tsá₃ 'e₂ ta₁ tí₄ a₂jme₂juag'₂,
 ia₁ jág₁ a₂jme₂tag₂₃
 jmá'₃ 'éi'₃ quió'₅ dsa₂ mi₂güíng₃ bá₄ jaun₂.^j

¹⁰ Jaun₂ ca₂të'₃ Jesús dsa₂ juín₅ i₂ma₂quiain'₅₄ a₂jme₃quián₃ 'éi₂
 ja₁coin₂, jaun₂ ca₂juá'₂:

—Rë₂ nei₂ 'nia'₂ a₂la₂; jui₁le₂ñí'₂ 'nia'₂: ¹¹ Jui₁lia'₂ a₂dsi₂to'₅₄ jui₅ mi₂'o₄
 dsa₂, on₃jua'₅₄ a₂jaun₂ jmo₅ a₂rë'₃iog₅ jme₂dsí₂ quió'₅ dsa₂. Ca₂le₃jë'₃
 a₂'uë₂ jui₅ mi₂'o₄ dsa₂, a₂jaun₂ bá₄ jmo₅ a₂rë'₂iog₅ jme₂dsí₂ quió'₅ dsa₂.

¹² Jaun₂ ca₂jme₃quián₃ chi'₂ dsi₂guia₃-tín₂, jaun₂ ca₂juá'₂:

—÷Tsa₁ ñi'₅₄, 'ñio₅ lín₃ tsá₃ dse₃ ca₂tín₂ dsa₂ fariseos jág₁ a₂në₂chei'₅₄?

¹³ La₁ ca₂ñag₃ Jesús:

—Ca₂le₃jë'₃ ni₁'ma₂ a₂tsá₃ ca₂chéin'₃ Ñe'₃ jniá₂ i₂guá₅ guei'₅₄ i₂juíng₃,
 guéi₃ le₂jio₅ jmú₄. ¹⁴ O₁lé₄ me'₂; ia₁ dsa₂ ten₄ bá₄ në₅ quian₅ ne₄ jui₅.^k Ia₁
 në₁jua'₂ jan₂ dsa₂ ten₄ jñiai₂₃ dsa₂ ten₄ riin'₅₄, le₃oin₃ bá₄ tsi₃séin'₂ siá₅.

¹⁵ Jaun₂ ca₂juá'₂ Pe₄ ca₂tsí'₃ Jesús:

—Jua'₅₄ 'e₂ jág₁ dsau₅ jáng'₅ jág₁ në₅.

¹⁶ Jaun₂ ca₂ñag₃ Jesús:

—÷Ján₃ bá₄ tsá₃ ñí'₂ 'au'₂ 'nia'₂? ¹⁷ Ia₁, ÷tsa₁ ñí'₂ 'nia'₂, jui₁lia'₂
 ca₂le₃jë'₃ a₂dsi₂to'₅₄ jui₅ rë₂'o₄ dsa₂, dsi₂lé₂ rë₂tú'₅ bá₄ dsa₂, cang₂ jaun₂
 'uë₂ táng₃? ¹⁸ La₁ jui₁lia'₂ a₂'uë₂ jui₅ mi₂'o₄ dsa₂, a₂jaun₂ a₂já₅ të₂dsí₅ bá₄
 dsa₂. A₂jaun₂ bá₄ jmo₅ a₂rë'₂iog₅ jme₂dsí₂ quió'₅ dsa₂. ¹⁹ Ia₁ të₂dsí₅ bá₄
 dsa₂ já₅ ca₂le₃jë'₃ a₂'lig'₅₄ a₂dsi₂jio₅ dsí₅: jui₁lia'₂ a₂jme₂dsian₅ dsa₂ dsa₂

^h4 Éxodo 20:12; Deuteronomio 5:16.

ⁱ4 Éxodo 21:17; Levítico 20:9.

^j8-9 Isaías 29:13.

^k14 A₂lín₅₄ chog₅₄ si₂ juá'₂: “ia₁ i₂jñia₅ dsa₂ ten₄ bá₄ në₅.”

mi₂güig₃ riin'₅₄: jui₁lia'₂ a₂nió'₅ dsa₂ jág₁ quian'₅₄ dsa₂ i₂tsá₃ lín₅
 dsi₂i₂gu₂, jui₁lia'₂ a₂lë₁i₂nio₄ dsa₂ tián'₅, tsá₃ gu₂ le₁jen'₂; jui₁lia'₂ a₂'ang₅
 dsa₂; jui₁lia'₂ a₂nau₂ dsa₂ a₂jáng'₅ jág₁ dsau₅ a₂jmo₂₃ tē₂jíin₁; jui₁lia'₂
 a₂jmo₅ dsa₂ a₂lë₁bóin'₂ dso₄ riin'₅₄ né₃. ²⁰ Ca₂le₃jé₃ a₂nē₅ bá₄ jmo₅
 a₂rē₂'iog₅ jme₂dsí₂ quió'₅ dsa₂; la₁ a₂gué'₅ dsa₂ tē₃ tsá₃ ma₂nē₂jme₃ti₃ 'éi'₃
 tag₄ a₂chí'₅ a₂rang₂₃ gu₂, on₃jua'₅₄ a₂jaun₂ jmo₅ a₂rē₂'nio₅ dsa₂.

Jan₂ i₁náu₃ i₂ca₂rē₃'én₂ tē₂le₃ quió'₅ Jesús

(Marcos 7:24-30)

- ²¹ O₂'ín₃ bá₄ Jesús ja₁jaun₂, ca₂ño₃ táng₃ jui₅ juig₂ Tiro quian'₅₄ Sidón.
²² Ja₁jaun₂ jan₂ 'io₅₄ cananea i₂guá₅ jē₄ juig₂ jaun₂, ca₂guain₃ con₂ Jesús
 'o₂₃ co₂mi'₅₄, juá'₂ tiá₂:
 —iTe₁gui'₅₄, jaun₅ David, dsia₄ nēi₂ 'au'₂ jniá₂! Jan₂ chi'₂ ja₁míg₄ jniá₂
 'en₅₄ jan₂ jme₂dsí₂ je₂na'₅₄ tē₂dsí₅, 'nio₅ lín₃ nág₅ uig₅.
²³ La₁ tsá₃ 'e₂ ca₂ñag₃ Jesús 'i₁caun₂. Jaun₂ o₃lén₂ chi'₂ dsi₂guia₃-tín₂
 quián₅, jaun₂ ca₂juá'₂:
 —Chei'₅₄ i₂nē₅ jui₁dsiain'₅₄, ia₁ já₅ guió'₅ co₂mi'₅₄ chi₁co'₅₄ quián₂
 jniog₄.
²⁴ Jaun₂ ca₂ñag₃ Jesús ca₂tsí'₃ 'io₅₄ 'éi₂:
 —Ca₂chei₃ Diú₄ jniá₂ a₂guio₃ jmá'₃ lia'₂ ca₂ne₅₄ o₄quió'₄ já'₂ cha'₂
 i₂ma₂i₂cón'₅ chan₂ juig₂ Israel.
²⁵ La₁ caun₂ já₅ bá₄ 'io₅₄ 'éi₂, ca₂chi₃jné₃ ne₄ Jesús, ca₂juá'₂:
 —iTe₁gui'₅₄, jme₁'o₄ jniá₂!
²⁶ Jaun₂ ca₂ñag₃ Jesús:
 —Tsá₃ dsi₂ten₅₄ jua'₅₄ a₂jñiá'₄ jniá₂ i₁ñí'₄ quió'₅ chi'₂-guein₂ a₂cué'₄
 dsi₂jí'₅₄.
²⁷ Jaun₂ ca₂ñag₃ táng₃ 'io₅₄:
 —Dsón'₂ bá₄ dsau₅, Te₁gui'₅₄; la₁ cág'₅ bá₄ dsi₂jí'₅₄ ni₁jne₁ a₂tsi₂séi'₂
 ne₄ mesa ja₁gué'₅ juig₅₄.
²⁸ Jaun₂ ca₂ñag₃ táng₃ Jesús:
 —i'E₂ gué'₄ tson₂ 'én'₂ 'ne₂, dsa₂ mí₂! Jui₁le₅₄ bá₄ lia'₂ con'₂ lē₅ a₂mi'₂
 nē₅.
 Dsi₂jui₅ le₂jaun₂ bá₄ ca₂'lón₂ chi'₂ ja₁míg₄ 'io₅₄ 'éi₂.

Ca₂jme₃'lión₂ Jesús juin₅ dsa₂ dso'₅₄

- ²⁹ O₂'ín₃ bá₄ táng₃ Jesús ja₁jaun₂, jaun₂ ca₂ñí₃ jui₅ chei'₅₄ jmi₁ñí'₄
 Galilea; jaun₂ ca₂uíg₂ jui₅ ne₄ má'₂, jaun₂ ca₂guá₂ jme₁dsióg₃. ³⁰ Juin₅
 dsa₂ ca₂dsi₃lén₂ táng₃ cau₅ quió'₅ ja₁jaun₂, le₁jñiai₂₃ dsa₂ guian'₅₄, dsa₂
 i₂le₁já'₂ gu₂-tag₄, dsa₂ ten₄, dsa₂ con₄, juin₅ gué'₄ dsa₂ sián'₂
 i₂jme₁le₁dso'₅₄ né₃. Qui₂ca₂dsiog₃ ja₁chén'₄ Jesús, jaun₂ ca₂jme₃'lió₂ 'éi₂.
³¹ Jaun₂ gué'₄ ca₂i₃gó'₃ dsí₅ dsa₂ jme₁ca₂tē₂ ne₅₄ ma₂dsia₅ jág₁ dsa₂
 i₂jme₁con₄, ma₂i₂nio₄ dsa₂ i₂jme₁qui₂le₁já'₂ quió'₅, quian'₅₄ dsa₂ guian'₅₄

né₃; dsa₂ ten₄ né₃ qui₂ca₂jág₃. Jaun₂ ca₂tón'₂ dsa₂ ca₂jme₃juin'₂ Diú₄
quián₅ dsa₂ Israel.

Ca₂jme₃tan₅₄ Jesús quén₂ mei₅ dsa₂

(Marcos 8:1-10)

³² Jaun₂ ca₂té'₃ Jesús chi'₂ dsi₂guia₃-tín₂ quián₅, jaun₂ ca₂juá'₂:
—'Nio₅ néi₂ dsi₃ jing₅₄ dsa₂ ně₅, ia₁ ma₂'ni₅ jmig₄ tioin'₅₄ ja₁lá₃
quian'₅₄ jniá₂, 'i₁ca₂juig₄ tsá₃ 'e₂ cha₂ a₂gué'₃ ja₁lá₃. Jaun₂ né₃, tsá₃ 'nio₃
jniá₂ dsiain'₅₄ tē₃ tsá₃ ma₂nē₂gué'₃, ia₁ con'₂ tsá₃ ŋó₅ ně₁ca₂'uáin₂ le₂'i₄
jui₅.

³³ Jaun₂ ca₂juá'₂ chi'₂ dsi₂guia₃-tín₂ quián₅:

—¿A₂já'₄ lé₂ dsi₁liá₄ i₁ŋí'₄ ja₁co₂'ŋiog₅ la₂ a₂gué'₃ dsa₂ juin₅ ně₅?

³⁴ Jaun₂ ca₂ŋag₃ Jesús ca₂ŋí'₃ chi'₂ dsi₂guia₃-tín₂:

—¿Je₂liá'₂ i₁ŋí'₄ 'i₄ gué'₄ quián'₂ 'nia'₂?

Jaun₂ ca₂ŋag₃ 'éi₂:

—Guio₃ i₁ŋí'₄ bá₄ 'i₄, quian'₅₄ gué'₂ on₃-ún₂ ju₄ pí'₁.

³⁵ Jaun₂ ca₂jmo₃ 'éi'₃ a₂tian'₃ dsa₂ 'uē₃, ³⁶ jaun₂ ca₂ŋa'₃ ta₁guio₃ i₁ŋí'₄
quian'₅₄ i₁ju₁ né₃, ca₂cué'₃ ti₁'mag'₄ Diú₄. Jaun₂ ca₂dsioin₃ le₂caun₂
le₂caun₂ i₁ŋí'₄, ca₂cué'₃ chi'₂ dsi₂guia₃-tín₂ quián₅, jaun₂ 'éi₂ gué'₄ né₃
ca₂dsió'₃ jin₄ dsa₂. ³⁷ Ca₂le₃jín₃ bá₄ dsa₂ 'éi₂ ca₂gué'₃ ca₂lia'₂ ca₂'ág'₃ dsí₅.
Jaun₂ ca₂cág'₃ chi'₂ dsi₂guia₃-tín₂ guio₃ tsi₁mi'₂ jmá'₃ ni₁jne₁
a₂ca₂chóng₃. ³⁸ Dsa₂ i₂ca₂gué'₃ 'éi₂ jme₁lé₂ quén₂ mei₅ jmá'₃ dsa₂ ŋe'₂,
i₂sián'₂ bá₄ dsa₂ mí₂ quian'₅₄ chi'₂ né₃. ³⁹ Jme₁ca₂lě₃ jaun₂, ca₂'ág'₃ Jesús
jág₁ dsa₂, jaun₂ ca₂'í₃ 'ŋió'₃ tsi₁mu₅ a₂ŋó₃ jui₅ jē₄ juig₂ Magadán.¹

Dsa₂ fariseos quian'₅₄ dsa₂ saduceos mi₂₃ ne₄

Jesús a₂jmo₃ 'éi₂ caun₂ léi₄ jué'₂

(Marcos 8:11-13; Lucas 12:54-56)

16 ¹ Dsa₂ fariseos quian'₅₄ dsa₂ saduceos i₁lein₅₄ i₁jiin₅₄ Jesús, ia₁
a₂'no'₂ jui₅ 'a₂ lia'₂ tiain'₃ Jesús quian'₅₄ jág₁; jaun₂ ca₂mi₃
a₂jmo₃ 'éi₂ caun₂ léi₄ a₂já₅ guei'₅₄ i₂juíg₃.

² La₁ ca₂ŋag₃ Jesús:

—['Nia'₂ ting'₂ jág'₁ tē₂le₃ ca₂'láu₂ jme₁lin₅₄, juá'₂ 'nia'₂: “Dse₃ bá₄ 'ei₅
táng₃ 'ióg₃, ia₁ guéin₂ bá₄ jniá₂ guei'₅₄ mi₂güí₃.” ³ Ján₃ bá₄ juá'₂ 'nia'₂
jme₁lin₅₄ jui₁lia'₂ tē₃ o₃'iog₂, “Tiá'₃ jmí₅ ně₃, ia₁ guéin₂ jniá₂ jnei₅ tio'₅₄
guei'₅₄.” Ní'₅₄ bá₄ 'nia'₂ 'a₂ lia'₂ jua'₅₄ 'e₂ jein₅ jág₁ 'a₂ lia'₂ jniá₂ guei'₅₄,
jŋia'₅₄ lia'₂ 'e₂ a₂tē₅ ne'₅₄ 'nia'₂ jmig₄ ně₃ bá₄, tsá₃ ŋi'₅₄ 'nia'₂ 'e₂ jein₅
jág₁.]” ⁴ Tsi₁jon₂ dsa₂ 'lin'₅₄ i₂tsá₃ nag₃ la₂, mi₂₃ a₂jmo₅₄ jniá₂ caun₂ léi₄

¹39 o₃, Magdala, ja₁chan₂ María Magdalena.

^m2,3 A₂lin₅₄ chog₅₄ si₂ gui'₅₄ gué'₄ tsá₃ chi₁ton₅ jág₁ a₂tio'₅₄ 'ŋió'₃ corchetes [le₂la₂].

a₂o₂dsang₂. La₁ 'i₁caun₂ léi₄ siá'₂ tsá'₃ 'e₂ ηe'₂ 'nia'₂, jñia'₅₄ lia'₂ caun₂ léi₄ jui₁lia'₂ a₂ca₂i₃ñí'₂ Jonás bá₄.

Jaun₂ ca₂tén₂ bá₄ Jesús dsa₂ 'éi₂, ca₂ñái'₃.

Levadura quió'₅ dsa₂ fariseos

(Marcos 8:14-21)

⁵ Jme₁ca₂'an₂ chi'₂ dsi₂guia₃-tín₂ jmi₁ñí'₄, ca₂dsáu'₃ dsí'₅ tsá'₃ 'e₂ i₁ñí'₄ le₁quian₅ gué'₃. ⁶ Jaun₂ ca₂juá'₂ Jesús:

—Jmo₄ 'nia'₂ 'í₁ jaun₂ tsá'₃ le₃tín'₂ 'nia'₂ juá'₅ a₂jme₂tag₅ dsa₂ fariseos, dsa₂ saduceos né₃. Ia₁ juá'₅ quió'₅ lé₅ lia'₂ lé₅ jui₁ levadura.

⁷ Jaun₂ ca₂dsia₃ chi'₂ dsi₂guia₃-tín₂ jág₁ tsí'₅ riin'₅₄:

—Ia₁ tsá'₃ i₁ñí'₄ le₁quian₁ bá₄ jniog₄, jaun₂ bá₄ juá'₂ le₂nē₅.

⁸ La₁ ca₂rē₃lí'₄ bá₄ Jesús 'e₂ jág₁ dsia₂₃, jaun₂ ca₂juá'₂:

—¿'E₂ lē₃ juá'₂ 'nia'₂ tsá'₃ le₁quian'₄ i₁ñí'₄? 'i'E₂ gué'₄ ca₂juig₄ 'én'₂ 'nia'₂! ⁹ ¿'E₂? ¿Tsa₁ ma₂ca₂rē₃ñí'₂ 'nia'₂? ¿Tsa₁ ma₃dsá₂ 'au'₂ 'nia'₂ lia'₂ con'₂ ca₂dsio'₄ jniá'₂ 'ñiá'₂ i₁ñí'₄ ca₂lin₅ quió'₅ 'ñiá'₂ mei₅ dsa₂, on₃ gué'₂ dsá'₂ 'au'₂ 'nia'₂ je₂liá'₂ tsi₁mi'₂ 'nau₅₄ a₂ca₂cag'₅₄ táng₃ 'nia'₂? ¹⁰ ¿On₃ gué'₂ dsá'₂ 'au'₂ 'nia'₂ lia'₂ con'₂ ca₂dsio'₄ jniá'₂ guio₃ i₁ñí'₄ ca₂lin₅ quió'₅ quén₂ mei₅ dsa₂, on₃ gué'₂ dsá'₂ 'au'₂ 'nia'₂ je₂liá'₂ tsi₁mi'₂ 'nau₅₄ a₂ca₂chóng₂ a₂ca₂cag'₅₄ 'nia'₂ né₃? ¹¹ ¿'A₂ bá₄ lia'₂ ñí'₄ tsá'₃ rē₂len'₅₄ 'nia'₂? On₃jua'₅₄ i₁ñí'₄ 'ē₅ jniá'₂ jme₁nē₂juá'₃ jmo₄ 'nia'₂ 'í₁ quian'₅₄ levadura quió'₅ dsa₂ fariseos quian'₅₄ dsa₂ saduceos.

¹² Jaun₂ gué'₄ ca₂ñí'₂ dsí'₅ 'éi₂ a₂ 'ē₅ Jesús jaun₂, on₃jua'₅₄ a₂ca₂tín₂ jmo₃ 'í₁ jui₁lia'₂ jui₁ levadura a₂cón'₂ dsa₂ i₁ñí'₄, a₂ca₂tín₂ jmo₃ 'í₁ 'a₂ lia'₂ lé₅ juá'₅ a₂jme₂tag₅ dsa₂ fariseos quian'₅₄ dsa₂ saduceos bá₄.

Ca₂juá'₂ Pe₄ lia'₂ tí₅ jág₁ dsau₅ a₂lín₅ Jesús dsa₂ I₂rē₂'ín₁ quián₅ Diú₄

(Marcos 8:27-30; Lucas 9:18-21)

¹³ Jme₁ca₂dsióg₃ Jesús ma₂quián₅ juig₂ Cesarea ja₁tén₄ Filipino, jaun₂ ca₂ñí'₃ chi'₂ dsi₂guia₃-tín₂ quián₅:

—¿'Ein₂ lín₅ Jaun₅ dsa₂ mi₂güí'₃, juá'₂ dsa₂?

¹⁴ Jaun₂ ca₂ñag₃ 'éi₂:

—I₂lín₅₄ dsa₂ juá'₂ a₂lín'₅ Juan₅₄ i₂chon₅ dsa₂ jmig₂; i₂sián'₂ gué'₂ juá'₂ a₂lín'₅ Elías; i₂lín₅₄ gué'₂ juá'₂ táng₃ a₂lín'₅ Jeremías, o₃ jan₂ i₂sián'₂ i₂já₅ 'é₂ jág₁ quió'₅ Diú₄.

¹⁵ Jaun₂ ca₂ñag₃ Jesús:

—¿'Nia'₂ gué'₂ né₃? ¿'E₂ juá'₂ 'nia'₂ 'ein₂ lín₅ jniá'₂?

¹⁶ Jaun₂ ca₂ñag₃ Si₂mu₅₄ Pe₄:

—'Ne₂ lín'₅ dsa₂ I₂rē₂'ín₁, Ja₁ñi'₅₄ Diú₄ jén'₃.

¹⁷ Jaun₂ ca₂ñag₃ Jesús:

—E₂ gué₄ dsen₃ 'ne₂, Si₂mu₅₄, ja₁ŋi₅₄ Jonás, ia₁ 'i₁jan₂ dsa₂ mi₂güí₃ tsá₃ nē₂jme₃jnia₅ ne₅₄ a₂nē₅, jñia₅₄ lia₂ Ne₃ jniá₂ i₂guá₅ i₂juí₃ bá₄.

¹⁸ Jaun₂ juá₅ jniá₂ juí₃ 'ne₂, a₂ma₂cheng₂ Pedro,ⁿ jaun₂ ne₄ ni₁ 'lau₂ la₂^o jmóg₄ jniá₂ guá₅ quió₃, jaun₂ ca₂lia₂ jñia₅₄ i₂'io₅ bí₂ 'mú₃ tsá₃ le₃qui₅₄ jmíg₄ jua₅₄ a₂tió₃ quiong₅₄ quian₅₄ mai₅₄ quió₅. ¹⁹ Jaun₂ o₄gog₂ 'ne₂ dsia₅₄ jniá₂ jág₁ dse₃ quió₃ a₂lé₅ co₂'nió₄ ŋí₁ llave a₂niá₃ ja₁dsi₃tion₅₄ dsa₂ ja₁gon₂ Diú₄. Ca₂le₃jé₃ 'e₂ a₂tsá₃ cué₂ 'ne₂ jmíg₄ ne₄ gua₅₄ 'uē₃ la₂ lia₂ con₂ lé₅ jág₁ quió₃, ján₃ bá₄ le₂jaun₂ tsá₃ lé₂ guei₅₄ i₂juí₃; ján₃ bá₄ le₂jaun₂ jui₁lia₂ a₂cué₂ 'ne₂ jmíg₄ gua₅₄ 'uē₃ la₂ lia₂ con₂ lé₅ jág₁ quió₃, a₂jaun₂ bá₄ lé₂ guei₅₄ i₂juí₃ ján₃.

²⁰ Jaun₂ ca₂tsí₃ chi₂ dsi₂guia₃-tín₂ quiáin₅ a₂tsá₃ 'ein₂ tsí₃ 'i₁jan₂ a₂lín₅ I₂rē₂'ín₁ quián₅ Diú₄.

Ca₂'é₂ Jesús jág₁ a₂jóin₂
(Marcos 8:31-9:1; Lucas 9:22-27)

²¹ Tē₂le₃ ne₄ jui₅ ja₁ŋó₄ jaun₂, ca₂jme₃lióg₃ Jesús ca₂'é₂ jág₁ ca₂tsí₃ chi₂ dsi₂guia₃-tín₂ quiáin₅, a₂tion₅₄ dsó₃ jui₅ Jerusalén, ja₁dsi₃ŋí₂ 'lióng₂ ne₅₄ jmi₁uig₅ a₂jmóg₂ dsa₂ can₅₄ quián₅ guá₅, quian₅₄ juig₅₄ jme₂dsa₂, tē₅juá₅ nē₃. Jaun₂ ca₂juá₂ a₂jñag₃ dsa₂, la₁ a₂'ni₅ jmíg₄ jaun₂, jein₅₄ bá₄ táng₃.

²² Jaun₂ Pe₄ nē₃ ca₂jio₃ le₃cau₅, jaun₂ ca₂jme₃lióg₃ a₂tē₂néi₂ a₂jme₁jnéi₂ jui₅, ca₂juá₂:

—iTsá₃ o₁le₅₄ le₂nē₅, Te₁gui₅₄! iO₁líg₂ bá₄ tsá₃ jui₁dsi₂ŋí₂ 'ne₂ le₂nē₅!

²³ La₁ Jesús nē₃, ca₂jéin₃ le₂ca₃, jaun₂ ca₂juá₂ ca₂tsí₃ Pe₄:

—iJñiag₃ cau₅ quió₃, Satanás! Jñia₅₄ jni₂ bá₄ 'ne₂ jui₅ quió₃, ia₁ tsá₃ le₂jaun₂ dsi₂jio₅ 'au₂ jui₁lia₂ dsi₂jio₅ dsí₅ Diú₄. Ia₁ lia₂ dsi₂jio₅ dsí₅ dsa₂ mi₂güí₃ bá₄ dsi₂jio₅ 'au₂.

²⁴ Jaun₂ ca₂juá₂ Jesús ca₂tsí₃ ca₂le₃jín₃ chi₂ dsi₂guia₃-tín₂ quiáin₅:

—Chi₂jua₂ 'ein₂ 'nio₃ 'éin₃ jniá₂, co₂dsia₅ jui₁dsi₂'én₂ dsí₅ guioin₅₄, jui₁jmo₁₂ co₂jñiai₅₄ a₂jóin₂,^p jui₁jia₂ chi₁co₅₄ quió₃. ²⁵ Ia₁ jui₁'ein₂ gué₃ i₂tsá₃ 'nio₃ jón₂ ia₁ a₂'ín₅ dsí₅ le₃chain₂ dse₃ mi₂güí₃ la₂, dsi₂'én₂ quió₅. La₁ jui₁'ein₂ gué₃ i₂tén₂ dsí₅ gue₃ 'mú₃ 'uig₅₄ quió₃ jniá₂, le₃chain₂ dse₃ mi₂güí₃ caun₂. ²⁶ Ia₁, ¿'e₂ bá₄ ta₁ jmo₃ a₂lí₂ dsa₂ 'ŋio₅ lín₃ ne₄ gua₅₄ 'uē₃ la₂, nē₁jua₂ dsi₃'én₂ bá₄ guē₂ jme₂dsí₂ quió₅ mi₂güí₃ caun₂? ¿O₃ je₂liá₂ lé₂ le₃quí₃ dsa₂ 'lia₅₄ ia₁jaun₂ tñ₄ jme₂dsí₂ quió₅? ²⁷ Ia₁ Jaun₅ dsa₂ mi₂güí₃ jñiúi₂ quian₅₄ jui₅bí₂ jlá₁ quió₅ Jmei₂, quian₅₄ ángeles quiáin₅, ja₃qui₅ 'lian₅₄ dsa₂ 'a₂ con₂ jñia₅₄ niog₅ ca₂jmo₃. ²⁸ A₂dsi₂jó₃ juá₅ jniá₂ juí₃ 'nia₂, chan₂ i₂lín₅₄ jui₁lia₂ i₂tion₅₄ ja₁lá₃ tsá₃ dsián₃

ⁿ18 griego: Petros, co₂'nió₄ le₃jua₅₄ ni₁cang₁.

^o18 'Nio₂ ja₁ton₅₄ 1 Pedro 2:7.

^p24 lit. "jui₁quian₅₄ cróg₄ quió₅."

ca₂lia'₂ ca₂tě'₂ ne₅₄ jín₂ Jaun₅ dsa₂ mi₂güí₃ a₂jñíó'₂ lín₅ rag₅₄
a₂qui₃dsi₂₃ 'éi'₃.

Ca₂rě₃tsín₃ 'a₂ lia'₂ jniá'₂ Jesús

(Marcos 9:2-13; Lucas 9:28-36)

17 ¹ Jñéi₂ jmi₄ cang₂ jaun₂, ca₂jñia₃ Jesús Pe₄, Jacobo,^q quian'₅₄
Juan₅₄ rin'₅₄ Jacobo nē₃, ca₂i₃lén₂ con'₂ guioin₅₄ caun₂ má'₂
ñei₅. ² Ja₁jaun₂ ca₂rě₃tsín₃ 'a₂ lia'₂ jniá'₂ Jesús tē₃ jág₅ 'éi'₂. Ne₄ Jesús
ca₂jñia₃ tá₅ jui₁lia'₂ jniá'₂ 'iog₂; tsín'₅₄ guē'₂ nē₃ ca₂jñia₃ tiog₂ jau₂
ca₂lia'₂ tá₅ lín₃. ³ Jaun₂ dsi₂jui₅ jaun₂ ca₂jñia₃ Moisés quian'₅₄ Elías,
tióin₂ dsia₂₃ jág₁ quiaín'₅₄ Jesús. ⁴ Jaun₂ ca₂juá'₂ Pe₄ ca₂tsí'₃ Jesús:
—Te₁gui'₅₄, i'e₂ gué₄ dse₃ lia'₂ tio'₅₄ jniog₄ ja₁lá₃! Chi₂jua'₂ niog'₂,
jmo₅₄ jniá'₂ 'ni₅ tsi₁'io₅ láu₃; caun₂ quiáng'₂, caun₂ quió'₅ Moisés, caun₂
guē'₂ quió'₅ Elías nē₃.

⁵ Tē₃jē₄ dsia₅ Pe₄ jág₁ jaun₂, ca₂lioin₂ caun₂ jnei₅ tá₅; jaun₂ jē₄ jnei₅
jaun₂ ca₂nē'₂ jág₁ a₂juá'₂:

—I₂la₂ bá₄ jón₃ quiáng₃, i₂ñí₄ lē₃ 'nióg₃ gué₄ lín₃. 'E₂ bá₄ 'ñio₂ dsi₃
quiaín'₅₄. Nei₂ 'nia'₂ jág₁ quió'₅.

⁶ Jme₁ca₂nág₂ chi'₂ dsi₂guia₃-tín₂ jág₁ jaun₂, ca₂rě₃gó'₅ ca₂le₃jé₃
ca₂i₃gain'₅₄ 'uē₃ le₁'éin₂, ⁷ Jaun₂ ca₂guán'₃ tá₃ Jesús cau₅ quió'₅,
ca₂jñau'₃, jaun₂ ca₂juá'₂:

—Nau₂ 'nia'₂; Tsá₃ lē₁jmo₂ 'nia'₂ gang'₃.

⁸ Jaun₂ jme₁ca₂jág₃ tá₃, tsá₃ ma₂'ein₂ i₂sián'₂ ca₂jín₂; jñia'₅₄ lia'₂
'ñiog₅ bá₄ Jesús ma₂chéin'₅.

⁹ Jme₁ja₂lein₃ sióin₅ tá₃ má'₂ jaun₂, ca₂jmo₃ Jesús 'éi'₃, ca₂juá'₂:
—Tsá₃ 'ein₂ jui₅'₅₄ 'nia'₂ a₂nē₂jag'₅₄ 'nia'₂ nē₅, ca₂lia'₂ ca₂tě'₂ jmi₄
jē₁ma₂ca₂jen'₅₄ tá₃ Jaun₅ dsa₂ mi₂güí₃ ne₄ 'mú₃.

¹⁰ Jaun₂ ca₂ñag₃ chi'₂ dsi₂guia₃-tín₂ ca₂ñí'₃ Jesús:

—Chi₂jua'₂ le₂nē₅, ¿'E₂ lē₃ juá'₂ tē₅juá'₅, Elías bá₄ i₂jiá₃ le₂'uig₅₄?

¹¹ Jaun₂ ca₂ñag₃ Jesús:

—Dsón'₂ Elías bá₄ jiá₃ le₂'uig₅₄, jaun₂ 'éi'₂ bá₄ jme₃rě₃ ca₂le₃jé₃. ¹² La₁
juá'₅ jniá'₂, i₂ma₂guan₅ bá₄ Elías, la₁ tsá₃ 'ein₂ ca₂rě₃cui₅. Jaun₂
qui₂ca₂jmóg'₂ dsa₂ lia'₂ lē₂ dsí₅ ca₂le₃jé₃ gué₄ 'a₂ lia'₂ 'nio₃ jmóg'₂. Ján₃
bá₄ le₂nē₅, Jaun₅ dsa₂ mi₂güí₃ dsi₃ñí₂ uig₅ o₄gú₃ dsa₂ 'éi'₂.

¹³ Jaun₂ gué₄ ca₂rě₃lí'₄ chi'₂ dsi₂guia₃-tín₂, Juan₅₄ i₂ca₂chon₃ dsa₂ jmi₄
bá₄ 'in₅ Jesús, a₂juá'₂ le₂jaun₂.

Ca₂jme₃'lión₂ Jesús jan₂ chi'₂ i₂'en₅₄ jme₂dsí₂ 'lín'₅₄ dsí₅

(Marcos 9:14-29; Lucas 9:37-43)

¹⁴ Jme₁ca₂dsi₃lein₃ ja₁tion'₅₄ dsa₂ juín₅, jaun₂ ca₂jme₃quián₃ jan₂ dsa₂
ja₁chén'₄ Jesús, jaun₂ ca₂chi₃jnē₃ ne₅₄, jaun₂ ca₂juá'₂:

^q1 ján₃ bá₄ chein₂ Santiago.

¹⁵ —Te₁gui' ₅₄, dsia₄ nēi' ₂ 'au' ₂ chi' ₂ quiáng₃, 'nio' ₅ lín₃ nág₅ uig' ₅ lín₅ dso₄ 'ei' ₂; 'lóng₂ ráun₂ ma₂ca₂táin' ₂ dsi₂si₂, dsi₂jmi₂g' ₂ nē₃. ¹⁶ Ma₂i₁jñiai' ₅₄ jniá' ₂ ne₄ chi' ₂ dsi₂guia₃-tín₂ quiáng' ₂, la₁ tsá' ₃ ca₂tió' ₃ jme' ₃ 'lió' ₂.

¹⁷ Jaun₂ ca₂ñag₃ Jesús:

—i'En₁ jmá' ₃ tsá' ₃ 'e' ₂ 'én' ₂ 'nia' ₂! ¿Je₂liá' ₂ jmi₂g' ₄ jmá' ₃ 'nió' ₅ 'ú' ₄ quian' ₅₄ 'nia' ₂? ¿Je₂liá' ₂ jmi₂g' ₄ jmá' ₃ 'nió' ₅ jmo' ₅₄ tió' ₅ dsi' ₃ quian' ₅₄ 'nia' ₂? I₂jñia' ₅ chi' ₂ ja₁lá₃.

¹⁸ Jaun₂ ca₂jí' ₂ Jesús ca₂jéin' ₂ je₂na' ₅₄. Jaun₂ ca₂o₃'lín₃ tē₂dsí' ₅ chi' ₂ 'éi' ₂, jaun₂ gué' ₄ nē₃ ca₂'lón' ₂ dsi₂jui' ₅ le₂jaun₂.

¹⁹ Jme₁co₂lág' ₂ jaun₂ ca₂dsia' ₃ chi' ₂ dsi₂guia₃-tín₂ jág' ₁ quian' ₅₄ Jesús jē' ₄ con' ₂ guioin' ₅₄, jaun₂ ca₂ñí' ₃ 'éi' ₂:

—¿'E' ₂ 'uig' ₅₄ tsá' ₃ ca₂tián' ₃ jnia' ₅₄ dsén' ₄ i' ₂ 'lín' ₅₄?

²⁰ Jaun₂ ca₂ñag₃ Jesús:

—Ne₄ ia₁ a₂ñí' ₄ lē' ₃ ca₂jui' ₄ 'én' ₂ bá' ₄ 'nia' ₂. A₂dsi₂jó' ₃ juá' ₅ jniá' ₂, jua' ₅₄ mei' ₂ gué' ₃ 'én' ₂ 'nia' ₂, tsá' ₃ a₂ñag' ₅₄ o₁jñia' ₅₄ con' ₂ tí' ₅ ca₂mí' ₂ mī' ₂ jon' ₂ mostaza,^r lé' ₂ le₃jme₁jui' ₅₄ 'nia' ₂ jui' ₁lia' ₂ má' ₂ ó' ₃: “Jñiag' ₃ ja₁nē' ₅, gua₂ tē' ₂le₃ ca₂taun' ₂”; má' ₂ jaun₂ nē' ₃ jñió' ₃ ja₁ 'è' ₂ 'nia' ₂. 'I₁caun' ₂ tsá' ₃ 'e' ₂ cha₂ jua' ₅₄ a₂tsá' ₃ lé' ₂ le₃jmó' ₂ 'nia' ₂ jua' ₅₄ mei' ₂ gué' ₃ le₂jaun₂.^s

Ca₂'é' ₂ táng₃ Jesús jág' ₁ a₂jóin' ₂

(Marcos 9:30-32; Lucas 9:43-45)

²² Tē' ₁lia' ₂ i₂nioi' ₅₄ co₂lē' ₅ le₂con' ₂ ja₁tén' ₄ 'uē' ₃ Galilea, jaun₂ ca₂juá' ₂ táng₃ Jesús a₂jáng' ₂ dsa₂ jín' ₂ Jaun₅ dsa₂ mī' ₂güí' ₃ o₄gú' ₃ dsa₂ mī' ₂güí' ₃.

²³ Jaun₂ jñag' ₃ dsa₂, la₁ a₂'ni' ₅ jmi₂g' ₄ jaun₂, jein' ₅₄ bá' ₄ táng₃. Ca₂tá' ₂ 'lia' ₂ bá' ₄ dsí' ₅ chi' ₂ dsi₂guia₃-tín₂ jme₁ca₂nág' ₂ jág' ₁ jaun₂.

Ca₂quí' ₃ 'lia' ₅₄ ja₁con' ₂ dsi₂tan' ₅₄ quián' ₅ guá' ₅

²⁴ Jme₁ca₂dsió' ₃ Jesús jui' ₂ Capernaum quian' ₅₄ chi' ₂ dsi₂guia₃-tín₂, jaun₂ ca₂o₃lén' ₂ dsa₂ i₂cág' ₅ jma₃tín' ₃ 'éi' ₃ cu₄ dracma a₂'nió' ₅ quió' ₅ guá' ₅ templo, jaun₂ dsa₂ 'éi' ₂ ca₂jme₃quián' ₃ con' ₂ Pe₄, ca₂ñag₃:

—¿Tsa₁ quí' ₅ tē' ₅ quián' ₂ 'nia' ₂ 'lia' ₅₄ quió' ₅ guá' ₅?

²⁵ Jaun₂ ca₂ñag₃ Pe₄:

—Ján' ₅. Quí' ₅ bá' ₄.

Jme₁ca₂'i' ₃ Pe₄ dsi₂néi' ₂, jaun₂ 'ñiog' ₅ Jesús de' ₂ jñiá' ₅ ca₂juá' ₂ ca₂tsí' ₃ Pe₄:

—¿'A₂ lia' ₂ lín' ₂ 'ne' ₂, Si₂mu' ₅₄? Jui' ₁lia' ₂ jan' ₂ rag' ₅₄ dsa₂ mī' ₂güí' ₃, ¿'Ein' ₂ quió' ₅ mī' ₂₃ 'lia' ₅₄? ¿Quió' ₅ dsa₂ go' ₅₄, o₃ quió' ₅ jmá' ₃ dsi₂nau' ₂ 'e' ₂?

²⁶ Jaun₂ ca₂ñag₃ Pe₄:

^r20 mostaza: On₃jua' ₅₄ mī' ₁ján' ₅ a₂cuí' ₅ dsa₂ go' ₄ jniog' ₄; caun' ₂ ni' ₁ma' ₂ dsón' ₂ bá' ₄ jaun' ₂ a₂té' ₂ tē' ₅sí' ₃ Brassica nigra.

^s20 A₂lín' ₅₄ chog' ₅₄ si₂ chi₁ton' ₅ versículo 21 bá' ₄ ján' ₃, a₂juá' ₂ le₂la₂: “La₁ jui' ₁lia' ₂ i' ₂ 'lín' ₅₄ le₂nē' ₅, tsá' ₃ o₂ 'iin' ₅ nē' ₁jua' ₂ tsá' ₃ chi₂lén' ₂ dsa₂ Diú' ₄ a₂jme' ₂'iin' ₅₄.”

—Quió'₅ dsi₂nau₂ bá₄.

Jaun₂ ca₂juá'₂ táng₃ Jesús ca₂tsí'₃ 'éi₂:

—Tsá₃ ca₂tín₂ dsa₂ go₅₄ qui₃ jaun₂ né₃.²⁷ La₁, jaun₂ tsá₃ tiin₃ 'lig'₅₄, gua₂ o₂'éi₂ mi₂cu₄ dsi₂jmig₂, O₂dsen₅₄ i₁ju₁ i₂nág'₃ le₂'uig₅₄ mi₂cu₄. Mi₂'o₄ i₁ju₁ 'éi₂, dsiang'₂ caun₂ cu₄ 'ua'₂. A₂jaun₂ qui'₅₄ quián₂ jniog₄ le₃ó₃.

'Ein₂ lín₅ i₂dsen₅₄ gué'₄ ja₁gon₂ Diú₄

(Marcos 9:33-37; Lucas 9:46-48)

18¹ Ján₃ bá₄ jmig₄ jaun₂ táng₃ ca₂jme₃quián₃ chi'₂ dsi₂guia₃-tín₂ con₂ Jesús jaun₂ ca₂ngag₃:

—'Ein₂ lín₅ i₂dsen₅₄ gué'₄ guei'₅₄ i₂juíg₃ ja₁gon₂ Diú₄?

² Jaun₂ ca₂té'₃ Jesús jan₂ i₂bē'₅₄, jaun₂ ca₂chei'₃ dsi₂jo₂ ja₁tián'₄,
³ jaun₂ ca₂juá'₂:

—A₂dsi₂jó'₃ juíg₂ jniá'₂ 'nia'₂, nē₁jua'₂ tsá₃ ca₂jme₁tsín'₄ 'nia'₂ 'au'₂, a₂léng'₂ lia'₂ lín₅ jan₂ i₂bē'₅₄, o₁líg'₂ jmig₄ tsá₃ lé₂ le₃dsi₁no'₃ 'nia'₂ guei'₅₄ i₂juíg₃.⁴ Jaun₂ né₃, i₂'éi₂ bá₄ i₂lén₂ i₂dsen₅₄ gué'₄ guei'₅₄ i₂juíg₃ jui₁lia'₂ i₂jmo₅ me'₂ lia'₂ lín₅ chi'₂ bē'₅₄ la₂.⁵ Con'₂ siá'₂ táng₃, jui₁lia'₂ dsa₂ i₂guen₅ jan₂ guein₂ o₄quió₃ jniá'₂ jui₁lia'₂ i₂la₂, jniá'₂ bá₄ guei'₂₃.

A₂go'₂ tsi₃sén'₂ dsa₂ dso₄

(Marcos 9:42-48; Lucas 17:1-2)

⁶ Jui₁'ein₂ gué'₃ i₂jmo₅ tsi₂sén'₂ jui₁lia'₂ chi'₂ bē'₅₄ i₂le₂la₂ i₂'én₂ tē₂le₃ quió₃ jniá'₂, ja₂lín₃ gué'₄ co₂nei'₅₄ dse₃ tón₂ dsa₂ ne₄ jmi₁ñí'₄ rē₂quein₅ ca₂míg₂ ni₁to₂ dsi₂lag₅₄.⁷ 'E₂ gué'₄ juíg₂ dsa₂ mi₂güig₃ ia₁ tsá₃ caun₂ a₂ja₂lé₂ ja₁coin₂ a₂jmo₅ a₂tsi₂sén'₂! La₁ le₂jaun₂ dsón'₂ dsi₃ñí₂ bá₄, la₁ 'e₂ gué'₄ juíg₂ jui₁lia'₂ dsa₂ i₂ton'₂ jág₁ rin'₅₄ jaun₂ jén'₃ dsí₅ 'éi₂ a₂'no₃ dso₄.

⁸ 'Uig₅₄ jaun₂, chi₂jua'₂ mi₂gog'₂ o₃ mi₂tag'₅₄ 'e₂, jmo₅ a₂tang'₂ dso₄, co₂dsia₅ dse₃ 'nia₄, tiong₂ uíng₂; ia₁ ja₂lín₃ gué'₄ dse₃ a₂dsiáng'₄ ja₁le₃chang'₂ co₂tan₅₄ a₂rē₂'liáng'₃, con'₂ gué'₄ a₂jme₁o₁'ú'₃ a₂rē₂'ñia₅ gog'₂-tag'₅₄ dsi₂si₂ ja₁tsá₃ ton₅ jmig₄ éi₃.⁹ Nē₁jua'₂ mi₂ne'₅₄ jmo₅ a₂tang'₂ dso₄, dsi₄ ján₃, tiong₂ uíng₂; ia₁ ja₂lín₃ gué'₄ dse₃ a₂dsiáng'₄ ja₁le₃chang'₂ co₂tan₅₄ a₂teng'₅₄ ca₂míg₂ mi₂ne'₅₄, lia'₂ con'₂ gué'₄ a₂jme₁gog'₅₄ a₂rē₂'ñia₅ ta₁tín₃ míg₂ mi₂ne'₅₄ dsi₂si₂ guio₃-juíg₃.

Jág₁ a₂jáng'₅ léi₄ jui₁lia'₂ jan₂ já'₂ cha'₂ i₂ca₂i₃cón'₅

(Lucas 15:3-7)

¹⁰ 'Tsá₃ jmo₂ 'nia'₂ jua'₅₄ a₂tsá₃ jen'₅₄ jui₁lia'₂ jan₂ chi'₂ bē'₅₄ le₂la₂. Ia₁ juíg₂ jniá'₂ 'nia'₂, ia₁ ángeles i₂jmo₅ 'í₁ quián₅ co₂tan₅₄ bá₄ jín₂ Ne'₃ i₂guá₅ guei'₅₄ i₂juíg₃.^t

^t10 A₂lin₅₄ chog₅₄ si₂ chi₁ton₅ versículo 11 a₂juá'₂ le₂la₂: “Ta₁ jaun₂ bá₄ já₅ Jaun₅ dsa₂ mi₂güig₃, a₂ja₂'niai'₂ dsa₂ i₂ma₂i₂cón'₅.”

¹² 'í'A₂ lia'₂ lín'₂ 'nia'₂? Jua'₅₄ mei'₂ gué'₃ jan₂ dsa₂ 'ñio₅ caun₂ 'ñiá'₂-lón₂ já'₂ cha'₂, në₁jua'₂ ca₂i₃cón'₅ jan₂, 'tsa₁ ja₁jaun₂ chein'₂ ne₄ dsi₂con'₂ i₂quéin'₂ co₂ne₂guión₂ rē₂dsí₂ guia₃-né₂ (99) con'₂ i₂te₂ 'éi₂, jaun₂ dsó₅ táng₃ dsi₂'niai'₂ i₂tsá₃ chan₂ 'éi₂? ¹³ Jē₁ma₂ca₂dsáu'₂ né₃, a₂dsi₂jó'₃ juá'₅ jniá₂, 'ñio₅ lín₃ gué'₄ 'io'₂ jmo₂₃ o₄quió'₄ i₂jan₂ 'éi₂ con'₂ gué'₄ i₂quéin'₂ co₂ne₂guióg₂ rē₂dsí₂ guia₃-né₂ i₂tsá₃ i₂cón'₅. ¹⁴ Le₂nē₅ bá₄ ján₃, Néi'₅ 'nia'₂ i₂guá₅ guei'₅₄ i₂juíg₃ tsá₃ 'nio₃ jua'₅₄ dsi₃cón'₅ ca₂lia'₂ 'i₁jan₂ i₂lín₅ guein₂ bē'₅₄ jui₁lia'₂ i₂la₂.

'A₂ lia'₂ 'nió'₅ 'én₂ dsa₂ dsáu₁ riin'₅₄

(Lucas 17:3)

¹⁵ 'Chi₂jua'₂ 'e₂ caun₂ a₂ca₂j móg'₂ jan₂ ríng'₂, dsia₄ de'₂ 'nia'₂ jág₁ ja₁con'₂ guiong'₅₄, ja₁jaun₂ jme₁jniag'₂ ne₅₄ 'e₂ a₂ca₂j móg'₂. Në₁jua'₂ ca₂tón'₃ jui₅ jág₁ quiáng'₂, ja₁jaun₂ ca₂dsan₃ bá₄ mī'₅₄, ca₂lě₃ bá₄ táng₃ ríng'₂ quiain'₅₄. ¹⁶ La₁ në₁jua'₂ tsá₃ ca₂tón'₃ jui₅ jág₁ quiáng'₂ né₃, te'₂ on₃-ún₂ dsa₂ sián'₂ ia₁jaun₂ "ca₂le₃jé₃ 'e₂ niog₅ lé₂ jióg'₂ 'í₁ quian'₅₄ on₃-ún₂ dsa₂ i₂jáng'₃ jág₁ dsau₅, në₁jua'₂ tí₅ jág₁ jaun₂." ¹⁷ Në₁jua'₂ tsá₃ ca₂tón'₃ jui₅ jág₁ quió'₅ dsa₂ 'éi₂, chei'₅₄ guá'₅; në₁jua'₂ tsá₃ ca₂tón'₃ jui₅ on₃ gué'₂ jág₁ quió'₅ guá'₅ né₃, tē₂le₃ ja₁ñó₄ jaun₂, jmo₄ 'au'₂ jiin'₅₄ lia'₂ ja₁jíng'₄ jan₂ dsi₂nau₂, o₃ jui₁lia'₂ jan₂ i₂cág'₅ cu₄ a₂ca₂tín₂ dsi₂tan₅₄ 'e₂. ¹⁸ 'A₂dsi₂jó'₃ juíg₂ jniá₂ 'nia'₂, ca₂le₃jé₃ 'e₂ a₂tsá₃ cuē'₂ 'nia'₂ jmi₄g₄ ne₄ gua'₅₄ 'uē₃ la₂, lia'₂ con'₂ lē₅ jág₁ quió₃, ján₃ bá₄ tsá₃ lé₂ guei'₅₄ i₂juíg₃; ján₃ bá₄ le₂jaun₂ jui₁lia'₂ a₂cuē'₂ 'nia'₂ jmi₄g₄ ne₄ gua'₅₄ 'uē₃ la₂, lia'₂ con'₂ lē₅ jág₁ quió₃, a₂jaun₂ bá₄ lé₂ guei'₅₄ i₂juíg₃.

¹⁹ 'Ján₃ bá₄ juá'₅ jniá₂, në₁jua'₂ on'₃ 'nia'₂ jmo'₂ caun₂ jág₁ ne₄ gua'₅₄ 'uē₃ la₂, a₂mī'₁ 'nia'₂ 'e₂ a₂'niog'₂ mī'₁, cuē₃ bá₄ Ñe'₃ jniá₂ i₂guá₅ guei'₅₄ i₂juíg₃. ²⁰ Ia₁ jē₁le₁ñi'₂ on₃-ún₂ o₄quió₃ jniá₂, jē₄ jaun₂ bá₄ 'eng₅₄.

²¹ Jaun₂ Pe₄ né₃ ca₂ñag₃:

—Te₁gui'₅₄, 'con'₂ je₂liá'₂ ráun₂ 'nió'₅ 'én₂ jniá₂ dsáu₁ ríng'₃ në₁jua'₂ 'e₂ caun₂ a₂ca₂j móg'₂? 'í'A₂ lia'₂? 'íGuio₃ ráun₂?

²² Jaun₂ ca₂ñag₃ Jesús:

—Ma₁ tsá₃ juá'₅ jniá₂ jñia'₅₄ guio₃ ráun₂. Ta₁'nag'₂ co₂ne₂guióg₂ rē₂dsí₂ guia₃ ráun₂ a₂jma₃guio₃ (70 X 7 = 490)^v bá₄ juá'₅ jniá₂.

Jág₁ a₂jáng'₅ léi₄ jui₁lia'₂ jan₂ dsa₂ i₂tsá₃ ca₂'én₂ dsáu₁ rin'₅₄

²³ 'Uig₅₄ jaun₂, lē₅ guei'₅₄ i₂juíg₃ jui₁lia'₂ lín₅ jan₂ rag₅₄ i₂ca₂mág₃ cuentas quió'₅ ca₂le₃jín₃ dsa₂ i₂jme₂ti₃ ta₁ ne₅₄. ²⁴ Jaun₂ jme₁ma₂jme₂lióg₃ chein'₂ cuentas, jme₁ca₂dsi₃lén₂ dsa₂ le₁jñiai₂₃ jan₂ dsa₂ i₂rin₅ guia₃ mei₅ talentos. ²⁵ La₁, ia₁ tsá₃ 'e₂ cha₂ quian'₅₄ a₂quí₃, jaun₂ ca₂jmo₃ rag₅₄ 'éi'₃ a₂dsi₃'ni₄ dsa₂ 'éi₂ lia'₂ jma₃quian'₅₄ 'io₅₄

^u16 Deuteronomio 19:15.

^v22 o₃, "ta₁'nag'₂ co₂ne₂guióg₂ rē₂dsí₂ guia₃-guio₃ (77) ráun₂".

quiáin₅, chi'₂ quiáin₅ né₃, ca₂le₃jé₃ 'e₂ a₂jme₁cha₂ quió'₅ né₃, ia₁jaun₂ le₂jaun₂ jme₁dsian₅ a₂riin₂.²⁶ La₁ dsa₂ 'éi₂ né₃, ca₂já₃ ca₂chi₃jiné₃ ne₄ rag₅₄ juig₅₄, jaun₂ ca₂mi₃ tion₅₄ ca₂juá'₂: “Gui'₅₄ quiáng₃, jmo₄ juin'₂ 'au'₂ quian'₅₄ jniá₂, a₂quí₄ bá₄ jniá₂ quiáng'₂, ca₂le₃jé₃.”²⁷ Jaun₂ juig₅₄ né₃ ca₂dsia₃ bá₄ néi₂ dsí₅ ja₁coin₂, jaun₂ ca₂'éin₂ bá₄ ca₂le₃jé₃ a₂jme₁riin₂, jaun₂ ca₂lió₂ bá₄.

²⁸ La₁ dsi₂juí₅ jme₁o₂'ín₃ jaun₂ né₃, ca₂jein'₂ jan₂ dsa₂ i₂jme₂ti₃ riin'₅₄ i₂rin₂ caun₂ 'ñiá₂-láu₂ cu₄ denarios quió'₅. Jaun₂ ca₂tín₂ dsi₂lag₄ riin'₅₄, ca₂güi'₃ tiá₂, ca₂juá'₂: “iQui₄ a₂ring'₂ quió'₃!”²⁹ Jaun₂ riin'₅₄ 'éi₂ né₃ ca₂chi₃jiné₃ ne₅₄, jaun₂ ca₂mi₃ tion₅₄ ca₂juá'₂: “Jmo₄ juin'₂ 'au'₂ quian'₅₄ jniá₂, a₂quí₄ bá₄ jniá₂ quiáng'₂, ca₂le₃jé₃.”³⁰ La₁ i₂jan₂ né₃ tsá₃ ca₂gue₃, jaun₂ juí₅ 'né₅ 'má₃ bá₄ ca₂i₁tio'₂. Ca₂lia'₂ jaun₂ ca₂'mag'₂ dsí₅ ca₂lia'₂ ca₂quí₃ riin'₅₄ ca₂le₃jé₃.³¹ Jaun₂ jme₁ca₂jág₃ riin'₅₄ i₂jme₂ti₃ ta₁ sián'₂, ca₂tá'₂ 'lia'₂ dsí₅, jaun₂ ca₂i₁con₂ jág₁ ne₄ juig₅₄ ca₂i₁jua'₄ ca₂le₃jé₃ a₂ca₂lë₃ jaun₂.³² Jaun₂ ca₂jmo₃ juig₅₄ 'éi'₃ ca₂i₁quiong₅₄ táng₃ dsa₂, jaun₂ ca₂të₃ juig₅₄ dsi₂néi₂ quió'₅, jaun₂ ca₂juá'₂: “'Ne₂ i₂jme₂ti₃ ta₁ ne₃, i'e₂ gué₄ 'ñio₅ 'lin'₅₄ 'ne₂ ca₂'uín'₂! Jua'₂ nē₂'én₃ bá₄ jniá₂ ca₂le₃jé₃ a₂jme₁ring'₂ quió'₃, ia₁ nē₂mi'₅₄ tion₅₄-jan₃.³³ ¿Tsa₁ dse₃ jua'₅₄ le₂jaun₂ bá₄ nē₂dsia'₅₄ néi₂ 'au'₂ ríng'₂, juí₁lia'₂ nē₂dsia₃ jniá₂ néi₂ dsi₃ 'ñiag'₂?”³⁴ Të₃ ma₂'ne₂ jaun₂ juig₅₄, ca₂jín'₂ dsa₂ 'éi₂ o₄gú₃ dsa₂ i₂niog₅ ne₄ 'né₅ 'má₃, ca₂jmo₃ ca₂lia'₂ ca₂quí₃ jë₂ a₂jme₁riin₂.

³⁵ Jaun₂ ca₂juá'₂ Jesús gué₄ né₃:

—Ján₃ bá₄ le₂nē₅ jmo₃ Ne'₃ jniá₂ i₂guá₅ guei'₅₄ i₂juíg₃ quian'₅₄ 'nia'₂ le₂jang'₂ le₂jang'₂ nē₁jua'₂ tsá₃ ca₂'én'₃ 'nia'₂ ca₂le₃jé₃ 'au'₂ dsáu₁ ríng'₂.

Jme₂tag₅ Jesús juí₁lia'₂ 'a₂ lia'₂ lé₅ a₂tén₂ dsa₂ dsi₂i₂gu₂

(Marcos 10:1-12; Lucas 16:18)

19¹ Jme₁ca₂dsan₃ juá'₂ Jesús jág₁ nē₅, jaun₂ ca₂o₃'ín₃ 'uē₃ Galilea, jaun₂ ca₂dsióg₃ tē₂le₃ quióng₄ Cuá₃ Jordán.² Juín₅ lin₃ dsa₂ ca₂jme₃quiong'₅₄, jaun₂ ca₂jme₃'lióin₂ dsa₂ i₂qui₂le₁dso'₅₄.

³ Jaun₂ né₃, i₂lin₅₄ dsa₂ fariseos ca₂jme₃quiáin₃ con₂ Jesús a₂jñia'₅₄ con'₂ cáun₂ táu₂. Jaun₂ ca₂ñag₃:

—¿I₄ 'éi'₃ a₂tén₂ dsa₂ dsi₂i₂gu₂ ne₄ 'uig₅₄ nē₁'e₂ caun₂ a₂lë₃?

⁴ Jaun₂ ca₂ñag₃ Jesús:

—¿Tsa₁ ma₂ca₂'í'₂ 'nia'₂ ne₄ Si₂, ja₁juá'₂ i₂ca₂jmo'₂ dsa₂ mi₂güí₃ le₂ne₁: “Ca₂jmo'₂ dsa₂ ñe'₂ dsa₂ mí₂ né₃?”^w ⁵ Ca₂juá'₂ né₃: “'Uig₅₄ jaun₂ ca₂tín₂ dsa₂ ñe'₂ téin₂ chog₅₄-jmei₂ jaun₂ con'₂ tiain'₃ quiaín'₅₄ dsi₂i₂gu₂, jaun₂ jë₁le₃oin₃ léin₂ caun₂ bá₄ ni₁ñí₅.”^x ⁶ Jaun₂ dsióg₄ léin₂ jan₂ bá₄, tsá₃ ma₃lë₂ oin₃. Jaun₂ tsá₃ 'i₄ 'éi'₃ jua'₅₄ jmo₃ dsa₂ mi₂güí₃ jma₃quén₅ a₂ma₂ca₂dsia₃ Diú₄ rë₂.

^w 4 Génesis 1:27; 5:2.

^x 5 Génesis 2:24.

⁷ Jaun₂ ca₂ŋag₃ táng₃ dsa₂ fariseos:
—'E₂ guè'₂ lë₃ nē₃ ca₂jmo₃ Moisés 'éi'₃ a₂lé₂ le₃jmo₃ dsa₂ ŋe'₂ caun₂ si₂ tē₃ron₅₄ cué'₃ 'io₅₄ ja₁juá'₂ a₂téin₂ riin'₅₄, jaun₂ gué'₄ ma₂lé₂ dsei₂₃?

⁸ Jaun₂ ca₂juá'₂ Jesús:
—'Uig₅₄ ia₁ a₂ŋí₄ tsá₃ nág'₁ 'nia'₂ guiong'₅₄ bá₄ jaun₂ ca₂cuë₃ 'éi₂ jmig₄ a₂tén₂ dsa₂ dsi₂i₂gu₂; la₁ lia'₂ con'₂ le₂'uig₅₄ tsá₃ le₂nē₅ jme₁lé₄. ⁹ La₁ jniá₂ juá'₅, jui'₁ein₂ gué'₃ i₂lë₁tén₂ dsi₂i₂gu₂, on₃jua'₅₄ a₂cha₂ lë₃, nē₁jua'₂ on₃ gué'₂ jua'₅₄ ia₁ a₂nió'₅ jág₁ quian'₅₄ i₂sián'₂; nē₁jua'₂ jë₁ma₂ca₂lë₃ jaun₂, cáin₂ táng₃ 'io₅₄ sián'₂, 'no₂₃ dso₄ ne₄ Diú₄; ján₃ bá₄ le₂nē₅ quian'₅₄ dsa₂ ŋe'₂ i₂jén'₂ gu₂ quian'₅₄ jan₂ 'io₅₄ i₂ma₂téi₂ dsa₂ né₃, ján₃ bá₄ le₂jaun₂ 'no₂₃ dso₄ ne₄ Diú₄.

¹⁰ Jaun₂ lë₃, ca₂juá'₂ chi'₂ dsi₂guia₃-tín₂ quiáin₅:
—Nē₁jua'₂ le₂nē₅ cha₂ o₂me'₅₄ dsi₅ quió'₅ dsa₂ ŋe'₂ dsa₂ mí₂, 'tsa₁ dse₃ jua'₅₄ a₂tsá₃ jéin'₂ co₂ŋei'₅₄ gu₂?

¹¹ Jaun₂ ca₂juá'₂ táng₃ Jesús:
—Tsá₃ ca₂le₃jín₃ lé₂ le₃ŋí'₂ dsí₅ jua'₅₄ lé₂ le₃jmo₃ le₂nē₅; ŋjia'₅₄ lia'₂ i₂ma₂cuë₃ Diú₄ bí₂ a₂le₃ŋí'₂. ¹² 'Lióng₂ bá₄ 'uig₅₄ cha₂ a₂tsá₃ le₃jén'₂ dsa₂ ŋe'₂ i₂lín₅₄ gu₂; ia₁ i₂lín₅₄ le₂jaun₂ ma₂lín₅ lia'₂ con'₂ jme₁ca₂rë₃cháin₃ a₂tsá₃ lé₂ le₃jéin'₂ gu₂; i₂lín₅₄ gué'₂ né₃, ia₁ a₂ma₂ca₂jmóg'₂ dsa₂ mi₂güíg₃ riin'₅₄ té'₃; i₂lín₅₄ gué'₂ né₃, ia₁ a₂co₂ŋei'₅₄ ma₂quí'₃ dsí₅ a₂tsá₃ jéin'₂ gu₂ ne₄ o₄quió'₄ ja₁gon₂ Diú₄. Jui'₁lia'₂ i₂tió'₅ jme₃ti₃ jág₁ la₂, jui'₁jmo₁₂.

Ca₂jme₃gon'₅₄ Jesús chi'₂-guein₂
(Marcos 10:13-16; Lucas 18:15-17)

¹³ Jaun₂ ca₂o₃ŋjia₃ i₂lín₅₄ dsa₂ ca₂o₃ŋjia₃ guein₂ quiáin₅ ne₄ Jesús ia₁jaun₂ qui₃ní'₂ gu₂, tsí'₃ Diú₄ o₄quió'₄ né₃. La₁ chi'₂ dsi₂guia₃-tín₂ né₃ ca₂jéin₂ dsa₂. ¹⁴ La₁ Jesús né₃, ca₂juá'₂:

—Cuë'₄ 'nia'₂ jmig₄ jui'₁ja₂lén₂ chi'₂-guein₂ cong₂; tsá₃ lë₁jmo₂ 'nia'₂ le₂nē₅ jua'₅₄ jnig'₅₄, ia₁ jui'₁lia'₂ i₂le₂nē₅ bá₄ gué'₂ i₂ca₂tín₂ ja₁gon₂ Diú₄.

¹⁵ Jme₁ca₂lë₃ chi₂lái'₂ le₂jan₂ le₂jan₂ guein₂ a₂jme₂gu'₅₄, ca₂ŋái'₃ bá₄ jaun₂.

Jan₂ dsó₂ chi'₂ cha₂ cu₄ ca₂dsia₃ jág₁ quiain'₅₄ Jesús
(Marcos 10:17-31; Lucas 18:18-30)

¹⁶ Jan₂ dsó₂ chi'₂ ca₂jme₃quián₃ con₂ Jesús, jaun₂ ca₂ŋag₃:

—Të₅ dsen₃, 'e₂ jmo₅₄ jniá₂^y ia₁jaun₂ léi₂ ja₁le₃chang₂ co₂tan₅₄?

¹⁷ Jaun₂ ca₂juá'₂ Jesús:

—'E₂ lë₃ té'₅ jniá₂ dsen₃^z ŋjia'₅₄ lia'₂ jan₂ bá₄ i₂chan₂ i₂lín₅ i₂dsen₃, i₂'éi₂ lín₅ Diú₄. La₁ nē₁jua'₂ 'niog'₂ 'ú'₄ ja₁le₃chang₂ co₂tan₅₄, jme₁ti₁ 'éi'₃ quió'₅ Diú₄.

^y16 o₃, “Të₅, 'e₂ a₂dse₃ a₂jmo₅₄ jniá₂...”

^z17 o₃, “'E₂ lë₃ ŋag'₅₄ jniá₂ jui'₁lia'₂ a₂dse₃?”

¹⁸ Jaun₂ ca₂ŋag₃ táng₃ dsó₂ 'éi₂:

—¿'E₂ 'éi₃?

Jaun₂ ca₂ŋag₃ táng₃ Jesús:

—Tsá₃ jŋíg₄ dsa₂ mi₂güí₃ ríng₂; tsá₃ nióg₄ jág₁ quian₅₄ dsa₂ i₂tsá₃ lín₅ dsi₂i₂gog₂; tsá₃ 'áng₁ a₂cha₂ quió₅ ríng₂; tsá₃ jmó₂ jua₅₄ jang₅₄ jág₁ tē₂jág₁ a₂jmag₅₄ ríng₂; ¹⁹ a₂jme₁gang₃ chog₂-ŋéi₅; ^a a₂jme₁'nióg₄ dsa₂ mi₂güí₃ ríng₂ jui₁lia₂ 'nióg₃ 'ŋiag₂ né₃. ^b

²⁰ Jaun₂ ca₂ŋag₃ táng₃ dsó₂ 'éi₂ ca₂tsí₃ Jesús:

—Ca₂le₃jé₃ a₂nē₅ ma₂guio₃ jme₂tí₂. ¿'E₂ gué₄ a₂siá₂ 'nió₅ jmo₅₄?

²¹ Jaun₂ ca₂ŋag₃ táng₃ Jesús:

—Nē₁jua₂ 'niog₂ léng₂ jan₂ dsa₂ i₂rē₂'ŋia₅ tē₂le₃ quió₅ jme₂dsí₂, guan₂ o₂'nag₄ ca₂le₃jé₃ a₂cha₂ quiáng₂, jaun₂ o₂dsio₅₄ ja₁con₂ dsa₂ te₂ŋé₂, jaun₂ le₂nē₅ le₃cha₂ a₂jlá₁ quiáng₂ guei₅₄ i₂juíg₃; jaun₂ gué₄ ŋe₅₄ quian₅₄ jniá₂.

²² La₁ jme₁ca₂nág₂ dsó₂ jág₁ nē₅, ca₂ŋái₃ 'lia₂ dsí₅, ia₁ 'ŋio₅ lín₃ jme₁cha₂ cu₄.

²³ Jaun₂ ca₂juá₂ Jesús ca₂tsí₃ chi₂ dsi₂guia₃-tín₂ quiáin₅:

—A₂dsi₂jó₃ juíg₂ jniá₂ 'nia₂, 'e₂ gué₄ quian₅ ta₁ quió₅ jan₂ dsa₂ cha₂ cu₄ a₂'í₂ guei₅₄ i₂juíg₃ ja₁gon₂ Diú₄. ²⁴ Juá₅ jniá₂, tsá₃ gué₄ 'e₂ ta₁ quian₅ a₂lé₂ le₃ŋí₃ jan₂ já₂ camello jui₅ tau₂ mi₂cu₄, lia₂ con₂ gué₄ jan₂ dsa₂ cha₂ cu₄ a₂'í₂ ja₁gon₂ Diú₄.

²⁵ Jme₁ca₂nág₂ chi₂ dsi₂guia₃-tín₂ quiáin₅ jág₁ nē₅, 'ŋio₅ lín₃ ca₂i₃gó₃ dsí₅, jaun₂ qui₂ca₂ŋí₃ riin₅₄ con₂ guioin₅₄:

—¿I₂'ein₂ bá₄ gué₂ jaun₂ né₃ i₂lé₂ le₃tín₄?

²⁶ Jaun₂ ca₂jág₃ Jesús ca₂jín₂ 'éi₂, jaun₂ ca₂juá₂:

—Dsón₂ bá₄ jaun₂, tē₂le₃ quió₅ dsa₂ mi₂güí₃ o₁líg₂ tsá₃ lé₂ le₃lé₂. La₁ tē₂le₃ quió₅ Diú₄, ca₂le₃jé₃ bá₄ lé₂ le₃lé₂.

²⁷ Jaun₂ ca₂juá₂ Pe₄ né₃:

—Te₁gui₅₄, ca₂le₃jé₃ 'e₂ a₂jme₁cha₂ quián₂ jnia₅₄ ma₂ca₂tén₃ dsi₅ jnia₅₄ ma₂qui₂ca₂tí₄ ia₁ a₂'én₅ jnia₅₄ 'ne₂. ¿'E₂ a₂tag₃ jnia₅₄ né₃?

²⁸ Jaun₂ ca₂ŋag₃ Jesús ca₂juá₂:

—A₂dsi₂jó₃ juá₅ jniá₂ juíg₂ 'nia₂, jē₁ma₂ca₂tē₂ jmi₄ i₁le₃'mag₂ ca₂le₃jé₃ 'a₂ lia₂ niog₅ lē₅ mi₂güí₃, jē₁ma₂ca₂tē₂ rē₁guá₃ Jaun₅ dsa₂ mi₂güí₃ ne₄ta₁ jlá₁ quió₅, jaun₂ 'nia₂ né₃ i₂ma₂ja₂nóg₅ quiong₅₄ jniá₂, nio₃ gog₂ 'nia₂ jma₃cáun₃ ta₁ a₂tiáng₄ jmó₂ gong₂ qui₁dsí₂ 'éi₃ ta₁guia₃-tín₂ nió₃ dsa₂ juig₂ tsi₁jon₂ Israel. ²⁹ Ján₃ bá₄ le₂jaun₂ ján₃, ca₂le₃jín₃ i₂ma₂ca₂tén₃ dsí₅ dsi₂néi₂ quió₅, i₂ma₂ca₂tén₃ dsí₅ chi₂ rin₅₄, o₃ chog₅₄-jmei₂, o₃ dsa₂ mí₂ quiáin₅, o₃ chi₂ quiáin₅, i₂ca₂tén₃ dsí₅ ca₂tí₂ ja₁nau₂ quió₅ né₃, 'uig₅₄ quió₃ jniá₂, ia₁ gue₃ caun₂ 'ŋiá₂-láu₂ ŋag₅₄ gué₄ lia₂ con₂ gué₄ a₂ma₂ca₂tí₂, ton₂ gue₃ ján₃ a₂le₃chain₂ co₂tan₅₄. ³⁰ La₁

^a19 Éxodo 20:12-16; Deuteronomio 5:16-20.

^b19 Levítico 19:18.

rě₂ně₃ juin₅ lin₃ i₂lín₅ i₂quen₅, la₁ jmig₄ jaun₂ léin₂ dsa₂ tē₂le₃ jē₁ca₂tó'₂;
le₂jaun₂ bá₄ ján₃ jui₁lia'₂ i₂tsá₃ 'e₂ quen₅ rě₂ně₃ lia'₂ con'₂ niog₅ lín₂ dsa₂
mi₂güí₃, léin₂ i₂le₂'uig₅₄.

Jág₁ jáng'₅ léi₄ jui₁lia'₂ dsa₂ i₂jmo₅ ta₁ caun₂ ja₁nau₂

20 ¹ 'Lé₅ guei'₅₄ i₂juí₃ ja₁gon₂ Diú₄ jui₁lia'₂ jan₂ dsa₂ juig₅₄
ja₁nau₂ i₂o₂'in₅ tē₃ o₃'iog₂, ca₂i₁tioin₁₂ dsa₂ i₂jmo₃ ta₁ ja₁nau₂
quió'₅ ja₁jnia₄ cho'₅₄ uing₂ uvas. ² Ca₂lí'₃ bá₄ jág₁ quian'₅₄ dsa₂ i₂jmo₃ ta₁
a₂'liain'₅₄ jma₃ca₂'éi'₃ cu₄ denario lia'₂ co₂jmig₄, jaun₂ ca₂chein₃ dsa₂ 'éi'₂
jui₅ ja₁nau₂ quió'₅. ³ Jme₁co₂lág₂ jaun₂ o₂'íin₃ táng₃ con'₂ hora ní₁ ní₃
tē₂le₃ o₃'iog₂, ^c jaun₂ ca₂jíin₂ dsa₂ sián'₂ i₂tió₂ jín₅₄ jē₄ 'ma'₅₄. ⁴ Jaun₂
ca₂tsí'₃ dsa₂ 'éi'₂: “O₂nó'₅ 'nia'₂ ján₃ o₂jmo₄ ta₁ ja₁nau₂ quió'₃, quí₄ bá₄
jniá₂ 'liang'₅₄ 'nia'₂ con'₂ dsi₂ten₅₄.” Jaun₂ i₃lén₂ bá₄ dsa₂ 'éi'₂. ⁵ Jaun₂
o₂'íin₃ táng₃ con'₂ dsi₂ní'₃, ^d con'₂ siá'₂ hora ní₁ 'ni₅ tē₂le₃ ca₂'láu₂ ně₃; ^e
le₂jaun₂ bá₄ ca₂jmo₃ ján₃. ⁶ Con'₂ siá'₂ o₂'íin₃ bá₄ gué₄ con'₂ hora ní₁ 'niá₂
tē₂le₃ ca₂'láu₂, ^f nóg₃ jui₅ jē₄ 'ma'₅₄, jaun₂ ca₂dsáin'₂ táng₃ dsa₂ i₂jín₅₄ tió₂.
Jaun₂ ca₂tsí'₃ 'éi'₂: “¿E₂ lē₃ tió₂ 'nia'₂ ja₁lá₃ ta₁ ne₁jmig₄ tsá₃ 'e₂ ta₁
jmo'₂?” ⁷ Jaun₂ ca₂ṇag₃ dsa₂ 'éi'₂ ca₂juá'₂: “la₁ 'i₁jan₂ tsá₃ 'ein₂ tio₅.”
Jaun₂ ca₂ṇag₃ dsa₂ juig₅₄ ja₁nau₂ ca₂juá'₂: “O₂nó'₅ 'nia'₂ ján₃, o₂jmo₄ ta₁
ja₁nau₂ quió'₃; quí₄ bá₄ jniá₂ 'lian'₅₄ 'nia'₂ con'₂ dsi₂ten₅₄.”

⁸ 'Jme₁ca₂nei₂ jmig₄ jaun₂, ca₂juá'₂ juig₅₄ ja₁nau₂ ca₂tsí'₃ dsa₂ i₂niog₅
ne₄ i₂te₂né'₂ dsa₂ ta₁: “Te'₂ dsa₂ i₂ma₂nē₂jmo₃ ta₁, jaun₂ qui'₅₄ 'liain'₅₄.
Jme₁lióg₄ de'₂ jniá₅ quian'₅₄ dsa₂ i₂nē₂tió₂ jē₁ca₂tó'₂, jaun₂ dsian₅
quian'₅₄ i₂nē₂tió₂ le₂'uig₅₄.” ⁹ Jaun₂ dsi₃lén₂ dsa₂ i₂ca₂tón'₂ ca₂jmo₃ ta₁
hora ní₁ 'niá₂ tē₂le₃ ca₂'láu₂, jaun₂ le₂jain₂ le₂jain₂ ca₂gue₃ 'liain'₅₄
jma₃ca₂'éi'₃ cu₄ denario. ¹⁰ Jme₁co₂lág₂ jaun₂, ca₂tín₂ dsa₂ i₂ca₂i₃ton'₅₄
le₂'uig₅₄, i₃jio₅ dsí₅ a₂jme₁gue₃ gué₄ ṇag₅₄ 'liain'₅₄; la₁ co₂rē₂ bá₄ 'liain'₅₄
ca₂gue₃ jma₃ca₂'éi'₃ cu₄ denario le₂jain₂ le₂jain₂. ¹¹ La₁ jme₁ma₂nē₂gue₃
'liain'₅₄, i₃lén₂ i₃chog'₄ dso₄ ne₄ juig₅₄, ¹² jaun₂ ca₂juá'₂: “Dsa₂ i₂o₃lén₂
jē₁ca₂tó'₂, caun₂ hora bá₄ nē₂tióin'₂ nē₂jmo₃ ta₁; co₂jaun₂ bá₄ 'liain'₅₄
nē₂gue₃ ján₃ con'₂ 'liog'₅₄ jnia'₅₄ i₂nē₂tió'₄ nē₂jmo₁ ta₁ ta₁ne₁jmig₄
nē₂ṇag₅₄ 'iog₂ dséi₂ 'ṇio₅ lín₃.” ¹³ La₁ ca₂ṇag₃ juig₅₄ ca₂tsí'₃ jan₂: “A₂mei₅₄
quiáng₃, tsá₃ 'e₂ jua'₅₄ a₂tsá₃ dsi₂ten₅₄ jmo₅ jniá₂ ja₁cong'₂. ¿Tsa₁ ca₂lē₃
jág₁ a₂'liang'₅₄ ca₂'éi'₃ cu₄ denario gué'₂? ¹⁴ Jui₁le₂'ṇio₂ 'au'₂ con'₂
ma₂'liang'₅₄ ně₅, guan'₂ quiáng'₂. Nē₁jua'₂ jniá₂ le₂nē₅ ca₂lē₃ dsi₃ quí₄
'lian'₅₄ dsa₂ i₂nē₂tong₅₄ jē₁ca₂tó'₂ con'₂ 'lian'₅₄ 'ne₂, ¹⁵ ¿o₃ tsa₁ ca₂tín₂
jniá₂ jmo₅₄ quian'₅₄ cu₄ quió'₃ 'a₂ lia'₂ jnia'₅₄ 'nio₃ jmo₅₄? ¿O₃ ja₂ uig₅
'au'₂ 'e₂, ia₁ a₂'ua₁ dsi₃?”

^c3 lit. “hora 'ni₅,” 'Nio'₂ ja₁ton₅ Apéndice B.

^d5 lit. “hora jṇéi₂.”

^e5 lit. “hora ní₃.”

^f6 lit. “hora guía₃-cáun₃.”

¹⁶ 'Jaun₂ ně₃ jui₁lia'₂ dsa₂ i₂lín₅ tē₂le₃ jē₁ca₂tó'₂ rē₂ně₃, lēin₂ i₂le₂'uig₅₄ jmig₄ jaun₂; le₂ně₅ bá₄ ján₃, jui₁lia'₂ i₂lín₅ i₂le₂'uig₅₄ rē₂ně₃, lēin₂ dsa₂ tē₂le₃ jē₁ca₂tó'₂.

Con'₂ siá'₂ táng₃ ca₂'ě₂ Jesús jág₁ a₂jóin₂

(Marcos 10:32-34; Lucas 18:31-34)

¹⁷ Jme₁ma₂'en₅₄ Jesús jui₅ uig₂ tso₄ a₂dsióg₄ Jerusalén, jaun₂ ca₂té'₃ cau₅ chi'₂ dsi₂guia₃-tín₂ quiáin₅, jaun₂ ca₂juá'₂:

¹⁸ —Jui₁lia'₂ jág'₂ 'nia'₂, tio'₅₄ jniog₄ jui₅ tso₄ la₂ a₂dsi₁náu₅ Jerusalén. Ja₁jaun₂ jáng'₂ dsa₂ jín'₂ Jaun₅ dsa₂ mi₂güig₃ o₄gú₃ juig₅₄ jme₂dsa₂, ne₄ tē₅juá'₅ ně₃; 'éi₂ gué₄ ně₃ cuē₃ 'éi'₃ a₂jñag'₃ dsa₂. ¹⁹ Jáng'₂ dsa₂ ně₃ o₄gú₃ dsi₂nau₂ ia₁jaun₂ jmóg'₂ burlas, qui₃bóg₂ dsa₂, jaun₂ gué₄ tioen₃ cróg₄ jñag'₃; la₁ a₂'ni₅ jmig₄ jaun₂, jein'₅₄ le₃chain₂ bá₄ táng₃.

Jui₁lia'₂ a₂ca₂mi₃ chog₅₄ Jacobo quian'₅₄ Juan₅₄

(Marcos 10:35-45)

²⁰ Jaun₂ ca₂jme₃quián₃ chog₅₄ Jacobo quian'₅₄ Juan₅₄, ja₁ñi'₅₄ Zebedeo, ja₁'en₅₄ Jesús. Jaun₂ ca₂chi₃jné₃ ca₂mi₃ a₂jmo₃ 'éi₂ dse₃ dsí₅.

²¹ Jaun₂ ca₂jñag₃ Jesús:

—¿'E₂ 'niog'₂ 'ne₂?

Jaun₂ ca₂jñag₃ chog₅₄ chi'₂ 'éi₂:

—¿Tsa₁ cué'₁ jmig₄ a₂tian'₃ jma₃jan₂ chi'₂ quiáng₃ cong'₂, jē₁ma₂tē₂ rē₁ne'₅₄ gong'₂ ne₄ta₁ quiáng'₂, jan₂ tē₂le₃ gog'₂ ne₁, jan₂ guē'₂ tē₂le₃ gog'₂ jen₅?

²² La₁ Jesús ně₃ ca₂jñag₃:

—Tsá₃ ñi'₅₄ 'nia'₂ 'e₂ a₂mi'₂. ¿Tian'₃ 'nia'₂ dsi₃ñíg'₂ ca₂le₃jē₃ jui₁lia'₂ a₂dsi₃ñí₂ jniá₂ guē'₂?^g

Jaun₂ ca₂jñag₃ 'éi₂:

—Tián₂ bá₄ jnia'₅₄.

²³ Jaun₂ ca₂juá'₂ táng₃ Jesús:

—Dsón'₂ bá₄ jaun₂ dsi₃ñí'₂ 'nia'₂ jui₁lia'₂ 'a₂ lia'₂ niog₅ dsi₃ñí₂ jniá₂,^h la₁ jui₁lia'₂ a₂juá'₂ 'nia'₂ ně₅ a₂tiáng'₄ jma₃ca₂ton₂ cau₅ quió₃, on₃jua'₅₄ jniá₂ ca₂tíng₂ cuē₅₄ a₂jaun₂. Ja₁jaun₂ ma₂jmo₃ Ñe'₃ jniá₂ co₂jñia₅₄ a₂tian'₃ con'₂ i₂ca₂tín₂ bá₄.

²⁴ Riin'₅₄ i₂guian₃ gué₄ 'éi₂ ně₃ ca₂rē₃'néi₃ quian'₅₄ i₂on₃ 'éi₂ jme₁ca₂nág₂ jág₁ jaun₂. ²⁵ La₁ ca₂tē₃ Jesús, jaun₂ ca₂juá'₂:

^g22 A₂lin₅₄ chog₅₄ si₂ juá'₂ le₂la₂ ján₃: “¿Tian'₃ 'nia'₂ cán'₁ o₂i₁ dsi₅ jui₁lia'₂ o₂i₁ dsi₅ a₂can₅₄ jniá₂?”

^h23 A₂lin₅₄ chog₅₄ si₂ juá'₂ le₂la₂ ján₃: “ján₃ bá₄ cán'₁ 'nia'₂ o₂i₁ dsi₅ jui₁lia'₂ o₂i₁ dsi₅ can₅₄ jniá₂.”

—ŋi' ₅₄ bá ₄ 'nia' ₂, jui' ₁ lia' ₂ dsi' ₂ tan' ₅₄ dsa' ₂ can' ₅₄ i' ₂ tián' ₅ gon' ₂ ca' ₂ le' ₃ jé' ₃
 juig' ₂, ⁱ qui' ₂ toin' ₂ dsa' ₂ 'éi' ₃ bēn' ₂. Le' ₂ jaun' ₂ bá ₄ jmo' ₅ jui' ₁ lia' ₂ dsi' ₂ tan' ₅₄
 i' ₂ sion' ₅ gué' ₄, tián' ₅ goin' ₂ jmo' ₂₃ 'éi' ₃. ²⁶ La' ₁ jin' ₄ 'nia' ₂, tsá' ₃ le' ₂ jaun' ₂ lé' ₂.
 Chi' ₂ jua' ₂ 'ein' ₂ 'nio' ₃ jmo' ₃ juin' ₂, ca' ₂ tīn' ₂ jme' ₃ ti' ₃ ta' ₁ ne' ₄ riin' ₅₄; ²⁷ chi' ₂ jua' ₂
 'ein' ₂ 'nia' ₂ 'nio' ₃ cán' ₂ ne' ₄ jui' ₅, 'nió' ₅ jme' ₃ ti' ₃ ne' ₄ ca' ₂ le' ₃ jín' ₃ dsa' ₂. ²⁸ Ia' ₁
 le' ₂ nē' ₅ bá ₄ Jaun' ₅ dsa' ₂ mi' ₂ gü' ₃ íg' ₃, tsá' ₃ ta' ₁ jaun' ₂ já' ₅ jua' ₅₄ a' ₂ jme' ₃ ti' ₃ dsa' ₂
 ne' ₅₄; a' ₂ jme' ₃ ti' ₃ ta' ₁ ne' ₄ dsa' ₂ bá ₄ já' ₅, a' ₂ quí' ₃ quian' ₅₄ 'mú' ₃ co' ₂ 'nió' ₄ 'lia' ₅₄
 ia' ₁ jaun' ₂ tīn' ₄ juin' ₅.

Ca' ₂ jme' ₃ 'lión' ₂ Jesús on' ₃ dsa' ₂ ten' ₄

(Marcos 10:46-52; Lucas 18:35-43)

²⁹ Jme' ₁ ma' ₂ tioin' ₅₄ jui' ₅ 'uiin' ₂ juig' ₂ Jericó, juin' ₅ dsa' ₂ ja' ₁ jaun' ₂
 ca' ₂ jme' ₃ quian' ₅₄ Jesús. ³⁰ Jui' ₅ ja' ₁ n'ó' ₄ jaun' ₂, jme' ₁ tián' ₄ on' ₃ dsa' ₂ ten' ₄ cau' ₅
 jui' ₅. Dsa' ₂ 'éi' ₂ nē' ₃ jme' ₁ ca' ₂ nág' ₂ a' ₂ n'ó' ₅ Jesús cau' ₅ jaun' ₂, ca' ₂ juá' ₂ tiá' ₂:

—i' _{Te} ₁ gui' ₅₄, tsi' ₁ jon' ₂ David, dsia' ₄ n'éi' ₂ 'au' ₂ jnia' ₅₄!

³¹ Jaun' ₂ ca' ₂ jí' ₂ bá ₄ dsa' ₂ ia' ₁ jaun' ₂ dsi' ₃ léin' ₂ tei' ₄. La' ₁ tē' ₂ le' ₃ i' ₂ jui' ₂ gué' ₄
 co' ₂ mi' ₅₄ ca' ₂ tóin' ₂ bá ₄, ca' ₂ juá' ₂:

—i' _{Te} ₁ gui' ₅₄, tsi' ₁ jon' ₂ David, dsia' ₄ n'éi' ₂ 'au' ₂ jnia' ₅₄!

³² Jme' ₁ ca' ₂ nág' ₂ Jesús, jaun' ₂ ca' ₂ nau' ₂, jaun' ₂ ca' ₂ tē' ₃ le' ₃ on' ₃ dsa' ₂ 'éi' ₂, jaun' ₂
 ca' ₂ nág' ₃:

—¿' _E ₂ 'niog' ₂ 'nia' ₂ jmo' ₅₄ jniá' ₂ o' ₄ quían' ₂ 'nia' ₂?

³³ Jaun' ₂ ca' ₂ nág' ₃ dsa' ₂ 'éi' ₂:

—Te' ₁ gui' ₅₄, a' ₂ jnia' ₅₄ mi' ₂ ne' ₄ bá ₄ jnia' ₅₄ 'niog' ₂.

³⁴ Jaun' ₂ ca' ₂ dsia' ₃ bá ₄ Jesús n'éi' ₂ dsí' ₅, jaun' ₂ ca' ₂ tí' ₂ gu' ₂ jme' ₁ ne' ₁ dsa' ₂ 'éi' ₂.
 Jaun' ₂ dsi' ₂ jui' ₅ le' ₂ jaun' ₂ ca' ₂ jnia' ₃ jme' ₁ ne' ₁ dsa' ₂, jaun' ₂ i' ₃ léin' ₂ bá ₄ jaun' ₂
 ca' ₂ jme' ₃ quian' ₅₄ Jesús.

Ca' ₂ 'í' ₃ Jesús jē' ₄ juig' ₂ Jerusalén

(Marcos 11:1-11; Lucas 19:28-40; Juan 12:12-19)

21 ¹ Jme' ₁ ma' ₂ quían' ₅ dsi' ₁ léin' ₂ Jerusalén, dsi' ₃ léin' ₂ quían' ₅ juig' ₂
 Betfagé a' ₂ niog' ₅ cau' ₅ Má' ₂ Olivos, ja' ₁ jaun' ₂ ca' ₂ chen' ₃ Jesús on' ₃
 chí' ₂ dsi' ₂ gua' ₃-tín' ₂ quían' ₅, ² ca' ₂ juá' ₂:

—O' ₂ n'ó' ₅ 'nia' ₂ juig' ₂ pí' ₁ niog' ₅ tē' ₂ le' ₃ ne' ₄ jui' ₅ ja' ₁ dsau' ₅₄ nē' ₅. Ja' ₁ jaun' ₂
 dsian' ₂ 'nia' ₂ jan' ₂ i' ₂ bú' ₄ m'í' ₂ rē' ₂ 'ne' ₅₄, chéin' ₅ quian' ₅₄ guein' ₂ quían' ₅.
 O' ₂ chein' ₅₄ 'nia' ₂ jaun' ₂ tē' ₅₄ ja' ₁ lá' ₃. ³ Nē' ₁ jua' ₂ 'ein' ₂ nág' ₅ 'e' ₂ lē' ₃ tsiin' ₅₄,
 jaun' ₂ juig' ₅₄ 'nia' ₂: “Te' ₁ gui' ₅₄ bá ₄ 'nio' ₃ ca' ₂ tiá' ₂.” Jaun' ₂ nē' ₃ cón' ₅ bá ₄
 cuag' ₃.

⁴ Ca' ₂ lē' ₃ le' ₂ nē' ₅ ia' ₁ jaun' ₂ le' ₃ ti' ₃ jág' ₁ a' ₂ ca' ₂ tó' ₂ ne' ₄ si' ₂ dsa' ₂ i' ₂ jme' ₁ 'é' ₂ jág' ₁
 quían' ₅ Diú' ₄ ma' ₂ līg' ₂, jme' ₁ ca' ₂ juá' ₂:

⁵ Chei' ₅₄ dsa' ₂ juig' ₂ i' ₂ tián' ₅ Sión:

“Jag' ₄, nē' ₅ jón' ₅ Rag' ₅₄ quían' ₂ 'nia' ₂ ja' ₁ cong' ₂,

ⁱ25 o₃, “i' ₂ tián' ₅ gon' ₂ jin' ₄ dsi' ₂ nau' ₂.”

a₂lín₅ jan₂ dsa₂ me'₂, tsá₃ jláin'₁,
 jóin'₅ co₂dsiin₅₄ jan₂ bú'₄,
 jóin'₅ quian'₅₄ jaun₅ já'₂ i₂cán₂ lio₅₄ bá₄".^j
⁶ Jaun₂ ca₂i₃lén₂ bá₄ i₂on₃ 'éi₂, ca₂jmo₃ bá₄ con'₂ lé₅ jág₁ a₂ca₂cuë₃
 Jesús. ⁷ Jaun₂ ca₂i₁te₂ bú'₄ lia'₂ jma₃quian'₅₄ guein₂ quiáin₅, ca₂i₁jio₃
 ja₁'en₅₄ Jesús. Jaun₂ ca₂jlág₂ ni₁tsin'₅₄ mi₂ca'₄ já'₂, jaun₂ gué₄
 ca₂co₃dsag₅₄ Jesús. ⁸ Jaun₂ dsa₂ juin₅ i₂quian'₅₄ né₃ i₂jñiá₅ le₃ne₄ jui₅
 qui₂ca₂néi'₃ 'mi'₂ le₂'i₄ jui₅ ja₁ñí₃ Jesús; i₂lin₅₄ guè'₂ qui₂ca₂'nia₃ mog'₅₄
 'ma₂tsín₅, qui₂ca₂jó₃ dsi₂jui₅. ⁹ Dsa₂ i₂i₃lén₂ le₃ne₄ jui₅, quian'₅₄ i₂ja₂lén₂
 le₃chi₁co'₅₄ né₃, qui₂ca₂tóin'₂ co₂mi'₅₄ ca₂juá'₂:
 iJui₁le₂juin'₂^k bá₄ tsi₁jon₂ David!
 iJui₁le₂jñi₃ó₃ bá₄ i₂në₅ i₂já₅ o₄quió'₄ Te₁gui'₅₄!^l
 iJui₁le₂juin'₂ bá₄ i₂guá₅ guei'₅₄ i₂juíg₃!
¹⁰ Jme₁ca₂'í₃ Jesús jë₄ juig₂ Jerusalén, jaun₂ qui₂ca₂tón'₂ go₂'i₃ dsa₂
 juig₂, juin₅ i₂qui₂ca₂ñag₃:
 —¿'Ein₂ bá₄ në₅?
¹¹ Jaun₂ qui₂ca₂ñag₃ dsa₂ juin₅ i₂quian'₅₄ Jesús, ca₂juá'₂:
 —Jesús bá₄ la₂, dsa₂ i₂'é₂ jág₁ quián₅ Diú₄, i₂chan₂ juig₂ Nazaret
 ja₁tén₄ Galilea.

Ca₂'uín'₂ Jesús dsa₂ i₂jme₁tion'₅₄ dsia₅ 'ma'₅₄ i₁dsi₅ guá'₅
(Marcos 11:15-19; Lucas 19:45-48; Juan 2:13-22)

¹² Ca₂dsi₃óg₃ Jesús jme₁ca₂dsi₃óg₃ i₁dsi₅ guá'₅ templo, jaun₂
 qui₂ca₂'uín'₂ ca₂le₃jín₃ dsa₂ i₂jme₁ma₂tion'₅₄ dsia₅ 'ma'₅₄ i₁dsi₅ guá'₅,
 dsa₂ i₂'nag₅, i₂qui₂lá₅ né₃, qui₂ca₂jéin'₃ ni₁mesa ja₁jme₁jmó'₂ dsa₂ ta₁
 jme₂tsiin₃ cu₄, qui₂ca₂quí'₂ 'ma₂si₅₄ ja₁jme₁tián'₄ dsa₂ i₂'ni₅ i₁ju₂; ¹³ jaun₂
 ca₂juá'₂:
 —Ne₄ Si₂ juá'₂: “'Né₅ quió₃ lé₅ ca₂ne₅₄ 'né₅ ja₁të₁ja₂lén₂ dsa₂ ja₂chi'₅₄
 Diú₄”,^m la₁ 'nia'₂ né₃ ma₂jmo'₅₄ në₂jag₄ bá₄ të₂'lau₂ quió'₅ dsa₂ 'ang₂.ⁿ
¹⁴ Jaun₂ ca₂jme₃quián₃ i₂lin₅₄ dsa₂ ten₄ quian'₅₄ dsa₂ guian'₅₄ né₃ con₂
 Jesús i₁dsi₅ guá'₅, jaun₂ ca₂jme₃'lióin₂ bá₄ dsa₂ 'éi₂. ¹⁵ La₁ jme₁ca₂jág₃
 juig₅₄ jme₂dsa₂ quian'₅₄ të₅juá'₅ léi₄ jlá'₁ a₂ca₂jmo₃ Jesús jaun₂, ton'₂ ia₁
 ca₂nág₂ né₃ tion'₅₄ chi'₂ co₂mi'₅₄ qui₂guió'₅ i₁dsi₅ guá'₅, a₂juá'₂:
 “iJui₁le₂juin'₂ tsi₁jon₂ David!”, jaun₂ ca₂rë₃'néi₃. ¹⁶ Jaun₂ ca₂juá'₂ ca₂tsí'₃
 Jesús:

^j5 Zacarías 9:9.

^k9 lit. “Hosana”, a₂jein₅ jág₁ quian'₅₄ jág₁ jme₅ arameo: “Lio₄ jnia'₅₄”, co₂'nió'₄ a₂qui₂mi₅
 dsa₂ ne₄ Diú₄ a₂jíá₃ I₂rë₂'ín₁ quiáin₅; la₁ cang₂ jaun₂ táng₃ ca₂jein₃ jág₁ a₂jme₂juin'₂
 dsa₂ jan₂ dsa₂. Ján₃ bá₄ le₂në₅ 15.

^l9 Salmo 118:26.

^m13 Isaías 56:7.

ⁿ13 Jeremías 7:11.

—¿Tsa₁ nag'₂ 'e₂ juá'₂ chi'₂?

Jaun₂ ca₂ɲag₃ Jesús:

—Ján₅, nag₅ bá₄ jniá₂. Ia₁, ¿tsa₁ ma₂'í'₂ 'nia'₂ ne₄ Si₂ ja₁juá'₂:

Te₁gui'₅₄, 'ne₂ bá₄ ma₂ca₂jmo'₅₄

'e₂ a₂'uë₂ mi₂'o₄ chi'₂ bë'₅₄

quian'₅₄ mi₂'o₄ guein₂ tei₄ i₂guén'₅ dsi'₅₄,

'uë₂ jág₁ a₂jme₂juiin'₂ 'ne₂?^o

¹⁷ Jaun₂ ca₂o₃ 'fin₃ bá₄ ja₁tion'₅₄ 'éi₂, jaun₂ ca₂ɲái'₃ táng₃ juig₂ Betania.
Ja₁jaun₂ ca₂jɲia₂ caun₂ nei₅.

Ca₂juá'₂ Jesús caun₂ jág₁ a₂ca₂cué'₃ uig₅

caun₂ ni₁'ma₂ higuera a₂tsá₃ míg₂ cha₂

(Marcos 11:12-14, 20-26)

¹⁸ Jme₁jɲia₃ jaun₂, jme₁ma₂tioin'₅₄ jui₅ a₂i₂lein₃ táng₃ jui₅ jë₄ juig₂
Jerusalén. Jesús né₃ ca₂tá'₂ i₁cón'₅. ¹⁹ Jaun₂ ca₂jág₃ caun₂ ni₁'ma₂
higuera a₂dsi'₅₄ cau₅ jui₅, jaun₂ ca₂jme₃quiáin₃ 'uig₅₄, la₁ tsá₃ 'e₂ míg₂
ca₂dsó'₂ guë'₂ guei'₅₄ ni₁'ma₂; jɲia'₅₄ lia'₂ jmá'₃ mog'₅₄ bá₄ cha₂. Jaun₂
né₃ ca₂juá'₂ Jesús ca₂tsí'₃ ni₁'ma₂:

—iLia'₂ o₁líg'₂ jmig₄, tsá₃ ma₃jui₁'ag₅₄ míg₂ quiáng'₂!

Dsi₂jui₅ jaun₂ bá₄ ca₂rë₃quéin₃ ni₁'ma₂ jaun₂. ²⁰ Jme₁ca₂të₂ ne₄ chi'₂
dsi₂guia₃-tín₂ a₂ca₂lë₃ jaun₂, ca₂i₃gó'₃ dsí₅, jaun₂ ca₂ɲí'₃ Jesús:

—¿A₂ bá₄ lia'₂ con'₂ tan₅₄ lia'₂ dsi₂jui₅ ca₂rë₃quéin₃ ni₁'ma₂ në₅?

²¹ Jaun₂ ca₂ɲag₃ Jesús:

—A₂dsi₂jó'₃ juig₂ jniá₂ 'nia'₂, në₁jua'₂ tsá₃ ca₂'éi'₂ 'nia'₂ caun₂-tín₃ 'au'₂
lia'₂ 'éng'₂, on₃jua'₅₄ jmá'₃ jui₁lia'₂ a₂në₂jmo₃ jniá₂ quian'₅₄ ni₁'ma₂
higuera në₅, lé₂ le₃jmó'₂ 'nia'₂, ia₁ lé₂ le₃jua'₅₄ 'nia'₂ ján₃ juig₅₄ ni₁má'₂
ó₃: “Jɲiag'₃ ja₁në₅, o₃ o₂'ú₅ jmi₁ɲí'₄”, le₂jaun₂ dsón'₂ lé₂ bá₄. ²² Le₂jaun₂
bá₄ ján₃ ca₂le₃jé₃ 'e₂ a₂mi'₂ 'nia'₂ jme₁mi'₂ ne₄ Diú₄, në₁jua'₂ 'én'₂
të₃dsón'₂ 'nia'₂, guéi'₁ bá₄ 'nia'₂.

Jesús bá₄ i₂'io₅ 'éi'₃

(Marcos 11:27-33; Lucas 20:1-8)

²³ Jaun₂ ca₂'í₃ táng₃ Jesús i₁dsi₅ guá'₅ templo, jaun₂ të₁lia'₂ 'ein₅₄
jme₂tiin₂₃ dsa₂, jaun₂ ca₂jme₃quián₃ juig₅₄ jme₂dsa₂ quian'₅₄ i₂lín₅ dsa₂
can'₅₄ quián₅ dsa₂ juig₂, con₂ Jesús, jaun₂ ca₂ɲag₃:

—¿E₂ ta₁ lín'₅ 'ne₂, 'e₂ lë₃ jmo'₂ ca₂le₃jé₃ 'e₂ a₂jmo'₂ ɲi'₂? ¿Ein₂
ca₂cuë₃ bí₂ 'éi'₃ në₅?

²⁴ Jaun₂ ca₂ɲag₃ Jesús:

—Ján₃ bá₄ ɲag₄ jniá₂ caun₂ 'nia'₂; në₁jua'₂ ca₂ɲag'₅₄ 'nia'₂ lia'₂ tí₅,
jaun₂ gué₄ juá'₄ jniá₂ 'ein₂ cuë₅ bí₂ 'éi'₃ a₂jmo₂₃ ca₂le₃jé₃ a₂jmo₂₃.

^o16 Salmo 8:2.

²⁵ Jui₁lia'₂ a₂ca₂chon₃ Juan₅₄ jmi₂g₂ dsa₂, ¿'ein₂ quió'₅ 'éi'₃ jaun₂? ¿Quió'₅ Diú₄, o₃ quió'₅ dsa₂ mi₂güí₃g₃ 'e₂?

Jaun₂ ca₂dsia₃ dsa₂ can'₅₄ jág₁ con'₂ guioin₅₄, ca₂juá'₂:

—Nē₁jua'₂ ca₂chei₅₄ jniog₄ 'éi'₃ quió'₅ Diú₄ bá₄ jaun₂, nē₃ cón'₅ bá₄ ηag₃: “¿'E₂ lē₃ tsá₃ ca₂rē₃'én'₂ 'nia'₂ jág₁ quió'₅ 'éi'₂?” ²⁶ La₁ nē₁jua'₂ ca₂ηag₄ guē'₂ jniog₄ 'éi'₃ quió'₅ dsa₂ mi₂güí₃g₃ né₃, le₃'ne₂ dsa₂ juig₂ quian'₅₄ jniog₄, ia₁ ca₂le₃jín₃ bá₄ dsa₂ jmo₂₃ dsí₅ a₂jme₁lín₄ Juan₅₄ jan₂ dsa₂ i₂ca₂'é₂ jág₁ quián₅ Diú₄.

²⁷ Jaun₂ né₃, ca₂ηag₃ dsa₂ can'₅₄ 'éi'₂ ca₂tsí'₃ Jesús:

—Tsá₃ a₂jaun₂ ne₄ jnia'₅₄ 'ein₂ ca₂chen₃ 'éi'₂.

Jaun₂ né₃, ca₂ηag₃ Jesús:

—Ján₃ bá₄ le₂nē₅ tsá₃ juá'₄ jniá₂ 'ein₂ cuē₅ bí₂ a₂jmo₂₃ ca₂le₃jé₃ a₂jmo₂₃ ηi₂₃.

Jág₁ jáng'₅ léi₄ jui₁lia'₂ on₃ ja₁ηi'₅₄ jan₂ dsa₂

²⁸ Jaun₂ ca₂juá'₂ Jesús ca₂tsí'₃ dsa₂ 'éi'₂:

—¿'A₂ lia'₂ lín'₂ 'nia'₂ jui₁lia'₂ jág₁ la₂? Jan₂ dsa₂ jme₁chan₂ on₃ ja₁ηi'₅₄. Jaun₂ ca₂tsí'₃ chi'₂ quián₅ i₂lín₅ i₂juín'₂ guē₄: “Jón₃, gua₂ o₂jmo₄ ta₁ ja₁nau₂ quián₂ jmi₂g₄ né₃.” ²⁹ Jaun₂ ca₂ηag₃ chi'₂ quián₅: “iTsá₃ nei₅₄!” La₁ jme₁co₂lág₂ jaun₂ ca₂jme₃tsín₃ 'a₂ lia'₂ dsi₂jio₅ dsí₅, jaun₂ ηó₃ bá₄ i₁jmo₅₄ ta₁. ³⁰ Jaun₂ ca₂ηe₄ táng₃ jmei₂ i₁chi'₄ chi'₂ jan₂ quián₅. Ján₃ bá₄ le₂jaun₂ ca₂tsí'₃ 'éi'₂. I₂'éi'₂ né₃ ca₂ηag₃: “Nei₅₄ bá₄ jniá₂, tia₅₄, i₁jmo₃ ta₁.” La₁ tsá₃ ηei₅₄ guē'₂ jaun₂ né₃. ³¹ Jē₄ le₃oin₃ le₂jaun₂, ¿'ein₂ ca₂jmo₃ a₂'ηio₂ dsí₅ jmei₂?

Jaun₂ ca₂ηag₃:

—Chi'₂ i₂le₂'uig₅₄ bá₄.

Jaun₂ ca₂juá'₂ Jesús:

—A₂dsi₂jó'₃ juí₂g₂ jniá₂ 'nia'₂, dsa₂ i₂cán₂ 'lia'₅₄ quián₅ dsi₂tan₅₄, o₃ jui₁lia'₂ 'io₅₄ i₂'nag₅ quió'₅ né₃, i₂le₂'éi'₂ bá₄ tiá₂ le₂'uig₅₄ dsi₃ton'₅₄ ja₁gon₂ Diú₄ lia'₂ con'₂ guē₄ 'nia'₂. ³² Ia₁ lia'₂ con'₂ jme₁guan₃ Juan₅₄ i₂chon₅ dsa₂ jmi₂g₂, ca₂jme₃jniai₂₃ ja₁con'₂ 'nia'₂ 'a₂ lia'₂ dsón'₂ ca₂tíng'₂ 'nia'₂ tiáng'₄. La₁ tsá₃ a₂jaun₂ ca₂rē₃'én'₂ 'nia'₂. Ia₁ a₂dsau₅ bá₄ jui₁lia'₂ dsa₂ i₂cán₂ 'lia'₅₄ quián₅ dsi₂tan₅₄, quian'₅₄ 'io₅₄ i₂'nag₅ quió'₅ né₃, ca₂rē₃'éin₂ jág₁ quió'₅ Juan₅₄. La₁ a₂dsau₅ bá₄ o₁jnia'₅₄ a₂ca₂té₂ ne'₅₄ 'nia'₂ jaun₂, tsá₃ ca₂tá'₂ jén₂ 'au'₂ 'nia'₂, on₃ guē'₂ ca₂rē₃'éng'₂.

Jág₁ jáng'₅ léi₄ jui₁lia'₂ co₂nió'₃ dsa₂ 'lín'₅₄ i₂jmo'₂ ta₁ ja₁nau₂

(Marcos 12:1-12; Lucas 20:9-19)

³³ 'Nei₂ 'nia'₂ jág₁ a₂jáng'₅ léi₄ siá'₂ la₂: Jan₂ dsa₂ ca₂chéin'₃ cho'₅₄ uing₂ uvas ja₁nau₂ quió'₅. Jaun₂ ca₂jmo₃ jní₁ le₃lág'₃; ca₂jmo₃ co₂ηia₅₄ ja₁jleín'₃ míg₂ né₃; caun₂ guē'₂ tsi₁'né₅ ηei₅ ca₂chi'₃ ja₁guá₃ jmo₃ 'í₁. Jaun₂ ca₂lí'₃ jág₁ quian'₅₄ dsa₂ sián'₂ i₂nio₃ ne₄ ja₁nau₂, jaun₂ ca₂ηó₃ bá₄ 'ηiog₅ i₁ηi₂ juig₂ siá'₂. ³⁴ Jme₁ca₂té₂ jein₂ a₂ca₂rau₂ míg₂, jaun₂ dsa₂ juig₅₄

ja₁nau₂ ca₂chein₃ co₂nió'₃ dsa₂ mozo quiáin₅, a₂jme₁i₂mí₃ a₂jáng'₃ dsa₂ i₂nio₅ gu₂ ja₁nau₂ ca₂dsio₄ mí₂g con'₂ a₂ca₂tín₂ juig₅₄.³⁵ La₁ dsa₂ i₂tion'₅₄ jmó'₂ ta₁ ja₁nau₂ né₃, ca₂jñai'₃ bá₄ dsa₂ mozo i₂chen₄ quián₅ juig₅₄. Ca₂cué'₃ bá₄ jan₂ tioin'₅₄; jan₂ gué'₂ ca₂jñi'₃; jan₂ gué'₂ ca₂cué'₃ quian'₅₄ ni₁cang₁.³⁶ La₁ juig₅₄ ja₁nau₂ né₃, juin₅ gué₄ i₂ca₂chein₃ cang₂ jaun₂ con'₂ gué₄ le₂'uig₅₄; la₁ dsa₂ 'lin'₅₄ i₂tion'₅₄ jmo₅ ta₁ ja₁nau₂ né₃, le₂jaun₂ bá₄ qui₂ca₂jmaí'₂ ca₂le₃jín₃ dsa₂ mozo i₂chen₄ 'éi₂.

³⁷ La₁ jë₁ca₂tó'₂ né₃, dsa₂ juig₅₄ ja₁nau₂ ca₂chein₃ ja₁ñi'₅₄, ia₁ lín₂: “Jme₃go₃ dsa₂ jme₃gain₃ chi'₂ quiáng₃.”³⁸ La₁ jme₁ca₂jág₃ dsa₂ i₂jmo₅ ta₁ ja₁nau₂ ca₂jín₂ ja₁ñi'₅₄ dsa₂ juig₅₄ ca₂dsió₃, jaun₂ ca₂dsia₃ jág₁ tioin'₅₄: “I₂në₅ bá₄ tin₃ ja₁nau₂ la₂ cang₂; në₃ o₁jñí'₄ jniog₄ ia₁jaun₂ jniog₄ bá₄ lé₂ quián₂.”³⁹ Le₂jaun₂ bá₄ ca₂jmo₃. Ca₂jñai'₃ bá₄ 'éi₂ tioin'₅₄, jaun₂ ca₂dsei₂₃ le₃co'₅₄ jñí₁; ja₁jaun₂ ca₂jñag'₃.

⁴⁰ 'Jaun₂ né₃, jë₁ma₂të₂ jmi₂g rë₁jñió'₂ dsa₂ juig₅₄ ja₁nau₂, ¿e₂ lín'₂ 'nia'₂ jmo₃ quian'₅₄ dsa₂ i₂jmó'₂ ta₁ ja₁nau₂ 'éi₂?

⁴¹ Jaun₂ ca₂jñag₃ dsa₂ 'éi₂:

—A₂jme₃dsiain₂₃ dsa₂ 'lin'₅₄ 'éi₂ ca₂lia'₂ tsá₃ jéi₂ dsí₅, jaun₂ cué'₃ dsa₂ sián'₂ ja₁nau₂ con'₂ i₂léi₄ jáng'₃ ca₂dsio₄ con'₂ ca₂tín₂ jë₁ma₂të₂ jëin₂ a₂ráu₃.

⁴² Jaun₂ né₃, ca₂juá'₂ Jesús ca₂tsí'₃ dsa₂:

—¿Tsa₁ ma₂'í'₂ 'nia'₂ ne₄ Si₂ ja₁juá'₂:

Ni₁cang₁ a₂tsá₃ ca₂rë₃jí'₅₄ të₅'ia'₂,
ca₂dsió₃ ca₂lë₃ ni₁cang₁ a₂dsen₅₄ gué₄
të₁ron₅₄ qui'₅₄ 'ia'₂;

a₂ca₂jmo₃ Te₁gui'₅₄ bá₄ jaun₂,
jaun₂ 'ñio₅ lín₃ bá₄ jlá'₁, lág₂ jniog₄?^p

⁴³ 'Uig₅₄ jaun₂ juí₂g jniá'₂ 'nia'₂, co₂dsia₅ jñiá'₂ Diú₄ o₄gog'₂ 'nia'₂ 'éi'₃ quió'₅, o₄gú₃ i₂sián'₂ bá₄ dsia₃ con'₂ i₂léi₄ jáng'₃ a₂ráu₃.⁴⁴ La₁ jui₁lia'₂ ni₁cang₁ la₂ né₃, jui₁'ein₂ gué₃ i₂ca₂tán'₂ ne₄, lé₂ le₁juig₁ le₁dsog'₅₄ quió'₅; o₃ në₁jua'₂ ca₂jlín₃, lé₂ ti₁'liog₂ quió'₅.^q

⁴⁵ Jme₁ca₂nág₂ juig₅₄ jme₂dsa₂ quian'₅₄ dsa₂ fariseos jág₁ a₂jáng'₅ léi₄ në₅, ca₂rë₃lí'₄ bá₄ guioin₅₄ a₂'in₅ 'éi₂ bá₄ Jesús. ⁴⁶ Jaun₂ jme₁'nio₃ jme₁tsáun'₂, la₁ ca₂rë₃gain₃ bá₄ dsa₂ juin₅ i₂quian'₅₄ Jesús, ia₁ ca₂le₃jín₃ bá₄ dsa₂ jmo₂₃ dsí₅ a₂lín₅ 'éi₂ jan₂ i₂'ë₂ jág₁ quián₅ Diú₄ bá₄.

Jág₁ jáng'₅ léi₄ jui₁lia'₂ ja₁nio₅ jmi₂g a₂ca₂jen'₂ gu₂ dsa₂

(Lucas 14:15-24)

22 ¹ Ca₂jme₃lióg₃ táng₃ Jesús ca₂tsí'₃ dsa₂ të₂le₃ quian'₅₄ jág₁ a₂jáng'₅ léi₄, le₂la₂:

^p42 Salmo 118:22-23.

^q44 A₂lin₅₄ chog₅₄ si₂ tsá₃ rë₂ton₅ versículo 44.

² —Lé₅ guei'₅₄ i₂juíg₃ ja₁gon₂ Diú₄ jui₁lia'₂ jan₂ rag₅₄ i₂ca₂jmo₃ co₂jnia₅₄ caun₂ má₃ a₂ca₂jmo₃ jmi₄g₄ ja₁jen'₂ gu₂ chi'₂ ja₁ni'₅₄. ³ Jaun₂ ca₂chein₃ dsa₂ i₂jme₂ti₃ ta₁ ne₅₄ a₂dsi₃quiáin₂ dsa₂ i₂ma₂lé₅ jág₁ ja₃lén₂ ja₃gué'₃. La₁ dsa₂ 'éi₂ né₃ tsá₃ ma₃ca₂gue₃ ja₃lén₂. ⁴ Jaun₂ ca₂chein₃ táng₃ i₂sián'₂, jaun₂ ca₂tsí'₃ 'éi₂: “Chei'₅₄ 'nia'₂ dsa₂ i₂ma₂lé₅ jág₁ ja₃lén₂ jmi₄g₄, ma₂lé₅ bá₄ co₂jnia₅₄ má₃. Ca₂jme₁dsiang₂₃ bá₄ ca₁jui₅ 'on'₅₄ quiáng₃; ma₂lé₅ bá₄ co₂jnia₅₄ ca₂le₃jé₃. Jaun₂ jui₁ja₂lén₂ bá₄ jmi₄g₄ quió'₅ chi'₂ quiáng₃.” ⁵ La₁ tsá₃ jui₅ ca₂tón'₃ dsa₂ i₂jme₁ma₂lé₅ jág₁ rē₂té₄ 'éi₂. Jui₅ siá'₂ bá₄ i₃lén₂: jan₂ nō₃ jui₅ ja₁nau₂ quió'₅ bá₄; jan₂ guē'₂ nō₃ i₃dsiá₃ 'ma'₅₄. ⁶ Rin'₅₄ dsa₂ 'éi₂ né₃, ca₂jñai'₃ bá₄ dsa₂ i₂jme₂ti₃ ta₁ ne₄ rag₅₄ 'éi₂, ca₂cuē₃, ca₂jme₃dsiog₂₃ bá₄. ⁷ Jaun₂ né₃, ca₂rē₃'né₃ rag₅₄ 'ñio₅ lín₃, jaun₂ ca₂chein₃ 'lióg₂ quiáin₅ ca₂i₁jme₁dsiain₂₃ dsa₂ 'éi₂ qui₂ca₂i₁dsí'₄ 'lióg₂ 'né₅, co₂dsia₅ ca₂'éin₂ go₄ dsa₂ 'éi₂. ⁸ Jaun₂ ca₂juá'₂ rag₅₄ ca₂tsí'₃ dsa₂ i₂jme₂ti₃ ne₅₄: “Ca₂le₃jé₃ ma₂lé₅ co₂jnia₅₄ a₂jen'₂ gu₂ chi'₂ quiáng₃ a₂nio₃ jmi₄g₄, la₁ dsa₂ i₂jme₁lé₄ jág₁ rē₂té₄ 'éi₂, tsá₃ ma₃ca₂tín₂ ja₃lén₂. ⁹ O₂nó'₅ 'nia'₂ né₃, o₂nau₂ jē₄ calle juē'₂ ja₁i₂nio₄ guē'₄ dsa₂ juin₅, o₂chei'₅₄ ca₂le₃jín₃ dsa₂ i₂jeng'₂ jui₁ja₂lén₂ jmi₄g₄ jē₁jen'₂ gu₂ chi'₂ quiáng₃.” ¹⁰ Jaun₂ ca₂'uin₂ bá₄ dsa₂ 'éi₂ né₃ ca₂i₁lein₅₄ jē₄ calle, jaun₂ chi₂ca₂liain'₃ ca₂le₃jín₃ dsa₂ i₂ca₂jein'₂ lia'₂ dsa₂ dsen₃ lia'₂ dsa₂ 'lin'₅₄ né₃; jaun₂ ca₂can'₂ bá₄ dsi₂néi₂ ca₂lē₃, quian'₅₄ dsa₂ 'éi₂. ¹¹ 'Jaun₂ guē'₄ ca₂'í₃ rag₅₄ dsi₂néi₂ ca₂i₁jñin₁₂ dsa₂ i₂tion'₅₄ 'éi₂, jaun₂ ca₂jñin₂ jan₂ i₂'en₅₄ jē₄ jaun₂, tsá₃ jme₁rē₂liin₅₄ jua'₅₄ a₂qui'₂ 'mi'₂ a₂quí'₅ dsa₂ dsi₂lén₂ ja₁nio₅ jmi₄g₄ jen'₂ gu₂ dsa₂. ¹² Jaun₂ ca₂tsí'₃ dsa₂ 'éi₂, ca₂juá'₂: “A₂mei₅₄, ¿'a₂ bá₄ lia'₂ nē₂'ú'₃ 'ne₂ ja₁lá₃ tē₃ tsá₃ rē₂ling'₅₄ con'₂ dsi₂ten₅₄ a₂gog'₅₄ ja₁nio₅ jmi₄g₄ jen'₂ gu₂ dsa₂?” Jaun₂ tei₄ bá₄ ca₂nau₂ dsa₂ 'éi₂, tsá₃ 'e₂ ñi₅ ñag₃. ¹³ Jaun₂ bá₄ ca₂juá'₂ rag₅₄ ca₂tsí'₃ dsa₂ i₂tion'₅₄ jme₂ti₃ ne₄ mesa: “Quéin₂ 'nia'₂ gu₂-tag₄ i₂nē₅, dsein₅₄ ca₁'né₄, qui₂dsi₂in₅ 'nia'₂ güig₂, 'liain'₅₄ jē₄ qui₁né₃ ja₁qui'₂'o₃, qui₃quí₃g'₃ jan₅₄.” ¹⁴ Ia₁ juin₅ lín₃ dsa₂ i₂rē₂té₄, la₁ me'₂ bá₄ i₂rē₂quion'₅₄.

Jág₁ jui₁lia'₂ 'lia'₅₄ a₂ca₂tín₂ dsi₂tan₅₄

(Marcos 12:13-17; Lucas 20:20-26)

¹⁵ Jme₁co₂lág₂ jaun₂ ca₂i₃len₃ dsa₂ fariseos ca₂i₁jmo₅₄ jág₁ 'a₂ lia'₂ join₅₄ Jesús jui₁lia'₂ bá₄ 'ñiái₃ ca₂jon₄ jág₁ 'lia'₂, ia₁jaun₂ cuin₃ jmi₄g₄ a₂bóg'₂ dso₄. ¹⁶ Jaun₂ ca₂chein₃ táng₃ i₂lín₅₄ dsa₂ quiáin₅ quian'₅₄ i₂lín₅₄ dsa₂ i₂quian'₅₄ Herodes, a₂ca₂i₁chi'₄ Jesús:

—Tē₅, ne₄ bá₄ jnia'₅₄, a₂dsón'₂ bá₄ juá'₂ 'ne₂ lia'₂ tí₅ jág₁, qui₂jme₂tíng'₁ dsa₂ jui₅ dse₃ quió'₅ Diú₄, jaun₂ tsá₃ can'₂ 'ne₂ jág₁ jua'₅₄ a₂quian'₅₄ o₂i₁ dsi₅ 'e₂ a₂'ag₅ dsa₂, ia₁ tsá₃ gang'₃ jmag'₅₄ jui₁lia'₂ dsa₂ dsen₅₄ né₃. ¹⁷ Jaun₂ 'niog₂ jnia'₅₄ jua'₅₄ 'ne₂ 'a₂ lia'₂ dsi₂jio₅ 'au'₂: ¿Dsióg₅ guē'₂ jua'₅₄ a₂caun₂ qui₅₄ 'lia'₅₄ a₂ca₂tín₂ dsi₂tan₅₄ César? ¿'Nió'₅ qui₅₄, o₃ tsá₃ qui₅₄ 'e₂?

¹⁸ La₁ ca₂rē₃lí'₄ bá₄ Jesús a₂dsi₂jio₅ dsí₅ dsa₂ 'éi₂ 'lig'₅₄, jaun₂ ca₂juá'₂:

—i'Nia'₂ dsa₂ i₂lë₁co₂jmo₅ o₁ne₁! ð'E₂ lë₃ 'niog'₂ 'nia'₂ jo'₅₄ jniá'₂
 jui₁lia'₂ tsán'₂ dsa₂ jan₂ já'₂ quian'₅₄ liá'₂? ¹⁹ 'Ē₄ de'₂ 'nia'₂ caun₂ cu₄ 'ua'₂
 jui₁lia'₂ a₂quí₅ dsa₂ 'lia'₅₄ a₂ca₂tín₂ dsi₂tan₅₄.

Jaun₂ ca₂o₃can₅ dsa₂ caun₂ cu₄ denario. ²⁰ Jme₁ma₂në₂jág₃ Jesús, jaun₂
 ca₂ñí'₃ dsa₂ 'éi₂:

—ð'E₁n₂ dsi₂ne₄ chi₁ton₅ ja₁lá₃? ð'E₁n₂ guë'₂ quió'₅ letra né₃?

²¹ Jaun₂ ca₂ñag₃:

—Quió'₅ gui'₅₄ emperador César.

Jaun₂ ca₂juá'₂ táng₃ Jesús:

—Jang'₅₄ guë'₂ 'nia'₂ jaun₂ ne₄ César con'₂ a₂ca₂tín₂ César; ne₄ Diú₄
 né₃ jang'₅₄ 'nia'₂ con'₂ a₂ca₂tín₂ Diú₄.

²² Dsa₂ 'éi₂ né₃, jme₁ca₂nág₂ jág₁ në₅, ca₂i₃gó'₃ dsí₅. Ca₂téin₂ bá₄
 ca₂juë'₂ Jesús, ca₂i₃lein₃ bá₄.

Ca₂ñag₃ dsa₂ saduceos jui₁lia'₂ a₂jen'₅₄ 'lag₄

(Marcos 12:18-27; Lucas 20:27-40)

²³ Jmig₄ jaun₂ ca₂o₃lén₂ i₂lin₅₄ dsa₂ saduceos ca₂o₃jiin₅₄ Jesús. Ia₁ tsá₃
 'én₂ dsa₂ 'éi₂ a₂jen'₅₄ táng₃ dsa₂ jë₁ma₂dsain₃. Jaun₂ jág₁ në₅ ca₂ñí'₃
 Jesús ca₂juá'₂:

²⁴ —Të₅, le₂la₂ ca₂juá'₂ Moisés: në₁jua'₂ ca₂jon₃ jan₂ dsa₂ ñe'₂ të₃ tsá₃
 ca₂can₃ 'io₅₄ quiáin₅ guein₂, tion₅₄ 'nió'₅ jén'₂ gu₂ dsó₂ rin'₅₄ dsa₂ ñe'₂
 i₂ca₂jon₃ quian'₅₄ 'io₅₄ 'nág₂ 'éi₂, ia₁jaun₂ guein₂ i₂le₃chan₂ quiáin₅, lé₂
 co₂'nió'₄ tsi₁jon₂ 'lag₄ riin'₅₄. ²⁵ Dse₃ jaun₂. Jë₄ quián₂ jnia'₅₄ la₂,
 jme₁chan₂ guion₃ dsa₂ ñe'₂ i₂lín₅ rin'₅₄. Ca₂jen'₂ gu₂ i₂le₂'uig₅₄, la₁
 ca₂join₃ bá₄, të₃ tsá₃ guein₂ ca₂can₃ 'io₅₄ quiáin₅. Jaun₂ ca₂të₁ 'ñiá₄ bá₄
 'io₅₄ 'nág₂ 'éi₂ o₄gú₃ dsó₂ riin'₅₄ i₂jë₁ca₂të₂ on₃. ²⁶ La₁ ján₃ bá₄ le₂jaun₂
 ca₂i₃ñí₂, ca₂join₃ bá₄ ján₃. Jaun₂ ca₂guá₂ táng₃ 'io₅₄ 'éi₂ quian'₅₄
 i₂jë₁ca₂të₂ ún₂ dsó₂; ján₃ bá₄ le₂jaun₂ ca₂lë₃ quian'₅₄ 'éi₂. Jaun₂ le₂në₅ bá₄
 ca₂lë₃ quian'₅₄ ta₁guion₃ dsó₂ 'éi₂ con'₂ i₂jme₁lë₄ rin'₅₄, ca₂dsain₃ bá₄ të₃
 tsá₃ guein₂ ca₂can₃ 'io₅₄. ²⁷ Jaun₂ ca₂jon₃ bá₄ 'io₅₄ jme₁ca₂jon₃ né₃.

²⁸ Jaun₂ né₃, jmig₄ jë₁ma₂të₂ rë₁jen'₅₄ 'lag₄, ð'ein₂ bá₄ quián₅ lé₂ 'io₅₄
 'éi₂? Ia₁ ta₁guion₃ bá₄ guë'₂ dsa₂ ñe'₂ ca₂guá₂ quiain'₅₄.

²⁹ Jaun₂ ca₂ñag₃ Jesús:

—Tsá₃ le₂jaun₂ lia'₂ ñí'₂ 'au'₂ 'nia'₂, ia₁ tsá₃ cuin'₂ 'nia'₂ 'a₂ lia'₂ juá'₂
 Si₂, on₃ guë'₂ cuin'₂ 'nia'₂ 'a₂ lia'₂ lë₅ jui₅bí₂ quió'₅ Diú₄ né₃. ³⁰ Jë₁ma₂të₂
 jmig₄ a₂jen'₅₄ 'lag₄, on₃jua'₅₄ a₂le₃chain₂ jua'₅₄ a₂qui₃jéin'₂ gué₄ gu₂, on₃
 guë'₂ në₅ tóin'₃ gué₄ jua'₅₄ a₂qui₃cuin₃ chi'₂ quiáin₅ a₂jéin'₂ gu₂, ia₁
 i₂lén₂ jui₁lia'₂ lín₅ ángeles i₂tion₅₄ guei'₅₄ i₂juíg₃ bá₄ 'éi₂ jmig₄ jaun₂.

³¹ La₁ jui₁lia'₂ a₂jen'₅₄ táng₃ 'lag₄, ðtsa₁ ma₂'í'₂ 'nia'₂ ne₄ Si₂ jui₁lia'₂
 a₂ca₂juá'₂ 'ñiog₅ Diú₄ jme₁ca₂juá'₂: ³² “Jniá₂ bá₄ lín₅ Diú₄ quián₅

Abraham, quián₅ Isaac, quián₅ Jacob né₃?^r A₂lín₅ Diú₄ quián₅ dsa₂ jén₃ bá₄, on₃jua'₅₄ rē'₂ Diú₄ quián₅ 'lag₄.

³³ Jme₁ca₂nág₂ dsa₂ jág₁ nē₅, ca₂i₃gó'₃ dsí₅ 'a₂ lia'₂ jme₂tag₅ Jesús.

'Éi'₃ Juá'₅ a₂dsen₅₄ gué'₄ quió'₅ Diú₄

(Marcos 12:28-34; Lucas 10:25-28)

³⁴ Jme₁ca₂rē₃ñi₅ dsa₂ fariseos ca₂lí'₃ bá₄ táng₃ Jesús jág₁ a₂ca₂tsín₂ quian'₅₄ dsa₂ saduceos, jaun₂ ca₂ñi'₂ ca₂jmo₃ jág₁. ³⁵ Jaun₂ jan₂ riin'₅₄ i₂lín₅ tē₅juá'₅, jme₁'nio₃ jme₁jo₅₄ quian'₅₄ jág₁, jaun₂ ca₂ñi'₃ Jesús:

³⁶ —Tē₅, ¿'e₂ 'Éi'₃ Juá'₅ a₂dsen₅₄ gué'₄ con'₂ gué'₄ ca₂le₃jé₃ Si₂ 'Éi'₃ quió'₅ Diú₄?

³⁷ Jaun₂ ca₂ñag₃ Jesús:

—“Jme₁'nió₄ Te₁gui'₅₄ Diú₄ quiáng'₂, ca₂le₃jé₃ 'au'₂, ca₂le₃jé₃ jme₂dsí₂ quiáng'₂, ca₂le₃jé₃ 'a₂ lia'₂ niog₅ ñi'₂ dsei'₂.^s ³⁸ A₂nē₅ bá₄ 'Éi'₃ Juá'₅ a₂le₂'uig₅₄ a₂dsen₅₄ gué'₄ con'₂ gué'₄ ca₂le₃jé₃. ³⁹ Jē₁ca₂té₂ tin₃ 'Éi'₃ né₃, mei'₂ tsá₃ co₂rē₂ quian'₅₄ a₂le₂'uig₅₄: “Jme₁'nió₄ dsa₂ mi₂güig₃ ríng'₂ jui₁lia'₂ 'nióg₃ 'ñiag'₂.^t ⁴⁰ Tin₃ 'éi'₃ nē₅ bá₄ lé₅ 'uig₅₄ cho'₅₄ ca₂le₃jé₃ 'Éi'₃ quió'₅ Moisés quian'₅₄ ca₂le₃jé₃ jág₁ a₂ca₂'é₂ dsa₂ i₂chen₄ quián₅ Diú₄ ma₂líg'₂.

¿'Ein₂ tsi₁jon₂ quián₅ lín₅ I₂rē₂'ín₁ quián₅ Diú₄?

(Marcos 12:35-37; Lucas 20:41-44)

⁴¹ Tē₃ tion'₅₄ dsa₂ fariseos le₁ñi'₂, ⁴² jaun₂ ca₂ñag₃ Jesús ca₂juá'₂:

—¿'A₂ lia'₂ lín'₂ 'nia'₂? ¿'Ein₂ tsi₁jon₂ quián₅ lín₅ I₂rē₂'ín₁ quián₅ Diú₄?

—Tsi₁jon₂ David —ca₂ñag₃ dsa₂ 'éi₂.

⁴³ Jaun₂ ca₂juá'₂ táng₃ Jesús:

—¿'A₂ lia'₂ jaun₂? Ia₁ 'ñiog₅ bá₄ guē'₂ David ca₂juá'₂ lia'₂ con'₂ jme₁ca₂'í₃ Jme₂dsí₂ Jñi₅ tē₂dsí₅, ca₂tē₃ “Te₁gui'₅₄.” ¿'A₂ lia'₂ lé₅ jaun₂? Ia₁ 'ñiog₅ bá₄ guē'₂ David ca₂juá'₂:

⁴⁴ Ca₂juá'₂ Diú₄ ca₂tsí'₃ Te₁gui'₅₄ quiáng₃:

“Né₂ con₂ jniá₂ tē₂le₃ gu₃ ne₁,

ca₂lia'₂ ca₂tē₂ jmig₄

a₂tón₁ jniá₂ dsa₂ i₂'iog₅₄ o₄tag'₄.^u

⁴⁵ ¿'A₂ bá₄ lia'₂ lé₅ a₂lín₅ tsi₁jon₂ David, ton'₂ 'ñiog₅ bá₄ guē'₂ David ca₂tē₃ “Te₁gui'₅₄ quiáng₃?”

⁴⁶ Jaun₂ tē₂le₃ ne₄ jui₅ gué'₄ jaun₂, tsá₃ ma₃'ein₂ ca₂tiá₂ dsí₅ jua'₅₄ a₂ñag₃ gué'₄ 'e₂ ñag₃.

^r32 Éxodo 3:6.

^s37 Deuteronomio 6:5.

^t39 Levítico 19:18.

^u44 Salmo 110:1.

Chóg'₅ Jesús dso₄ juá'₂ 'a₂ lia'₂ niog₅ lín₅
dsa₂ fariseos quian'₅₄ tē₅juá'₅ né₃

(Marcos 12:38-40; Lucas 11:37-54; 20:45-47)

23 ¹ Jaun₂ né₃ ca₂ton₃ Jesús jág₁ ca₂tsí'₃ dsa₂ juin₅ i₂quian'₅₄,
ca₂tsí'₃ chí'₂ dsi₂guia₃-tín₂ quiáin₅ né₃, ca₂juá'₂:

² —Dsa₂ fariseos quian'₅₄ tē₅juá'₅ né₃, tiáin'₅ ta₁ a₂jme₁lín₄ Moisés.

³ Jaun₂ lē₃ ca₂tín'₂ 'nia'₂ nág'₁ gau₂ jág₁ quió'₅, jme₁ti'₄ 'nia'₂ 'e₂
a₂te₂néi'₂. La₁ tsá₃ can₂ 'nia'₂ jui₅ jua'₅₄ a₂jmó'₂ jui₁lia'₂ a₂jmo₂₃ guioin₅₄,
ia₁ jui₁lia'₂ jme₂tag₂₃, tsá₃ jme₂ti₃ guioin₅₄; tē₂le₃ siá'₂ bá₄ jmo₂₃ dsó₅.

⁴ Qui₂'nei₂₃ lio₅₄ guei₂ 'ñio₅ lín₃ qui₂dsi₂₃ mi₂ca'₄ dsa₂, la₁ guioin₅₄ né₃
ca₂lia'₂ jñia'₅₄ caun₂ chí₁gú₃ bá₄ tsá₃ 'nio₃ tí₂ jua'₅₄ a₂jme₃'o₅₄ cán₂.

⁵ Ca₂le₃jē₃ 'e₂ a₂jmo₂₃, jmo₂₃ a₂jñia'₅₄ con'₂ 'nio₃ jág₂ dsa₂ bá₄. Ia₁ tin₂
dsí₅ i₃quian₅₄ le₁ton₅ jma₃ca₂tsín'₅ tsi₁'mi'₂ 'í₂ le₂con₂ chí₁quí₃ quian'₅₄
mi₂cu₅ né₃ qui₂le₁ton₅ 'éi'₃ quió'₅ Diú₄;ᵛ a₂ta₁ dsí₅ i₂nioi₅₄ le₁qui'₂
tsi₁'mi'₂ chen'₅₄ jang₄ qui₂le₁'ág₄ a₂lē₅ lí₁ ca'₅₄ a₃tag₄. ⁶ 'Nio₅ tē₅ dsí₅
qui₂dsi₂toin'₅₄ jmá'₃ lia'₂ ja₁jlá'₁ bá₄ ja₁qui₂dsi₂gué'₃, qui₂dsi₂tiain'₂
ja₁dsen₅₄ gué₄ jui₁lia'₂ dsi₂néi₂ guá'₅ sinagoga né₃. ⁷ Ton'₂ 'ñio₅ tē₅ dsí₅
qui₃cuag₃ dsa₂ Diú₄ jē₄ 'ma'₅₄, qui₃tē₂ dsa₂ “tē₅”ʷ né₃.

⁸ 'La₁ 'nia'₂ né₃, tsá₃ ca₂tíng'₂ jua'₅₄ tē₂ dsa₂ “tē₅”, ia₁ ca₂le₃jín'₃ bá₄
'nia'₂ lē₅ ríng'₂; ia₁ jan₂ bá₄ Tē₅ quián'₂ 'nia'₂ chan₂. ⁹ Tsá₃ tē'₅₄ 'nia'₂
“tia₅₄” 'i₁jan₂ dsa₂ mi₂güí₃, ia₁ jan₂ bá₄ Néi'₅ 'nia'₂ i₂chan₂, i₂guá₅
guei'₅₄ i₂juí₃. ¹⁰ Tsá₃ cué'₁ 'nia'₂ jmí₄ a₂tē₂ dsa₂ 'nia'₂ guiong'₅₄ a₂líng'₅
juí₃₅₄ dsa₂, ia₁ jan₂ l₂rē₂'ín₁ quián₅ Diú₄ bá₄ i₂lín₅ juí₃'₂ 'nia'₂. ¹¹ Jui₁lia'₂
i₂jme₃ti₃ ta₁ ne₄ rin'₅₄, i₂'ei₂ bá₄ i₂juin'₂ gué₄. ¹² Ia₁ jui₁lia'₂ i₂jme₂can'₅₄
guion₅₄ jin₄ rin'₅₄, tē₂le₃ sióin₂, lé₂ mei'₂; la₁ jui₁lia'₂ i₂jmo₅ me'₂ jin₄
rin'₅₄, i₂'ei₂ bá₄ lén₂ i₂juin'₂ gué₄ con'₂ gué₄ ca₂le₃jín₃.

¹³ 'i'E₂ gué₄ juí₃'₂ 'nia'₂ tē₅juá'₅, 'nia'₂ dsa₂ fariseos né₃, i₂lē₁jmo₅-dsáu₅
o₁ne₁! Ia₁ jnág'₂ 'nia'₂ o₄'né₄ guei'₅₄ i₂juí₃ ja₁gon₂ Diú₄, tsá₃ cué'₂ 'nia'₂
jmí₄ tón'₃ i₂sián'₂. Ia₁ on₃ gué'₂ tón'₂ 'nia'₂ guiong'₅₄, on₃ gué'₂ cué'₂
'nia'₂ jui₅ tón'₃ jui₁lia'₂ i₂'nio₃ tón'₃.ˣ

¹⁵ 'i'E₂ gué₄ juí₃'₂ 'nia'₂ tē₅juá'₅, 'nia'₂ dsa₂ fariseos né₃, i₂lē₁jmo₅-dsáu₅
o₁ne₁! Ia₁ qui₂i₂nio'₄ 'nia'₂ ca₂le₂con₂ mi₂güí₃ qui₁'ang'₄ jmi₁ñí'₄,
a₂qui₂jme₂tíng'₁ dsa₂ lia'₂ lē₅ 'én'₂ 'nia'₂ guiong'₅₄. Jē₁ma₂ca₂jon'₃ 'nia'₂
dsa₂ a₂dsi₃léin₂ jui₅ quiáng'₂, qui₂jme₂tín'₁ 'nia'₂ a₂jñia'₅₄ con'₂
a₂jme₃'liin'₅₄ gué₄ lia'₂ con'₂ gué₄ guion'₅₄ 'nia'₂.

ᵛ₅ 'Nio'₂ ja₁ton₅ Deuteronomio 6:4-9.

ʷ₇ o₃, Rabbí.

ˣ₁₃ A₂lín₅₄ chog₅₄ si₂ chí₁ton₅₄ versículo 14 ján₃, a₂juá'₂ le₂la₂: “i'E₂ gué₄ juí₃'₂ 'nia'₂
tē₅ juá'₅, 'nia'₂ dsa₂ fariseos né₃, i₂lē₁jmo₅-dsáu₅ o₁ne₁! Ia₁ ja₂nó'₅ 'nia'₂ qui₂jñiá'₂ 'ne₄
'io₅₄ 'nág₂, jaun₂ jmo'₂ 'nia'₂ chí₂leng'₅₄ Diú₄ ué₂ lín₃, ia₁jaun₂ tsá₃ 'ein₂ le₃lí'₄. 'Uig₅₄ jaun₂
ja₂lín₃ gué₄ 'ñio₅ uig₅ gué'₁ 'nia'₂.

¹⁶ 'i'E₂ gué₄ juíg' ₂ 'nia' ₂, dsa₂ ten₄ i₂quian₅ ne₄ jui₅! Ia₁ juá' ₂ 'nia' ₂ jme₂tíng' ₁ dsa₂: "Në₁jua' ₂ 'ein₂ ca₂cuë₃ jág₁ quió' ₅ 'ë₂₃ guá' ₅, tsá₃ 'e₂ quen₅ jág₁ jaun₂; la₁ në₁jua' ₂ ca₂'ë₃ cu₄nióg₄ a₂te₁'i₁ guá' ₅, a₂jaun₂ gué₄ dsón' ₂ quen₅ jág₁ quió' ₅", tion₅₄ 'nió' ₅ jme₃ti₃ jág₁ a₂në₂cuë₃. ¹⁷ 'i'Nia' ₂ dsa₂ ten₄, dsa₂ co₄! 'i'E₂ a₂quen₅ gué₄ 'ñio₅ lín₃? 'i'Cu₄nióg₄, o₃ guá' ₅ ja₁rë₂jñio₃ cu₄nióg₄ jaun₂ 'e₂? ¹⁸ Juá' ₂ 'nia' ₂ ján₃: "Në₁jua' ₂ 'ein₂ cuë₅ jág₁ quió' ₅ a₂'ë₂₃ ne₄chei₂, ján₃ bá₄ tsá₃ 'e₂ quen₅ jág₁ jaun₂; la₁ në₁jua' ₂ ca₂'iin₃ já' ₂ i₂rë₂jen' ₅₄ ne₄ ne₄chei₂, jaun₂ gué₄ dsón' ₂ tion₅₄ 'nió' ₅ jme₃ti₃ jág₁ quió' ₅." ¹⁹ 'i'Nia' ₂ dsa₂ ten₄! 'i'E₂ jaun₂ a₂lé₅ a₂dsen₅₄ gué₄? 'i'Já' ₂ i₂rë₂jen' ₅₄ ne₄ Diú₄, o₃ ne₄chei₂ a₂rë₂jñio₃ já' ₂ 'éi₂ 'e₂? ²⁰ Jaun₂ lë₃, jui₁lia' ₂ jme₁cuë₅ dsa₂ jág₁ quió' ₅ a₂'ë₂₃ ne₄chei₂, on₃jua' ₅₄ jmá' ₃ ne₄chei₂ 'ë₂₃; a₂'ë₂₃ ca₂le₃jé₃ 'e₂ a₂te₁'i₁ ne₄chei₂ bá₄ jaun₂. ²¹ Le₂në₅ bá₄ ján₃, jui₁lia' ₂ i₂'ë₅ guá' ₅, on₃jua' ₅₄ jmá' ₃ ca₂ne₅₄ guá' ₅ 'ë₂₃, a₂'iin₂₃ le₂jio₅ Diú₄ i₂guá₅ dsi₂néi₂ jaun₂ bá₄. ²² Ján₃ bá₄ le₂në₅ jui₁lia' ₂ i₂'ë₅ guei' ₅₄ i₂juíg₃, a₂ma₂në₂'ë₃ le₂jio₅ ne₄ta₁ quió' ₅ Diú₄, ton' ₂ a₂ma₂në₂'iin₃ le₂jio₅ 'ñio₅ Diú₄ i₂guá₅ ne₄ta₁ jaun₂ bá₄ ján₃.

²³ 'i'E₂ gué₄ juíg' ₂ 'nia' ₂ të₅juá' ₅, 'nia' ₂ dsa₂ fariseos në₃, i₂lë₁jmo₅-dsáu₅ o₁ne₁! Ia₁ qui₂jáng' ₂ 'nia' ₂ caun₂ qui' ₅₄ a₂guia₃ quió' ₅ mi₁'au₂ mi₂juíg₂, jui₁lia' ₂ menta, anís, quian' ₅₄ qui₂má₃ në₃. La₁ tsá₃ tón' ₂ guë' ₂ 'nia' ₂ jui₅ 'Éi' ₃ Juá' ₅ a₂dsen₅₄ gué₄ quió' ₅ Diú₄ ron₅, jui₁lia' ₂ ja₁juá' ₂ a₂'nió' ₅ jmo₃ dsa₂ a₂dse₃, a₂dsia₃ dsa₂ ñéi₂ dsí₅ dsa₂ mi₂güí₃ riin' ₅₄, a₂jmo₃ dsa₂ tí₅ jág₁ quió' ₅ quian' ₅₄ riin' ₅₄. A₂në₅ bá₄ a₂dsen₅₄ gué₄ a₂ca₂tín' ₂ 'nia' ₂ jmó' ₂, la₁ on₃jua' ₅₄ a₂tsá₃ ma₃jme₁ti' ₄ 'nia' ₂ 'Éi' ₃. ²⁴ 'i'Nia' ₂ dsa₂ ten₄ i₂quian₅ ne₄ jui₅! Qui₁ñi' ₄ 'nia' ₂ quió' ₅ i₁lu₂ pí₁, la₁ ní' ₅ bá₄ guë' ₂ 'nia' ₂ guiong' ₅₄ jui₁lia' ₂ já' ₂ camello.

²⁵ 'i'E₂ gué₄ juíg' ₂ 'nia' ₂ të₅juá' ₅, 'nia' ₂ dsa₂ fariseos në₃, i₂lë₁jmo₅-dsáu₅ o₁ne₁! Ia₁ lín' ₅ 'nia' ₂ jui₁lia' ₂ lé₅ ni₁vaso, ni₁uing₅ në₃, qui₁rín' ₄ 'nia' ₂ jmá' ₃ lia' ₂ le₃co' ₅₄. La₁ të₂le₃ jui₅ të₂'au' ₂ 'nia' ₂, qui₂rë₂can' ₂ ca₂le₃jé₃ ne₅₄ a₂'lig' ₅₄ a₂qui₂dsi₂jñia₅ 'au' ₂ 'nia' ₂, 'niog' ₂ 'nia' ₂ jua' ₅₄ jmá' ₃ lia' ₂ guiong' ₅₄ bá₄ qui₂le₃cha₂ quiáng' ₂; qui₂ja₂nó' ₅ 'nia' ₂ 'ang' ₂ quió' ₅ dsa₂.

²⁶ 'i'Nia' ₂ dsa₂ fariseos ten₄! Rang₂ 'nia' ₂ de' ₂ jñiá₅ le₃'ñio' ₂ ni₁vaso quian' ₅₄ ni₁uing₅, jaun₂ gué₄ lé₂ le₁jé₃ le₂tan₅₄ le₃co' ₅₄ në₃.

²⁷ 'i'E₂ gué₄ juíg' ₂ 'nia' ₂ të₅juá' ₅, 'nia' ₂ dsa₂ fariseos në₃, i₂lë₁jmo₅-dsáu₅ o₁ne₁! Ia₁ lín' ₅ 'nia' ₂ jui₁lia' ₂ lé₅ tau₂ 'ñio₅ a₂jñia' ₅₄ con' ₂ jniá₂ tiog₂, jniá₂ jlá' ₁ jmá' ₃ lia' ₂ le₃co' ₅₄ bá₄, la₁ le₃'ñio' ₂ qui₂rë₂can' ₂ ni₁mu₅, chí' ₅ ma₂'lig' ₅₄. ²⁸ Le₂në₅ bá₄ lín' ₅ 'nia' ₂; 'e₂ gué₄ dsen' ₃ 'nia' ₂ jniág' ₂ jmá' ₃ lia' ₂ le₃co' ₅₄ të₃jë₄ jág₅ dsa₂, la₁ të₂'au' ₂ guë' ₂ 'nia' ₂ qui₂rë₂can' ₂ ca₂le₃jé₃ ne₅₄ a₂'lig' ₅₄, a₂jmo' ₂ dsáu' ₂ 'nia' ₂ o₁ne₁ 'e₂ a₂jmo' ₂.

²⁹ 'i'E₂ gué₄ juíg' ₂ 'nia' ₂ të₅juá' ₅, 'nia' ₂ dsa₂ fariseos në₃, i₂lë₁jmo₅-dsáu₅ o₁ne₁! Ia₁ qui₂jmóg' ₂ 'nia' ₂ tau₂ 'ñio₅ quió' ₅ dsa₂ i₂ca₂'é₂ jág₁ quián₅ Diú₄ ma₂líg' ₂, qui₂jmóg' ₂ 'nia' ₂ jlá' ₁ qui₂rë₂lag₄ jui₁lia' ₂ ja₁le₁'on₅ dsa₂ dsen₃ i₂ma₂dsan₃. ³⁰ Jaun₂ jag' ₅₄ 'nia' ₂: "Jua' ₅₄ mei' ₂ bá₄ ca₂rë₃chóng₃ jniog₄ jmíg₄ jaun₂ lia' ₂ con' ₂ jme₁chan₂ dsa₂ can' ₅₄ quián₂ ma₂líg' ₂, tsá₃

jme₁jme₁quian'₅₄ jniog₄ lia'₂ con'₂ jme₁ca₂jmo₃ a₂ca₂i₃'o₅₄ jmi₂ 'an₅₄ dsa₂ i₂chen₄ 'éi₂ quián₅ Diú₄.³¹ Jaun₂ le₂nē₅, quian'₅₄ jág₁ quián'₂ 'nia'₂ guiong'₅₄, jáng'₂ 'nia'₂ jág₁ dsau₅ a₂lín'₅ tsi₁jon₂ dsa₂ i₂ca₂jme₃dsian₅ dsa₂ i₂ma₂chen₃ Diú₄.³² Jaun₂ nē₃, jme₁'ñia₅ 'nia'₂ dso₄ a₂ca₂jme₃lióg₃ dsa₂ can'₅₄ quián'₂ 'nia'₂.

³³ 'iJá'₂ 'lín'₅₄! 'Tsi₁jon₂ dsi₂mi'₂! 'A₂ bá₄ lia'₂ le₃lon'₅₄ 'nia'₂ 'éi'₃ uig₅ a₂já₅ ja₁con'₂ 'nia'₂ a₂dsi₁nog'₃ guio₃-juíg₃?³⁴ 'Uig₅₄ jaun₂, tsin₅₄ jniá₂ ja₁con'₂ 'nia'₂ dsa₂ i₂'é₂ jág₁ o₄quió₃, dsa₂ i₂ñí'₂ niog₅ dsi₄, i₂lín₅ tē₅ nē₃. I₂lín₅₄ 'éi₂ jme₁dsiain'₂ bá₄ 'nia'₂, i₂lín₅₄ guē'₂ qui₁tóin'₄ 'nia'₂ cróg₄. I₂sián'₂ guē'₂ nē₃ qui₁cuē'₅₄ 'nia'₂ dsi₂néi₂ guá'₅ sinagogas quiáng'₂, qui₂co₁'éin'₄ 'nia'₂ nē₃ le₂'í₁ juig₂.³⁵ Jaun₂ lē₃, 'nia'₂ bá₄ le₁cáng'₄ jmi₄ ca₂le₃jín₃ dsa₂ dsen₃ i₂qui₂ma₂dsan₃ mi₂güig₃, ca₂tē₂ jmi₄ Abel i₂jme₁lín₄ dsa₂ dsen₃, ca₂tē₂ jmi₄ Zacarías ja₁ñi'₅₄ Berequías, i₂ca₂jñí'₃ 'nia'₂ i₁dsi₅ guá'₅ jē₄ ja₁lē₄ ja₁jñi₅ quian'₅₄ ja₁chí'₄ ne₄chei₂.³⁶ A₂dsi₂jó'₃ juíg₂ jniá₂ 'nia'₂, dsa₂ chan₂ jmig₄ nē₃ bá₄ rē₂cán'₄ ca₂le₃jē₃ dso₄ jaun₂.

'O₅ Jesús o₄quió'₄ juig₂ Jerusalén

(Lucas 13:34-35)

³⁷ 'i'Nia'₂ dsa₂ juig₂ Jerusalén! 'i'Nia'₂ dsa₂ juig₂ Jerusalén, 'nia'₂ i₂jme₂dsiáng'₁ dsa₂ i₂'é₂ jág₁ quián₅ Diú₄, 'nia'₂ i₂qui₂jñag'₅₄ cang₄ dsa₂ i₂chen₅ Diú₄ jin'₄ 'nia'₂! 'i'Lióng₂ ráun₂ jme₁'ín₅ dsi₃ jme₁chi₁liang'₂ guein₂ dsa₂ juig₂ quiáng'₂, jui₁lia'₂ jmo₅ i₁tsín'₃ a₂chi₂lain'₂ guein₂ quiáin₅ to'₂ nē₃ tsi₁rē₂cu₅, la₁ guion'₅₄ 'nia'₂ tsá₃ ca₂gue'₅₄!³⁸ Jag₄ jaun₂, dsi₂néi₂ quiáng'₂ nē₃ tē₃'ñiá₄, tē₃tsi'₅₄ tei₄, tsá₃ 'ein₂ chan₂ lé₂.³⁹ Ia₁ juá'₅ jniá₂, tsá₃ ma₃la₂ jag'₅₄ 'nia'₂ jniá₂, ca₂lia'₂ ca₂tē₂ jmig₄ jē₁ma₂tē₂ rē₁jua'₅₄ 'nia'₂: “Jui₁le₂jñi₅ bá₄ i₂nē₅ i₂jón'₅ o₄quió'₄ Te₁gui'₅₄.”^y

Ca₂'é₂ Jesús jág₁ a₂dsi₃'én₂ bá₄ guá'₅ templo

(Marcos 13:1-2; Lucas 21:5-6)

24 ¹ Jaun₂ ca₂o₃'ín₃ Jesús i₁dsi₅ guá'₅ templo ja₁jme₁'ein₅₄. Jme₁ma₂'ein₅₄ jui₅ ñái'₅, ca₂jme₃quián₃ chi'₂ dsi₂guia₃-tín₂ quiáin₅ tē₂, ca₂juá'₂:

—Jag₄ 'a₂ lia'₂ lē₅ guá'₅.

² La₁ jaun₂ ca₂jag₃ Jesús:

—¿Jág'₂ 'nia'₂ ca₂le₃jē₃ a₂nē₅? A₂dsi₂jó'₃ juíg₂ jniá₂ 'nia'₂, já₅ jmig₄ lia'₂ 'i₁ca₂míg₂ ni₁cang₁ tsá₃ ma₃'e₂ jua'₅₄ a₂le₁juí₄ gué₄ lé₂ quian'₅₄ rin'₅₄. Ca₂le₃jē₃ bá₄ 'én₂.

^y39 Salmo 118:26.

Léi₄ a₂lé₂ jmig₄ jē₁ca₂tó'₂
(Marcos 13:3-23; Lucas 21:7-24; 17:22-24)

³ Jme₁ca₂dsióg₃ Jesús Má'₂ Olivos; ja₁jaun₂ ca₂guá'₂. Jaun₂ ca₂i₁len₅₄ chi'₂ dsi₂guia₃-tín₂ con'₂ jē₄ jmá'₃ guioin₅₄, ca₂ní'₃ Jesús:

—'Niog₂ jnia'₅₄ le₃ne₄ líg'₂ lé₂ a₂juá'₂ 'ne₂ nē₅. ¿'E₂ léi₄ lé₂ jē₁ma₂tē₂ rē₁neg'₅₄ táng₃? ¿'E₂ bá₄ léi₄ lé₂ jē₁ma₂tē₂ rē₁tē₅₄ jmig₄ jaun₂?

⁴ Jaun₂ ca₂ṇag₃ Jesús:

—Jmo₄ 'nia'₂ 'í₁ ia₁jaun₂ tsá₃ 'ein₂ jme₃gau₅. ⁵ Ia₁ juin₅ i₂tē₁i₃nio₄ a₂juá'₂ i₂nioi₅₄ o₄quió₃ jniá'₂, juá'₂: “Jniá'₂ bá₄ líng₅ I₂rē₂'ín₁ quián₅ Diú₄”; jaun₂ juin₅ dsa₂ i₂qui₂jme₃gain₂₃. ⁶ Jē₁ma₂nei'₂ 'nia'₂ 'ei₅ jág₁ a₂nio₃ 'nei₂ a₂quín'₂ dsa₂ ja₁lá₃ ja₁ó₃, la₁ tsá₃ jmó'₂ 'nia'₂ gang'₃, ia₁ le₂jaun₂ dsón'₂ lé₂ bá₄. La₁ 'nió'₅ bá₄ gué'₄ a₂ṇí₂ jein₂ jaun₂. ⁷ Ia₁ nio₃ 'nei₂, qui₃quín'₂ dsa₂ le₂caun₂ le₂caun₂ juig₂ nación; dsi₂tan₅₄ guē'₂ né₃ qui₃tóin'₃ mi'₅₄ quín'₂ quian'₅₄ dsi₂tan₅₄ riin'₅₄ i₂chan₂ juig₂ siá'₂. Jaun₂ gué'₄ né₃ 'lióng₂ ja₁qui₂i₂nio₄ dsa₂ 'oin₅₄ lé₂, ton'₂ 'lióng₂ ja₁qui₂dsi₃bi₅₄ 'uē₃ né₃.

⁸ Ca₂le₃jé₃ a₂nē₅ lé₂ a₂le₂'uig₅₄ jmi₁uig₅ jui₁lia'₂ jan₂ 'io₅₄ i₂rē₂chan₂ guein₂ quián₅.

⁹ Jaun₂ gué'₄ né₃, qui₃jín'₂ dsa₂ 'nia'₂ ne₄ dsi₂tan₅₄ ia₁jaun₂ cuē₃ dsa₂ uig₅, jaun₂ gué'₄ jme₃dsian₅ dsa₂ 'nia'₂. Le₂con₂ mi₂güí₃ bá₄ jme₃'ṇia₅₄ dsa₂ 'nia'₂ 'uig₅₄ quió₃ jniá'₂. ¹⁰ Jmig₄ jaun₂, juin₅ dsa₂ i₂tí₂ jui₅ quió'₅ Diú₄ a₂jme₁'éin₂, qui₂jme₃'ṇia₅₄ bá₄ riin'₅₄, qui₃jáng'₂ né₃. ¹¹ Juin₅ dsa₂ le₃chan₂ i₂'é₂ jág₁ i₂jui₁gan₂, jaun₂ juin₅ dsa₂ i₂jme₃gain₂₃. ¹² 'Uig₅₄ ia₁ a₂ṇí₄ lē₃ jui₁si ṇag₅₄ le₃'lin'₅₄ dsa₂, co₂dsia₅ le₃güí₃' bá₄ 'a₂ lia'₂ jme₁'nio₃ dsa₂ riin'₅₄ le₂jain₂ le₂jain₂. ¹³ La₁ jui₁lia'₂ i₂náu₃ tiá'₂ tē₂ jē₁ca₂tó'₂, 'éi₂ bá₄ líón₂. ¹⁴ Jág₁ dse₃ la₂ jui₁lia'₂ 'a₂ lia'₂ lē₅ ja₁gon₂ Diú₄ qui₂dsi₃'ag₅ ta₁caun₂ mi₂güí₃, ia₁jaun₂ le₃ṇi₅ ca₂le₃jé₃ juig₂ te₁'i₁ gua'₅₄ 'uē₃ jág₁ dse₃ jaun₂; jaun₂ gué'₄ né₃ tē₅₄ jmig₄ jē₁ca₂tó'₂.

¹⁵ Jaun₂ né₃, já₅ jmig₄ a₂tē₅₄ ne'₅₄ 'nia'₂ a₂náu₃ jan₂ dsa₂ i₂'lin'₅₄ gué'₄ lin₃, a₂jme₃'ió₃ ja₁ṇi₅, a₂le₃ti₃ jág₁ a₂ca₂'é₂ Daniel i₂jme₁'é₂ jág₁ quián₅ Diú₄,^z (jaun₂ jui₁le₂ṇí'₂ bá₄ i₂'i₅ si₂ la₂), ¹⁶ jaun₂ né₃, dsa₂ i₂tián'₅ le₂tan₅₄ 'uē₃ Judea, jui₁cuíng₁₂ jui₅ má'₂. ¹⁷ Jui₁lia'₂ i₂'en₅₄ guei'₅₄ 'ne₄, tsá₃ ma₃jui₁sióin₄ jua'₅₄ a₂'uē₃ 'e₂ 'uē₃ dsi₂néi₂ quió'₅; ¹⁸ jui₁lia'₂ i₂'en₅₄ ja₁nau₂ quió'₅ táng₃, tsá₃ ma₃jui₁ṇi₅oi₅₄ jua'₅₄ a₂ja₃quián₂ tsi₁'mi'₂ dsio₂ quió'₅. ¹⁹ iJuí₂ bá₄ jui₁lia'₂ dsa₂ mí₂ i₂le₁quian₅ guein₂, jui₁lia'₂ i₂le₁ṇia₅ guein₂ i₂'ín'₂ dsi'₅₄ né₃, jmig₄ jaun₂! ²⁰ Mi₄ 'nia'₂ ne₄ Diú₄ ia₁jaun₂ tsá₃ o₁le₅₄ jua'₅₄ a₂cuíng'₂ 'nia'₂ jein₂ güí₂, on₃ guē'₂ jmig₄ sa₅₄ né₃. ²¹ Ia₁ juá'₅ jniá'₂, caun₂ o₂i₁ dsi₅ lin₃ a₂le₃chan₂ dsa₂ jmig₄ jaun₂, caun₂ jmi₁uig₅ a₂tsá₃ ma₂ca₂rē₃chá₃ ca₂le₃ ca₂nio₃ mi₂güí₃, on₃ guē'₂ ma₃nio₅ jmig₄ jua'₅₄ a₂le₃cha₂ gué'₄ cang₂. ²² Jua'₅₄ mei'₂ gué'₃ Diú₄ tsá₃ ma₂ca₂jme₃tē₃

^z15 'Í₂ Daniel 9:27; 11:31; 12:11.

jmig₄ jaun₂, 'i₁jan₂ tsá₃ 'ein₂ jme₁lión₂ jua'₅₄ mei'₂ gué₃ tsá₃ le₂jaun₂. La₁ o₄quió'₄ i₂rē₂quion'₅₄ quián₅, jme₃tē₃ bá₄ jmig₄ jaun₂.

²³ 'Nē₁jua'₂ chan₂ i₂ca₂juá'₂ tsí'₅ 'nia'₂ jmig₄ jaun₂: “iJag₄ 'nia'₂! iLa₂ bá₄ chén'₅ i₂rē₂'ín₁ quián₅ Diú₄!” o₃ nē₁jua'₂ 'ein₂ ca₂juá'₂: “Jó₄ 'ein₅₄”, tsá₃ o₁'en'₅₄ 'nia'₂ jág₁ jaun₂. ²⁴ Ia₁ jui₅ dsa₂ i₂jui₁gan₂ ja₃lén₂ a₂juá'₂ a₂lín₅ i₂rē₂'ín₁ quián₅ Diú₄, a₂juá'₂ né₃ a₂lín₅ dsa₂ i₂'é₂ jág₁ quián₅ Diú₄; 'lióng₂ léi₄ jué'₂ a₂o₂dsain₂ jmo₃ a₂jme₃gain₂₃ dsa₂. Jua'₅₄ mei'₂ gué₃ lé₂, ca₂tē₂ dsa₂ i₂quion'₅₄ quián₅ Diú₄ jme₃gain₂₃. ²⁵ Jaun₂ nē₅ ma₂nē₂juíg₂ jniá₂ 'nia'₂ tē₃jniá₅. ²⁶ Jaun₂ né₃, nē₁jua'₂ 'ein₂ ca₂tsí'₃ 'nia'₂: “Ní₂ 'nia'₂, jó₄ 'ein₅₄ ja₁lé₄ 'uē₃ quein₂ co₂'ñiog₅”, tsá₃ lē₁o₂nó'₅ 'nia'₂ ja₁jaun₂; o₃ nē₁jua'₂ 'ein₂ ca₂juá'₂: “Ní₂ 'nia'₂, ja₁lá₃ rē₂'mai₅₄ dsi₂néi₂”, tsá₃ jui₁le₂'én'₂ 'nia'₂. ²⁷ Ia₁ jui₁lia'₂ jme₁lé₂ si₁ñí'₃ ca₂taun₂ ca₂taun₂, le₂jaun₂ bá₄ lé₂ jē₁ma₂tē₂ rē₁guan'₂ Jaun₅ dsa₂ mi₂güí₃. ²⁸ Ia₁ jui₁lia'₂ ja₁ron₅ 'lag₄, ja₁jaun₂ bá₄ ñi'₂ i₁tú₃ tsin'₅₄.

'A₂ lia'₂ guan'₂ Jaun₅ dsa₂ mi₂güí₃

(Marcos 13:24-37; Lucas 21:25-33; 17:26-30, 34-36)

²⁹ 'Dsi₂jui₅ jē₁ma₂ca₂ñag₅ jmig₄ o₂i₁ dsi₅ jaun₂,

'iog₂ né₃ co₂dsia₅ le₃lia'₂,

tsí'₂ né₃ tsá₃ ma₃tág₅ jnia₅₄;

nei₅ guē'₂ né₃ qui₂tsi₃séi'₂,

ca₂le₃jé₃ gué₄ 'e₂ bí₂ cha₂ guei'₅₄ mi₂güí₃

qui₃guan'₃.^a

³⁰ 'Tē₃jē₄ jaun₂ gué₄ né₃, le₃jniá₂ guei'₅₄ dsi₂güí₂ léi₄ quió'₅ Jaun₅ dsa₂ mi₂güí₃, ca₂le₃jé₃ juig₂ te₁'i₁ le₂con₂ mi₂güí₃ tóin'₃ qui'₃-o₃. Jíin₂ Jaun₅ dsa₂ mi₂güí₃, guain'₂ guei'₅₄ jē₄ jnei₅ quian'₅₄ ca₂le₃jé₃ jui₅bí₂ a₂'io₂₃ jláin'₁. ³¹ Jaun₂ qui₃chein₃ ángeles quián₅ jéi₂ ñí₂ trompeta tiá₂ lín₃ a₂tē₂ dsa₂ i₂quion'₅₄ quián₅ i₂chan₂ ca₂le₃jé₃ juig₂ te₁'i₁ ta₁caun₂ mi₂güí₃.

³² 'Jme₁tin₅ 'nia'₂, jui₁le₂ñí'₂ 'au'₂ jág₁ a₂jáng'₅ léi₄ jui₁lia'₂ ni₁'ma₂ a₂'ag₅ míg₂ higos: jme₁chéi'₂ gu'₂ nei'₅₄, a₂ja₂'ñio₃ mog'₅₄, ñi'₅₄ 'nia'₂ a₂ma₂ja₂quián₃ jein₂ 'iog₂ bá₄ jaun₂. ³³ Le₂nē₅ bá₄ 'nia'₂ jaun₂ né₃, jē₁ma₂tē₅ ne'₅₄ a₂lé₂ ca₂le₃jé₃ a₂nē₅, jui₁le₂ñi'₅₄ bá₄ 'nia'₂ a₂ma₂ja₂quián₃, nē₂jag₄ bá₄ i₂ma₂chén'₅ o₄'né₄ bá₄ 'éi₂. ³⁴ A₂dsi₂jó'₃ juá'₅ jniá₂ juíg₂ 'nia'₂, tsá₃ dsi₃ñí'₂ tsi₁jon₂ la₂,^b ca₂lia'₂ ca₂lē₃ ca₂le₃jé₃ a₂nē₅. ³⁵ Já₅ jmig₄, guei'₅₄ dsi₂güí₂ quian'₅₄ mi₂güí₃ la₂ ñag₅, la₁ jág₁ quió₃ o₁líg'₂ tsá₃ ñag₅ jua'₅₄ a₂tsá₃ le₃ti₃.

³⁶ 'La₁ 'i₁jan₂ tsá₃ 'ein₂ ñi₅ 'e₂ 'i₁ó'₄, 'e₂ hora lé₂ a₂jaun₂, on₃ guē'₂ ángeles i₂tion'₅₄ guei'₅₄ i₂juíg₃, on₃ guē'₂ 'ñiog₅ Ja₁ñi'₅₄ Diú₄.^c Jñia'₅₄ lia'₂ 'ñiog₅ bá₄ Diú₄ Jmei₂ ñi₅.

^a29 Isaías 13:10; 34:4.

^b34 o₃, “né₃ a₂dsián₃ dsa₂ i₂lín₅ raza la₂.”

^c36 A₂lín₅₄ chog₅₄ si₂ tsá₃ chi₁ton₅ “on₃ guē'₂ 'ñiog₅ Ja₁ñi'₅₄ Diú₄.”

³⁷ 'Ia₁ jui₁lia'₂ ca₂lë₃ jmi₄lia'₂ con'₂ jme₁chan₂ Noé, le₂jaun₂ bá₄ lé₂ ján₃ jë₁ma₂të₂ rë₁guan'₂ Jaun₅ dsa₂ mi₂güí₃. ³⁸ Ia₁ jmi₄jaun₂, né'₃ a₂can'₂ mi₂güí₃ quian'₅₄ jmi₂, jme₁chan₂ dsa₂ qui₂gué'₅, qui₂'ín'₂, qui₂jéin'₂ gu₂, qui₂cuin₂₃ ja₁mí₄ jme₁jéin'₂ gu₂ né₃, ca₂lia'₂ ca₂të₂ jmi₄jme₁ca₂'í₃ Noé 'ñió'₃ ni₁barco; ³⁹ la₁ con'₂ tsá₃ 'ein₂ rë₁ján₁ jme₁ca₂dság'₃ jmi₂ca₂jio₃ quió'₅ ca₂le₃jíin₃. Le₂jaun₂ bá₄ lé₂ táng₃ jë₁ma₂të₂ rë₁guan'₂ Jaun₅ dsa₂ mi₂güí₃. ⁴⁰ Jmi₄jaun₂, on₃ dsa₂ ñe'₂ tion'₅₄ ja₁nau₂; jan₂ i₂dsán'₃, jan₂ guë'₂ i₂të₃'ñiá₄. ⁴¹ On₃ guë'₂ dsa₂ mí₂ tioen'₅₄ éi'₅ ne₄ ni₁to₂; jan₂ i₂dsán'₃, jan₂ guë'₂ i₂të₃'ñiá₄.

⁴² 'Jme₁jnio₂ 'nia'₂ ne'₅₄ jaun₂, ia₁ tsá₃ ñi'₅₄ 'nia'₂ 'e₂ hora jñió'₂ juig'₂. ⁴³ La₁ jui₁le₂ñí'₂ 'au'₂ 'nia'₂ a₂la₂: jua'₅₄ mei'₂ gué₃ ñi₅ dsa₂ juig₅₄ caun₂ dsi₂néi₂ 'e₂ hora jiá₃ dsa₂ 'ang₂ të₂le₃ ca₂nei₂, jme₃jnio₅₄ ne₅₄, tsá₃ cuë₃ jmi₄a₂'í₂ dsa₂, 'ang₃ dsi₂néi₂ quió'₅. ⁴⁴ Le₂ñë₅ bá₄ 'nia'₂, rë₂ján₁ 'nia'₂ chang'₂; ia₁ con'₂ tsá₃ ñi'₅₄ bá₄ 'nia'₂ guan'₂ Jaun₅ dsa₂ mi₂güí₃.

Dsa₂ dsen₃ i₂jme₂ti₃, quian'₅₄ dsa₂ i₂tsá₃ jme₂ti₃

(Lucas 12:41-48)

⁴⁵ '¿Ein₂ dsa₂ i₂ñí'₂ dsí₅ jme₂ti₃ con'₂ dsi₂ten₅₄ ne₄ juig₅₄? Juig₅₄ né₃ ca₂dsia₃ o₄gú₃ 'éi₂ dsi₂néi₂ quió'₅ lia'₂ jma₃quian'₅₄ ca₂le₃jín₃ riin'₅₄ i₂jme₂ti₃, a₂ñii'₃ riin'₅₄ jë₁ma₂të₂ hora a₂gué'₃. ⁴⁶ 'E₂ gué₄ dsen₃ 'éi₂ jë₁ma₂të₂ rë₁jo₅₄ juig₅₄ jë₁ma₂guáin'₅ jme₂ti₃ bá₄ ta₁ a₂chéin'₅.

⁴⁷ A₂dsi₂jó₃ juá'₅ jniá₂, cuë₃ juig₅₄ ta₁ a₂nio₃ ne₅₄ ca₂le₃jé₃ 'e₂ a₂cha₂ quió'₅. ⁴⁸ La₁ jua'₅₄ mei'₂ gué₃ dsa₂ i₂jme₂ti₃ lín₅ jan₂ dsa₂ 'lín'₅₄ i₂tsá₃ tón'₂ jui₅ ta₁ a₂chéin'₅, ia₁ lín₂, “i₂le₃'ín₄ bá₄ juig₃”, ⁴⁹ jaun₂ jme₂lióg₃ qui₂cué'₅ bá₄ riin'₅₄, dsó₂ qui₂dsi₂gué'₃ qui₂dsi₂'én'₃ quian'₅₄ dsa₂ 'en₅ né₃. ⁵⁰ La₁ caun₂ jmi₄con'₂ tsá₃ rë₂jáin₁, caun₂ hora con'₂ tsá₃ lí₄ bá₄, dsián'₄ juig₅₄. ⁵¹ Juig₅₄ né₃ cuë₃ uig₅,^d 'liog₃ ja₁jaun₂ bá₄ ján₃, ja₁ca₂tín₂ dsi₁len₅ i₂lë₁jmo₅-dsáu₅ o₁ne₁, ja₁qui'₂-o₃, qui₃quí₃ jan₅₄.

Jág₁ jáng'₅ léi₄ jui₁lia'₂ guian₃ chi'₂ dsa₂ mi₄

25 ¹ 'Jmi₄jaun₂ jui₁lia'₂ ja₁gon₂ Diú₄, lé₂ jui₁lia'₂ ca₂jmo₃ guian₃ chi'₂ dsa₂ mi₄ jme₁ca₂can₃ ni₁tsí₅ le₁guí'₂ si₂ quió'₅. Ca₂i₃lén₂ ca₂i₁jme₁jein'₂ dsa₂ ñe'₂ i₂jen'₂ gu₂. ² 'Ñiá₂ chi'₂ dsa₂ mi₄ 'éi₂ jme₁coin₅₄; 'ñiá₂ guë'₂ i₂ñio₄, i₂dse₃ niog₅ dsi₄. ³ Dsa₂ mi₄ i₂co₄ 'éi₂ né₃, jmá'₃ ni₁tsí₅ chi₁guí'₂ si₂ bá₄ ca₂can₃; tsá₃ ca₂can₃ guë'₂ ni₁dsig₁ a₂'a₄ aceite. ⁴ La₁ dsa₂ mi₄ i₂niog₅ dse₃ dsi₄ né₃ ca₂jmo₃ co₂jñia₅₄ quió'₅, jme₁le₁quian₅ ni₁tsí₅ le₁guí'₂ si₂, ton'₂ jme₁le₁quian₅ rë₂tsón₂ aceite 'a₄ ni₁dsig₁. ⁵ La₁ ca₂rë₃'ín₄ bá₄ guë'₂ dsa₂ ñe'₂ i₂lë₅ jág₁ jen'₂ gu₂, jaun₂ le₃jín₃ bá₄ dsa₂ mí₂ 'éi₂ né₃ ca₂tá'₂ i₁güíin₃, jaun₂ ca₂güiin₂ bá₄. ⁶ Jaun₂ jme₁ca₂të₂ dsi₃nei₅, ca₂né'₂ tiá₂ i₁juá'₄ dsa₂: “i₁Ñë₅ jón'₅ dsa₂ ñe'₂ i₂jen'₂ gu₂! i₁Uin'₂ 'nia'₂ o₂jme₁jein'₂!” ⁷ Jaun₂ qui₂ca₂nau₂ ca₂le₃jín₃, ca₂jmo₃ dse₃ mecha tsí₅

^d51 lit. “dsia₃ juig₅₄ le₁juig₁ le₁dsog'₅₄ quió'₅.”

quió⁵. ⁸ Jaun₂ ca₂juá'₂ dsa₂ mí₂ i₂'ñiá₂ i₂co₄ 'éi₂ ca₂tsí'₃ riin'₅₄ i₂'ñio₄:
 “Cué'₁ 'nia'₂ ca₂juig₄ aceite quiáng'₂, ia₁ ma₂i₁ei₃ si₂ tsí₅ quián₂ jnia'₅₄.”
⁹ La₁ ca₂ñag₃ dsa₂ mí₂ i₂'ñio₄: “Jan₂'ón₄. Ia₁ con'₂ tsá₃ ñó₅ në₁juá'₂ tsá₃
 ca₂tín'₂ quián₂ jnia'₅₄ guio₅₄, on₃ gué'₂ quián'₂ 'nia'₂ tín'₂ në₃. Co₂ñei'₅₄
 gué₄ dse₃ o₂no'₅ 'nia'₂ guiong'₅₄ o₂liá₃ quiáng'₂ ja₁'nag₅ dsa₂.” ¹⁰ La₁
 të₁lia'₂ i₂lén₂ 'éi₂ i₂lia₅ aceite, të₃jë₄ jaun₂ ca₂guán'₃ dsa₂ ñe'₂ i₂lë₅ jág₁
 jen'₂ gu₂. Dsa₂ mí₂ i₂tián'₅ lé₅ co₂jñia₅₄ ca₂i₃toin'₅₄ bá₄ co₂lë₅ quiong'₅₄
 i₁gué'₂ ja₁niog₅ jmig₄ a₂jen'₂ gu₂ dsa₂. Jaun₂ ca₂jñág₃ o₄'né₄
 jme₁ca₂jñág₃. ¹¹ Jme₁co₂lág₂ jaun₂, o₃len₅ i₂'ñiá₂ 'éi₂, jaun₂ ca₂tóin'₂
 ca₂të₃, ca₂juá'₂: “iTe₁gui'₅₄, Te₁gui'₅₄! iNia₄ o₄'né₄ jaun₂ tió'₄ jnia'₅₄!”
¹² La₁ jaun₂ ca₂ñag₃ dsa₂ ñe'₂: “A₂dsi₂jó'₃ juá'₅, tsá₃ cuíng₅ 'ein₂ 'nia'₂.”
¹³ 'Jaun₂ le₂në₅, chan'₂ 'nia'₂ co₂jñiag'₅₄, ia₁ tsá₃ ñi'₅₄ 'nia'₂ 'e₂ 'ió'₄, 'e₂
 hora guan'₂ Jaun₅ dsa₂ mi₂güíng₃.

Jág₁ jáng'₅ léi₄ jui₁lia'₂ 'a₂ lia'₂ lé₅ ca₂jmo₃

ún₂ dsa₂ quian'₅₄ a₂ca₂dsia₃ juig₅₄ o₄gú₃

(Lucas 19:11-27)

¹⁴ 'Con'₂ siá'₂ lé₅ ja₁gon₂ Diú₄ jui₁lia'₂ jan₂ dsa₂ i₂'en₅₄ jui₅ dsó₃ dsi₃ñí₃
 uíng₂ juig₂ siá'₂. Jaun₂ ca₂té'₃ dsa₂ i₂jme₁jme₂ti₃ ta₁ ne₅₄, jaun₂ o₄gú₃ 'éi₂
 ca₂dsia₃ cu₄. ¹⁵ Jan₂ i₂ca₂cué'₃ 'ñiá₂ mei₅ 'éi'₃ cu₄ talentos; jan₂ gué'₂
 i₂ca₂cué'₃ tin₃ mei₅, jan₂ gué'₂ caun₂ mei₅. Ca₂cué'₃ le₂jan₂ dsa₂ 'éi₂ 'a₂
 con'₂ jnia'₅₄ qui'₅₄ jmig₄. Jaun₂ gué₄ ñó₃ i₁ñí₃. ¹⁶ Dsa₂ i₂ca₂gue₃ 'ñiá₂ mei₅
 'éi'₃ cu₄ në₃, ca₂jmoi'₂ ta₁ cu₄ jaun₂, jaun₂ ca₂lí'₃ con'₂ gué₄ 'ñiá₂ mei₅
 jmá'₃ a₂dsí₂. ¹⁷ Ján₃ bá₄ le₂jaun₂ ca₂jmo₃ i₂ca₂gue₃ tin₃ mei₅, ca₂lí'₃ con'₂
 gué₄ tin₃ mei₅ táng₃ a₂të₁dsi₅₄. ¹⁸ La₁ dsa₂ i₂ca₂gue₃ caun₂ mei₅ në₃,
 ca₂'ma₃ bá₄ a₂caun₂ mei₅ a₂ca₂cué₃ juig₅₄, ca₂i₁'ó₄ né₃ 'uë₃.

¹⁹ 'Ué₂ lin₃ bá₄ i₁ñi₂ juig₅₄ në₃; la₁ ca₂guáin'₃ jme₁ca₂guáin'₃ cang₂.
 Jaun₂ ca₂caún₃ 'í₁ ca₂chein'₃ cuentas quió'₅ dsa₂ i₂jme₂ti₃ i₂ca₂cué'₃ cu₄.
²⁰ Jaun₂ ca₂dsióg₃ i₂le₂'uig₅₄ i₂ca₂gue₃ 'ñiá₂ mei₅, jaun₂ ca₂jín'₂ juig₅₄
 con'₂ gué₄ 'ñiá₂ mei₅ a₂të₁dsi₅₄ a₂ca₂lí'₃, jaun₂ juá'₂ tsí'₃ juig₅₄: “Te₁gui'₅₄,
 ca₂cué'₅₄ 'ne₂ 'ñiá₂ mei₅; jag₄, la₂ ron₅ con'₂ gué₄ 'ñiá₂ mei₅ táng₃
 a₂ca₂lág₃.” ²¹ Jaun₂ ca₂juá'₂ juig₅₄: “'Ñio₅ dse₃ ca₂jmo'₅₄. Lín'₅ bá₄ jan₂
 dsa₂ dsen₃ i₂ca₂rë₃ti'₅₄; ca₂rë₃teng'₅₄ bá₄ quian'₅₄ a₂ca₂juig₄ a₂ca₂dsia₃
 jniá₂ gog'₂, në₃ në₃ 'lióng₂ gué₄ a₂dsia₅₄ jniá₂ gog'₂. 'Ú₅ dsi₂néi₂, o₁quián₁
 o₂'ñió₃ dsi₅ co₂dsia₅.” ²² Jme₁co₂lág₂ jaun₂ ca₂dsióg₃ i₂ca₂gue₃ tin₃ mei₅,
 jaun₂ ca₂juá'₂: “Te₁gui'₅₄, ca₂cué'₅₄ 'ne₂ tin₃ mei₅; jag₄, la₂ ron₅ con'₂
 gué₄ tin₃ mei₅ táng₃ a₂ca₂lág₃.” ²³ Jaun₂ ca₂juá'₂ juig₅₄, “'Ñio₅ dse₃
 ca₂jmo'₅₄. Lín'₅ bá₄ jan₂ dsa₂ dsen₃ i₂ca₂rë₃ti'₅₄; ca₂rë₃teng'₅₄ bá₄
 quian'₅₄ a₂ca₂juig₄ a₂ca₂dsia₃ jniá₂ gog'₂, në₃ në₃ 'lióng₂ gué₄ a₂dsia₅₄
 jniá₂ gog'₂. 'Ú₅ dsi₂néi₂, o₁quián₁ o₂'ñió₃ dsi₅ co₂dsia₅.”

²⁴ 'La₁ jme₁ca₂dsióg₃ i₂ca₂gue₃ caun₂ mei₅, ca₂juá'₂ tsí'₅ juig₅₄:
 “Te₁gui'₅₄, guion₄ jniá₂ a₂lín'₅ jan₂ dsa₂ i₂tsá₃ 'e₂ néi₂ dsí₅, 'aun'₂ ja₁tsá₃
 'e₂ ca₂jñí'₂, ton'₂ cag'₅₄ ja₁tsá₃ 'e₂ ca₂séi'₃. ²⁵ 'Uig₅₄ jaun₂ ca₂rë₃gó₅ jniá₂,

ca₂i₁'ó₄ bá₄ jniá₂ cu₄ quiáng'₂ né'₃ 'uë₃. La₁, la₂ bá₄ ron₅ quiáng'₂.”
²⁶ Jaun₂ ca₂rag₃ juig₅₄: “iDsa₂ 'lín'₅₄ juí'₅! 'An₁, ñi'₅₄ bá₄ jaun₂ ně₃ a₂'on₂₃
ja₁tsá₃ 'e₂ ca₂jan₃, ton'₂ cag'₅₄ ja₁tsá₃ 'e₂ ca₂séi₃. ²⁷ 'Uig₅₄ jaun₂, jua'₅₄
banco bá₄ co₂nei'₅₄ ca₂i₁tio'₂ cu₄ quió₃, ia₁jaun₂ jme₁guéi'₄ cu₄ quió₃
jě₁ma₂guáng'₃ lia'₂ jma₃quian'₅₄ a₂tě₁dsi₅₄. ²⁸ Jñiá'₃ 'nia'₂ a₂caun₂ mei₅
chan'₂ i₂ně₅ jaun₂ ně₃, o₂cuë'₅₄ i₂chan'₂ guia₃ mei₅. ²⁹ Ia₁ jui₁lia'₂
i₂ma₂le₁'io₅ 'lióng₂, tět₂le₃ 'lióng₂ gué'₄ ñei₂ bá₄, ia₁jaun₂ le₃cha₂ quió'₅
lia'₂ qui₂rě₂tsón₂; la₁ jui₁lia'₂ i₂tsá₃ 'e₂ le₁'io₅, le₂jio₅ a₂ca₂juig₄
a₂ma₂le₁'io₂₃, co₂dsia₅ jñia'₃ bá₄. ³⁰ Jaun₂ dsa₂ i₂tsá₃ ta₁ tén₄ la₂, dsein₅₄
ca₁'né₄ tioin'₂ 'nia'₂ jě₄ qui₁né'₃, ja₁qui'₂-o₃ quíg'₃ jan₅₄ ně₃.”

Jě₁ma₂tě₂ rě₁tě₃dsi₅₄ 'éi'₃ ja₁con₂ dsa₂ mi₂güig₃.

³¹ 'Jě₁ma₂tě₂ rě₁guan'₂ Jaun₅ dsa₂ mi₂güig₃ a₂lín₅ rag₅₄ jlán'₁ lín₃,
a₂qui₂le₁lio₃ ángeles quiáin₅, jaun₂ gué'₄ guá₃ ne₄ta₁ quió'₅ a₂'uain'₂ lín₃,
³² jaun₂ ñi'₂ ne₅₄ ca₂le₃jín₃ dsa₂ chan₂ juig₂ ca₂le₂con₂ mi₂güig₃. Jaun₂
gué'₄ ně₃ jmo₃ jma₃quén₅ con'₂ ca₂tín₂ le₂jan₂ le₂jan₂ dsa₂ quian'₅₄ riin'₅₄,
jui₁lia'₂ jmo₅ dsa₂ i₂jmo₅ 'í₁ já'₂ cha'₂, jmo₂₃ jma₃quén₅ já'₂ cha'₂ quian'₅₄
chein₄ lau₂. ³³ Tět₂le₃ gu₂ ne₁ quió'₅, chein'₃ já'₂ cha'₂; chein₄ lau₂ gué'₂
tět₂le₃ gu₂ jen₅. ³⁴ Jaun₂ ně₃, juá'₂ Rag₅₄ tsí'₅ i₂tión₂ tět₂le₃ gu₂ ne₁: “I₂no'₄
'nia'₂ i₂ma₂rě₂gon'₅₄ quián₅ ñe'₃; gue₄ 'nia'₂ a₂ca₂tíng'₂ ja₁gon₂ Diú₄,
ja₁ma₂lé₅ co₂jñia₅₄ quián'₂ 'nia'₂ ca₂le₃ ca₂nio₃ mi₂güig₃. ³⁵ Ia₁ ca₂ñi₃
jniá₂ 'ong₅₄, 'nia'₂ bá₄ i₂ca₂cuë'₅₄ a₂ca₂guë'₃; ca₂ñi₃ a₂rě₂quein₂ dsi₃
i₁gui'₄ jmig₂, 'nia'₂ bá₄ i₂ca₂cuë'₅₄ jmig₂ ca₂gui'₃; ca₂ñi₃ jniá₂ 'no₂₃
ja₁jan₁₂, 'nia'₂ bá₄ i₂ca₂cuë'₅₄ dsi₂néi₂ quiáng'₂ ca₂jan₅₄. ³⁶ Ca₂ñi₃ jniá₂
'in₂ tsín'₅, 'nia'₂ bá₄ i₂ca₂cuë'₅₄ tsín'₅ ca₂quí'₃; ca₂tsán₂ dsong₅₄, 'nia'₂ bá₄
i₂ca₂jmo'₅₄ 'í₁; ca₂i₁'ú₄ né'₃ 'má₃, ca₂i₁jag'₄ bá₄ 'nia'₂.” ³⁷ Jaun₂ ně₃, ñag₃
dsa₂ dsen₃ 'éi₂: “Te₁gui'₅₄, ílíg'₂ bá₄ jaun₂ ca₂né₄ jnia'₅₄ 'ne₂ a₂ñi'₂
i₁cuang'₃ jaun₂ ca₂cuë'₁ jnia'₅₄ a₂ca₂qué'₂? íO₃ líg'₂ jaun₂ ca₂né₄ jnia'₅₄
'ne₂ a₂ñi'₂ rě₂quein₂ 'au'₂, jaun₂ ca₂cuë'₁ jnia'₅₄ jmig₂ ca₂'én'₂? ³⁸ íO₃ líg'₂
jaun₂ ca₂né₄ jnia'₅₄ 'ne₂ a₂ñi'₂ 'náu'₂ ja₁jan'₄, jaun₂ jnia'₅₄ bá₄ ca₂cuë'₁
dsi₂néi₂ ca₂jñia'₅₄, o₃ ca₂ñi'₅₄ 'in₂ tsín'₂, jaun₂ jnia'₅₄ bá₄ ca₂cuë'₁? ³⁹ íO₃
líg'₂ jaun₂ ca₂né₄ jnia'₅₄ 'ne₂ a₂rong'₂ dsong'₅₄ o₃ lia'₂ con'₂ ca₂'ú'₃ né'₃
'má₃, jaun₂ ca₂i₁jag₅₄ jnia'₅₄?” ⁴⁰ Jaun₂ ně₃, ñag₃ Rag₅₄: “A₂dsi₂jó'₃ juá'₅
jniá₂, ca₂le₃jě₃ a₂dse₃ a₂'ua₁ 'au'₂ 'nia'₂ ca₂jmo'₅₄ ja₁con₂ le₂jan₂ le₂jan₂
ríg'₃ la₂ i₂jín₂ dsa₂ mi₂güig₃ 'uin₃, o₄quió₃ jniá₂ bá₄ a₂ca₂jmo'₅₄ 'nia'₂.”
⁴¹ 'Jaun₂ juá'₂ táng₃ Rag₅₄ tsí'₃ i₂tión₂ tět₂le₃ gu₂ jen₅: “Jñia'₃ 'nia'₂
ja₁con₂ jniá₂, 'nia'₂ i₂tiong'₅₄ 'éi'₃ o₁nóg'₅ dsi₂si₂ ja₁tsá₃ ton₅ jmig₄ éi₃,
ja₁lé₄ co₂jñia₅₄ quió'₅ i₂sě₃dsen₃ quian'₅₄ ángeles quiáin₅. ⁴² Ia₁ ca₂ñi₃
jniá₂ i₁cón₅, 'nia'₂ ně₃ tsá₃ 'e₂ ca₂cuë'₅₄ a₂guë'₅₄; ca₂ñi₃ rě₂quein₂ dsi₃
i₁gui'₄ jmig₂, tsá₃ 'e₂ jmig₂ ca₂cuë'₅₄ 'nia'₂. ⁴³ Ca₂ñi₃ jniá₂ 'no₂₃ ja₁jan₁₂,
tsá₃ ja₁ca₂cuë'₅₄ 'nia'₂ jan₅₄. Ca₂ñi₃ 'in₂ tsín'₅, tsá₃ 'e₂ tsín'₅ ca₂cuë'₅₄
'nia'₂. Ca₂tsán₂ dsong₅₄, jme₁ca₂'ú₃ né'₃ 'má₃ ně₃, tsá₃ ca₂i₁jag'₄ 'nia'₂.”
⁴⁴ Jaun₂ ně₃, ñag₃ dsa₂ 'éi₂: “Te₁gui'₅₄, ílíg'₂ bá₄ jaun₂ ca₂né₄ jnia'₅₄ 'ne₂

a₂ŋi'₂ i₁cuang'₃, o₃ rē₂quein₂ 'au'₂ o₃ ca₂ŋi'₅₄ 'náu'₂ ja₁jan'₄, o₃ ca₂ŋi'₅₄ tsá₃ tsín'₂ cha₂ qui'₅₄, o₃ jme₁ca₂rē₃dsong'₅₄, o₃ lia'₂ con'₂ ca₂'ú'₃ né'₃ 'má'₃, tsá₃ ca₂jme₁'o₁ jnia'₅₄?'⁴⁵ Jaun₂ ŋag₃ Rag₅₄: "A₂dsi₂jó'₃ juá'₅ jniá'₂, ca₂le₃jé₃ a₂dse₃ a₂tsá₃ ca₂jmo'₅₄ 'nia'₂ ja₁con₂ le₂jan₂ le₂jan₂ ríng'₃ la₂ i₂jín₂ dsa₂ mi₂güí₃g₃ 'uin₃, o₄quió₃ jniá'₂ bá₄ tsá₃ 'e₂ ca₂jmo'₅₄ 'nia'₂."⁴⁶ Jaun₂ dsa₂ 'éi₂ dsi₃léin₂ ja₁dsi₃ŋag₅₄ uig₅ co₂tan₅₄, la₁ dsa₂ dsen₃ né₃, dsi₃lein₅ ja₁le₃chain₂ co₂tan₅₄.

Ca₂quin'₃ dsa₂ jág₁ a₂tsáin'₂ Jesús

(Marcos 14:1-2; Lucas 22:1-2; Juan 11:45-53)

26 ¹ Jme₁ca₂dsan₃ juá'₂ Jesús ca₂le₃jé₃ jág₁ ně₅, jaun₂ ca₂tsí'₃ chi'₂ dsi₂guia₃-tín₂:

² —Ma₂ŋi'₅₄ 'nia'₂ jaun₂, a₂tín₃ jmi₃g₄ ně₃ te₅₄ Jmi₃g₄ Tē₂'in₅₄, ja₁jáng'₂ dsa₂ jín'₂ Jaun₅ dsa₂ mi₂güí₃g₃ a₂tion₃ ne₄ cróg₄.

³ Jaun₂ ně₃, juig₅₄ jme₂dsa₂, quian'₅₄ tē₅juá'₅, dsa₂ can'₅₄ quián₅ dsa₂ judíos ně₃, ca₂ŋi'₂ i₁dsi₅ ne₄ta₁ quió'₅ i₂lín₅ jme₂dsa₂ dsen₅₄, i₂chen₂ Caifás. ⁴ Ja₁jaun₂ ca₂quín₃ jág₁ quió'₅ a₂jmo₃ tē₂le₃ quian'₅₄ caun₂ mai₅₄ ia₁jaun₂ cuín₃ jmi₃g₄ tsáun'₂, jaun₂ ŋang'₃. ⁵ Jaun₂ tioen'₅₄ ca₂dsia₃ jág₁ ca₂juá'₂:

—La₁ tsá₃ 'nió'₅ jmó₁ jniog₄ tē₃ niog₅ jmi₃g₄, jme₁né₄, ia₁ con'₂ tsá₃ ŋó₅ ně₁jua'₂ ca₂tó'₂ dsa₂ juig₂ mi'₅₄.

Jan₂ 'io₅₄ ca₂tsíin₂ Jesús no'₅₄ mi₂juig₂

(Marcos 14:3-9; Juan 12:1-8)

⁶ Lia'₂ con'₂ 'en₅₄ gué₄ Jesús juig₂ Betania ja₁quió'₄ i₂té'₂ dsa₂ Si₂mu₅₄ 'mé'₅ 'iog₅, ⁷ jaun₂ ca₂dsióg₃ jan₂ 'io₅₄ quian₅ caun₂ tsí'₅ no'₅₄ mi₂juig₂ a₂'mu'₅₄. Jme₁ma₂guá₅ Jesús ne₄ mesa gué'₅, jaun₂ ca₂ág₂ 'io₅₄ 'éi₂ no'₅₄ mi₂juig₂ mi₂dsi₄ Jesús. ⁸ Jme₁ca₂jág₃ chi'₂ dsi₂guia₃-tín₂ a₂jaun₂, tsá₃ dse₃ ca₂tín₂, jaun₂ ca₂tsí'₃ riin'₅₄ tioen'₅₄:

—Tsá₃ ne₄ 'e₂ lē₃ ně₂'éin₂ a₂nē₅. ⁹ Jua'₅₄ co₂ŋei'₅₄ bá₄ ně₂'nag₃ ia₁jaun₂ jme₁jme₂'oin₅₄ dsa₂ te₂ŋé₂.

¹⁰ Jme₁ca₂nág₂ Jesús jág₁ a₂dsia₂₃ tioen'₅₄, jaun₂ ca₂juá'₂:

—'E₂ lē₃ cué'₂ 'nia'₂ o₂me'₅₄ dsi₅ 'io₅₄ la₂? A₂nē₂jmóg'₂ la₂ caun₂ a₂dse₃ bá₄. ¹¹ Ca₂le₃jé₃ jmi₃g₄ bá₄ i₂nio₄ dsa₂ te₂ŋé₂ jin'₄ 'nia'₂, la₁ jniá'₂ ně₃ tsá₃ ma₃uē₂ 'en₅₄ jniá'₂ quian'₅₄ 'nia'₂. ¹² Jui₁lia'₂ no'₅₄ mi₂juig₂ a₂nē₂tsáng₂ ni₁ŋi₃, jua'₂ a₂ma₂nē₂jmóg'₂ co₂ŋia₅₄ jē₁ma₂tē₂ rē₁'ong₃ bá₄. ¹³ A₂dsi₂jó'₃ juig₂ jniá'₂ 'nia'₂, ca₂le₂con₂ mi₂güí₃g₃ ja₁'é₂ dsa₂ jág₁ dse₃ quió₃, ján₃ bá₄ le₂jaun₂ dsio₂g'₂ dsí₅ dsa₂ 'iin₃ 'io₅₄ ně₅.

Jmo₅₄ Judas caun₂ jág₁ a₂'nií₂₃ Jesús

(Marcos 14:10-11; Lucas 22:3-6)

¹⁴ Jaun₂ ně₃, jan₂ i₂lín₅ dsa₂ guia₃-tín₂, i₂chen₂ Judas Iscariote, ŋei₅₄ i₁dsia₂ jág₁ quian'₅₄ juig₅₄ jme₂dsa₂, ¹⁵ jaun₂ ca₂i₁jua'₄:

—¿Je₂liá'₂ cué'₁ 'nia'₂ në₁jua'₂ jin'₄ jniá'₂ Jesús o₄gog'₂?
 Jaun₂ në₃, ca₂quí₃ juig₅₄ jme₂dsa₂ guióg₂-guiá'₂ 'éi'₃ cu₄tio₂.¹⁶ Jaun₂
 në₃ tē₃ne₄ jui₅ ja₁ŋó₄ jaun₂, ca₂'náu'₃ Judas dsí₅ 'a₂ lia'₂ cuin₃ jmig₄ jín'₂
 Jesús.

Má₃ jē₁ca₂tó'₂ quió'₅ Te₁gui'₅₄

(Marcos 14:12-25; Lucas 22:7-23; Juan 13:21-30; 1 Corintios 11:23-26)

¹⁷ Jmig₄ le₂'uig₅₄ a₂niog₅ Jmig₄ Tē₂'in₅₄ a₂gué'₅ dsa₂ i₁ŋí'₄ a₂tsá₃
 quian'₅₄ levadura, chi'₂ dsi₂guia₃-tín₂ në₃ ca₂jme₃quiáin₃ ja₁con₂ Jesús
 ca₂ŋag₃:

—¿A₂já'₄ 'niog'₂ dsi₁jmo₁ jnia'₅₄ co₂jnia₅₄ má₃ Jmig₄ Tē₂'in₅₄ quiáng'₂?

¹⁸ Jaun₂ ca₂juá'₂ Jesús:

—O₂nó'₅ 'nia'₂ jē₄ juig₂, ja₁quió'₄ jan₂ dsa₂, jaun₂ juig'₅₄ 'nia'₂: “Le₂la₂
 juá'₂ tē₅: Ma₂ja₂quián₃ hora quió₃, jaun₂ ja₁quiáng'₂ i₁gué'₃ Jmig₄
 Tē₂'in₅₄ co₂lē₅ quian'₅₄ chi'₂ dsi₂guia₃-tín₂ quiáng₃.”

¹⁹ Jaun₂ në₃ i₃lén₂ bá₄ chi'₂ dsi₂guia₃-tín₂, jaun₂ ca₂jmo₃ con'₂ lé₅ jág₁
 ca₂juá'₂ Jesús. Jaun₂ ca₂tóin'₂ ca₂jmo₃ co₂jnia₅₄ a₂gué'₃ Jmig₄ Tē₂'in₅₄
 ja₁jaun₂.

²⁰ Jme₁ca₂nei₂ jaun₂, jme₁ma₂guá₅ Jesús ne₄ mesa co₂lē₅ quian'₅₄
 ta₁guia₃-tín₂ chi'₂ dsi₂guia₃-tín₂ quiáin₅.²¹ Tē₃jē₄ tiáin'₄ gué'₅ jaun₂,
 ca₂juá'₂ Jesús:

—A₂dsi₂jó'₃ juá'₅ jniá₂, jan'₂ 'nia'₂ i₂'en₅₄ jē₄ la₂ bá₄ i₂jáng'₂ jniá₂.

²² Jaun₂ në₃ ca₂tá'₂ 'lia'₂ dsí₅ 'ŋio₅ lín₃ bá₄ tiáin'₅, jaun₂ ca₂jme₃lióg₃
 ca₂ŋí'₃ Jesús le₂jain₂ le₂jain₂ ca₂juá'₂:

—Te₁gui'₅₄, ¿On₁jua'₅₄ jniá₂ 'ág'₅?

²³ Jaun₂ ca₂ŋag₃ Jesús:

—I₂tiá₂ gu₂ co₂lē₅ 'ŋió'₃ uing₅ quian'₅₄ jniá₂, i₂'éi₂ bá₄ i₂jáng'₂.

²⁴ Dsón'₂ bá₄ dsau₅ Jaun₅ dsa₂ mi₂güí₃ 'ein₅₄ jui₅ lia'₂ con'₂ lé₅ juá'₂ ne₄
 Si₂; la₁ i'e₂ gué₄ juí₂ dsa₂ i₂jáng'₂! Dse₃ quió'₅ jua'₅₄ co₂nei'₅₄ bá₄ tsá₃
 ca₂rē₃cháin₃.

²⁵ Jaun₂ në₃ Judas, dsa₂ i₂ma₂lē₂ dsí₅ jáng'₂, ca₂juá'₂:

—Tē₅, ¿On₁ jniá₂ bá₄ 'ág'₅ 'ne₂?

Jaun₂ ca₂ŋag₃ Jesús:

—'Ŋiag'₂ bá₄ ma₂nē₂jua'₅₄.

²⁶ Tē₁lia'₂ tiáin'₅ gué'₅, ca₂jŋa'₃ Jesús i₁ŋí'₄, ca₂cué'₃ ti₁'mag'₄ Diú₄,
 jaun₂ gué₄ ca₂dsioin₃, ca₂cué'₃ chi'₂ dsi₂guia₃-tín₂ quiáin₅, jaun₂ ca₂juá'₂:

—Qué'₂ 'nia'₂, ia₁ ŋi₃ bá₄ jniá₂ i₁ŋí'₄ la₂.

²⁷ Jaun₂ ca₂can₃ táng₃ copa 'a₄ vino, ján₃ bá₄ le₂jaun₂ ca₂cué'₃
 ti₁'mag'₄ Diú₄, jaun₂ gué₄ ca₂cué'₃ chi'₂ dsi₂guia₃-tín₂, jaun₂ ca₂juá'₂:

—'Ēn'₂ 'nia'₂ ca₂le₃jíng'₃ a₂la₂,²⁸ ia₁ jmi₃ bá₄ jniá₂ la₂, a₂lì'₅₄ jág₁ 'mí₂
 a₂tē₃ron₅₄,^e a₂niog₅ dsi₃'o₅₄ o₄quió'₄ juin₅ dsa₂, ia₁jaun₂ 'én₂ dsáu₁.

^e28 'Nio'₂ ja₁ton₅ Éxodo 24:8; Hebreos 10:29; 13:20.

²⁹ Dsón'₂ juá'₅ jniá'₂, tsá'₃ ma₃líg'₂ jmi₄g₄ jua'₅₄ a₂gui'₅₄ gué'₄ táng₃ vino ca₂lia'₂ ca₂té'₂ jmi₄g₄ i₁gui'₄ táng₃ caun₂ vino 'mí'₂ co₂lë'₅ quian'₅₄ 'nia'₂ ja₁gon₂ Ne'₃.

Ca₂juá'₂ Jesús a₂tsá'₃ tion₃ Pe₄ a₂cuig₂₃

(Marcos 14:26-31; Lucas 22:31-34; Juan 13:36-38)

³⁰ Jme₁ca₂lë'₃ 'ë'₂₃ jme₂juiin'₂ Diú'₄, jaun₂ gué'₄ i₃lëin₂ jui₅ Má'₂ Olivos.
³¹ Jaun₂ ca₂juá'₂ Jesús ca₂tsí'₃ chi'₂ dsi₂guia₃-tín₂:
 —Ca₂le₃jín'₃ bá'₄ 'nia'₂ tiá'₃ jén'₂ 'au'₂ o₄quió'₃ jniá'₂ a₂'uë'₂ nē'₃, 'ág'₁ 'nia'₂ caun₂-tín₃ 'au'₂; ia₁ rē'₂ton₅ ne₄ Si₂, juá'₂: “Jñí'₄ jniá'₂ dsa₂ i₂jñia₅ já'₂ cha'₂, jaun₂ já'₂ cha'₂ nē'₃ dsi₃lëin₂ tsi₁rē'₂jain₅₄.”^f ³² La₁ cang₂ jë'₁ma₂ca₂jeng'₅₄ táng₃, nei₅₄ jniá'₂ jñiág₅ jui₅ Galilea lia'₂ con'₂ gué'₄ 'nia'₂.

³³ Jaun₂ nē'₃ ca₂ñag₃ Pe₄:

—O₁jñia'₅₄ la₂ ca₂'ág₂ caun₂-tín₃ dsi₅ ca₂le₃jín₃ ríng'₃, la₁ jniá'₂, o₁líg'₂ jmi₄g₄ tsá'₃ 'ag₅₄ caun₂-tín₃ dsi₃.

³⁴ Jaun₂ ca₂juá'₂ Jesús:

—A₂dsi₂jó'₃ juá'₅ jniá'₂, a₂'uë'₂ nē'₃, né'₃ a₂'o₃ tē'₁guí'₄ dsó'₂, hora jaun₂ dé'₄ dsón'₂ chéng'₅ tsá'₃ tóng'₄ ta₁'ni₅ ráun₂ a₂cuig'₂ jniá'₂.

³⁵ Jaun₂ ca₂ñag₃ táng₃ Pe₄:

—O₁jñia'₅₄ la₂ ca₂dsau₃ jniog₄ co₂lë'₅, o₁líg'₂ jmi₄g₄ jua'₅₄ a₂tsá'₃ 'ín₄ jniá'₂ 'ne₂.

Le₂jaun₂ bá'₄ ca₂juá'₂ ca₂le₃jín₃ riin'₅₄ ján₃.

Ca₂chi₃lén'₂ Jesús Diú'₄ caun₂ ja₁chei₂ Getsemaní

(Marcos 14:32-42; Lucas 22:39-46)

³⁶ Jaun₂ ca₂dsióg₃ Jesús jme₁ca₂dsióg₃ quiaín'₅₄ chi'₂ dsi₂guia₃-tín₂ quiaín₅ caun₂ ja₁chei₂ Getsemaní, jaun₂ ca₂juá'₂:

—Ja₁lá₃ tián'₂ 'nia'₂ tē'₁lia'₂ nei₅₄ jó'₄ i₁chi₁leng'₄ Diú'₄.

³⁷ Jaun₂ ca₂jñiai₃ Pe₄, quian'₅₄ le₃on₃ ja₁ñi'₅₄ Zebedeo, jaun₂ Jesús nē'₃ ca₂tá'₂ quian₅ o₂i₁ dsi₅ 'ñio₅ lín₃. ³⁸ Jaun₂ ca₂juá'₂ ca₂tsí'₃ i₂ún₂ i₂quiaín'₅₄:

—'Ñio₅ lín₃ quian₅₄ o₂i₁ dsi₅, ca₂lia'₂ jmá'₃ le₃jóng₂ tē'₂nē'₃. Ja₁lá₃ tián'₂ 'nia'₂, jme₁jñio₂ 'nia'₂ ne'₅₄, jme₁quiong'₅₄ jniá'₂.

³⁹ Ca₂juig₄ bá'₄ ca₂ñó'₃ gué'₄ ne₄ jui₅. Ja₁jaun₂ ca₂lia'₂ ca₂i₃'ín₃ chi₁'ín₅ ne₅₄ ca₂tē'₂ 'uë'₃, ca₂mí₃ ca₂tsí'₃ Diú'₄, ca₂juá'₂:

—Tia₅₄ quiáng₃, jua'₅₄ mei'₂ bá'₄ lé'₂ le₃lé'₂, lio₄ jniá'₂ jmi₁uig₅ la₂. La₁ tsá'₃ jui₁le₅₄ con'₂ 'nio₃ jniá'₂, jui₁le₅₄ bá'₄ a₂'ñio₂ 'au'₂ 'ne₂.

⁴⁰ Jaun₂ nē'₃, ca₂nau₂ Jesús, jaun₂ ca₂ñái'₃ ja₁tián'₄ i₂ún₂ i₂quiaín'₅₄, la₁ ma₂le₁güín₃ bá'₄ gué'₂ 'éi₂ tiáin'₅; jaun₂ ca₂té'₃ Pe₄, ca₂juá'₂:

^f31 Zacarías 13:7.

—¿Tsa₁ ma₃tian'₃ gué₄ 'nia'₂ jua'₅₄ caun₂ hora bá₄ jme₁jnio'₂ gué₄ 'nia'₂ ne'₅₄ quian'₅₄ jniá'₂? ⁴¹ Jme₁jnio₂ 'nia'₂ ne'₅₄, chi₁len'₄ 'nia'₂ Diú₄, ia₁jaun₂ tsá₃ tsi₃sén'₂ 'nia'₂. Dsón'₂ bá₄ jaun₂ 'nio₂ bá₄ dsí₅ jme₂dsí₂ quián'₂ 'nia'₂, la₁ ni₁ni'₁ guion'₅₄ bá₄ 'nia'₂ 'uan₅₄.

⁴² A₂ca₂té₂ tin₃ ráun₂ nō₃ táng₃ i₁chi'₄ Diú₄ le₂la₂:

—Tia₅₄ quiáng₃, chi₂jua'₂ tsá₃ lé₂ jua'₅₄ a₂tsá₃ jme₁ngag₅₄ jniá₂ uig₅ la₂, jui₁le₅₄ bá₄ a₂'nio₂ 'au'₂ 'ne₂.

⁴³ Jaun₂ ca₂guáin'₃ táng₃ ja₁tián'₄ chi'₂ dsi₂guia₃-tín₂, la₁ le₁güín₃ bá₄ táng₃ 'éi₂ tián'₅, ia₁ a₂ni₄ lē₃ ma₂i₁güín₃. ⁴⁴ Jaun₂ nō₃ bá₄ táng₃ jē₁ca₂té₂ 'ni₅ ráun₂, a₂chi₂i₁lein'₄ Diú₄; ján₃ bá₄ le₂jaun₂ ca₂juá'₂ tsí'₅ Diú₄. ⁴⁵ Jaun₂ guáin'₃ nē₃ ja₁tián'₄ chi'₂ dsi₂guia₃-tín₂, jaun₂ ca₂juá'₂:

—¿E₂? ¿Lia'₂ ma₂tián'₅ jaun₂ bá₄ 'nia'₂ le₁güíng'₃? Ní₂ 'nia'₂, ca₂té₂ bá₄ hora nē₃. Ma₂rē₂jín'₅₄ bá₄ Jaun₅ dsa₂ mi₂güíng₃ o₄gú₃ dsa₂ i₂le₁cán'₄ dso₄. ⁴⁶ Nau₂ 'nia'₂ nē₃, ma₃; ia₁ nē₅ ma₂já₅ i₂jáng'₂.

Ma₂le₁te₂ dsa₂ Jesús

(Marcos 14:43-50; Lucas 22:47-53; Juan 18:2-11)

⁴⁷ Tē₃jē₄ dsia₂₃ jág₁ jaun₂, jme₁ca₂dsióg₃ Judas, i₂lín₅ jan₂ dsa₂ i₂guia₃-tín₂. Juín₅ lín₃ dsa₂ i₂ja₂lén₂ quiong'₅₄ qui₂le₁quian₅ ni₁tág₂, i₂le₁quian₅ ni₁'ma₂ nē₃, i₂chen₄ quián₅ juig₅₄ jme₂dsa₂ quian'₅₄ dsi₂gui'₅₄ can'₅₄ quián₅ dsa₂ juig₂. ⁴⁸ Jaun₂ Judas nē₃, ia₁ ma₂ca₂jmo₃ bá₄ jág₁ le₂jniá₅ 'e₂ léi₄ jmo₃ jē₁ma₂té₂ rē₁jáng'₂, jme₁ma₂juá'₂:

—I₂chen'₄ jniá₂ quió'₅, i₂'éi₂ bá₄ jma'₅₄ 'nia'₂.

⁴⁹ Jaun₂ dsi₂jui₅ jme₁dsióg₃ Judas, ca₂jme₃quiáin₃ con₂ Jesús, jaun₂ ca₂juá'₂:

—iSiang'₃, tē₅!

Jaun₂ ca₂chen'₃ rē₂jú'₅ Jesús.

⁵⁰ Jaun₂ ca₂jéin'₃ Jesús jág₁ quió'₅, ca₂juá'₂:

—A₂mei₅₄, ¿E₂ ta₁ ni'₂?

Jaun₂ gué₄ ca₂jme₃quián₃ ca₂le₃jín₃ dsa₂ ca₂jñai'₃ Jesús, jaun₂ ca₂tág₃.

⁵¹ Tē₃jē₄ jaun₂, jan₂ dsa₂ i₂jme₁quian'₅₄ Jesús ca₂dsi₂ ni₁tág₂, ca₂ti₃ caun₂ rē₂gua₄ dsa₂ i₂jme₂ti₃ quián₅ jme₂dsa₂ dsen₅₄. ⁵² Jaun₂ ca₂juá'₂ Jesús:

—Tiá₃ táng₃ ni₁tág₂ quiáng'₂ ja₁jme₁'i₄. Ia₁ ca₂le₃jín₃ i₂quín'₂ quian'₅₄ ni₁tág₂, ján₃ bá₄ quian'₅₄ ni₁tág₂ dsiáin₃. ⁵³ ¿E₂ líng'₂? ¿A₁tsá₃ lé₂ le₃jme₁mi₁₂ ne₄ Ne'₃, a₂chein₃ ja₁cong₂ guia₃-tín₂ mei₅ ángeles quiáin₅? ⁵⁴ La₁ jua'₅₄ mei'₂ gué₃ le₂jaun₂, ¿A₂ bá₄ lia'₂ le₃ti₃ jág₁ a₂tio'₅₄ ne₄ Si₂ ja₁juá'₂ a₂dsi₃ni₂ le₂la₂?

⁵⁵ Jaun₂ juá'₂ Jesús tsí'₅ dsa₂:

—¿E₂? ¿Ja₁nó'₅ 'nia'₂ le₁quian'₅₄ ni₁tág₂, ni₁'ma₂, ja₂chong'₂ jniá₂, nē₂jag₄ bá₄ líng₅ dsa₂ 'ang₂? Jua'₂ ca₂le₃jé₃ jmig₄ bá₄ 'eng₅₄ jme₁tíng₂ dsa₂ jín'₄ 'nia'₂ i₁dsi₅ guá'₅ templo, tsá₃ ma₂chong'₂ gué'₂ 'nia'₂ ja₁jaun₂.

⁵⁶ La₁ ca₂le₃jé₃ a₂lé₂ la₂ rē₂ti₃ jág₁ quió'₅ dsa₂ i₂jme₁'é₂ jág₁ quián₅ Diú₄ ma₂líg'₂.

Jaun₂ gué₄ qui₂ca₂cuíng₃ ca₂le₃jín₃ chi'₂ dsi₂guia₃-tín₂, ca₂téin₂ bá₄ Jesús.

Dsián'₃ Jesús ne₄ dsi₂tan₅₄ quián₅ guá'₅
(Marcos 14:53-65; Lucas 22:54-71; Juan 18:12-24)

⁵⁷ Jaun₂ dsa₂ i₂ca₂i₁chan'₅₄ Jesús ca₂i₁jo₅₄ ne₄ Caifás, i₂lín₅ jme₂dsa₂ dsen₅₄. Ja₁jaun₂ ma₂le₁ñi'₂ tē₃juá'₅ quian'₅₄ gué₄ dsa₂ can'₅₄. ⁵⁸ Pe₄ né₃ ca₂ñó₃ uíng₂ tē₂quín₃ 'ein₂₃ Jesús ca₂tē₂ i₁dsi₅ quió'₅ jme₂dsa₂ dsen₅₄. Ja₁jaun₂ ca₂'í₃ ca₂guá'₂ quian'₅₄ 'lióg₂, ia₁ 'nio₃ tē₅ ne₅₄ 'a₂ lia'₂ jñia'₅₄ dsióg₄ quian'₅₄ Jesús.

⁵⁹ Jaun₂ juig₅₄ jme₂dsa₂, quian'₅₄ ca₂le₃jín₃ dsi₂tan₅₄ quián₅ guá'₅ né₃, qui₂ca₂'náu'₃ jui₅ 'a₂ lia'₂ jme₃cáin'₂ Jesús dso₄ quian'₅₄ jág₁ tē₂jág₁ ia₁jaun₂ jñag'₃. ⁶⁰ La₁ tsá₃ dso'₂ guē'₂ 'a₂ lia'₂ jme₃cáu'₂, o₁jñia'₅₄ juin₅ i₂qui₂ca₂nau₂ jmo₂₃ jág₁ tē₂jág₁. Dsi₃lén₂ jme₁dsi₃lén₂ on₃ dsa₂, ⁶¹ jaun₂ ca₂juá'₂:

—I₂nē₅ ma₂ca₂juá'₂, “Qui'₅₄ jniá₂ jmig₄ lé₂ le₃léng₄ guá'₅ templo quió'₅ Diú₄, quian'₅₄ 'ni₅ jmig₄ bá₄ lé₂ le₃jmóg'₄ táng₃.”

⁶² Jaun₂ ca₂nau₂ jme₂dsa₂ dsen₅₄, jaun₂ ca₂tsí'₃ Jesús:

—¿Tsa₁ 'e₂ ñag'₅₄ 'i₁caun₂? ¿I₂'e₂ bá₄ jág₁ nē₅ a₂jáng'₅ dsa₂ a₂rē₂cáng'₄?

⁶³ La₁ tei₄ bá₄ ca₂nau₂ Jesús. Jaun₂ ca₂ñag₃ táng₃ jme₂dsa₂ dsen₅₄, ca₂juá'₂:

—Dsi₅₄ jniá₂ 'éi'₃ a₂jua'₅₄ 'íng'₅ Diú₄ jén'₃ ne₄ jnia'₅₄, chi₂jua'₂ tē₃dsón'₂ líng'₅ Ja₁ñi'₅₄ Diú₄, I₂rē₂'ín₁ quiáin₅.

⁶⁴ Jaun₂ ca₂ñag₃ Jesús:

—Ján₅, jniá₂ bá₄ 'éi'₂, jui₁lia'₂ i₁juá'₂ 'ne₂ nē₅. La₁ juá'₅ jniá₂ juíg₂ 'nia'₂ ján₃, ca₂le₃jíng'₃, a₂já₅ jmig₄ a₂jag'₅₄ 'nia'₂ jíng'₅₄ Jaun₅ dsa₂ mi₂güíng₃ guá₃ tē₂le₃ gu₂ ne₁ Diú₄ i₂'uan'₂ gué₄ lín₃, a₂jñiói'₂ jē₄ jnei₅ guei'₅₄ dsi₂güíng₂ né₃.

⁶⁵ Jme₂dsa₂ dsen₅₄ né₃, jme₁ca₂nág₂ jág₁ jaun₂, ca₂chein₃ ni₁tsin'₅₄ 'ñiog₅,⁸ jaun₂ ca₂juá'₂:

—i'E₂ gué₄ 'ñio₅ 'líg'₅₄ juá'₂ i₂nē₅ 'iin₂₃ Diú₄ quian'₅₄ jág₁ nē₅ quió'₅! ¿I'E₂ gué₄ jmá'₃ jág₁ 'lióng₂ 'niog₂ jniog₄ jua'₅₄ a₂jáng'₅ gué₄ dsa₂ sián'₂ jág₁ dsau₅? Ma₂nē₂nei'₂ bá₄ 'nia'₂ guiong'₅₄ jág₁ 'líg'₅₄ a₂ma₂nē₂juá'₂ i₂nē₅ 'iin₂₃ Diú₄. ⁶⁶ ¿A₂ lia'₂ lín'₂ 'nia'₂?

Jaun₂ ca₂juá'₂ ca₂le₃jín₃ tioen'₅₄:

—I₂ca₂tín₂ jón₂ bá₄ nē₅.

⁸65 Jme₁chí'₄ tag₄ quió'₅ dsa₂ judíos jmig₄ jaun₂ a₂gág₅ dsa₂ ni₁tsin'₅₄ cuē₂₃ léi₄ jē₁ma₂'í₅ 'nei₂ dsí₅, o₃ jme₁'i₄ qui'₂ dsí₅.

⁶⁷ Jaun₂ qui₂ca₂'ñéi₃ dsa₂ dsi₂ne₄ Jesús tioin'₅₄, tsá₃ caun₂
a₂qui₂ca₂jmóg'₂. I₂lín₅₄ guë'₂ qui₂ca₂quein₃ tioin'₅₄, ⁶⁸ jaun₂ ca₂juá'₂:
—'Ne₂ guë'₂ i₂juá'₂ líng'₅ I₂rë₂'ín₁ quián₅ Diú₄: iDsi₄ jág₁ jua'₅₄ 'ein₂
në₂quein₃ quiáng'₂!

Tsá₃ ca₂tion₃ Pe₄ a₂cuin₂₃ Jesús

(Marcos 14:66-72; Lucas 22:56-62; Juan 18:15-27)

⁶⁹ Të₃jë₄ jaun₂ jme₁guá₄ Pe₄ i₁dsi₅; jaun₂ ca₂dsióg₃ jan₂ 'io₅₄ i₂jme₂ti₃
ta₁ ja₁jaun₂, jaun₂ ca₂tsí'₃ Pe₄:

—¿Ján₃ guë'₂ jme₁quian'₄ 'ne₂ Jesús i₂chan₂ Galilea?

⁷⁰ La₁ jin₄ dsa₂ ja₁guá₄ jaun₂ tsá₃ ca₂tioin₃, jaun₂ ca₂juá'₂:

—Tsá₃ guion₅₄ 'e₂ a₂juá'₂ 'ne₂ në₅.

⁷¹ Ca₂nau₂ Pe₄ ñó₅ të₂le₃ o₄'né₄, jaun₂ ca₂jág₂ táng₃ jan₂ 'io₅₄ sián'₂. 'Éi₂
në₃ ca₂tsí'₃ dsa₂ i₂tion'₅₄:

—I₂jme₁quian'₅₄ Jesús Nazareno bá₄ në₅.

⁷² La₁ jme₁ca₂nág₂ Pe₄, tsá₃ ca₂tioin₃ táng₃ jé₃ 'iin₂₃ Diú₄, ca₂juá'₂:

—iTsá₃ dsa₂ 'éi₂ cuín₅ jniá'₂!

⁷³ Jme₁co₂lág₂ jaun₂, ca₂jme₃quián₃ dsa₂ i₂tion'₅₄ con₂ Pe₄, jaun₂
ca₂juá'₂:

—Të₃dsón'₂ bá₄ líng'₅ jan₂ rin'₅₄ 'éi₂, ia₁ në₅ rë₂jniág'₂ 'a₂ lia'₂ né'₂
jag'₅₄.

⁷⁴ Jaun₂ në₃, Pe₄ ca₂'iin₃ Diú₄ ca₂mi₃ a₂dsi₃ñíi₂ 'e₂ dsi₃ñíi₂, ca₂juá'₂:

—iTsá₃ dsa₂ 'éi₂ cuín₅ jniá'₂!

Të₃jë₄ jaun₂ ca₂'o₃ jan₂ të₁guí₄ dsó₂. ⁷⁵ Jaun₂ gué₄ në₃ ca₂dsáu'₃ dsí₅
Pe₄ a₂ca₂juá'₂ Jesús le₂jñiá₅: “Né'₃ a₂'o₃ të₁guí₄ dsó₂; hora jaun₂ dé₄
dsón'₂ chéng'₅ tsá₃ tóng'₄ ta₁'ni₅ ráun₂ a₂cuig'₂ jniá'₂.” Jaun₂ gué₄ o₂'ín₃
Pe₄ të₂le₃ ca₁'né₄, ca₂tá'₂ qui'₂ dsí₅, ca₂'o₃ 'ñio₅ lín₃.

Ca₂jín'₂ dsa₂ Jesús o₄gú₃ Pilato

(Marcos 15:1; Lucas 23:1-2; Juan 18:28-32)

27 ¹ Jme₁jñia₃ jaun₂, ca₂le₃jín₃ juig₅₄ jme₂dsa₂ quian'₅₄ gui'₅₄
can'₅₄ quián₅ dsa₂ juig₂ ca₂jmo₃ caun₂ jág₁ a₂jñii'₃ Jesús.
² Qui₂ca₂'néi₂ tioin'₅₄, jaun₂ ca₂tág₃ ca₂i₁jang'₂ ne₄ Dsi₄má'₂ Poncio
Pilato.

Ca₂jon₃ Judas

(Hechos 1:18-19)

³ Jme₁ma₂të₅ ne₄ Judas i₂ca₂'nag₃, a₂ma₂në₂dsí₃ dsa₂ 'éi'₃ a₂jñii'₃
Jesús, jaun₂ ca₂tá'₂ qui'₂ dsí₅. Jaun₂ ca₂i₁con₂ táng₃ ta₁guiog₃-guiá'₂ 'éi'₃
cu₄tio₂g₂ jaun₂, ca₂jín'₃ juig₅₄ jme₂dsa₂ quian'₅₄ gui'₅₄ can'₅₄. ⁴ Jaun₂
ca₂juá'₂:

—Ma₂në₂'no₃ jniá'₂ dso₄, ia₁ në₂jing'₅₄ ne₄ 'mú₃ jan₂ i₂tsá₃ dso₄ rin₂.

La₁ ca₂jag₃ dsa₂ 'éi₂:

—Tsá₃ 'e₂ a₂jaun₂ dsan₂ dsi₅ jnia'₅₄. A₂ca₂tín'₂ 'ne₂ bá₄ jaun₂.
⁵ Con'₂ ca₂i₁guia'₂ jaun₂ bá₄ Judas cu₄ jaun₂ dsi₂néi₂ ja₁jñi₅ guá'₅
templo, jaun₂ ca₂o₃'íin₃ ca₂i₁tiá₄ ché₂ dsi₂lag₅₄ ca₂jñi'₃ 'ñiog₅. ⁶ Juig₅₄
jme₂dsa₂ né₃ ca₂i₁cag'₂ cu₄ jaun₂, jaun₂ ca₂juá'₂:
—Tsá₃ 'i₄ 'éi'₃ dsi₃to'₅₄ cu₄ la₂ 'ñi₃o'₃ gu₅ ja₁tio'₅₄ cu₄ quió'₅ guá'₅, ia₁
cu₄ a₂ca₂quín₂ jmi₂ bá₄ la₂.
⁷ Jaun₂ ca₂jmo₃ caun₂ jág₁ a₂lá₃ caun₂ 'uë₃ quian'₅₄ cu₄ jaun₂ quió'₅
jan₂ dsa₂ i₂jme₁jmo₅ ni₁dsig₁ gua'₅₄, ja₁jmo₃ 'uë₃ ja₁'óin₂ jmá'₃ lia'₂
dsi₂nau₂. ⁸ 'Uig₅₄ jaun₂ chei₂ ja₁jaun₂ ca₂të₂ jmi₄g₄ në₃, 'Uë₃ Jmi₂. ⁹ Le₂në₅
ca₂rë₃ti₃ jág₁ a₂ca₂juá'₂ Jeremías, dsa₂ i₂jme₁'é₂ jág₁ quián₅ Diú₄ ma₂líg'₂,
jme₁ca₂juá'₂: “Ca₂can₃ dsa₂ guió₂g₂-guiá₂ cu₄tio₂g₂, con'₂ 'ma'₅₄ a₂ca₂dsi₂
dsa₂ juig₂ Israel quió'₅ 'éi₂. ¹⁰ Quian'₅₄ cu₄ jaun₂ ca₂lá₃ caun₂ 'uë₃ quió'₅
dsa₂ i₂jmo₅ ni₁dsig₁, lia'₂ con'₂ lë₅ 'éi'₃ quió'₅ Te₁gui'₅₄.”^h

Chén'₅ Jesús ne₄ Pilato

(Marcos 15:2-5; Lucas 23:3-5; Juan 18:33-38)

¹¹ Të₁lia'₂ jaun₂, chén'₅ Jesús ne₄ dsi₄má'₂, jaun₂ 'éi₂ né₃ ca₂ñag₃:
—¿Dson'₂ líng'₅ Rag₅₄ quián₅ dsa₂ judíos?
Jaun₂ ca₂ñag₃ Jesús:
—Le₂në₅ bá₄, jui₁lia'₂ juá'₂ 'ne₂ në₅.
¹² Jaun₂ caun₂ qui₂ca₂'nag₃ bá₄ juig₅₄ jme₂dsa₂ quian'₅₄ gui'₅₄ can'₅₄
tioin'₅₄. La₁ tsá₃ ma₃'e₂ ca₂ñag₃ Jesús. ¹³ Jaun₂ ca₂juá'₂ Pilato:
—¿Tsa₁ nag'₂ ca₂le₃jé₃ 'e₂ i₁juá'₄ dsa₂ në₅ 'nii₂₃ 'ne₂?
¹⁴ La₁ tsá₃ ma₃'e₂ ca₂ñag₃ Jesús 'i₁caun₂; jaun₂ ca₂i₃gó'₃ dsí₅ Pilato.

Ca₂o₃'ág₃ 'éi'₃ a₂jón₂ Jesús

(Marcos 15:6-20; Lucas 23:13-25; Juan 18:38-19:16)

¹⁵ Jmi₄g₄ jaun₂ jme₁chí'₄ tag₄ quió'₅ dsi₄má'₂ a₂lióin₂ ca₂le₃jé₃ ñi₂, jan₂
dsa₂ i₂'en₅₄ né₃ 'má₃, jme₁të₅ Jmi₄g₄ Të₂'in₅₄, 'ein₂ ca₂'in₃ dsa₂ juig₂
i₂lión₂. ¹⁶ Jmi₄g₄ jaun₂ jme₁rë₂jñí₅ jan₂ dsa₂ i₂chen₂ Barrabás, ca₂le₂con₂
bá₄ 'ei₅ jág₁ quió'₅ a₂'liin'₅₄. ¹⁷ Të₃jë₄ le₁ñi'₂ dsa₂ jaun₂, ca₂ñag₃ Pilato
ca₂ñí'₃ dsa₂ juig₂:
—¿I₂'ein₂ 'niog'₂ 'nia'₂ lon₄ jniá₂ quián'₂ 'nia'₂? ¿Barrabás, o₃ Jesús
i₂té'₂ dsa₂ I₂rë₂'ín₁ quián₅ Diú₄ 'e₂?
¹⁸ Ia₁ ca₂rë₃lí'₄ bá₄ Pilato 'ñiog₅, a₂'iog₅₄ uig₅ dsí₅ bá₄ dsa₂ ca₂jíin'₂
Jesús ne₅₄.
¹⁹ Të₁lia'₂ guá₅ Pilato ne₄ta₁ quió'₅, ja₁qui₂dsi₂₃ 'éi'₃, të₃jë₄ jaun₂
ca₂chen₃ 'io₅₄ quiáin₅ jág₁ ne₅₄ a₂ca₂juá'₂: “Tsá₃ lë₁tián₅ 'ne₂ cuente
quió'₅ dsa₂ i₂tsá₃ 'e₂ rin₂ në₅. Ia₁ 'ñio₅ gau₂ qui₂chóg₂ i₃ñíg₂ ca₂néi₃
o₄quió'₄.”

^h10 Jeremías 32:6-9; Zacarías 11:12-13.

²⁰ La₁ juig₅₄ jme₂dsa₂ quian'₅₄ gui'₅₄ can'₅₄ né₃, ca₂toin'₂ jág₁ dsa₂ juig₂ ia₁jaun₂ mi₃ dsa₂ tsí'₃ Pilato a₂lión₂ Barrabás bá₄, jaun₂ jñii'₃ bá₄ Jesús.

²¹ Jaun₂ ca₂juá'₂ Pilato ca₂tsí'₃ dsa₂:

—¿I₂'ein₂ dsa₂ on₃ la₂ 'niog'₂ 'nia'₂ lon₄ jniá'₂?

Jaun₂ ca₂ñag₃ dsa₂ juig₂ tioin'₅₄:

—Barrabás bá₄.

²² Jaun₂ ca₂ñag₃ táng₃ Pilato ca₂ñí'₃ dsa₂ juig₂:

—¿'E₂ gué'₂ 'niog'₂ 'nia'₂ jmo₅₄ jniá'₂ quian'₅₄ Jesús i₂té'₂ dsa₂ I₂rë₂'ín₁ quián₅ Diú₄?

Jaun₂ ca₂ñag₃ co₂dsia₅ ca₂le₃jín₃ tioin'₅₄:

—iTióin₃ cróg₄!

²³ Jaun₂ ca₂ñag₃ táng₃ Pilato:

—¿'E₂ 'uig₅₄ né₃? ¿'E₂ gué'₂ dso₄ ma₂'náu₂?

La₁ të₂le₃ i₂jui'₂ gué'₄ co₂mi'₅₄ ca₂tóin'₂, ca₂juá'₂:

—iTióin₃ cróg₄!

²⁴ La₁ ca₂rë₃lí'₄ bá₄ Pilato tsá₃ 'e₂ ta₁ jmo₃ jág₁ quió'₅, ia₁ të₂le₃ 'ñio₅ lín₃ gué'₄ jui₁si co₂mi'₅₄ ca₂tóin'₂. Jaun₂ lë₃, ca₂chein₃ jan₂ dsa₂ i₁quian₅₄ jmig₂, jaun₂ ca₂rang₃ gu₂ të₃ne₄ dsa₂ juig₂, jaun₂ ca₂juá'₂:

—Tsá₃ 'e₂ rë₃cán'₄ jniá'₂ jmi₄ dsa₂ në₅; guion'₅₄ bá₄ 'nia'₂ rë₂cáng'₄ në₁'e₂ ca₂jmai'₅₄.

²⁵ Jaun₂ ca₂ñag₃ ca₂le₃jín₃ dsa₂ juig₂ tioin'₅₄:

—iJmi₄ 'mú₃ quió'₅ i₂në₅, jui₁dsi₂ñag₂ jnia'₅₄ 'e₂ dsi₃ñág₂, quian'₅₄ tsi₁jon₂ quián₂ jnia'₅₄ i₂në₃ gué'₄ të₁ja₃lén₂!

²⁶ Jaun₂ ca₂lión₂ bá₄ Pilato Barrabás i₂mi₅ dsa₂ lión₂; jaun₂ ca₂jmo₃ 'éi'₃ a₂bán₂ dsa₂ Jesús, jaun₂ gué'₄ ca₂jáng'₂ o₄gú₃ dsa₂ juig₂ jaun₂ tion₃ cróg₄.

²⁷ Jme₁co₂lág₂ jaun₂, 'lióg₂ quián₅ dsi₄má'₂ ca₂jñiai₃ Jesús jui₅ i₁dsi₅ ne₄ta₁ jaun₂. Jaun₂ ca₂ñi'₂ ca₂le₃jín₃ 'lióg₂ le₃lág'₃ quió'₅ Jesús. ²⁸ Jaun₂ gué'₄ ca₂dsi₂ tsin'₅₄ Jesús, ca₂quei'₃ caun₂ tsi₁'mi'₂ guéin₂ 'ui'₃, ²⁹ jaun₂ ca₂jmo₃ caun₂ corona quian'₅₄ chi₁uín₃ taun₅, ca₂tó'₂ mi₂dsi₄ Jesús. Ca₂chong'₂ ca₂'nau₅₄ gué'₂ ni₁'ma₂ ta₅ gu₂ ne₁. Jaun₂ gué'₄ ca₂chi₃jnë₃ ne₄ Jesús tioin'₅₄, a₂lë₁qui₂co₂jmóg'₂, ca₂juá'₂:

—iSian'₃ 'ne₂, Rag₅₄ quián₅ dsa₂ judíos!

³⁰ Ján₃ qui₂ca₂'ñéi₂ dsa₂, qui₂ca₂bá₂ dsa₂ mi₂dsi₅₄ quian'₅₄ ni₁'ma₂ a₂ca₂chong'₃ jaun₂. ³¹ Jme₁ca₂lë₃ a₂lë₁co₂jmóg'₂ jaun₂, ca₂dsei₂₃ táng₃ tsi₁'mi'₂ 'ui'₃ a₂jme₁ca₂quei'₃, jaun₂ ca₂quei'₃ táng₃ ni₁tsin'₅₄ a₂jme₁qui'₂. Jaun₂ gué'₄ ca₂jio₃ ca₂të₂ ja₁të₃toin₅₄ cróg₄.

ⁱ28 Guéin₂ 'ui'₃ jme₁jniá₂ tsin'₅₄ rag₅₄ jme₁quí₅ jmig₄ jaun₂.

Ca₂tion₃ dsa₂ cróg₄ Jesús

(Marcos 15:21-32; Lucas 23:26-43; Juan 19:17-27)

³² A₂ca₂'uiin₂ jaun₂, ca₂jein'₂ jan₂ dsa₂ i₂chan₂ Cirene, i₂chen₂ Si₂mu₅₄.
Jaun₂ ca₂chi₃quiáin₂ jmi₄g₄ 'éi₂ a₂cán₂ cróg₄.

³³ Jaun₂ ca₂dsi₃léin₂ jme₁dsi₃léin₂ caun₂ ja₁chei₂ Gólgota, co₂'nió'₄
ja₁té'₂ dsa₂ Dsi₂con'₂ Ni₁mu₅ Mi₂dsi₄ 'Lag₄. ³⁴ Ja₁jaun₂ ca₂jén'₃ dsa₂ ne₄
Jesús vino a₂rē₃cón'₅ quian'₅₄ dsí'₁ já'₂^j la₁ dsi₂jui₅ jme₁ca₂tí₂ Jesús 'o₅₄,
tsá₃ ma₃ca₂'in'₃.

³⁵ Jme₁ca₂lě₃ tion₂₃ cróg₄, 'lióg₂ ně₃ ca₂jmo₃ dsióg₁ tsin'₅₄ Jesús, ca₂co₃
o₁ne₄ 'ein₂ lí'₂.^k ³⁶ Ja₁jaun₂ ca₂tiáin'₂ jmo₂₃ 'í₁. ³⁷ Dsi₄ cróg₄ ca₂tióng₃ dsa₂
letra ja₁juá'₂ 'e₂ dso₄ a₂bóin'₂ Jesús, a₂juá'₂ le₂la₂: “I₂LA₂ BÁ₄ JESÚS,
I₂LÍN₅ RAG₅₄ QUIÁN₅ DSA₂ JUDÍOS”.

³⁸ Ján₃ bá₄ ca₂tioin₃ gué₄ on₃ dsa₂ 'ang₂ co₂lě₅ quiong'₅₄, jan₂ tē₂le₃ gu₂
ne₁, jan₂ guē'₂ tē₂le₃ gu₂ jen₅. ³⁹ Jaun₂ ca₂le₃jín₃ dsa₂ i₂qui₂ca₂ŋí₃ jui₅
jaun₂ qui₂ca₂jáu'₂ jág₁ uig₅, qui₂bí₂ dsi₅₄, ⁴⁰ ca₂juá'₂:

—'Ne₂ guē'₂ i₂juá'₂ a₂'éng'₄ guá'₅, con'₂ siá'₂ ting'₂ jmog'₅₄ táng₃
quian'₅₄ 'ni₅ jmi₄g₄, ně₃ ně₃, lion₄ 'ŋiag'₂. Sió₅ ja₁tong'₂ ně₅, chi₂jua'₂
dsón'₂ 'ne₂ líng'₅ Ja₁ŋi'₅₄ Diú₄.

⁴¹ Ján₃ bá₄ le₂jaun₂ a₂lě₁qui₂co₂jmo₃g'₂ jui₅₄ jme₂dsa₂ quian'₅₄ tē₅juá'₅,
gui'₅₄ can'₅₄ ně₃, dsia₂₃ jág₁ qui₂tsí'₅ riin'₅₄, juá'₂:

⁴² —Ca₂lióin₂ bá₄ i₂sián'₂, la₁ 'ŋiog₅ bá₄ tsá₃ lé₂ le₃lióin₂. Chi₂jua'₂ i₂ně₅
lín₅ Rag₅₄ quián₅ dsa₂ jui₂ Israel, jui₁sióin₄ cróg₄ ia₁jaun₂ bá₄ le₃'éin₂
jniog₄ le₃quió'₅. ⁴³ I₂ně₅ guē'₂ juá'₂ 'ei₅ caun₂ dsí₅ ne₄ Diú₄; ně₃ ně₃ 'éi₂
jui₁lio₅₄ chi₂jua'₂ tē₃dsón'₂ bá₄ 'nioi₃ i₂ně₅; ia₁ 'ŋiog₅ guē'₂ ma₂juá'₂ lín₅
Ja₁ŋi'₅₄ Diú₄.

⁴⁴ Le₂jio₅ dsa₂ 'ang₂ i₂le₁ton₅ quian'₅₄ Jesús qui₂ca₂juá'₂ uig₅.

Ca₂jon₃ Jesús

(Marcos 15:33-41; Lucas 23:44-49; Juan 19:28-30)

⁴⁵ Jme₁ca₂tē₂ dsi₂ŋí'₃,^l ca₂'ág₂ nei₂ le₂tan₅₄ le₂con₂ 'uē₃ jaun₂ ca₂lia'₂
ca₂tē₂ hora ŋí₁ 'ni₅^m tē₂le₃ ca₂'láu₂. ⁴⁶ Hora jaun₂, ca₂'ŋia₂ gué₄ Jesús, jág₁
ca₂juá'₂ tiá₂:

—Elí, Elí, ¿lama sabactani? —co₂'nió'₄ a₂juá'₂: Diú₄ quiáng₃, Diú₄
quiáng₃, ¿'e₂ lě₃ ma₂ně₂téi'₃ jniá₂?ⁿ

^j34 co₂'nió'₄ caun₂ mí₅ a₂ŋia'₃ uig₅ quió'₅ dsa₂.

^k35 A₂lín₅₄ chog₅₄ si₂ a₂ca₂lě₃ gué₄ cang₂ juá'₂ le₂la₂ ján₃: “Le₂ně₅ ca₂lě₃ ca₂rē₃ti₃ jág₁
a₂ca₂juá'₂ dsa₂ i₂'é₂ jág₁ quián₅ Diú₄ ma₂líg'₂, ja₁juá'₂: ‘Ca₂dsión'₂ dsa₂ ni₁tsín'₅; ca₂co₃
dsa₂ o₁ne₄ 'ein₂ lí'₂ 'mi'₂ quió₃.’” Salmo 22:18.

^l45 lit. “hora jŋéi₂.” ‘Nio'₂ ja₁ton₅ Apéndice B.

^m45 lit. “hora ŋi₃.”

ⁿ46 Salmo 22:1.

⁴⁷ I₂lin₅₄ dsa₂ i₂jme₁tion₂ cau₅ jaun₂ ca₂nág₂, jaun₂ ca₂dsia₃ jág₁ tsí'₅ riin'₅₄:

—Nei₂ 'nia'₂. Elías, i₂jme₁'é₂ jág₁ quián₅ Diú₄ ma₂líg'₂, té'₂.

⁴⁸ Jaun₂ dsi₂jui₅ le₂jaun₂ nóg₃ jan₂ co₂chi'₅₄ i₁quian₅₄ caun₂ ni₁jau₂ guion₅ jmig₂. Jaun₂ ca₂guioin₃ vino dsi'₃, jaun₂ ca₂chi₃dsí'₂ nei'₅₄ caun₂ ni₁'ma₂ ta₅, jaun₂ ca₂jén'₃ ne₄ Jesús ia₁jaun₂ jme₁'ín'₂. ⁴⁹ La₁ ca₂juá'₂ riin'₅₄:

—Tsá₃ lein'₅₄; o₁ne₄ chi₂jua'₂ jiá₃ Elías ja₃lio₅₄ quió'₅.

⁵⁰ Con'₂ bá₄ ca₂'nióg₂ gué'₄ Jesús tiá'₂ lin₃, jaun₂ gué'₄ ca₂jáng'₃ jme₂dsí'₂ quió'₅. ⁵¹ Hora jaun₂ dé'₄ dsón'₂ co₂dsia₅ ca₂chen₃ ca₂të'₂ guei'₅₄ ca₂të'₂ 'uë'₃ ca₂lë'₃ tin₃ tsín'₅ tsi'₁'mi'₂ pa₁ a₂jme₁'ei₅ dsi₂néi'₂ guá'₅ templo. 'Uë'₃ gué'₂ né'₃ ca₂i₁bi₅₄, ni₁'lau₂ a₂te₁'i₁ ja₁jaun₂ qui₂ca₂dsón'₂; ⁵² tau₂ 'nio₅ né'₃ qui₂ca₂niá'₃ ca₂lë'₃; ján₃ bá₄ qui₂ca₂jen'₅₄ juin₅ 'lag₄ jnió'₅ quián₅ Diú₄ i₂ma₂dsan₃ le₂jniá'₅. ⁵³ Qui₂ca₂'uüin₂ tau₂ 'nio₅; ca₂i₃toin'₅₄ Jerusalén ciudad jnió'₅ jme₁ca₂jen'₅₄ Jesús, ton'₂ ca₂jme₃jniai₂₃ né'₃ ne₄ juin₅ dsa₂.

⁵⁴ Jaun₂ juig₅₄ 'lióg₂ quian'₅₄ gué'₄ dsa₂ i₂jme₁quian'₅₄ jmo₂₃ 'í₁ Jesús, jme₁ma₂të'₅ ne₅₄ dsi₂bi₅₄ 'uë'₃ ma₂lë'₂ ca₂le₃jé'₃ gué'₄ 'e₂ a₂ca₂lë'₃ jaun₂, jaun₂ gué'₄ ca₂rë'₃gó'₅ 'nio₅ lin₃; jaun₂ gué'₄ ca₂juá'₂:

—Të'₃dsón'₂ bá₄ jme₁lín₄ i₂në'₅ Ja₁ni'₅₄ Diú₄.

⁵⁵ Jme₁tion'₅₄ juin₅ 'io₅₄ ja₁jaun₂ jág₅, tióin₂ uíng₂. 'Éi₂ ma₂ja₂lén₂ jme₂ti₃ ne₄ Jesús le₂tan₅₄ 'uë'₃ Galilea. ⁵⁶ Jin₄ 'io₅₄ 'éi₂ jme₁'en₅₄ María i₂chan₂ Magdala, quian'₅₄ María chog₅₄ Jacobo quian'₅₄ Sé'₄; quian'₅₄ chog₅₄ chi'₂ quián₅ Zebedeo.

Ca₂'on₃ Jesús

(Marcos 15:42-47; Lucas 23:50-56; Juan 19:38-42)

⁵⁷ Jme₁ca₂tó'₂ nei₂ jmig₄ jaun₂, guan₃ jan₂ dsa₂ cha₂ cu₄ i₂chen₂ José, i₂chan₂ juig₂ Arimatea, ia₁ ján₃ bá₄ ca₂rë'₃éin₂ le₃quió'₅ Jesús. ⁵⁸ 'Éi₂ né'₃, nei₅₄ i₂jiiin₁₂ Pilato, ca₂i₁mii'₄ 'lag₄ Jesús. Jaun₂ ca₂jmo₃ Pilato 'éi'₃ a₂jáng'₂ dsa₂. ⁵⁹ Jaun₂ né'₃ ca₂tág₃ Sé'₄, ca₂lio₃ rë'₂ quian'₅₄ caun₂ tsi'₁'mi'₂ le₁jé'₃. ⁶⁰ Jaun₂ ca₂i₁tio'₂ 'nió'₃ caun₂ tau₂ 'nio₅ 'mí'₂ quió'₅ 'niog₅, a₂jme₁ma₂guéi'₃ dso'₂ ni₁'lau₂. Jaun₂ ca₂jniói'₃ ca₂míg₂ ni₁cang₁ li'₂ pa₁, ca₂jlé'₂ 'o₄ tau₂ 'nio₅, jaun₂ gué'₄ ca₂niái'₃. ⁶¹ La₁ María i₂chan₂ Magdala quian'₅₄ María jan₂ 'éi₂, jaun₂ bá₄ jme₁tiáin'₄ të'₂le₃ ja₁jniá'₂ o₄'né'₄ tau₂ 'nio₅.

Jmo₅ 'lióg₂ 'í₁ tau₂ 'nio₅

⁶² Jme₁jnia₃ táng₃ jaun₂, co₂'nió'₄ jme₁ca₂dsan₃ tion'₅₄ dsa₂ jmo₂₃ co₂jnia₅₄ a₂'nió'₅ quió'₅ jmig₄, jaun₂ ca₂i₁len₅₄ juig₅₄ jme₂dsa₂ quian'₅₄ dsa₂ fariseos né'₃ ca₂nií'₂ ne₄ Pilato, ⁶³ ca₂i₁jua'₄:

—Gui'₅₄, dsáu'₅ dsi₅ jnia'₅₄, a₂ca₂juá'₂ të'₂jág₁ 'éi₂ lia'₂ con'₂ jme₁chain₂ gué'₄, a₂jein'₅₄ táng₃ a₂'ni₅ jmig₄. ⁶⁴ 'Uig₅₄ jaun₂, chen₅ 'lióg₂ jui₁dsi₂jmo₂ 'í₁ tau₂ 'nio₅ ca₂lia'₂ ca₂të'₂ jmig₄ 'ni₅, ia₁ con'₂ tsá₃ nóg₅ në'₁jua'₂ ja₂lén₂

dsa₂ i₂jme₁quai_{in}'₅₄ tē₂, jaun₂ táun₂ jág₁ cang₂, lé₂ le₃juá'₂:
 “Ma₂ca₂jei_n'₅₄ bá₄ táng₃.” Ia₁ nē₁jua'₂ ca₂lě₃ le₂jaun₂, ja₂lin₃ gué₄ juē'₂ lé₂
 jág₁ tē₂jág₁ jē₁ca₂tó'₂ nē₅, con'₂ gué₄ jág₁ tē₂jág₁ le₂'uig₅₄.

⁶⁵ Jaun₂ ca₂juá'₂ Pilato:

—Nē₅ tió_n₂ co₂nió'₃ i₂nē₅. O₂nó'₅ 'nia'₂ quai_{in}'₅₄, o₂jmo₄ 'nia'₂ 'í₁ 'a₂
 con'₂ jñia'₅₄ tian'₃ 'nia'₂ jmó'₂.

⁶⁶ Jaun₂ ca₂i₃lén₂ jaun₂ nē₃, i₁jmo₅₄ 'í₁ dse₃ lin₃ tau₂ 'ñio₅, ca₂tióng₃
 caun₂ sello dso'₂ ni₁cang₁ a₂chi₁jñi₅, jaun₂ ca₂chein'₃ co₂nió'₃ 'lióg₂
 i₂jmo₃ 'í₁.

Jmíg₄ a₂ca₂jen'₅₄ Jesús

(Marcos 16:1-8; Lucas 24:1-12; Juan 20:1-10)

28 ¹ Ca₂ñí₂ bá₄ jmíg₄ sa₅₄. Jaun₂ nē₃, tē₂le₃ ca₂jñia₃ jmíg₄ le₂'uig₅₄
 semana, ca₂ñe₄ María i₂chan₂ Magdala quai_{in}'₅₄ María jan₂;
 ca₂i₁lein₅₄ i₁jag₅₄ tau₂ 'ñio₅ quió'₅ Jesús. ² Con'₂ tsá₃ rē₂jáin₁ dsi₂jui₅
 le₂jaun₂ ca₂i₁bi₅₄ 'uē₃ tiá₂ lin₃ ia₁ a₂ca₂sió_n₃ guei'₅₄ i₂juíg₃ jan₂ ángel
 quián₅ Te₁gui'₅₄. Ca₂tē₁tsin'₅₄ o₄'né₄ tau₂ 'ñio₅, ca₂mói₂ ni₁cang₁
 a₂jme₁chi₁jñi₅, jaun₂ ca₂guá₂ ne₄ jaun₂. ³ Ca₂lia'₂ tág₅ 'ñio₅ lin₃ jniái₂
 jui₁lia'₂ tág₅ si₁ñí'₃. Tsin'₅₄ a₂qui'₂ guē'₂ tiog₂ jau₂ lin₃. ⁴ Jme₁ca₂jág₂
 'lióg₂ i₂tion'₅₄ jmo₅ 'í₁, ca₂rē₃gó'₅ 'ñio₅ lin₃ ca₂jlein₃ nē₂jag₄ bá₄ tsá₃ dsi₅
 chan₂ ca₂jén'₃. ⁵ Jaun₂ ca₂juá'₂ ángel ca₂tsí'₃ 'io₅₄:

—Tsá₃ jmo₂ 'nia'₂ gang'₃. Ia₁ guion₄ jniá₂ a₂'na'₂ Jesús i₂ca₂tion₃ dsa₂
 cróg₄ bá₄ 'nia'₂ i₂niog'₅₄. ⁶ Tsá₃ 'éi₂ ma₃chan₂ ja₁lá₃; ma₂ca₂jei_n'₅₄ bá₄
 táng₃ jui₁lia'₂ lé₅ ca₂juá'₂ 'ñiog₅. La₂ i₂jag₄ de'₂ 'nia'₂ ja₁jme₁rē₂quai_{in}'₂₃.
⁷ O₂nó'₅ 'nia'₂ i₂ñáu'₂ o₂chei'₅₄ chi'₂ dsi₂guia₃-tín₂ quián₅ a₂ma₂ca₂jei_n'₅₄
 táng₃ ne₄ 'mú₃; ma₂'ein₅₄ jui₅ ñó₅ jñiái₅ lia'₂ con'₂ gué₄ 'nia'₂ jui₅ Galilea.
 Ja₁jaun₂ o₁jñin'₄ 'nia'₂. Jág₁ nē₅ ma₂nē₂juíg₂ 'nia'₂.

⁸ Jaun₂ nē₃ ca₂'uin₂ 'io₅₄ i₂ñáu'₂, tē₃ ma₂gó'₅, ton'₂ jén'₅ rē'₂ 'io'₂ ján₃.
 Jaun₂ ca₂i₃lein₃ co₂chi'₅₄ i₁con₂ jág₁ ne₄ dsa₂ guia₃-tín₂. ⁹ Tē₃jē₄ i₂lein₃
 jaun₂, con'₂ tsá₃ jáin₅ ca₂jme₃jñia₅ Jesús ne₅₄, ca₂juá'₂:

—iSiang'₃!

Jaun₂ nē₃ ca₂jme₃quiái_n₃ con₂ Jesús, ca₂chi₃jné₃ ca₂jmo₃ i₁'áin₃ ca₂tē₂
 'uē₃, ca₂quí'₃ cu₅ tag₄ Jesús. ¹⁰ Jesús nē₃ ca₂juá'₂:

—Tsá₃ lē₁jmo₂ 'nia'₂ gang'₃. O₂nó'₅ 'nia'₂ o₂con₄ jág₁ ne₄ ríng'₃
 o₂chei'₅₄ 'nia'₂ jui₁dsi₂lein₅ jui₅ Galilea, jaun₂ ja₁jaun₂ jág₂ jniá₂.

Jág₁ a₂ca₂dsia₃ 'lióg₂

¹¹ Tē₁lia'₂ i₃len₃ 'io₅₄ 'éi₂ i₂con₃ jág₁, i₂lin₅₄ 'lióg₂ i₂jme₁jmo₅ 'í₁ i₃lein₃
 jē₄ juig₂ i₁con₂ jág₁ ne₄ juig₅₄ jme₂dsa₂ ca₂i₁jua'₄ ca₂le₃jé₃ 'a₂ lia'₂ niog₅
 ca₂lě₃. ¹² Juig₅₄ jme₂dsa₂ nē₃ ca₂jñi'₂ quai_n'₅₄ gui'₅₄ can'₅₄ ca₂jmo₃ jág₁,
 jaun₂ ca₂cué'₃ 'lióng₂ cu₄ 'lióg₂ 'éi₂, ¹³ ca₂juá'₂:

—Le₂la₂ dsiá'₁ 'nia'₂ juig'₅₄ dsa₂: tē₁lia'₂ jme₁rē₂güín'₃ 'nia'₂ a₂'uē₂
 ca₂dsi₃lén₂ dsa₂ i₂jme₁quai_{in}'₅₄, jaun₂ ca₂tág₃ 'lag₄. ¹⁴ Nē₁jua'₂ ca₂rē₃jñi₅

dsi₄má'₂ jág₁ ně₅, la₂ bá₄ ne₄ jnia'₅₄ 'a₂ lia'₂ jme₁'uan₅₄ dsí₅ ia₁jaun₂ tsá₃
cán'₁ 'nia'₂ o₂i₁ dsi₅. ¹⁵ Jaun₂ ca₂gue₃ bá₄ 'lióg₂ cu₄, jaun₂ le₂jaun₂ bá₄
ca₂jmo₃ con'₂ lé₅ jág₁ ca₂to'₂ dsa₂ 'éi₂. Jaun₂ le₂ně₅ bá₄ jág₁ 'ei₅
ca₂le₂con₂ le₁ŋi₅ dsa₂ judíos ca₂tě₂ jmig₄ ně₃.

Ca₂chen₃ Jesús chi'₂ dsi₂guia₃-tín₂ a₂dsi₃'ě₃ jág₁

(Marcos 16:14-18; Lucas 24:36-49; Juan 20:19-23; Hechos 1:6-8)

¹⁶ Jaun₂ ně₃ i₃len₃ bá₄ ta₁guia₃-ján₃ chi'₂ dsi₂guia₃-tín₂ jui₅ Galilea,
ca₂i₃lén₂ ja₁lé₄ caun₂ má'₂, lia'₂ con'₂ lé₅ ma₂ca₂juá'₂ Jesús le₂ŋiá₅.

¹⁷ Jaun₂ dsi₂jui₅ jme₁ca₂jín₂ Jesús, ca₂chi₃jnë₃ ca₂jmo₃ i₁'áin₃, la₁ i₂lín₅₄
ně₃ tsá₃ caun₂ jme₁ma₂le₁'ág₄ dsí₅. ¹⁸ Jaun₂ ca₂jme₃quián₂ Jesús ja₁tióin₂,
jaun₂ ca₂juá'₂:

—Ca₂le₃jě₃ bí₂ 'éi'₃ lia'₂ guei'₅₄ i₂juíg₃ lia'₂ ne₄ gua'₅₄ 'uě₃ ně₃
ma₂ca₂ŋig₂. ¹⁹ Jaun₂ lě₃, o₂nó'₅ 'nia'₂ ně₃ ca₂le₂con₂ mi₂güíg₃, o₂jme₁tín₅
'nia'₂ dsa₂ a₂lén₂ dsa₂ quiáng₃, o₂qui₂o₂chon₄ 'nia'₂ dsa₂ jmig₂, lia'₂
con'₂ lé₅ 'éi'₃ quió'₅ Ŋe'₃, quian'₅₄ lia'₂ con'₂ lé₅ 'éi'₃ quió'₅ Ja₁ŋi'₅₄,^o
quian'₅₄ lia'₂ con'₂ lé₅ 'éi'₃ quió'₅ Jme₂dsí₂ Jŋi₅, ²⁰ o₂jme₁tín₅ 'nia'₂
a₂nag₃ gau₂ ca₂le₃jě₃ 'éi'₃ a₂ma₂cuě₃ jniá₂ 'nia'₂. Jaun₂ ŋi'₅₄ 'nia'₂ ně₃, la₂
bá₄ 'eng₅₄ quian'₅₄ 'nia'₂ ca₂le₃jě₃ jmig₄, ca₂lia'₂ ca₂'ŋia₅ jmig₄ jě₁ca₂tó'₂.
Co₂ně₅.

^o19 'Nio'₂ ja₁ton₅ Romanos 6:3; 1 Corintios 1:13; Gálatas 3:27.